

Primary 1

Siak ket Anak ti Dios
Nursery ken agtawen 3

Primary 1

Siak ket Anak ti Dios

Para iti panangisuro kadagiti ubbing nga agtawen 18 a bulan agingga iti 3 a tawen, a pakaibilangan dagiti singasing para iti panangibagay iti pagbasaan nga usaren iti nursery.

© 2006 ti Intellectual Reserve, Inc.
Nailatang amin a karbengan
Naimaldit iti Estados Unidos ti America
Pannakaanamongna iti Ingles: 5/00
Pannakaipatarus ti Primary 1
Pannakaipatarus ti *Primary 1: I Am a Child of God*
Ilokano

Dagiti Linaonna

Dagiti Tulong para iti Mannursuro

Panid

Panangisuro iti Daytoy a Pagbasaan	vi
Ti Klase ti Agtawen iti Tallo	vi
Panangisagana kadagiti Adalen	viii
Panangisuro kadagiti Adalen	ix
Musika iti Siled ti Klase	ix
Dagiti Pangtulong a Ladawan	x
Dagiti Naisangsangayan a Pangiwanwan iti Panangiraman kadagiti Ubbing nga Addaan Pagkurangan	xi
Panangibagay iti Pagbasaan nga Usaren iti Nursery	xiii
Ti Klase ti Nursery	xiii
Panangisagana kadagiti Ubbing para iti Nursery	xv
Tseklist dagiti Nagannak	xvi
Kababalin dagiti Babassit nga Ubbing	xvii
Dagiti Mabalina a Parikut ken Pangrisut iti Nursery	xviii
Dagiti Aktibidad ken Ay-ayam para iti Nursery	xix
Musika iti Siled ti Klase ti Nursery	xxiv
Pagarigan dagiti Naibagay nga Adalen	xxvii

Bilang ken Paulo ti Adalen

Panid

1 Siak ket Anak ti Dios	1
2 Adda Bagi ti Nailangitan nga Ama	5
3 Ti Plano ti Nailangitan nga Ama para Kadatayo	8
4 Makapagkararagak iti Nailangitan nga Ama	13
5 Anak ti Nailangitan nga Ama Ni Jesucristo	17
6 Ay-ayatennak ti Nailangitan nga Ama ken ni Jesucristo	20
7 Tultulongannak ti Espiritu Santo	26
8 Agyamanak iti Aldaw ken iti Rabii	30
9 Agyamanak iti Danum	34
10 Agyamanak kadagiti Kaykayo, Mulmula, ken Sabsabong	38

11	Agyamanak iti Ikan	42
12	Agyamanak kadagiti Ayup	48
13	Agyamanak kadagiti Tumatayab ken Insekto	52
14	Naparsua da Adan ken Eva iti Ladawan ti Nailangitan nga Ama	58
15	Aldaw a Panagdaydayaw Ti Sabbath	62
16	Addaanak iti Bagi	67
17	Agyamanak kadagiti Imak	72
18	Agyamanak kadagiti Lapayagko	78
19	Agyamanak kadagiti Matak	83
20	Agyamanak ta Makaangot ken Makaramanak	87
21	Addaanak iti Rikna	91
22	Makaaramidak iti Adu a Banag	97
23	Kamengak ti Maysa a Pamilia	101
24	Ay-ayatek dagiti Kakabsatko	106
25	Ay-ayatek ti Sibubukel a Pamilyak	111
26	Makapagdedenna dagiti Pamilia iti Agnanayon	115
27	Makapagkararagtayo Kas Maysa a Pamilia	121
28	Makapagbalinak a Managtungpal	125
29	Mabalinko a Sawen ti Ladingitek	130
30	Mabalinko a Pakawanan dagiti Dadduma	135
31	Agyamanak iti Pagtaengak	139
32	Agyamanak iti Taraon ken Lupot	143
33	Makapagbalinak a Maysa a Gyyem	147
34	Mabalinko nga Ayaten dagiti Dadduma	152
35	Makapagbalinak a Naasi kadagiti Ayup	157
36	Makapagbalinak a Nasayaat a Pagwadan	162
37	Makapagbalinak a Napudno	167
38	Makapagbalinak a Managraem	171
39	Maparagsagnak ti Musika	176
40	Tultulongannak ti Sakramento a Mangpanunot ken ni Jesus	180
41	Inikkannatayo ti Nailangitan nga Ama ken ni Jesus kadagiti Nasantuan a Kasuratan	184
42	Kamengak ti Ti Simbaan ni Jesucristo dagiti Santo iti Ud-udina nga Aldaw	189
43	Addaantayo iti Maysa a Sibibiag a Propeta	194
44	Makatulongtayo Amin iti Simbaan	198

45	Ti Panagungar ni Jesucristo (Paskua ti Panagungar)	202
46	Ti Pannakayanak ni Jesucristo (Paskua)	207
47	Indeks kadagiti Aktibidad a Berso ken Kanta nga Adda Aksionna iti Primary 1	211
48	Dagiti Kanta para iti Nursery Manipud iti <i>Children's Songbook</i>	213

Panangisuro iti Daytoy a Pagbasaan

Naglaon daytoy a pagbasaan kadagiti adalen para iti panangisuro kadagiti ubbing nga agtawen iti tallo no dumteng ti maika-1 ti Enero. Mabalin met nga ibagay dagiti mannursuro ti pagbasaan tapno mausar para kadagiti ubbing nga agtawen iti 18 a bulan agingga iti agtawen iti tallo. No adda dagiti ubbing nga awan pay tallo-ti-tawenda a dumardar-ay iti Primary, nasken nga addada iti klase ti nursery a maisina kadagiti agtawen iti tallo malaksid no bassit unay ti ward wenno branch. No nasursurok ngem walo wenno sangapulo nga ubbing nga agkakatawen iti maysa a ward wenno branch, mabalin a guduaen ti klase.

Nasken a kitaen dagiti mannursuro iti ubbing a nursery ti “Panangibagay iti Pagbasaan nga Usaren iti Nursery,” a mangrugi iti panid xiii kas mainayon iti daytoy a benneg.

Nasken a sikakararag nga ikeddeng dagiti dadaulo ken mannursuro no kasano ti kasayaatan a panangbukel kadagiti klase ken panangusar kadagiti adalen ken aktibidad iti daytoy a pagbasaan tapno maipaay ti kasapulan dagiti ubbing iti ward wenno branchda.

Ti Klase ti Agtawen iti Tallo

Dagiti ubbing nga agtallo ti tawenda no dumteng ti maika-1 ti Enero ket adda iti klase dagiti agtawen iti tallo.

Panggep

Ti panggep ti klase ti agtawen iti tallo ket tapno tulongan dagiti ubbing a maaddaan iti pannakaawat ken ayat iti Nailangitan nga Ama ken ni Jesucristo, makiraman kadagiti napipintas a padas iti Primary, ken dumakkel nga addaan rikna iti panangipateg iti bagi.

Kararag

Nasken a mairugi ken maigibus ti tunggal oras ti klase iti maysa a kararag ti maysa nga ubing. Gagangay nga adda ti pangrugian a kararag iti rugi ti oras ti klase, ken adda ti panggibus a kararag iti leppas ti klase. Sursuruam dagiti ubbing a mangted kadagiti ababa ken simple a kararag. Tulongam ida no kasapulan.

Iskediul ti Oras

Mangilatang daytoy a klase iti in-inut a panagbalbaliw manipud iti klase ti nursery a mapan iti regular a Primary. Kabayatan ti umuna a paset ti tawen, mabalin a makaay-ayo para kadagiti agtawen iti tallo a maaddaan iti oras ti panagbibinninglay ken aktibidad iti bukodda a siled ti klase. Kabayatan ti nabati pay a paset ti tawen, mabalin a dumar-ayda iti oras ti panagbibinninglay a kaduada dagiti daduma pay nga ubbing iti Primary. Ti kaadda ti umdas a kapanunotan dagiti ubbing iti klase ti mangikeddengto no kaano nga agaramid ti klase iti panagbalbaliw. Siputan dagiti ubbing tapno makita no nakasaganadan, ken makiuman iti pangu-

luen ti Primary tapno maammuan no kaano a nasken nga aramiden ti panagbalbaliw. Mabalín a dumar-ay dagiti agtawen iti tallo kadagiti pangrugí ken panggibus nga aramiden a kadua dagiti dadduma pay nga ubbing iti Primary bayat ti sibubukel a tawen.

Gagangay nga agpaut ti Primary iti 1 nga oras ken 40 a minuto. Agpaut dagiti pangrugian ken panggibus nga aramiden iti 20 a minuto, nga addaan 5 a minuto para kadagiti ubbing tapno mapan kadagiti siled ti klaseda. No ang-angayen dagiti agtawen iti tallo ti oras ti panagbibinninglay iti bukodda a siled ti klase, 75 a minuto ti oras ti klaseda. Mabalín a maibagay ti sumaganad a naisingasing nga iskediul a mayannurot kadagiti lokal a kasapulan:

Oras ti Panagkablaaw:	10–15 a minuto
Oras ti Adalen:	25–30 a minuto
Oras ti Panagbibinninglay ken Aktibidad:	20–25 a minuto
Oras ti Panangigibus:	10–15 a minuto

No dumar-ay dagiti agtawen iti tallo iti oras ti panagbibinninglay a kadua dagiti dadduma pay iti Primary, agpaut ti oras ti klase iti 40 a minuto ken buklen ti oras ti adalen ken ab-ababa nga oras ti panagkablaaw ken panangigibus.

Oras ti Panagkablaaw: Ti panggep ti oras ti panagkablaaw ket mangipalubos kadagiti ubbing nga agsarita ken makilangen iti mannursuro ken iti tunggal maysa iti saan a pormal nga aglawlaw. Marikna dagiti ubbing a nataltalged ken nasaysayaat iti kaaddada iti Primary no nawayada nga aggaraw iti aglawlaw kabayatan daytoy nga oras.

Tulongam ti tunggal ubing a makarikna a siraragsak a mapasangbay ken naginawa iti klase. Ipakitam ti ayat, napudno a pannakigayyem, ken respeto babaen kadagiti balikas ken tignaymo. Ilawlawagmo dagiti kasapulan ken paggugusto dagiti ubbing. Mabalín nga iraman dagiti maikanatad a topiko ti paglilinnawagan:

- Dagiti kallabes a padas iti biag dagiti ubbing, kas iti maysa a kayyanak a maladaga iti pagtaengan wenna maysa a panagpasiar ti pamilia.
- Dagiti naisangsangayan a piesta opisial.
- Ti panawen.
- Dagiti mapalpaliw iti aglawlaw.
- Dagiti paglaingan iti pannakilangen kas iti panagdengngeg, panagiburay wenna panangusar kadagiti nasayaat a kababalin.
- Dagiti aramid ti kinaimbag.

Mabalín met a makatulong dagiti ababa a daniw a kagiddan ti garaw ti ima wenna ramay, panagwatwat ken panagunnat, ken mabalín pay nga usaren dagiti kankanta kabayatan daytoy nga oras tapno makatulong kadagiti ubbing a mangpampek iti saanda a pannakaidna.

Oras ti Adalen: Surotem ti sapaasap a balabala ti tunggal adalen, nga ibagay daytoy no kasapulan para iti klasem. Ipamaysam iti pannakaawat ken ti paggugusto dagiti ubbing. Piliem dagiti estoria ken aktibidad a kasayaatan a mangisuro kadagiti miembro ti klasem kadagiti napapateg a pagbatayan ti adalen. Mangpili manipud iti benneg ti “Dagiti Pangpadur-as nga Aktibidad” iti ania man nga aktibidad a mariknam nga epektibo ken makaay-ayo kadagiti ubbing iti klasem. Usarem dagitoy nga aktibidad iti kanito a kayatmo kabayatan ti adalen. Makasursuro a naimbag dagiti ubbing babaen ti panangulit-ulit, isu a mabalín a kayatmo nga usaren ti isu

met laeng nga aktibidad, kanta, estoria, wenno nasantuan a kasuratan iti mamin-
adu ngem maminsan bayat ti adalen wenno kadagiti sumaruno nga adalen.

Isumrom dagiti adalen segun iti urnos, malaksid kadagiti adalen 45 ken 46 (Paskua
ti Panagungar ken Paskua).

Oras ti Panagbibinninglay ken Aktibidad: No adda oras ti panagbibinninglay dagiti
ubbing iti klase imbes a kadua dagiti dadduma pay nga ubbing iti Primary, usarem
dagiti aktibidad kadagiti adalen ken kadagiti benneg ti “Dagiti Pangpadur-as nga
Aktibidad” para iti oras ti panagbibinninglay. Mabalina a kayatmo nga uliten dagiti
paggugusto nga aktibidad dagiti ubbing manipud kadagiti kallabes nga adalen.
Iramanmo ti oras para iti panangkanta kadagiti kanta ti Primary (kitaen iti “Musika
iti Siled ti Klase,” p. ix). Allukoyem dagiti ubbing a makiraman ken mangisarita mai-
papan iti kapanunotanda iti tunggal maysa.

Kalpasan ti panangirugi dagiti agtawen iti tallo ti idadar-ay iti oras ti panagbibin-
ninglay a kadua dagiti dadduma pay nga ubbing iti Primary, mabalina a sagpa-
minsan a kiddawen kadakuada a mangtedda iti idatag iti oras ti panagbibinninglay.
Mangplanoka iti simple a panangidatag iti ebanghelio a mangiraman iti amin nga
ubbing iti klase. Mabalina a:

- Tulongan dagiti ubbing a mangyakem iti maysa nga estoria wenno kasasaad
manipud iti maysa kadagiti adalen.
- Pausar kadagiti ubbing dagiti ladawan tapno mangtulong kadakuada a
mangisarita iti estoria manipud iti maysa kadagiti adalen.
- Paisarita iti tunggal ubing ti maysa a nasantuan a kasuratan wenno kapanunotan
maipapan iti maysa a pagbatayan ti ebanghelio.
- Pagkantaen dagiti ubbing iti maysa a kanta maipapan iti pagbatayan a
maisursuro.

Oras ti Panangigibus: Subliem nga adalen ken gupgopem dagiti kangrunaan a
kapanunotan ti adalen. Ipangpangrunam a dakamaten ti maysa wenno dua nga
ababa a binatang iti nasantuan a kasuratan manipud iti adalen, ket yunay-unay dagiti
kangrunaan a kapanunotan tapno maisarita dagiti ubbing ti maipapan kadagitoy iti
pagtaengan. Mangawiska iti maysa nga ubing a mangted iti panggibus a kararag.

Panangisagana Kadagiti Adalen

Ti umuna a kapatgan a banag a laglagipen wenno aramiden tapno naballigian a
maisuro dagiti babassita nga ubbing ket isu ti panangam-ammo ken panangayat
kadakuada. Ammuken ken usarem ti nagnagan dagiti miembro ti klasem no kasari-
tam ida. Mismo a makilangenka kadakuada ket adalem ti maipapan iti biagda.
Agsapulka kadagiti wagas a panangiramanmo kadakuada kadagiti adalen ken
tapno maaramid dagiti adalen nga adda pakainaiganda wenno maipakat kada-
kuada. Ipakitam ti maitutop nga ayat ken pannakaay-ayo iti amin nga ubbing iti
klasem.

Ti maikadua a kapatgan a banag a laglagipen ken aramiden iti naballigian a pana-
ngisuro ket ti agsagana. Rugiam a nasapsapa ti panangisagana iti tunggal adalen
iti uray maminsan ti makalawas. Basaem a sibubukel ti adalen; kalpasanna sikaka-
rarag nga adalem daytoy tapno maammuam ti kasayaatan a wagas a panangisuro
iti pagbatayan kadagiti ubbing iti klasem. Mangpilika kadagiti pangpadur-as nga
aktibidad a pangnayon kadagiti aktibidad iti adalen a mangpatalinaed kadagiti
ubbing nga interesado ken makiraman. Agplano kadagiti sumagmamano nga

aktibidad, ket kalpasanna agsaganaka a mangbalbaliw no kasano wenno kaano nga usarem dagitoy bayat ti adalen tapno mapatgan ti kasapulan dagiti ubbing. Ammuem a naimbag ti adalen tapno saanmo a kasapulan ti agbasa manipud iti pagbasaan. Pagtalinaedem a nakaperrengka kadagiti ubbing agingga a mabalin. Agkararagka a masansan bayat ti panangisaganam iti tunggal adalen, ket agkali-kagumka a maaddaanka iti Espiritu a mangtarabay kenka bayat ti panagsaganam ken panangisurom.

Panangisuro Kadagiti Adalen

Bayat ti panangisurom kadagiti ubbing kadagiti pagbatayan ti ebanghelio, nasken nga allukoyem ti ayat dagiti ubbing iti ebanghelio. Dagiti sumaganad a singasing ket makatulong kenka a mangaramid iti Primary a makaay-ayo kadagiti ubbing iti klasem:

- Ikkam dagiti ubbing iti adu a gundaway nga agsarita ken makiraman.
- Dumngegka no agsarsarita dagiti ubbing, ket ikarigatam a sungbatan iti nasayaat ngem maikanatad.
- Agbalinka a naregget. No kaay-ayo ti mannursuro ti Primary, kaay-ayonto dagiti ubbing ti Primary.
- Agsaritaka iti naayat a timek.
- Agbalinka a naanus, naasi, ken managayat, nangnangruna no nabannog wenno saan a makaidna dagiti ubbing.
- Mangtedka iti nasayaat a pammadayaw iti napintas nga ugali ti ubing ket saanmo nga ikankano ti madi nga ugalina agingga a mabalin.
- Mangisaganaka iti sumagmamano kadagiti aktibidad ket agsaganaka a mangbalbaliw no kasano wenno kaano nga usarem dagitoy bayat ti adalen tapno mapatgan ti kasapulan dagiti ubbing. Ababa laeng ti oras ti panangipamaysa wenno idedengngeg dagiti ubbing iti maysa a banag ket kasapulanda ti masansan a panaggaraw.
- Ikarigatam nga iturong wenno baliwan ti imatang ti ubbing iti maysa a banag no adda dagiti di pagkikinnaawatan.
- Laglagipem a kaay-ayo dagiti babassit nga ubbing dagiti estoria, pangtulong a ladawan, musika, ken panaggaraw. Kaay-ayoda dagiti kanayon a panangdag-dagullit kadagiti aktibidad ken kanta, nangruna kadagitay ammoda unay nga aramiden ken kantaen.

Musika iti Siled ti Klase

Nairaman dagiti kanta iti tunggal adalen iti daytoy a pagbasaan tapno tumulong a mangpapigsa kadagiti pannursuro iti ebanghelio. Saan a nasken a nalaingka a kumakanta tapno maaramid a naragsak ken napnuan kaipapanan ti panagkanta iti siled a pagklasean. Saan a maammuan dagiti ubbing no nalaingka man nga agkanta wenno saan; maammuandanto laeng a kaay-ayom ti panagkanta. Sursuruem a naimbag ti tunggal kanta, ket sursuruem daytoy kas paset ti panangisaganam iti adalen. No adda a magun-od, ti *Children's Songbook*, nga adda iti audiocassettes (musika/balikas ken musika, 52538) ket makatulong kenka a mangsursuro kadagiti kanta. Mabalinmo pay nga usaren dagitoy a rekording bayat ti panagkantayo iti siled ti klase.

Ti maul-ulit a panangkanta ti kasayaatan a wagas a panangisuro kadagiti kanta kadagiti ubbing. Mabalnmo nga usaren ti isu met la a kanta iti sumagmamano a gundaway bayat ti adalen. Makatulong dagiti simple a panaggaraw a mangiraman kadagiti babassit nga ubbing iti maysa a kanta. No ammo dagiti ubbing a naimbag ti kanta ket kaay-ayoda ti panangkanta iti daytoy, kantaenyo daytoy a masansan bayat ti oras ti adalen wenno iti oras ti panagbibinninglay ken aktibidad.

Tapno makaisuro iti maysa a baro a berso ti kanta wenno aktibidad kadagiti ubbing:

- Yulom ti berso ti kanta wenno aktibidad sakbay ti klase.
- Yam-ammom ti baro a berso ti kanta wenno aktibidad babaen ti panangkanta wenno panangisao iti daytoy kadagiti ubbing. Nayonam dagiti garaw, no adda man.
- Awisem dagiti ubbing a mangkanta wenno mangisao kadagiti balikas a kagiddandaka. Didanto ammo a dagus dagiti balikas, ngem no ulitem ti berso ti kanta wenno aktibidad iti sumagmamano a gundaway, masursurodanto dagiti balikas.
- In-innayadem tapno maawatan dagiti ubbing dagiti balikas ken garaw.
- Agusarka kadagiti pangtulong a ladawan sagpaminsan tapno makatulong a mangidatag iti berso ti kanta wenno aktibidad. Dumngeg dagiti ubbing ket makasursuroda a nasaysayaat no adda maysa a banag a kitkitaenda.
- Yababa ti berso ti kanta wenno aktibidad no agbalin a di makatalna dagiti ubbing. No atiddog ti berso ti kanta wenno aktibidad, mabalnmo a tulongan dagiti ubbing iti panaggaraw bayat ti panangkantam wenno panangisaom kadagiti balikas a siksika.

Saanto a kanayon a kayat dagiti ubbing ti agkanta a kagiddandaka ngem kaay-ayodanto ti pannakiraman babaen ti panangdengngeg iti panangkanta.

Dagiti Pangtulong a Ladawan

Napateg dagiti pangtulong a ladawan iti panangisuro kadagiti babassit nga ubbing. Dagiti ladawan, nagegetteng a ladawan, banag, ken dadduma pay a pangtulong a ladawan ket makaala ken makapagpatalinaed iti imatang dagiti ubbing, a mangtulong kadagiti ubbing a manglagip no ania ti isursurom.

Dagiti ladawan ken nagegetteng a ladawan a naidawat nga usarem kadagiti adalen ket nairaman iti pagbasaan. Ti benneg ti “Panagsagana” iti tunggal adalen ket nakalista dagiti ladawan nga usaren iti dayta nga adalen babaen ti paulo ken bilang. Dagiti bilang iti panaklong ti mangilasin iti tunggal ladawan (wenno kapada daytoy) iti Pakete ti Ladawan ti Arte ti Ebanghelio (34730 864) ken iti biblioteka ti balay a pagtataripnongan. Nailista pay iti benneg ti “Panagsagana” ti tunggal nagegetteng a ladawan babaen iti bilang daytoy iti pagbasaan ken babaen ti Primary Visual Aids Cut-outs (33239–33250 wenno 08456) a pakairamanan dagiti isu met laeng a nagegetteng a ladawan.

Nasayaat a pangtulong a ladawan dagiti banag, nangruna no familiar dagitoy a banag a mabaln a sagiden wenno igganan dagiti ubbing. No mangisaritaka iti estoria iti nasantuan a kasuratan, usarem dagiti bukodmo a nasantuan a kasuratan wenno dagiti nasantuan a kasuratan a naggapu manipud iti biblioteka ti balay a pagtataripnongan kas pangtulong a ladawan.

**Dagiti
Naisangsangayan
a Pangiwanwan
iti Panangiraman
Kadagiti Ubbing
nga Addaan
Pagkurangan**

1. Ti Mangisalakana ti nangipakita iti pagwadan kadatayo iti pannakarikna iti panangngaasi kadagiti tao nga addaan pagkurangan. Idi sarungkaranna dagiti Nephite kalpaskan ti Panagungarna, kinunana:

“Adda kadi masakit kadakayo? Yasidegyo ida. Adda kadi kadakayo lugpi wenno busek, wenno pilay, wenno pukol, wenno agkukutel, wenno napakapsutan, wenno umel, wenno marigatan iti uray ania a kita? Yasidegyo ida ta agasak, gapu ta adda asik kadakayo” (3 Nephi 17:7).

Kas maysa a mannursuro iti Primary addaka iti kasayaatan a kasasaad tapno mangipakitaka iti panangngaasi. Nupay mabalin a saanka a nasanay tapno mangted iti propesional a tulong, kas maysa a mannursuro maawatam ken matulongam dagiti ubbing nga addaan pagkurangan a makaadal ken dumakkel iti kinaespirituanda. Kasapulan ti panangisakit, pannakaawat, ken tarigagay a mangibilang iti tunggal miembro ti klase kadagiti aktibidad iti pannakasursuro.

Mabalin a sagiden ti Espiritu dagiti ubbing nga addaan pagkurangan ania man ti tukad ti panagawatda. Nupay mabalin a saan a kabaelan ti sumagmamano nga ubbing ti dumar-ay iti sibubukel nga oras ti Primary, nasken nga addaanda iti gundaway a dumar-ay uray mabiit laeng tapno mariknada ti Espiritu. Mabalin a kasapulan ti ubbing ti kadkaduana nga alisto a makarikna kadagiti kasapulanna bayat ti kaaddana iti Primary no kas pagarigan ta kasapulan ti ubbing ti umadayo manipud iti sibubukel a ragup.

Mabalin nga adda pagrigatan ti sumagmamano a miembro ti klase kas kadagiti pagkurangan iti panagsursuro, kaawan ti panagkita wenno panagdengngeg, dipelesia iti panunot, parikut iti pagsasao wenno panagsao, parikut iti ugali ken panakilangen, sakit iti panagpanunot, parikut iti panaggaraw ken panagkuti, wenno dagiti nabayagen a parikut iti salun-at. Sumagmamano ti makatakuat a saan a familiar ken narigat ti pagsasao wenno kultura, pagilian wenno purok a pagnanae-danda. Ania man dagiti a kasasaad ti tunggal maysa, agpapada dagiti kasapulan ti tunggal ubbing tapno maipateg ken maawat, masuruan iti ebanghelio, marikna ti Espiritu, ken makiraman a sibaballigan, ken agserbi kadagiti sabali.

Makatulong kenka dagitoy a pangiwanwan iti panangisuro iti maysa nga ubbing nga addaan pagkurangan:

- Saanmo nga ikankano ti pagkurangan ket kaam-ammom ti ubbing. Agbalinka a natural, mannakigayyem, ket managayat.
- Ammuem ti maipapan kadagiti naipangpangruna a pagpigsaan ken pakarikutan ti ubbing.
- Aramidem ti amin a kabaalam a mangisuro ken mangipalagip kadagiti miembro ti klase maipapan iti pagrebbenganda a mangrespeto iti tunggal miembro ti klase. Ti panangtulong iti maysa a miembro ti klase nga addaan iti pagkurangan ket mabalin a maysa a nakristianuan a padas iti panagsursuro para iti sibubukel a klase.

- Sapulem dagiti kasayaatan a pamuspusan iti panangisuro iti ubing babaen ti panangyuman kadagiti nagannak, iti dadduma pay a kameng ti pamilia, ken no maikanatad, iti ubing.
- Sakbay ti panangawag iti maysa nga ubing nga addaan pagkurangan tapno agkararag wenno uray kaskasano makiraman, damagem no ania ti marikriknana maipapan iti pannakiramanna iti klase. Yunay-unaymo dagiti kabaelan ken talento ti tunggal ubing ket agsapulka kadagiti wagas tapno mabalin a makiraman a sinanam-ay ken sibaballigian ti tunggal maysa.
- Ibagaymo dagiti kasapulan iti adalen ken dagiti makita ken masagid iti aglawlaw tapno mapatgan ti kasapulan dagiti ubbing nga addaan pagkurangan.

Panangibagay iti Pagbasaan nga Usaren iti Nursery

Ti Klase ti Nursery **Asino dagiti Dumar-ay**

Dagiti ubbing nga agtawen iti 18 a bulan ngem saan pay nga agtawen iti 3 iti maika-1 ti Enero ket mabalin a dumar-ay iti nursery a mayannurot iti pangngeddeng dagiti nagannak kadakuada. Nasken a mangawag iti uray dua laeng a mannursuro para iti tunggal klase ti nursery. No saan nga agassawa dagiti mannursuro, nasken nga agpadada a lallaki wenno agpadada a babbai. Nasken nga agpada nga adda dagiti mannursuro iti klase kabayatan iti sibubukel nga oras ti Primary.

Panggep

Ti panggep ti klase ti nursery ket mangipaay iti naayat, natalged, naurnos a lugar a pakapadur-asan dagiti babassit nga ubbing iti pannakaawat ken panagayatda iti Nailangitan nga Ama ken ni Jesucristo, maaddaanda kadagiti napipintas a padas iti aglawlaw ti Simbaan, ken dumakkelda nga addaan iti rikna ti pamateg iti bagi. Ti klase ti nursery ti umuna a padas iti Simbaan a pagsursuruan dagiti kababassitan nga ubbing iti ebanghelio ken pakipulapolanda kadagiti dadduma pay nga ubbing ken nataengan.

Pisikal nga Aglawlaw

Nasken a nadalus, makaay-ayo, ken makaawis ti siled ti nursery ket no mabalin adda iti asideg ti maysa a pagisbuan. Mabalin a pagguduaen ti siled ti nursery iti nagsisina a paset para iti panagay-ayam (iti alpombra wenno ikamen, no mabalin), para iti panagbasa wenno aktibidad, ken panangted iti adalen. Nasken a nadalus, natalged, ken saan a perdi dagiti ay-ayam. Nasken a saan nga usaren dagiti ubbing dagiti ay-ayam a maulida.

Iskediul iti Oras

Gagangay nga agpaut ti klase ti nursery iti 1 nga oras ken 40 a minuto. Nasken a mapaggudua daytoy nga oras iti nadumaduma a paset, tunggal maysa ket mangpatibker iti panggep ti adalen.

Padasem a planuen dagiti adalen a mangsuot iti maymaysa a pormat iti linawas. Marikna dagiti ubbing ti talged no adda kanayon nga aramiden ken pamiliar a panagbalbaliw manipud iti maysa nga aktibidad a mapan iti sabali. Mabalin nga ibagay dagiti sumaganad a naisingasing a pormat a mayannurot kadagiti lokal a kasapulan:

Panagkabraaw	
Oras ti Panagay-ayam:	35 minuto
Oras ti Panagummong:	10 minuto
Oras ti Musika:	10 minuto
Oras ti Panagmerienda:	10 minuto
Oras ti Adalen:	10 minuto
Oras ti Aktibidad:	15 minuto
Panangigibus:	10 minuto

Saan a mapan dagiti ubbing iti nursery iti oras ti panagbibinninglay wenno kadagiti pangrugi wenno panggibus nga aramiden.

Panagkabilaaw: Bayat ti isasangpet dagiti ubbing iti klase ti nursery, kabilaawam ti tunggal maysa babaen iti naganna. Tulongam ti tunggal ubing a mangrikna iti ayatmo ken ti ayat ti Nailangitan nga Ama. Makaparnuay ti nalanay a musika iti naraem, makaawis nga aglawlaw.

Oras ti Panagay-ayam: Palubosam dagiti ubbing a nawaya a makapagay-ayam kadagiti ay-ayam, sinniriban [puzzle], ladawan wenno libro. Allukoyen ti tunggal ubing a pumili iti maysa laeng a banag tapno ay-ayamen ken isublina daytoy iti umisu a pagidulian sakbay ti panangpili iti maysa manen. Saan a piliten ti maysa nga ubing a mangipabulod no saanna a kayat. Adu dagiti ubbing iti kastoy nga edad ti saan a nakasagana a mangipeksa iti rikriknaenda wenno makilangen. Addaka para kadagiti ubbing, ngem saanka a makibiang unay iti panagay-ayamda. Iti gibus ti oras ti panagay-ayam, tulongam dagiti ubbing a mangidulin kadagiti ay-ayam.

Mabalin nga aramiden dagiti masinunuo nga aktibidad kabayatan daytoy nga oras (kitaen iti “Dagiti Aktibidad ken Ay-ayam para iti Nursery,” xix–xxiv, ngem nasken a saan a piliten dagiti ubbing a makiraman.

Oras ti Panaguummong: Ummongem dagiti ubbing tapno agkanta ket agsagana nga agkararag. Mangawiska iti maysa nga ubing nga agkararag. Suruam dagiti ubbing a mangted iti ababa ken simple a kararag. Tulongam ida no kasapulan. Kalpasan ti kararag awisem dagiti ubbing nga agsarita ken makilangen kadagiti mannursuro ken iti tunggal maysa iti saan a gagangay nga aglawlaw. Ipakitam ti ayat, pamateg, ken respeto babaen dagiti balikas ken tignaymo. Agbalinka a managrikna ken mannakibagay. Ilawlawagmo dagiti kasapulan ken paggugusto dagiti ubbing. Dagiti maikanatad a topiko ti paglilinnawagan ket mabalin a mairaman:

- Dagiti kallabes a padas iti biag dagiti ubbing, kas iti maysa a kayyanak a maladaga iti pagtaengan wenno maysa a panagpasiar ti pamilia.
- Dagiti naisangsayan a piesta opisial.
- Ti panawen.
- Dagiti mapalpaliw iti aglawlaw.
- Dagiti paglaingan iti pannakilangen kas iti panagdengngeg, panagiburay, wenno panangusar kadagiti nasayaat a kababalin.
- Dagiti aramid ti kinaimbag.

Mabalin met a mausar dagiti berso ti aktibidad, panagwatwat ken panagunnat, ken kankanta kabayatan daytoy nga oras tapno makatulong kadagiti ubbing a mangpamek iti saanda a pannakaidna.

Oras ti Musika: Mabalin nga usaren ti musika iti unos ti klase ti nursery tapno mangparnuay iti naragsak, makaay-ayo nga aglawlaw; mangisuro iti mensahe ti ebanghelio; ken mangipalubos kadagiti ubbing a mangaramid iti sabali a banag (kitaen iti “Musika iti Klase ti Nursery,” xxiv–xxvi). Kaay-ayo dagiti ubbing ti panagkanta kadagiti isu met la a kanta iti linawas. Mabalin a maawis dagiti dadduma tapno tumulong iti musika iti nursery.

Oras ti Panagmerienda: Ikeddeng ti oras ti panagmerienda tapno maipaay ti kasapulán dagiti ubbing. Nasken nga aggapu ti kuarta a para merienda iti badyet ti Primary. Gapu ta adda merienda dagiti ubbing iti tunggal lawas iti nursery, nasken a damagen dagiti mannursuro kadagiti nagannak no adda dagiti makan a saan a kayat a kanen dagiti annakda. Sakbay ti panangiserbi kadagiti merienda, tulongan ti maysa nga ubing a mangisao iti bendision iti taraon.

Oras ti Adalen: Naisurat dagiti adalen iti daytoy a pagbasaan iti tukad ti agtawen iti tallo, ngem adu nga aktibidad kadagiti adalen ken kadagiti benneg ti aktibidad a mangpadur-as iti pannakaammo ti maibagay para kadagiti babassit nga ubbing. Naglaon pay ti tunggal adalen iti benneg ti “Dagiti Pangnayon nga Aktibidad para kadagiti Babbabassit nga Ubbing.” (Kitaen a dagiti banag a kasapulán ken panagsagana a masapul para kadagiti pangnayon nga aktibidad ket *saan* a nakalista iti benneg a “Panagsagana” ti tunggal adalen. Basaem a nasayaat ti panangiladawan iti tunggal aktibidad a kayatmo nga usaren tapno masiguradom nga adda amin dagiti banag a kasapulán.)

Dagiti pagarigan ti no kasano a maibagay dagiti adalen iti daytoy a pagbasaan para iti klase ti nursery ket masarakan kadagiti panid xxvii–xxix. No ibagaymo dagiti adalen, laglagipem a nainkararagan nga ibilangmo ti pannakaawat ken pakaay-aywan dagiti ubbing. Nasken nga ababa ken sabasabali dagiti aktibidad gapu ta dagiti ubbing iti kastoy nga edad ket ababa laeng ti oras ti panagdengngegda. Makasursuro dagiti ubbing babaen ti panangdagdagullit, isu a mabalín a kayatmo nga uliten ti maysa nga aktibidad kabayatan ti adalen wenna kadagiti masakbayan nga adalen. Para iti nayon a tulong a panangisuro kadagiti babbabassit nga ubbing, kitaen iti “Panangisagana kadagiti Adalen,” “Panangisuro kadagiti Adalen,” “Musika iti Siled ti Klase,” ken “Dagiti Pangtulong a Ladawan” kadagiti panid viii–x.

Oras ti Aktibidad: Mangpilika kadagiti aktibidad kas iti panagkolor, panagaramid kadagiti banag babaen ti *clay*, drama, ay-ayam, ken dadduma pay (kitaen iti “Dagiti Aktibidad ken Ay-ayam para iti Nursery,” xix–xxiv a pangtulong iti mensahe ti ebanghelio, mangipalubos iti panagbibinninglay, ken mangipaay kadagiti managpartuat a padas. Saan a maseknan no kayat dagiti babbabassit nga ubbing ti agsubli nga agay-ayam.

Oras ti Panangigibus: Tulongam dagiti ubbing a mangidulin iti amin nga ay-ayam ken kasapulán; kalpasanna subliem nga adalen biit ket gupgopen ti mensahe ti ebanghelio a naisuro. Tulongam ti maysa nga ubing a mangted iti panggibus a kararag.

**Panangisagana
Kadagiti Ubbing
Para iti Nursery**

Sumagmamano a lawas sakbay a sumrek ti maysa nga ubing iti nursery, nasken nga ikkan ti umuna a mamagbaga iti panguluén ti Primary dagiti nagannak ti ubing iti maysa a kopia ti tseklit iti panid xvi ket makipagurnos iti maysa a miting dagiti nagannak ken dagiti mannursuro iti nursery.

Tseklis dagiti Nagannak

Mabalin a sangbayan ti maysa nga ubing ti umuna a panawenna iti nursery nga addaan panaggagar wenno panagbuteng, isem wenno lua. Adu ti maaramid dagiti nagannak tapno mapagbalinda a makaay-ayo ti padas ti anakda iti nursery babaen ti panangisaganada iti anakda a nasapsapa. No ammo dagiti ubbing no sadino ti papananda ken no ania ti namnamaen, gagangay nga aggagarda a dumar-ay. Dagitay umay nga addaan bassit wenno awan nasapsapa a panangilawlawag ket mabalin a mabuteng ken mabalin nga agkedkedda nga agbati. Isaganam ti anakmo nga umay iti nursery babaen ti panangaramid iti adu kadagitoy a banag agingga a mabalin:

- _____ 1. Suruanyo ti anakyo maipapan iti nursery iti uray dua laeng a lawas sakbay ti umuna nga idadar-ayna.
- _____ 2. Makipagurnos tapno makipagkita ti anakyo kadagiti mannursuro iti nursery maysa wenno dua a lawas sakbay ti umuna a gundaway nga idadar-ayna iti nursery.
- _____ 3. Makipagurnos tapno makipagkita ti anakyo iti sumagmamano kadagiti dadduma pay nga ubbing iti nursery.
- _____ 4. Kabayatan ti lawas sakbay a sumrek ti anakyo iti nursery, isaritayo dagiti napipintas a banag maipapan iti nursery.
- _____ 5. Kuyogenyo ti anakyo tapno mangkita iti siled ti nursery no awan ti asinoman idiyay.
- _____ 6. Maysa nga aldaw kasakbayanna, ipalagipyo iti anakyo a mangrugi ti nursery iti kabigatanna.
- _____ 7. Iti umuna nga aldaw ti nursery, ikkanyo iti adu nga oras tapno makapagsagana ti anakyo para iti simbaan. Saan nga agdardaras.
- _____ 8. Ibatiyo ti amin nga ay-ayam ti anakyo iti pagtaengan.
- _____ 9. Ipanyo ti anakyo iti pagisbuan ket pakanenyo daytoy sakbay nga ipanyo iti nursery. Ti ubing a kasapulan a masukatan iti lampin ket ipan iti nagannak.
- _____ 10. Sumangpet iti nursery iti husto nga oras.
- _____ 11. Ipanamnamayo iti anakyo nga agsublikayto no malpas. Agsublikayo iti husto nga oras tapno alaenyo ti anakyo kalpasan ti nursery.
- _____ 12. No mabuteng ti anakyo, agbatikayo a kaduana iti nursery iti umuna a sumagmamano a gundaway.
- _____ 13. Ibagayo kadagiti mannursuro iti nursery no sadino a klase ti dar-ayanyonto bayat ti oras ti nursery tapno maipanda ti anakyo kadakayo no adda problema.
- _____ 14. Ipakaammoyo kadagiti mannursuro iti nursery no adda saan a kadawyan a problema ti anakyo, kas iti alerdyi iti makan.
- _____ 15. Pagsaritaanyo iti anakyo ti padas iti nursery iti nasayaat, naayat a wagas. Siguraduenyo nga isarita dagiti napipintas a banag maipapan iti klase ti anakyo iti nursery ken maipapan kadagiti mannursuro.
- _____ 16. Laglagipenyo a maaramid ti ayat ken anus a nasayaat a padas ti nursery para iti anakyo.

Saanyo koma nga ipan ti anakyo iti nursery no addaan daytoy iti ania man kadagiti sumaganad a sintomas:

- Gurigor
- Agay-ayus a buteg
- Uyek
- Saan a kadawyan a pannakasuron wenno panagpungtot
- Panagsarua
- Panagibleng
- Panagbubudo
- Panagmukat
- Kuto
- Maysa a sakit wenno impeksion a maagasan iti antibiotics iti uneg ti napalabas a 48 nga oras
- Maysa a gagangay a sakit ti kinaubing a makaakar: tuko (pito nga aldaw)
kamuras (agingga nga umawan ti budubudo)
scarlet fever (agingga nga umawan ti budubudo)
kabbi (agingga nga umawan ti panagbussog, gagangay a pito nga aldaw) impetigo (nakaro ken alisto a makaakar a sakit ti kudil nga agbanag iti adu a bukol ken agar-aruyot a letteg)

No adda alerdyi ti anakyo a gapuanan ti buteg, uyek, wenno budubudo, ipakaammoyo koma kadagiti mannursuro iti nursery a saan a makaakar dagiti sintomas ti anakyo.

**Kababalin Dagiti
Babassit nga
Ubbing**

Ti panangadal kadagiti sumaganad a kababalin dagiti babassit nga ubbing ket makatulong kenka a makaawat a nasaysayaat no apay a dagiti ubbing iti klaseyo ket aggunngunay a kas iti ar-aramidenda. Usarenyo daytoy a pannakaammo iti panangisagana ken panangisuro kadagiti adalen ken iti pannakilangen kadagiti ubbing. Laglagipen a sapa sap a pangiwawan dagitoy; saan a dumakkel ti amin nga ubbing nga agkakaalisto wenno agtignay iti agpapada a wagas iti agpapada nga edad.

Dagiti Kababalin ti Bassit nga Ubing a Mainaig iti Panunot

- Agpanunot iti nalaka ken gagangay. Saanna a maawatan dagiti naririgat a kapanunotan.
- Ababa ti oras ti idedengnegna iti maysa a banag (maysa agingga iti tallo a minuto).
- Masansan nga agsaludsod wenno agkomentaryo nga adayo iti pagsarsaritaan.
- Managusisa unay ken managdamag.
- Gagangay nga aggagar a makasursuro ken mangpadas kadagiti baro a banag.
- Kaay-ayona ti madagdagullit.
- Makaaramid kadagiti nalaka a pili.

Dagiti Kababalin ti Bassit nga Ubing a Mainaig iti Bagi

- Gagangay a nakaregregta.
- Dumurdur-as kadagiti kabaelan nga agmartsa, aglagto, ken agsipat.
- Agbalin a nakuti, napungtot, ken nalaka a mabannog.
- Nalaklaka kenkuana ti agikkat ken agibaba ngem iti agisubli (iti ay-ayam).

Dagiti Kababalin ti Bassit nga Ubing a Mainaig iti Pannakilangen

- Managtalek.
- Gagangay a kaay-ayona ti agay-ayam a maymaysa.
- Masansan a kasla naimot ken managimbubukod.
- Marigatan nga agpabulod ken makisinnukat iti ay-ayam.
- Masansan a makiapa maipapan iti ay-ayam.

Dagiti Kababalin ti Bassit nga Ubing a Mainaig iti Rikna

- Gagangay nga aggagar nga agayat ken maayat.
- Masansan nga ipukkawna ti marikriknana.
- Masansan a nalaka nga agsangit.
- Masansan nga agbaliw-baliw ti riknana.

Dagiti Kababalin ti Bassit nga Ubing a Mainaig iti Kinaespirituan

- Magustuanna ti agkararag ngem kasapulanna ti tulong tapno maaramidna daytoy.
- Marugianna ti panangsursuro iti kaipapanan ti panagraem.
- Managrikna iti Espiritu.
- Maawatanna nga ay-ayatennatayo ti Nailangitan nga Ama ken ni Jesus.
- Maawatanna dagiti pangrugian a kapanunotan a mainaig iti kinaespirituan.

Dagiti Mabalina Parikut ken Pangrisut iti Nursery

Uray iti kalaingan a nursery, masansan a nakuti dagiti ubbing. Sumaganad dagiti sumagmamano a gagangay a parikut iti ugali ken singasing iti panangrisut kadagitoy.

Parikut

Maysa a nagannak ti mangibaga kenka a saan a kayat ti ubing ti umay iti nursery. Agriaw ken agsangit ti ubing no pumanaw ti nagannak.

Maysa nga ubing ti kasla mabuting kenka ken iti dadduma pay nga ubbing, agtaraytaray iti uneg ti nursery, ket saanna a kayat ti makisarita iti asino man.

Bayat ti sibubukel nga oras ti nursery, maysa nga ubing ti kumkumpet iti sakam wenno padpadasenna ti agpasaklot kenka.

Bayat ti oras ti adalen, adda dagiti ubbing a tumakder ket rummuar nga umadayo sakbay a malpas dagiti aktibidad.

Ti Mabalina Pangrisut

Allukoyen dagiti nagannak nga isaganada a nasapsapa dagiti annakda para iti nursery (kitaen iti “Panangisagana kadagiti Ubbing para iti Nursery,” kadagiti panid xv). Awisen ti nagannak nga agbati agingga a mapagtalna ken gumin-awa ti ubing. Mabalina makatulong nga awisen dagiti dadduma a nataengan a mangtengngel kadagiti agsangangit nga ubbing tapno matulongan ida a makarikna iti ad-adda a talged.

Agbalinka a naanus; saanmo a piliten ti ubing. Ikkam iti gundaway a mangam-ammo kenka, ti dadduma nga ubbing ken ti aglawlaw. Sagpaminsan nga isiguradom iti ubing ken isingasingmo ti maysa wenno dua nga aktibidad a padasen. Tulongam ti ubing a maaddaan iti ania man a kita ti naballigian a padas.

Kasapulan dagiti babbabassit nga ubbing ti ayat ken panangasikaso. Ti maysa a kanito a panangiggem ken pannakisarita iti ubing no dadduma ket gagangay a mangted ragsak kenkuana. Kalpasanna allukoyem ti ubing a makiraman kadagiti aktibidad iti nursery.

Agalibtakka ken ammuem dagiti kasapulan, paggugusto, ken kapaut ti idedengngeg ti tunggal ubing. Agsapulka kadagiti pagilasinan ti pannakarurod wenno kinaalikuteg tapno maibagaymo ti aktibidad nga apagisu kadagiti paggugusto dagiti ubbing. Saanmo a piliten ti maysa nga ubing a makiraman iti ania man nga aktibidad. No kayat ti sumagmamano nga ubbing ti agsubli nga agay-ayam palubosam ida a mangaramid iti daytoy.

Maysa nga ubing ti dina kayat ti agtugaw a siuulimek ken dumngeg. Iduron ken guyodenna dagiti ubbing a nakatugaw iti asideg.

Mangrugi a paggaapaan ti sumagmamano nga ubbing ti maysa nga ay-ayam. Maysa nga ubing ti kumugtar, dumanog, wenno kumagat tapno maalana ti ay-ayam.

Maysa nga ubing ti mangrugi nga agay-ayam a naalikuteg— agipalpallayog iti maysa nga ay-ayam, ibabaotna daytoy, wenno ipurpuruakna daytoy. Kalpasanna agtaray a mapan iti sabali a paset ti siled.

Maysa maysa nga alaen ti maysa nga ubing dagiti ay-ayam manipud iti pagidulinan, ket agkedked a mangidulin kalpasanna iti ania man kadagiti ay-ayam.

Maysa nga ubing ti mangrugi nga agasug ken agsangit. No padasem a liwiwaen daytoy, kunana, “Dika kayat,” ket umadayo.

Maysa nga ubing ti agdamag, “Kaano nga umay ni mamangko? Kaanoak nga agawid?”

Mabalin ti maikadua a mannursuro nga iturongna ti imatang ti ubing iti aktibidad nga iturong ti umuna a mannursuro. Ikkam ti ubing iti maysa a banag wenno maiggaman tapno sireregta a makiraman iti adalen wenno aktibidad.

No dadduma marisut mismo dagiti ubbing dagiti sinnuppiat ngem nasken a makibiangka no kasapulan tapno mapengdan ida nga agdinnangran iti tunggal maysa wenno mangperdi iti tagikua. Mabalinmo nga isingasing dagiti wagas tapno marisut dagiti ubbing ti parikutda.

Nasken a pengdam ti kastoy nga ugali. Ilawlawagmo iti ubing no apay a saan a mabalin nga agtignay iti kastoy a wagas; kalpasanna iturongmo ti ubing iti sabali nga aktibidad.

Silalanay ngem sititibker nga ibagam manen ti namnamaen a panagug-ugali. Ipakitam iti ubing no kasano nga idulin dagiti ay-ayam. Allukoyem ti ubing nga idulinna ti tunggal ay-ayam sakbay a mangala manen iti sabali.

Gagangay nga alisto a maisturbo dagiti babasit nga ubbing. Ipakitam iti ubing ti maysa a naisangsangayan nga ay-ayam ket isingasingmo a mabalin a napintas nga ay-ayamen daytoy. No saan nga omobra daytoy, padasem ti maysa nga estoria wenno libro. No dadduma makatulong ti panangpunas iti mata ti ubing iti panagsardeng a panagsangit. No ituloy pay laeng ti ubing ti agsangit, ipanmo iti maysa a naganak.

Ipanamnamam iti ubing nga agsublinto dagiti nagannak kenkuana. Pagsasaritaanyo ti sumagmamano a banag a mapasamakto sakbay a dumteng ti oras ti panagawid.

Dagiti Aktibidad ken Ay-ayam Para iti Nursery

Usarem dagiti aktibidad iti daytoy a benneg no ikeddengmo kabayatan ti oras ti panagay-ayam wenno oras ti aktibidad iti nursery. Mabalinmo pay nga usaren ti ania man nga aktibidad iti daytoy a benneg a maitunos iti maysa a naipangruna nga adalen bayat ti oras ti adalen iti nursery, ket mabalin pay nga usaren dagiti aktibidad a naggapu iti adalen kabayatan ti oras ti panagay-ayam. Aramidem nga adda mausar nga aktibidad kadagiti ubbing kabayatan ti oras ti panagay-ayam,

ngem saanmo a piliten dagiti ubbing a nakiraman. Kaykayat ti sumagmamano nga ubbing ti agay-ayam iti ay-ayam kabayatan ti sibubukel nga oras ti panagay-ayam.

Dagiti Aktibidad iti Arte

Mabalin a makaay-ayo dagiti padas iti arte ken makatulong kadagiti ubbing a mangpadur-as iti panagtalek iti bagi, kinamanagpartuat, kinalaing iti aramid ti ima, panagtunos dagiti mata ken ima, ken kinamannakaammo kadagiti panagriknada. Ti arte ket mabalin pay a napintas a wagas iti panangipeksa iti bukod a kinatao. Usarem ti bukodmo nga imahinasion ken kinamanagpartuat iti panangplano kadagiti umno a proyekto iti arte para iti klasem.

Mabalin a makatulong kenka dagitoy a pangiwawan iti panagplanom kadagiti managpartuat a proyekto iti arte.

- Pagtalinaedem a simple dagiti proyekto.
- Agbalinka a nakasagana. Alaem ti amin a kasapulan ket ammuem no kasano nga aramidem mismo ti proyekto.
- Agsaganaka a mangbalbaliw, no kasapulan. No nakasaganaka a mangbalbaliw, saanka a madanagan no saan a maipatungpal ti proyekto kas iti naplano. Laglagipem a masansan nga ad-adda a paggugusto dagiti ubbing ti ageksperimento kadagiti banag a kasapulan nga itedmo kadakuada ngem iti panangileppas iti maysa a proyekto.
- Agbalinka a naayat ken maay-ayo iti ar-aramiden dagiti ubbing, ket mangtedka iti naimpusuan a pammadayaw.
- Agusarka iti panagduduma. Agplanoka kadagiti proyekto a mangipalubos kadagiti ubbing a mangusar iti adu a nadumaduma a kasapulan ken pamuspusan iti linawas.
- Agbalinka a nadayaw iti pannakilangen. Saanmo a kanayon a padasen dagiti babassit nga ubbing ti mangiladawan iti maysa a banag babaen ti arteda. Kaay-ayoda laeng ti ageksperimento kadagiti kasapulan a naipaay. No adda masaom iti aramid ti maysa nga ubbing, sawem ti “Ibagam kaniak ti maipapan iti ladawan” imbes a damagem ti, “Ania daytoy?”
- Mangtedka laeng iti bassit a tulong. Tumulong laeng no kasapulan ngem bay-am dagiti ubbing nga aramidenda ti bukodda a trabaho.

Panagkolor Bayat ti Musika

Dagiti kasapulan: Nairekord a musika wenno instrumento, papel, krayola wenno pagkolor a lapis.

Patokarem ti musika bayat ti panagkolor dagiti ubbing. Bay-am ida nga agkolor iti wagas nga iparikna kadakuada ti musika.

Collage

Ti *collage* ket maysa a ladawan a naaramid babaen ti panangipigket a sangkamaysa dagiti piraso ti papel, retrato, ken dadduma pay a banag a kasapulan.

Dagiti kasapulan: Dumani amin a kasapulan ket mabalin nga usaren iti maysa a collage, kas iti papel a pagbungon iti regalo, papel a tisyu, papel a para iti diding, bulbulong, darat, ken produkto ti makaroni. Kasapulam ti pagpigket ken piraso ti

papel wenna sabali pay a banag a nasimpa ti rabawna (tapno pagpigketan iti collage) para iti tunggal ubing.

Bay-am a pumili dagiti ubbing ti banag a kasapulan nga ipigket iti pagpigketan iti collage. Bay-am ida nga agpartuat iti ania man a disenio a kayatda.

Panangubon iti Makaroni

Dagiti kasapulan: Dadakkel a di pay naluto a makaroni (wenna sumagmamano a *straw* wenna ania man a sabali a banag a kasapulan a nalaka a maubon), atiddog a tali wenna panait para iti tunggal ubing, ken pagpigket wenna allid.

Patangkenen ti maysa a murdong ti tunggal tali wenna panait babaen ti panangisawsaw daytoy iti pagpigket wenna allid. Kalpasan a namagaan daytoy, umdasen ti kinatangken daytoy tapno pagyubonan. Siglotem ti bangir a murdong ti tali tapno saan a rummuar ti makaroni. Bay-an nga ubonen dagiti ubbing ti makaroni, ket kalpasanna siglotem ti agsumbangir a murdong ti tali no nalpasen dagiti ubbing.

Simple nga Ay-ayam a kasla Clay

Dagiti kasapulan:

2 tasa nga arina
1 tasa nga asin
1 kutsara a manteka
3/4 tasa a danum
pagkolor iti makan (opsional)

Paglaoken ti arina ken asin. Inayon ti manteka ken apagpagisu a danum tapno agbalin a kasla *clay*. Saggabassit nga inayon ti danum agingga a lumukneng ti natimpla ngem saan unay a napigket. In-innayaden nga ikiwar ken imasa. (No koloran ti ay-ayam a *clay*, inayon ti pagkolor iti makan iti danum sakbay nga inayon iti arina ken asin.)

Aramidem ti ay-ayam a *clay* iti pagtaengan sakbay nga usaren daytoy iti nursery, ket ikabil daytoy iti pagyanan a saan a serken ti angin, no mabalin. Mangitugot iti papel (ti papel nga adda allidna ket nasaysayaat nga usaren) tapno iparabaw kadagiti lamisaan a pangusaranto dagiti ubbing iti ay-ayam a kasla *clay*.

Dagiti Ay-ayam ken Berso ti Aktibidad

Kayat dagiti ubbing nga agaramid kadagiti banag nga usaren ti panaggaraw, kas kadagiti simple nga ay-ayam wenna garaw kadagiti berso wenna kanta. Adu dagiti berso ti aktibidad a nairaman kadagiti adalen, ken nailadawan iti baba ti sumagmamano a simple nga ay-ayam. No kaay-ayo dagiti ubbing ti maysa nga aktibidad, mabalin nga usaren iti mamin-adu iti unos ti makatawen, saan laeng kadagiti adalen a nakadakamatan daytoy.

Makatulong kenka dagitoy a pangiwawan iti panangisurom kadagiti kabarbaro a berso ti aktibidad kadagiti ubbing:

- Yulom a mismo ti berso ti aktibidad sakbay ti panagklase.
- Isaom dagiti balikas ket aramidem nga umuna dagiti garaw para kadagiti ubbing, a paglablabesen ti garaw. Kalpasanna awisen dagiti ubbing a gumiddanda kenka.
- In-innayadem tapno maawatan dagiti ubbing dagiti balikas ken garaw.

- Sagpaminsan nga agusarka kadagiti pangtulong a ladawan tapno makatulong iti panangidatag iti berso ti aktibidad. Dumngeg dagiti ubbing ket masursuruanda a nasaysayaat no adda kitkitaenda.
- Yababam ti berso ti aktibidad no agbalin a nakuti dagiti ubbing. No atiddog ti berso ti aktibidad, mabalin a kayatmo a tulongan dagiti ubbing nga aramidenda dagiti garaw bayat ti panangisaom nga agmaymaysa kadagiti balikas.

Dagiti Berso ti Panagraem

Usarem dagiti sumaganad a berso no nakuti dagiti ubbing ket kasapulan ti tulong iti panagbalin a naraem. Ti panangusar iti maysa kadagitoy nga aggiddan iti tunggal lawas ket makatulong kadagiti ubbing a mangammo no orasen para iti pangrugi wenno panggibus a kararag. Tulongan dagiti ubbing a mangisao kadagiti balikas ket aramiden dagiti garaw nga isingasing dagiti balikas.

Ukraden, Keppetén [Dagiti Ima]

Ukraden, keppetén ida;

Ukraden, keppetén ida;
Pagsinnipaten ida.

Ukraden, keppetén ida;
Ukraden, keppetén ida;
Ipan iti saklot ida.

Iwagwagko dagiti Imak

Iwagwagko dagiti imak.

Irikusko dagiti imak.
Pagsinnipatek dagiti imak.
Ingatok dagiti imak,
Kalpasanna ibabak
Ket ipanko ida iti saklot.

Naulimek dagiti sakak.

Natalna dagiti sakak.
Nakatugawak a nasayaat.
Nakadumogak.
Nakakidemak.
Nakasaganaak iti kararag.

No Dadduma Natayagak, No Dadduma Bassitak

Usarem ti sumaganad a berso ti panagwatwat ken panagunnat no agtugtugaw dagiti ubbing ket kasapulan ti aggaraw iti lawlaw. Ulitem no tarigagayan.

No dadduma natayagak—nakataytayag unay (tumakder, kalpasanna agtil-ay).

No dadduma bassitak—nakabasbassit unay (agkummog, kalpasanna ikummog pay).

No dadduma natayagak, no dadduma bassitak (tumakder, kalpasanna agkummog).

Aniaak ita? (agtakder wenno agkummog; bay-an nga isao dagiti ubbing no nata-yag wenno bassitda).

Ti Bassit a Bukel

Ibagam kadagiti ubbing no kasano a maimula dagiti bukel iti daga, ket tulongam ida nga agpammarang nga agtubtubo a bukbukel. Sawem ti “Agpammarangtayo a babassit a bukbukel” (agkummog wenno agkukot a kasla maysa a bola, ket ikidem dagiti mata). “Rimmuar ti init ket pinainitan dagiti bukbukel. Sa immay ti tudo ket kinunana, ‘Agriing, babassit a bukbukel’” (imulagat dagiti mata ket rugian ti agunat). “Agtubokayo iti daga, babassit a bukbukel, tapno dumakkelkayo” (tumakder ket yunnat dagiti takiag iti ngatuen ti ulo). “Babassit a bukbukel, dimmakkelkayon a napipintas a sabsabong [wenno natatayag a kayo].”

Intayon iti Balay ni Lola [wenno Lolo]

Sawen ti, “Agpammarangtayo nga intay iti balay ni Lola [wenno Lolo]. Umuna a nasken nga isuottayo dagiti badotayo [wenno agsukat]” (agpammarang nga agi-susuot iti bado wenno agsuksukat). “Intayon aglugan iti kotse [wenno iti bus]” (agpammarang a mangiluklukat iti ridaw ken lumuglugan). “Ay, natibbakol daytoy a dalan” (aramiden dagiti garaw a panagdaliasat iti natibbakol a dalan). “Kitaenyo, payapayantayo ti pulis” (aramiden dagiti garaw a panagpayapay). “Asidegtayon. Adda itan ni Lola [wenno Lolo]. Arakupentayo” (agpammarang a mangar-arakup ken ni Lola wenno Lolo).

Panangtulong kadagiti Nagannaktayo

Bilinen dagiti ubbing iti panangaramid kadagiti tignay a mangiladawan iti panangtulong kadagiti nagannak kadakuada. Mabalina sawem, ti, “Agpammarangtayo a tumulong nga agsagad iti datar.” Agpammarang dagiti ubbing nga agsagsagad iti datar. Mabalimo nga itultuloy iti panangipakni iti nagiddaan, panangdalus iti tawa, panagwagwag iti tapok, panagkaraykay kadagiti bulong, panagkali iti minuyongan, panangugas iti kotse, wenno dadduma pay nga aramiden a maitutop iti lugaryo.

Ay-ayam a Panangpatulid iti Bola

Dagiti kasapulan: Maysa a bola.

Agtugaw dagiti ubbing iti sukog a kagudua ti nagtimbukel. Agtugawka iti sanguananda ket ipatulidmo ti bola nga agturong iti maysa nga ubing, nga ibagbagam ti nagan ti ubing wenno agdamdamag iti saludsod a maipanggep iti adalen. Ipatulid ti ubing ti bola nga agsubli kenka ket sawenna ti naganmo wenno sungbatanna ti saludsod. Siguraduem nga ikkam ti tunggal ubing uray maysa laeng a gundaway. Mabalimo pay nga ay-ayamen daytoy a nakatakder, nga ipasippaw ti bola nga agsubli-subli.

Panagparis-paris kadagiti Sukog

Dagiti kasapulan: Dekolor a papel, getteng

Usarem ti dekolour a papel tapno mangaramid iti maysa a dakkel ken maysa a bassit a naggetteng a ladawan dagiti sumaganad a sukog: kuadrado, nagtimbukel, trayanggulo, puso, oktagono, ken oblong. Iwaras dagiti sukog iti datar. Agsisinnublat ti tunggal ubbing iti panangikabil kadagiti babassit a sukog iti rabaw iti kaparis a dakdakkel a sukog. Tapno maiduma, agaramid kadagiti kapada a sukog iti nadumaduma a kolor ti papel, ket ipaparis kadagiti ubbing dagiti kolor imbes a dagiti sukog.

Dagiti Sukog nga Addaan Musika

Dagiti kasapulan: Dagiti nagtimbukel a nadumaduma ti kolorna a naggetteng manipud iti dekolor a papel wenno tela, nairekord a musika wenno instrumento, pagpigket (opsional).

Ipigket wenno ikabil dagiti nagtimbukel iti maysa a dakkel a nagtimbukel iti datar. Papagnaen dagiti ubbing iti ruar ti dakkel a nagtimbukel bayat ti panagpatokar iti musika. No agsardeng ti musika, ibaga ti ubing ti kolor ti nagtimbukel nga adda iti abayna. Tapno maiduma, agusar iti nadumaduma a sukog ket paibaga kadagiti ubbing ti kolor ken ti sukog.

Panagipuruak iti Beanbag

Dagiti kasapulan: Dagiti *beanbag*; maysa a kahon, basket wenno target (naaramid babaen ti panagkartib kadagiti buttaw iti maysa a ladawan a naipigket iti cardboard).

Paipuruak kadagiti ubbing dagiti *beanbag* iti kahon, basket, wenno target. (Mabalinmo nga aramiden dagiti *beanbag* wenno target tapno maipada iti maysa a piesta opisial wenno adalen.) Mabalin met nga ipuruak dagiti ubbing dagiti *beanbag* kadagiti bloke wenno kahon a pinagtutuon.

Dagiti Estatua

Dagiti kasapulan: Nairekord a musika wenno instrumento.

Paglawlawen dagiti ubbing iti siled bayat ti panagtokar ti musika. No agsardeng ti musika, nakatakder dagiti ubbing a di aggargaraw a kasla dagiti estatua. Mabalin nga aggaraw manen dagiti ubbing no mangrugi ti musika, ngem masapul nga agtalinaedda a nakatakder a di aggargaraw no agsardeng daytoy.

Musika iti Siled ti Klase ti Nursery

Ti musika iti siled ti klase ti nursery ket mangparnuay iti nagin-awa ken naayat nga aglawlaw, a mamagbalin iti Primary a maysa a naragsak a pagyanan. Dagiti ubbing nga adda iti tawen a nursery ket nakasagana ken aggagar nga agsursuro maipapan iti Nailangitan nga Ama ken ni Jesucristo, mismo, ken daytoy napintas a lubong. Ti kapatgan a wagas tapno makasursuroda ket babaen ti musika. Mabalin a maay-ayo dagiti ubbing iti musika iti adu a nadumaduma a wagas. Mabalin ti agkanta, ken dumngeg iti musika. Kitaen iti “Musika iti Siled ti Klase,” panid ix-x, para kadagiti mainayon a masao maipapan iti panangusar iti musika iti panangisuro kadagiti babassit nga ubbing.

Panagkanta

Mabalin a di kayat dagiti babassit nga ubbing ti makipagkanta kenka (mabalin a di kabaelan dagiti babassit unay nga ubbing a makipagkanta kenka), ngem kaay-ayoda ti dumngeg kenka nga agkanta ken masansan a makasursuroda kadagiti napapateg a pagbatayan babaen dagiti kanta. Allukoyem dagiti ubbing nga agkanta, ngem dimo pakadanagan no dida agkanta. Dagiti ubbing a di makagiddan kenka iti panagkanta ket mabalin a kaay-ayoda ti panagaramid kadagiti simple a garaw bayat ti panagkantam.

Mabalin a kayatmo nga usaren dagiti isu met la a kanta iti tunggal lawas bayat ti panangirugim iti tunggal sabali nga aktibidad. No mangngegan dagiti ubbing ti familiar nga ayug, ammodanto no ania nga aktibidad ti mairugugi. Mabalinmo

pay a balbaliwan dagiti balikas iti maysa a kanta tapno maibagay kadagiti kasasaad dagiti ubbing wenno aktibidad. Kantaem dagiti paggugusto a kanta dagiti ubbing iti mamin-adu a gundaway iti unos ti tawen.

Dagiti sumaganad a kanta manipud iti *Children's Songbook* ket naipangpangruna a maibagay nga usaren iti nursery. Maibilang ti sumagmamano a singasing para kadagiti wagas tapno maibagaymo dagiti balikas. Mabalín a maaddaanka iti dadduma pay a kapanunotan para kadagiti wagas tapno maibagay dagitoy wenno dadduma pay a kanta iti *Children's Songbook* tapno maikanatad dagitoy para iti nursery.

- “A Happy Family” (p. 198) © 1975 Pioneer Music Press, Inc.). Mangparnuay iti berso maipapan iti naragsak a nursery wenno Primaryyo. Agusar iti maysa a pangkablawa: “I see Susie; she sees me. . . .”
- “Do As I’m Doing” (p. 276). Mausar para iti panangted pangiturong: “Cleaning up the nursery; follow, follow me! . . . wenno “Gather for singing. . . .”
- “Fun to Do” (p. 253)
- “Here We Are Together” (p. 261)
- “I Wiggle (p. 271)
- “If You’re Happy” (p. 266)
- “My Hands” (p. 273)
- “Once There Was a Snowman” (p. 249) (© 1981 Pioneer Music Press, Inc.). Agpartuat kadagiti berso maipapan iti dadduma pay a banag iti aglawlaw: “Once there was a green tree . . . tall, tall, tall. In its shade, . . . I rested, . . . small, small, small.”
- “Rain Is Falling All Around” (p. 241)
- “Sing a Song” (p. 253). Sukatan ti “Sing” kadagiti balikas nga adda panaggaraw kas: “Jump, jump, jump” wenno “Hop, hop, hop.” Agkanta maipapan iti lupot, kolor, wenno bagi: “Shoes, shoes, shoes; I like my shoes. I wear them on my feet; shoes, shoes, shoes!”
- “Smiles” (p. 267)
- “Popcorn Popping” (p. 242)

Dagiti Instrumento iti Musika

Mangalaka kadagiti simple nga instrumento iti musika tapno tokaren dagiti ubbing, wenno agaramid iti bukodmo.

Pluta wenno torotot. Ikkam iti sumagmamano nga abot ti bakrang ti maysa a kard-bord a nalukot a sinantubo (kas iti maus-usar a papel a pagbungon, nagalis a papel (waxed paper), wenno papel a pagpunas iti ima (paper towels). Para iti naisangsangayan nga epekto, iteyp ti selopin iti agsumbangir. Tapno makatokar, aglallay wenno agkanta nga ibatog ti pinartuat a sinantubo iti bibig.

Sand blocks: Mangputedka iti dua a pedaso ti kayo a 1 pulgada ti kapuskol, 2 pulgada ti kaakaba ken 4 pulgada ti kaatiddog. Mangputedka iti dua a babbabassit a pedaso, 1 pulgada ti kaakaba ken 2 1/2 pulgada ti kaatiddog. Papinasem iti papel de liha ti ania man a natadem nga igid wenno ikkatem dagiti makasalugsog iti kayo. Ikabilmo dagiti babbabassit a puted iti tengnga dagiti daddadakkel a puted ket ilansa a nasayaat dagitoy. Ikkam iti sangapedaso a papel de liha ti tengnga

ti tunggal puted. Tapno makatokar, pagdinnungparen dagiti puted a kayo wenno pagkinnuskosen dagiti pedaso ti papel de liha.

Marakas: Mangikabilka iti bukbukel ti mais wenno bukbukel ti utong a nagango iti maysa a lata a saan a makadunor ti ngarabna wenno iti sabali a pagikkan. Paikkam iti arkos kadagiti ubbing dagiti pagikkan. Iteypmo a nasayaat dagiti abut tapno malapdan dagiti ubbing a kanen wenno ay-ayamen ti naguneg. Tapno makatokar, ikulog dagitoy.

Dagiti Kampanilia: Idaitmo dagiti kampanilia iti maysa a pedaso ti tela. Tapno mapatokar, ikulog dagitoy.

Garaw nga Igiddan iti Musika

Dagiti napartuat a garaw nga igiddan iti musika ket makatulong kadagiti ubbing a mangusar iti pigsada iti managpartuat a wagas ken mangpadur-as kadagiti kabae-landa a mangusar iti kapanunotanda a managpartuat. Agkanta, agpiano wenno agtokar iti sabali pay nga instrumento, wenno agusar iti nairekord a musika a kagiddan ti garaw dagiti ubbing.

Tapno mairaman dagiti ubbing iti garaw nga igiddan iti musika, mabalin nga:

- Iturongmo dagiti ubbing iti panagtaray, panaglagto, panagkummog, panagpuligos, panagtil-ay, panagkaradap, panaglagto, wenno panagunnat nga igiddan iti musika. Pagsisinnublatem dagiti ubbing iti panangidaulo kadagiti garaw ti grupo.
- Agpatokar wenno agkantaka nga addaan nadumaduma a tempo ket pagtarayen wenno papagnaem dagiti ubbing batay iti ibagbaga ti musika.
- Ipapayapaymo kadagiti ubbing dagiti dekolor a panio wenno papel a banderita bayat ti panaggarawda nga igiddan iti musika.
- Agusarka kadagiti kanta nga adda aksionna no kasapulan dagiti ubbing ti sabali a banag nga aramiden. No nabayagen a nakatugaw dagiti ubbing, maibagay ti maysa a kanta nga adda aksionna a pangigarawan dagiti ubbing dagiti takiag, luppno wenno sibubukel a bagida. No kutida la a kuti ket kasapulan a pagtalnaen ida, epektibo ti kanta nga adda aksionna a pangigarawanda kadagiti ima, ulo, wenno matada bayat ti panagtugaw dagiti ubbing.

Panagdenggeg

Usarem ti audiocassettes ti *Children's Songbook* (musika laeng, 52505; musika ken balikas, 52482), no adda a magun-od.

Marigatan dagiti ubbing a mangipamaysa iti musika no dumdumnggeda laeng. Ikadua ti panagdenggeg iti panagkanta, panaggaraw, wenno dadduma pay nga aktibidad, kas kadagiti sumaganad a pagarigan:

- Pagiddaem dagiti ubbing iti suelo ket dumnggeda iti nadumaduma a kita ti musika. Pagsasaritaanyo no kasano ti iparparikna ti musika kadakuada. Kalpasanna pailadawam kadakuada no ania ti mariknada.
- Patokarem ti pagmartsa a musika ket pagmartsaen dagiti ubbing iti lawlaw ti siled.
- Ipasipsipatmo kadagiti ubbing dagiti ritmo (rhythm) ti musika a dengdenggeda.

**Pagarigan Dagiti
Naibagay nga
Adalen**

Ti sumaganad ket pagarigan no kasano a maibagay tapno usaren iti nursery ti dua nga adalen iti daytoy a pagbasaan. Bayat ti panangamirismo kadagiti pagarigan, makitam a:

Maipamaysa ti tunggal paset ti oras iti adalen iti simple a mensahe ti ebanghelio. Nasken a makatulong ti aktibidad ken musika kadagiti ubbing a mangrugi a makaawat kadagiti pagbatayan ken termino ti ebanghelio.

Dagiti laeng sumagmamano a paset manipud iti sigud nga adalen ti napili. Daytoy ti makatulong a mangaramid a simple, aktibo, ken maikanatad ti klase para kadagiti ubbing nga agtawen iti edad ti nursery.

Saan a kanayon nga usaren dagiti napili nga aktibidad iti isu met la nga urnos a maiparang dagitoy iti sigud nga adalen. Nasken a maurnos dagiti aktibidad bayat ti adalen iti urnos a kasayaatan a makatulong kadagiti ubbing nga agtawen iti edad ti nursery tapno maawatanda ti mensahe ti ebanghelio.

Adalen 6: Ay-ayatennak ti Nailangitan nga Ama ken ni Jesus

Kablaaw

Maysa a wagas tapno makaaramid iti naraem nga aglawlaw para iti nursery ket agpatokar iti musika a naggapu iti audiocassettes ti *Children's Songbook*. Tapno mayam-ammo ti mensahe iti ebanghelio iti daytoy nga adalen, mabalinmo nga ikkan ti tunggal ubing iti tsapa a nakasurat ti "Ay-ayatennak ti Nailangitan nga Ama ken ni Jesus (kitaen iti aktibidad a mangpadur-as iti pannakaammo 6, panid 21).

Oras ti Panagay-ayam 35 minuto

Bayat ti oras ti panagay-ayam, agsapulka kadagiti wagas tapno makatulong kadagiti ubbing a mangpanunot maipapan iti Nailangitan nga Ama ken ni Jesucristo. Kas pagarigan, mabalinmo nga isuro kadagiti ubbing a naragsak ti Nailangitan nga Ama ken ni Jesus no naasitayo iti tunggal maysa ken ay-ayatendatayo unay. Mabalinmo pay a tulongan dagiti ubbing a manglagip ti adalen iti napalabas a lawas babaen ti panagdamag kadakuada, "Asino ti Anak ti Nailangitan nga Ama?"

*Oras ti
Panaguummong*

10 minuto

Mabalin met nga usaren ti oras ti panaguummong a pangisagana kadagiti ubbing para iti adalen. Rugian babaen ti panagkanta iti maysa a kanta ti kararag ket tulongan ti maysa nga ubing nga agkararag. Kalpasanna, tulongan dagiti ubbing nga agsagana para iti adalen babaen ti panagdamag kadakuada no asino ti nangted kadatayo iti daytoy napintas a lubong ken ti ebanghelio ken ti Simbaan (kitaen iti aktibidad a pangawis iti panagdengngeg, panid 19).

Oras ti Musika

10 minuto

Mabalin nga epektibo unay ti musika iti panangtulong kadagiti ubbing nga agtawen iti edad ti nursery a mangisuro iti mensahe ti ebanghelio. Kas pagarigan, iti daytoy nga adalen mabalinmo a tulongan dagiti ubbing a mangpanunot ti maipapan iti Nailangitan ng Ama ken ni Jesus babaen ti panangkanta iti "I Know My Father Lives" wenno "I Feel My Savior's Love" (kitaen iti aktibidad a pangawis iti panagdengngeg 2, panid 21). No ipalubos ti oras, sublien nga adalen dagiti kanta manipud kadagiti kallabes nga adalen wenno kantaen dagiti napili a kanta a nailista iti panid xxv.

*Oras ti
Panagmerienda*

10 minuto

Uray pay awan ti aktibidad a mausar ditoy a mangpapigsa iti mensahe ti ebanghelio, mabalinmo nga ipalagip kadagiti ubbing nga ay-ayatendatayo ti Nailangitan nga Ama ken ni Jesus ket nasken nga agyamantayo kadakuada iti amin a banag, agraman ti kanentayo. Kalpasanna, mangawiska iti maysa nga ubbing a mangted ti bendision iti taraon.

Oras ti Adalen

10 minuto

Addaan daytoy nga adalen iti sumagmamano a paset a mabalin nga usaren tapno makatulong kadagiti ubbing nga agtawen iti edad ti nursery a makaawat nga ay-ayaten ida ti Nailangitan nga Ama ken ni Jesus. Kas pagarigan, mabalinmo nga aramaten dagiti sumaganad a paset manipud iti adalen 6:

- Mangted kadatayo ti Nailangitan nga Ama ken ni Jesucristo kadagiti parabur (pp. 19–20)
- Ay-ayaten ti Nailangitan nga Ama ken ni Jesucristo ti tunggal maysa kadatayo (p. 21)
- Mainayon nga aktibidad 2 (p. 22)
- Aktibidad a mangpadur-as iti pannakaammo 1 (p. 21)

Oras ti Aktibidad

15 minuto

Mangted ti oras ti aktibidad iti gundaway kadagiti ubbing tapno agbalin a mangpartuat ken tapno adda pagdalan ti pigsada. No mabalin, nasken a mangpapigsa dagiti aktibidad iti mensahe ti ebanghelio. Kas pagarigan, mabalinyo nga ay-ayamen ti panangipatulid iti bola (p. xxiii), nga agdamag kadagiti saludsod a mangpapigsa iti mensahe ti ebanghelio.

Oras ti Panangigibus

10 minuto

Usarem ti oras ti panangigibus a mangipalagip kadagiti ubbing nga ay-ayaten ti Nailangitan nga Ama ken ni Jesus ti tunggal maysa kadakuada ken am-ammona ida babaen iti naganda. Iburaymo ti riknam iti panagyaman kadagiti bendision nga inted kenka ti Nailangitan nga Ama ken ni Jesucristo. Kalpasanna tulongam dagiti ubbing a mangted iti panggibus a kararag.

Adalen 10: Agyamanak kadagiti Kaykayo, Mulmula, ken Sabsabong

Kablaaw

Kablaawam ti tunggal ubbing babaen ti naganna bayat ti iseserrekda iti nursery. Bayat ti panangkablaawmo kadakuada, yam-ammom ti tema ti adalen babaen ti panangibagam kadakuada nga ita nga aldaw masursuroda ti maipapan kadagiti mula, sabong, ken kayo.

*Oras ti
Panagay-ayam*

35 minuto

Bayat ti oras ti panagay-ayam, isaganam dagiti ubbing para iti adalen babaen ti panangibaga kadakuada maipapan iti adu a napipintas a banag iti daytoy a lubong a pinarsua ti Nailangitan nga Ama ken ni Jesucristo para kadatayo tapno agragsaktayo.

<i>Oras ti Panaguummong</i>	10 minuto	Agkanta iti kanta ti kararag; kalpasanna tulongam ti maysa nga ubing nga agkararag. Para iti daytoy nga adalen, mabalinmo pay ti mangitugot iti sabali a mula tapno kitaen, riknaen, ken angoten dagiti ubbing. Kalpasanna ipeksam ti panagyamanmo kadagiti mulmula, sabsabong, ken kaykayo (kitaen iti mainayon nga aktibidad 2, panid 39).
<i>Oras ti Musika</i>	10 minuto	Kantaenyo ti “In the Leafy Treetops” (kitaen iti mainayon nga aktibidad 4, panid 39). Ti panagaramid kadagiti garaw a maigiddan iti kanta ket makatulong a mangparnuay iti naragsak nga aglawlaw ken mangted kadagiti ubbing iti maysa a banag nga aramidenda. No ipalubos ti oras, mabalinmo met a sublien nga adalen dagiti kanta a naggapu kadagiti kallabes nga adalen.
<i>Oras ti Panagmerienda</i>	10 minuto	No mabalin, rugian ti oras ti panagmerienda babaen iti simple nga aktibidad a mainaig iti mensahe ti ebanghelio. Kas pagarigan, iti daytoy nga adalen mabalin nga agmerienda iti tinapay ken prutas. Ilawlawag kadagiti ubbing a naggapu dagitoy manipud kadagiti kaykayo, mulmula, ken sabsabong (kitaen iti aktibidad iti panid 38). Kalpasanna tulongam ti maysa nga ubing a mangted bendision iti taraon.
<i>Oras ti Adalen</i>	10 minuto	Mangpilika kadagiti paset manipud iti adalen a mariknam a makatulong kadagiti ubbing a makaawat iti mensahe ti ebanghelio. Kas pagarigan, mabalinmo a tulongan dagiti ubbing a makaawat no kasano a dumakkel dagiti kaykayo, mulmula, ken sabsabong babaen ti panangpisi iti maysa a prutas tapno makita dagiti ubbing dagiti bukel. Ilawlawagmo no ania ti nasken a mapasamak tapno agtubo dagiti bukel ket agbunga iti ad-adu pay a prutas (kitaen iti aktibidad a mangpaduras iti pannakaammo 4, panid 38). Kalpasanna tulongam dagiti ubbing nga agmula iti bukbukel kadagiti papel a tasa a napno iti daga (kitaen iti aktibidad a mangpaduras iti pannakaammo 1, panid 38).
<i>Oras ti Aktibidad</i>	15 minuto	Kalpasan ti adalen, mabalinmo ti agpatokar iti nakapsut a musika bayat ti panagkolor dagiti ubbing kadagiti ladawan ti kaykayo, mulmula, ken sabsabong. Mabalin a pilien dagiti aktibidad manipud iti adalen wenna manipud iti nakalista kadagiti panid xx–xxiv. Mabalin a kaykayat ti sumagmamano nga ubbing ti agay-ayam kadagiti ay-ayamda bayat daytoy nga oras. Aramidem nga adda a magun-od dagiti aktibidad ngem saanmo a piliten dagiti ubbing a makiraman.
<i>Oras ti Panangigibus</i>	10 minuto	Mausar ti oras ti panangigibus a panggupgopan iti mensahe ti ebanghelio ken mangtulong a mangisagana kadagiti ubbing para iti kararag. Iti daytoy nga adalen, mabalinmo nga ipaulit kadagiti ubbing kalpasan ti panangisaom kadagiti balikas iti kanta a “Little Seeds Lie Fast Asleep” tapno maipalagip kadagiti ubbing nga agyamanantayo kadagiti kayo, mula, ken sabong (kitaen iti aktibidad a mangpaduras iti pannakaammo 2, panid 38). Kalpasanna tulongam ti maysa nga ubing a mangted iti panggibus a kararag.

Panggep

Tapno tulongan ti tunggal ubing a makaawat a datayo ket espiritu nga anak ti Nailangitan nga Ama, nga am-ammonatayo ken ay-ayatennatayo.

Panagsagana

1. Sikakararag nga adalen ti Exodo 2:1–10; Salmo 82:6; Doktrina ken Katulagan 138:55–56; ken Moises 1:1–6. Kitaen pay iti *Pagbatayan ti Ebanghelio* (31110 864), maika-2 a paset.
2. Ammuen ti dua wenno tallo a madaydayaw a kababalin ti tunggal ubing babaen ti pannakiuman iti nagannak kenkuana.
3. Dagiti kasapulan:
 - a. Biblia ken Perlas a Kapatgan.
 - b. Maysa a *beanbag* wenno bassit ken nalukneng a banag.
 - c. Ladawan 1-1, Ti Lubong (62196 864); ladawan 1-2, Ni Moises iti Runo (Pakete ti Ladawan ti Arte ti Ebanghelio 106; 62063 864).
4. Aramidem dagiti nasken a panagsagana para kadagiti ania man nga aktibidad a mangpadur-as iti pannakaammo a kayatmo nga usaren.

Dagiti Aktibidad iti Pannakasursuro

Mangawis iti maysa nga ubing a mangted iti pangrugji a kararag.

Aktibidad a Pangawis iti Panagdengngeg

Kantaen ti “I Am a Child of God” (*Children’s Songbook*, p. 2), a kagiddan dagiti ubbing.
Siak ket anak ti Dios,
Ditoy imbaonnak
Inikkannak pagtaengak,
Naimbag a nagannak.

Iturongnak, idalannak,
Tarabayennak.
Suruannak ‘ramidek,
Tapno makadennak.

Ipasippawmo ti *beanbag* iti maysa nga ubing bayat ti panangisaom kadagiti balikas nga “Adda am-ammok nga anak ti Dios nga agnagan iti.” Paisaom iti ubing ti naganna ket isublina kenka ti *beanbag*. Uliten ti aktibidad agingga a maaddaan iti gundaway ti tunggal maysa.

Espiritu nga Annakatayo ti Nailangitan nga Ama

- Asino ti Nailangitan nga Ama? (Usarem dagiti sungbat dagiti ubbing tapno matulonganka a mangammo no kasano ti panangilawlawag iti daytoy a benneg ti adalen iti wagas a nalaka a maawatan dagiti ubbing.)

Ipakita ti ladawan 1-1, Ti Lubong. Ilawlawag a sakbay a nayanaktayo iti daga nag-naedtoy idia langit a kaduatayo ti Nailangitan nga Ama. Espiritutayo sadiay. Ti espiritu ket ti adda iti unegtayo a mangbibig kadatayo. Idi espíritutayo, awanantayo iti lasag ken tulang kas iti adda kadagiti bagitayo ita, ngem isu met laeng ti langatayo ita.

Ilawlawag a ti Nailangitan nga Ama ti ama dagiti espirituwayo, ket datayo dagiti espiritu nga annakna. Ditayo malagip ti panagbiag a kadenna ti Nailangitan nga Ama sakbay nga immaytayo iti daga, ngem ammotayo a datayo dagiti espiritu nga annakna gapu ta mabasbasatayo daytoy kadagiti nasantuan a kasuratan.

Ipakita ti Biblia ket basaen ti Salmo 82:6, a mangilawlawag a ti *kangatuan* ket kayatna a sawen a ti Nailangitan nga Ama. Yunay-unay a tunggal tao iti daga ket maysa nga anak ti Nailangitan nga Ama.

Kanta

Kantaen manen ti “I Am a Child of God.” Ilawlawag a ti *Dios* ket sabali pay a nagan ti Nailangitan nga Ama.

Am-ammonatayo ken Ay-ayatennatayo ti Nailangitan nga Ama

Ilawlawag nga ay-ayaten unay unay ti Nailangitan nga Ama ti tunggal maysa kadatayo gapu ta annaknatayo. Ammona dagiti nagnagantayo ken ti amin a maipanggep kadatayo. Ammona no ania ti mangparagsak kadatayo ken no ania ti mangpaliday kadatayo. Ammona no ania ti kasayaatan para iti tunggal maysa kadatayo.

Aktibidad

Sawen ti sumaganad a berso iti sumagmamano a gundaway a kagiddan dagiti ubbing, nga usaren dagiti garaw a nailadawan:

Am-ammonak ti Nailangitan nga Ama

Am-ammonak ti Nailangitan nga Ama (*itudo ti bagi*)

Ken ti kayatko nga aramiden.

Ammona ti naganko ken ti pagnaedak (*agaramid iti atep babaen ti panamagdekket kadagiti ramay ti agpada nga ima*).

Ammok nga ay-ayatennak met (*pagkrusen dagiti takiag ket iparabaw dagiti ima kadagiti abaga nga iparakup*).

Ammona no ania ti mangparagsak kaniak (*ikabil dagiti ramay iti umis-istem a bibig*).

Ammona no ania ti mangpaliday kaniak (*ikabil dagiti ramay iti nakamisuot wenno naliday a bibig*).

Ammok a kayatna a tulongannak (*itudo ti bagi*),

Ket dayta ti mangparagsak kaniak!

Papanen ti maysa nga ubbing iti sango ti klase. Iti panangusar no ania ti naammuam manipud kadagiti nagannak ti ubbing, ilawlawag nga ammo ti Nailangitan nga Ama maipapan kadagiti madaydayaw a kababalin ti ubbing. Kas pagarigan, mabalinmo a sawen ti, “Ammo ti Nailangitan nga Ama a ni Emily ket managayat nga anak, tumultulong iti nanangna nga agaywan iti adingna, ken gagangay a naragsak ken umis-istem.” Itultuloy agingga a maaddaan gundaway ti tunggal maysa.

Ilawlawag a no agaramidtayo kadagiti nasayaat ken naimbag a banag, agbalintayo a kas iti Nailangitan nga Ama.

Makapagbalintayo a kas iti Nailangitan nga Ama

- Ania ti awag iti bassit nga aso?
- Ania ti pagbalinan ti uken no dumakkel?
- Ania ti awag iti bassit a manok?
- Ania ti pagbalinan ti piek no dumakkel?

Ilawlawag a no kasano a dumakkel dagiti ayup tapno agbalin a kas kadagiti naganak dagitoy, kasta met a dumakkeltayonto nga agbalin a kas kadagiti nagannak

kadatayo. Ti Nailangitan nga Ama ti ama dagiti espiritutayo, tapno makadakkeltayo a kas kenkuana. Ti Nailangitan nga Ama ket managayat, nasayaat ken nasingpet, ket kayatnatayo a tulongan. No managayat, nasayaat ken nasingpettayo, agbalin-tayo a kas iti Nailangitan nga Ama. Ilawlawag a masapul nga ikarigatantayo ti agbalin a kas iti Nailangitan nga Ama iti inaldaw.

Adda Napateg nga Ipaaramid kadatayo ti Nailangitan nga Ama

Estoria

Ipakita ti ladawan 1-2, Ni Moises iti Runo, ket isarita ti estoria maipapan no kasano nga insalakan ti anak a balasang ni Faraon ni Moises manipud iti peggad idi mala-daga pay laeng daytoy, a masarakan iti Exodo 2:1–10.

Ilawlawag a dimmakkel ni Moises a nagbalin a maysa kadagiti napapateg a katulongan ti Nailangitan nga Ama, maysa a propeta. Imbaga ti Nailangitan nga Ama ken ni Moises nga anakna isuna (kitaen iti Moises 1:4, 6) ket adda napateg a paaramidna ken ni Moises. Ibas ti umuna a binatang ti Moises 1:6 kadagiti ubbing. Inaramid ni Moises ti trabahona idi impanawna dagiti Israelita iti daga ti Egipto, a nakaidadanesanda unay, nga agturong iti sabali a daga, a nangisuruan ni Moises kadakuada kadagiti bilin ti Nailangitan nga Ama.

Saggaysa a papanen dagiti ubbing iti sango ti klase, ket tulongan ti tunggal maysa a mangulit iti umuna a binatang ti Moises 1:6, nga isukat ti bukodna a nagan: “Adda aramidek para kenka, (nagan ti ubing), anakko.”

Ilawlawag nga adda dagiti napapateg a banag a paaramid kadatayo ti Nailangitan nga Ama bayat ti panagbiagtayo iti daga, kas iti panagbalin a maysa nga ina wenno ama, misionario, mannursuro, katulongan iti simbaan, wenno katulongan iti maysa a purok.

- Ania ti napateg nga aramid a mabalina kayat ti Nailangitan nga Ama nga aramidenyo?

Aktibidad

Payakem kadagiti ubbing no ania ti kayatda a pagbalinan no dumakkelda, kas iti panagbalin a maysa nga ina wenno ama a mangin-indayon iti maysa a maladaga, maysa a misionario a mangisursuro kadagiti tao maipapan iti ebanghelio, wenno maysa a mannursuro a mangisursuro iti klase.

Pammaneknek

Ibaga kadagiti ubbing a masapul a kanayon a laglagipenda nga espirituda nga annak ti Nailangitan nga Ama ket am-ammona ida ken ay-ayatenna ida. Tulongam a makaawat a makapagbalinda nga ad-adda a kas iti Nailangitan nga Ama ken adda napateg nga aramidenda iti daga. Mabalina nga isaritam kadakuada ti maysa a bukod a padas a nakatulong kenka a nangammo nga am-ammonaka ken ay-ayatennaka ti Nailangitan nga Ama.

Dagiti Aktibidad a Mangpadur-as iti Pannakaammo

Pumili iti sumagmamano kadagitoy nga aktibidad tapno usaren bayat ti adalen.

1. Ipakita dagiti ladawan dagiti nadumaduma a tattao, wenno pagsasaritaan maipapan kadagiti tattao nga am-ammo dagiti ubbing, ket saludsoden, “Anak kadi ti Dios daytoy a tao?” Kas pagarigan, “Anak kadi ti Dios ti bishop?” “Anak kadi ti Dios ti opisial a polis?” “Anak kadi ti Dios ti kaarrubayo?” Ken dadduma pay. Tulongam dagiti ubbing a makaawat nga anak ti Dios ti tunggal maysa.
2. Tapno mayunay-unay nga am-ammo ken maseknan ti Nailangitan nga Ama iti tunggal ubing, paileppas kadagiti ubbing dagiti saom, kas kadagitoy a pagarigan:

“Ammo ti Nailangitan nga Ama a nalidayak no _____,” “Ammo ti Nailangitan nga Ama a naragsakak no _____,” Ammo ti Nailangitan nga Ama a paggugustok nga aramiden ti _____,” “Ammo ti Nailangitan nga Ama a kayatko ti umay iti Primary gapu ta _____,” ken dadduma pay.

3. Ilawlawag a ti Nailangitan nga Ama ti ari ti langit ken daga. Gapu ta datayo dagiti annakna, datayo dagiti prinsipe ken prinsesa. Agaramid iti simple a korona para iti tunggal ubing ket isurat dagiti balikas nga *Anaknak ti Dios* iti tunggal korona. Pakoloran kadagiti ubbing dagiti korona.
4. Kagiddan dagiti ubbing, kantaen wenno sawen dagiti balikas iti umuna a berso ti “I Know My Father Lives” (*Children’s Songbook*, p. 5).

Dagiti Mainayon nga Aktibidad para kadagiti Babbabassit nga Ubbing

1. Dawatem kadagiti ubbing a pumanunot iti maysa a banag a magusgustuanda (mabalinmo met nga alaen daytoy nga impormasion kadagiti nagannak kadakuada iti nasapsapa). Saludsoden iti tunggal ubing no ania ti magustuanna, ket ibaga kenkuana nga ammo dayta ti Nailangitan nga Ama, kas iti daytoy a pagarigan: “Ammo ti Nailangitan nga Ama a magustuan ni Leah dagiti aso.”
2. Tulongam dagiti ubbing a mangaramid kadagiti garaw a maigiddan iti sumaganad a berso ti aktibidad:

No nakataytayagka (*yunnat ken ingato dagiti takiag*),
Adda lugar iti simbaan para kenka.
No nakababassitka (*agkummog*),
Adda lugar iti simbaan para kenka.

Natayag (*agunnat*),
Bassit (*agkummog*),
Natayag (*agunnat*),
Bassit (*agkummog*)—
Ay-ayatennatayo amin ti Nailangitan nga Ama.
3. Tulongam dagiti ubbing a mangaramid kadagiti garaw a maigiddan iti sumaganad a berso bayat ti panangisaom kadagiti balikas:

Ti Bassit a Maladaga a ni Moises

Ti Bassit a Maladaga a ni Moises adda bilog a pagiddaanna (*pagsukogen ti maysa nga ima ket ikabil ti tammudo ti sabali nga ima ditoy*).

Binantayan ti managayat a manangna kadagiti ruruot a naglemmenganna (*sumirip babaen ti panangikabil kadagiti ramay iti asideg dagiti mata*).

Maysa nga aldaw nasarakan daytoy ti maysa a prinsesa (*agkummog bassit a kumitkita iti baba*) ket innalana daytoy nga inubba (*agpammarang nga ubbaem ti maladaga*);

Kinunana, “Alaek daytoy a maladaga ket aywanak tapno adayo ti “peggad kenkuana” (*agpammarang nga in-indayonem ti ubing iti takiagmo*).

(Manipud iti *Fascinating Finger Fun* ni Eleanor Doan. © 1951. Naaramat nga addaan pammalubos.)

Adda Bagi ti Nailangitan nga Ama

Adalen
2

Panggep

Tapno tulongan ti tunggal ubing a makaawat a ti Nailangitan nga Ama ket pudno a tao, nga addaan iti naan-anay a bagi nga adda lasag ken tulangna, ket naparsuatayo a kalanglangana.

Panagsagana

1. Sikakararag nga adalen ti Juan 14:9; Doktrina ken Katulagan 130:22; Moises 2:27; ken Joseph Smith—Pakasaritaan 1:14–17. Kitaen met iti *Pagbatayan ti Ebanghelio* (31110 864), maika-2 a paset.
2. Dagiti kasapulan:
 - a. Biblia ken Perlas a Kapatgan.
 - b. Papel ken krayola para iti tunggal ubing.
 - c. Bassit a sarming.
 - d. Ladawan 1-3, Ni Jesus a Cristo (Pakete ti Ladawan ti Arte ti Ebanghelio 240; 62572 864); ladawan 1-4, Ti Umuna a Parmata (Pakete ti Ladawan ti Arte ti Ebanghelio 403; 62470 864).
3. Aramidem dagiti nasken a panagsagana para kadagiti ania man nga aktibidad a mangpadur-as iti pannakaammo a kayatmo nga usaren.

Dagiti Aktibidad iti Pannakasursuro

Mangawis iti mayasa nga ubing a mangted iti pangrugui a kararag.

Dagiti Aktibidad a Pangawis iti Panagdengngeg

Ibunong dagiti papel ken krayola, ket pagdrowingen dagiti ubbing iti ladawan ti bagida. No nalpasdan, paingato kadakuada dagiti ladawanda, ket saludsoden ida no asino kadagiti ubbing ti pudno, dagiti adda iti papel wenno dagiti agig-iggem kadagiti papel. Saludsodem no kasano nga ammoda.

Ilawlawag a pudnoda gapu ta addaanda iti bagi, kasta met a pudno ti Nailangitan nga Ama ken addaan iti bagi. Makitatayo dagiti ladawan ti Nailangitan nga Ama, ngem saanda nga isu ti pudno a Nailangitan nga Ama. Ti pudno a Nailangitan nga Ama ket addaan iti bagi nga adda lasag ken tulangna.

Kalanglanga ni Jesucristo ti Nailangitan nga Ama

Saludsoden kadagiti ubbing no addan nakaibaga kadakuada a karuprupa ida dagiti nagannak kadakuada. Ipakita ti ladawan 1-3, Ni Jesus a Cristo, ket ilawlawag a ni Jesucristo ket anak ti Nailangitan nga Ama. Ibagi dagiti nasantuan a kasuratan kadatayo a kalanglanga ni Jesus ti Nailangitan nga Ama. Ipakita ti Biblia ket ilawlawag ti Juan 14:9 kadagiti ubbing.

- Asino ti kalanglanga ni Jesus?

Aktibidad

Patakderen dagiti ubbing. Tulongan ida a mangyulo iti umuna a paset ti umuna a pagannurotan ti pammati: “Mamatikami iti Dios, ti Agnanayon nga Ama, ken iti Anakna, ni Jesucristo.”

Kalanglangatayo ti Nailangitan nga Ama ken ni Jesus

Ilawlawag nga espiritutayo nga anak ti Nailangitan nga Ama ken kalanglangatayo met isuna. Adda bagitayo a kas kenkuana. Ilawlawag ti Moises 2:27 kadagiti ubbing. Ilawlawag a ti pannakaparsua iti langa ti Nailangitan nga Ama ket kayatna a sawen a karuprupatayo isuna.

Aktibidad

Pagsisinnublaten dagiti ubbing iti panangkita iti sarming wenno iti sabali nga ubbing. Paibaga iti tunggal ubbing ti paset ti bagi a makitana, kas kadagiti takiag, luppo, mata, wenno lapayag. Ilawlawag nga addaan met ti Nailangitan nga Ama ken ni Jesus kadagita a paset ti bagi.

- Addaankayo kadi iti bagi a kapadpada ti bagi ti Nailangitan nga Ama ken ni Jesus?

Ilawlawag nga ammotayo no ania ti langa ti Nailangitan nga Ama ken ni Jesus gapu ta nakitan dagiti sumagmamano a propeta (dadaulo ti Simbaan) ti Nailangitan nga Ama ken Jesus ken naisuratdan ti maipapan kadakuada kadagiti nasantuan a kasuratan.

Estoria

Ipakita ti ladawan 1-4, Ti Umuna a Parmata. Isarita ti estoria maipapan iti Umuna a Parmata, kas masarakan iti Joseph Smith—Pakasaritaan 1:14–17.

- Kasano a naammuan ni Joseph Smith no ania ti langa ti Nailangitan nga Ama ken ni Jesus?
- Ania a kita dagiti bagi nga adda ken ni Jesus ken ti Nailangitan nga Ama?

Pammaneknek

Iburaymo ti pammaneknekmo maipanggep no kasano ti panagyamanmo iti kaadda ti maysa a bagi a naaramid iti langa ti Nailangitan nga Ama. Yebkasmu ti panagyaman kadagiti adu a nakaskasdaaw a banag a maaramid ti bagim.

Dagiti Aktibidad a Mangpadur-as iti Pannakaammo

Pumili iti sumagmamano kadagitoy nga aktibidad tapno usaren bayat ti adalen.

1. Patakderen dagiti ubbing ket sawenda ti sumaganad a berso ti aktibidad iti sumagmamano a gundaway, nga usaren dagiti garaw a nailadawan:

Addaanak iti Nakaskasdaaw a Bagi

Addaanak iti nakaskasdaaw a bagi (*iparabaw dagiti ima iti barukong*)

A plinano ti Nailangitan nga Ama para kaniak.

Inikkannak kadagiti lapayag tapno makangngegak (*isukog ti ima iti lawlaw ti lapayag*)

Ken kadagiti mata tapno makakitaak (*itudo dagiti mata*).

Addaanak iti dua nga ima tapno makasipatak (*pagsipaten dagiti ima*),

Dua a saka tapno makapuligosak (*agpuligos*).

No kayatko, kabaalak

A sagiden ramay ti sakak a nakakummogak (*agkummog ket sagiden dagiti ramay ti saka*).

No panunotek maipapan iti bagik (*ipan ti ramay iti ulo*),

Ti kasayaatan daytoy a pasetna (*agtugaw a siuulimek*)

Ket plinano ti Nailangitan nga Ama

Tapno kalanglanga unay ti mismo a bagina.

2. Tulongan dagiti ubbing a mangkanta wenno mangisao kadagiti balikas iti “Head, Shoulders, Knees, and Toes” (*Children’s Songbook*, p. 275). Ipalagip kadagiti ubbing nga inikkannatayo ti Nailangitan nga Ama kadagiti bagi a kalanglanga ti bagina ken makaaramid dagitoy a nakaskasdaaw a bagi iti adu a banag.

3. Bay-an nga agsisinnublat dagiti ubbing iti panangusar iti ladawan 1-4, Ti Umuna a Parmata, tapno isalaysayda ti estoria maipapan iti Umuna a Parmata iti dadduma pay a miembro ti klase.

4. Isalaysay ti estoria maipapan ken ni Marc ken ti aktibidad ti pamilia:

Natay ti ama ni Marc idi maladaga pay laeng ni Marc. Masansan a pinanunot ni Marc no ania ti langa ti amana. Mapanda ken ni nanangna iti pasken ti pamilia a pakasarungkaranna kadagiti ikit ken ulitegna a nakaam-ammo a nasayaat ken ni tatangna.

Idi makasangpetda, immasideg ni Uliteg Joe a nangkabilaaw kadakuada. Kinitana ni Marc ket kinunana, "Mailasinka uray sadino. Agpadakayo iti mata ken ni tatangmo." Kinuna ni Ikit Elizabeth, "Ammom, Marc, kapadpadam iti agong ni tatangmo." Kinuna ni Ikit Mary, "Marc, ti isemmo ti mangipalagip kaniak iti isem ni tatangmo."

Idi agawiddan, imbaga ni Marc ken ni nanangna, "Naragsakak man ita! Adu ti naammuak a banag maipapan ken ni tatang ita nga aldaw. Naammuak a kalanglangak isuna, ket dayta ti mangparagsak kaniak! Ita no kumitaak iti sarming, malagipkonto no ania ti langana, ket diakto malipatan isuna." Immasideg ti nanang ni Marc ket pinikipikna ti ima ni Marc, ket kinunana, "Gapu ta addaka, diakto met malipatan isuna."

Ibaga kadagiti ubbing a maitulad iti ammo ni Marc a karuprupana ni tatangna uray no dina makitkita isuna, ammotayo a karuprupatayo ti Nailangitan nga Amatayo uray no ditayo makita isuna.

Dagiti Mainayon nga Aktibidad para kadagiti Babbabassit nga Ubbing

1. Ipakita ti ladawan 1-4, Ti Umuna a Parmata. Isalaysaymo ti simple nga estoria ti Umuna a Parmata. Yunay-unay a pudno a tao ti Nailangitan nga Ama ken ni Jesucristo ket dumdunggeda kadagiti kararagayo.
2. Usaren ti ladawan 1-4, Ti Umuna a Parmata, tapno ipakita no kasano a kapadpada dagiti bagitayo ti bagi ti Nailangitan nga Ama ken ni Jesus. Bayat ti panangitudom iti maysa a paset ti bagi iti ladawan, paitudo kadagiti ubbing ti maitutop a paset kadagiti bukodda a bagi. Kas pagarigan, no itudom ti takiag ti Nailangitan nga Ama, masapul nga itudo dagiti ubbing iti bukodda a takiag.
3. Tulongan dagiti ubbing a mangaramid kadagiti garaw iti sumaganad a berso ti aktibidad bayat ti panangisaom kadagiti balikas:
Nagparintumeng ni Joseph iti kakaywan (*agparintumeng ket agdalikepkep*)
Ket nangisao iti naisangayan a kararag (*isagid dagiti murdong ti kamay iti bibig*).
Nakitana ti Ama ken ti Anak (*tumangad, a manglinlinong kadagiti mata babaen ti ima*)
Ket idiay a dimngeg kadakuada (*pagsukogen ti ima iti lawlaw ti lapayag*).
4. Itudom ti ngiwatmo ket sawem ti, "Daytoy ti ngiwatko." Kalpasanna saludsodem, "Maipakitayo kadi kaniak ti ngiwatyo?" ket tulongan dagiti ubbing a mangitudo iti bukodda a ngiwat. Saludsoden, "Adda kadi ngiwat ti Nailangitan nga Ama?" Uliten iti mata, agong, lapayag, ima ken saka. Kalpasanna itudo iti tunggal paset ti bagi a saan nga ibagbaga ti nagan daytoy, ket paibaga kadagiti ubbing ti nagan daytoy.

Ti Plano ti Nailangitan nga Ama para Kadatayo

Panggep

Tapno tulongan ti tunggal ubing a makaawat a nagbiagtayo a kadenna ti Nailangitan nga Ama kas espiritu nga annakna sakbay nga immaytayo iti daga ken makapagbiagtayo manen a kadenna isuna kalpasan daytoy a biag.

Panagsagana

1. Sikakararag nga adalen ti Abraham 3:22–27. Kitaen met iti *Pagbatayan ti Ebanghelio* (31110 864), maika-2 a paset.
2. Dagiti kasapulan:
 - a. Napagtitipon a nasantuan a kasuratan.
 - b. Maysa a munieka wenno sinantao a papel.
 - c. Ladawan 1-1, Ti Lubong (62196 864); ladawan 1-3, Ni Jesus a Cristo (Pakete ti Ladawan ti Arte ti Ebanghelio 240; 62572 864); ladawan 1-5, Pamilia nga Addaan iti Maladaga (62307); ladawan 1-6, Family Home Evening (62521 864); ladawan 1-7, Maysa a Naayat a Pamilia; ladawan 1-8, Panangiwaras iti Sakramento (62021 864); ladawan 1-9, Kararag iti Agsapa (62310 864); ladawan 1-10, Kararag ti Kaamaan (62275 864); ladawan 1-11, Ubing a Lalaki a Mabumbuniagan (62018 864); ladawan 1-12, Ubing a Babai a Makomkompirmaan (62020 864); ladawan 1-13, Joseph Smith (Pakete ti Ladawan ti Arte ti Ebanghelio 400; 62449 864).
3. Aramidem dagiti nasken a panagsagana para kadagiti ania man nga aktibidad a mangpadur-as iti pannakaammo a kayatmo nga usaren.

Dagiti Aktibidad iti Pannakasursuro

Mangawis iti maysa nga ubing a mangted iti pangrugui a kararag.

Aktibidad a Pangawis iti Panagdenggeg Mangipan iti munieka wenno sinantao a papel iti maysa kadagiti tugaw nga asideg kadagiti ubbing. Dawaten kadagiti ubbing nga agtakder, agpuligos, ken agtugaw manen.

- Apay a saan a timmakder ti munieka?
- Apay a makatakderkayo?

Pagsasaritaan dagiti paggidiatan dagiti ubbing ken ti munieka. Tulongan dagiti ubbing a makaawat a sibibiagda. Addaan ti tunggal maysa kadakuada iti espiritu iti uneg ti bagida a mangbibig kadakuada tapno makakita, makanggeg, makatakder, makagunay, makapagpanunot, ken makapagsaoda.

Espiritutayo nga Annak ti Nailangitan nga Ama

Sublien nga adalen a kadua dagiti ubbing no kasano a nagbiagtayo a kadenna ti Nailangitan nga Ama kas espiritu nga annakna sakbay a nayanaktayo iti daga. Naragsaktayo, ken nagustuantayo ti panagbiag a kadenna ti Nailangitan nga Ama. Awanantayo kadagiti pisikal a bagi nga adda kadatayo ita, ngem adda espiritutayo. Ilawlawag a kalanglanga ti espiritu ti pisikal a bagi ngem awanan iti lasag ken tulang.

- Sadino ti nagnaedanyo sakbay a nayanakkayo iti daga?

Kanta Kantaen ti “I Am a Child of God” (*Children’s Songbook*, p. 2) a kagiddan dagiti ubbing. Ipalagip kadagiti ubbing a ti Dios ket sabali pay a nagan ti Nailangitan nga Ama.

Siak ket anak ti Dios,
Ditoy imbaonnak,
Inikkannak pagtaengak
Naimbag a nagannak.

Iturongnak, idalannak,
Tarabayennak.
Suruannak ‘ramidek
Tapno makadennak.

Aktibidad Patakderem ti maysa nga ubing iti abaymo. Usarem ti nagan ti ubing, ilawlawag a nagbiag isuna a kadenna ti Nailangitan nga Ama sakbay ti pannakayanakna iti daga, ken isu ket espiritu nga anak nga ay-ayaten ti Nailangitan nga Ama. Aramidem ti kasta met laeng iti tunggal ubing.

Ilawlawag a gapu ta ay-ayatennatayo ti Nailangitan nga Ama, adda planona para kadatayo. Sakbay a naparsua ti daga, sangkamaysa nga inawagan ti Nailangitan nga Ama ti amin nga annakna tapno ilawlawagna ti planona. Datayo amin, dagiti nagannaktayo, ken dagiti kakabsattayo ket adda idiay.

Imbaonnatayo ti Nailangitan nga Ama Tapno Agbiag iti Daga

Iparang ti ladawan 1-1, Ti Lubong. Ilawlawag a ti daga ket paset ti plano ti Nailangitan nga Ama. Babaen ti pangiturong ti Nailangitan nga Ama, pinarsua ni Jesucristo ti daga a para kadatayo. Naibaontayo tapno mayanak ditoy ken umawat iti pisikal a bagi.

Ipakita ti ladawan 1-5, Pamilia nga Addaan iti Maladaga. Bay-an a pagsasaritaan dagiti ubbing maipapan iti ladawan. Ibaga kadakuada a naggagartayo nga umay iti daga ken tapno agsursuro ken dumakkel. Immaytayo iti daga kas maladaga kadagiti pamilia a mabalina a mangipateg kadatayo ken mangaywan kadatayo.

Ibaga kadagiti ubbing nga idi immaytayo iti daga, naikkantayo kadagiti pisikal a bagi nga addaan kudil, lasag, dara, ken tulang. Iparikna kadagiti ubbing dagiti bukodda a takiag.

- Mariknayo kadi ti tulang iti uneg ti takiagyo?
- Makita ken mariknayo kadi ti kudilyo?
- Mariknayo kadi dagiti lasagyo?

Ipalagip kadagiti ubbing a dagiti espiritutayo iti uneg dagiti bagitayo ti mangted biag kadatayo, ngem ditay makita wenno masagid dagiti espiritutayo. Mabalina a makita ken masagid dagiti pisikal a bagitayo. Ibaga kadagiti ubbing a maysa a naindaklan a bendision ti maaddaan iti pisikal a bagi.

Aktibidad Isao ti sumaganad a berso a kagiddan dagiti ubbing. Itudo ti tunggal paset ti bagi bayat ti pannakadakamat daytoy.

Agyamanak kadagiti Matak

Agyamanak kadagiti matak,
Bibig, agong, ken lapayag;
Agyamanak kadagiti imak ken takiag,
Luppo, saka, ken ramay ti sakak.
(Naadaw manipud iti berso ni Lucy Picco.)

Ilawlawag a bayat ti kaaddatayo iti daga, dumakkel ken masursuruntayo iti adu a banag. Bayat ti panagsursurotayo a pumili kadagiti umno a banag nga aramiden, makapagbalintayo a kas iti Nailangitan nga Ama ken ni Jesus. Daytoy ti sabali pay a paset ti plano ti Nailangitan nga Ama.

Kayat ti Nailangitan nga Ama nga Agsublitayo Kenkuana iti Maysa nga Aldaw

Ipeksam ti ayatmo para iti Nailangitan nga Ama. Ibagam kadagiti ubbing nga iti maysa nga aldaw kayatmo ti agsubli iti Nailangitan nga Ama tapno makitamto isuna ken makadennam manen. Ilawlawag a paset pay daytoy ti plano ti Nailangitan nga Ama. Kayatna a ti tunggal maysa kadatayo ket makasubli tapno makipagnaed kenkuana no aggibusen ti biagtayo ditoy daga. Kayatnatayo, dagiti nagannaktayo, ken amin a pamiliatayo a makadenna manen isuna.

Ilawlawag a tapno agbiag a makadenna manen ti Nailangitan nga Ama ken ni Jesus, nasken a mabuniagantayo ken agtungpal kadagiti amin a bilin. Ipakitam ti napagtitipon a nasantuan a kasuratan. Ilawlawag a dagiti nasantuan a kasuratan ket mangisursuro kadatayo maipapan iti Nailangitan nga Ama ken ni Jesus ken no ania ti kayatda nga aramidentayo.

Usaren dagiti ladawan a nailista iti benneg a “Panagsagana,” pagsasaritaan no ania ti kayat ti Nailangitan nga Ama a sursuruen ken aramidentayo ditoy daga. Kayatna nga ayatentayo dagiti pamiliatayo, agbalintayo a saan a managimbubukod, mapantayo iti simbaan, umawattayo iti sakramento, agkararagtayo iti bigat ken rabii, maaddaantayo iti kararag ti kaamaan ken family home evening, mabuniagantayo, makompirmaantayo ken umawattayo iti Espiritu Santo, agkallaysatayo iti templo, agsursurotayo maipapan kadagiti propeta, ken agbalintayo a kas iti Nailangitan nga Ama ken ni Jesus.

Pammaneknek

Ipeksam ti panagyamanmo iti Nailangitan nga Ama ken iti planona para kadatayo. Allukoyem dagiti ubbing a kanayon nga agaramidda iti ammoda nga umno tapno iti maysa nga aldaw ket makapagsublida nga agbiag a kadenna ti Nailangitan nga Ama ken ni Jesus.

Dagiti Aktibidad a Mangpadur-as iti Pannakaammo

Pumili iti sumagmamano kadagitoy nga aktibidad tapno usaren bayat ti adalen.

1. Ikkan a saggaysa dagiti ubbing iti panid ti papel a nangisuratam iti *Siak ket anak ti Dios*, ket padrowing iti tunggal ubing ti ladawan ti bagina. Bay-an nga ipakita dagiti ubbing dagiti ladawanda iti dadduma pay nga ubbing iti klase. Allukoyem ti tunggal ubing nga agsarita ti maysa a napintas a banag maipapan iti bagina bayat ti panangipakitana iti ladawan.

2. Tulongan dagiti ubbing a mangisao iti sumaganad a berso ket aramiden dagiti garaw a naipakita:

Ti Panagparsua ti Dios

Inaramid ti Dios ti bulan (*agaramid iti nagtimbukel babaen dagiti ima*)

Ken dagiti bituen nga agrimat-rimat (*ukraden ken keppetien dagiti ima*)

Ket inkabilna dagitoy iti tangatang (*gumaw-at nga agpangato*).

Inaramidna ti init (*agaramid iti nagtimbukel babaen ti panangikabil kadagiti takiag iti ngatuen ti ulo*)

Ken kaykayo (*ilinteg nga ingato dagiti takiag*)

Ken sabsabong (*pagsukogen dagiti ima*)

Ken babassit a billit a tumaytayab (*ipayapay dagiti ima*).

(Manipud iti *Fascinating Finger Fun* ni Eleanor Doan. © 1951. Naaramat nga addaan pammalubos.)

3. Isurat dagiti sumaganad a saludsod iti nagsisina a panid ti papel. Sublien nga adalen babaen ti panangpapili iti tunggal ubing iti maysa a panid ti papel. Basaen ti saludsod ket bay-an a sungbatan ti ubing daytoy. Uliten no kasapulan tapno maikkan iti gundaway ti tunggal ubing.
 - a. Asino ti anak ti Dios (Siak; ti amin.)
 - b. Sadino ti nagnaedantayo sakbay a nayanaktayo iti daga? (Idiay langit a kadenna ti Nailangitan nga Ama ken ni Jesus.)
 - c. Apay nga indawat ti Nailangitan nga Ama ken ni Jesus nga aramidenna ti daga para kadatayo? (Tapno maaddaantayo iti pisikal a bagi ken masursurotayo no ania ti nasken nga aramidentayo tapno agbiag a kadennatayo manen ti Nailangitan nga Ama ken ni Jesus.)
 - d. Ania ti nasken nga aramidentayo tapno agbiag manen a kadennatayo ti Nailangitan nga Ama ken ni Jesus? (Agtungpal iti bilin, agbalin a saan a managimbubukod, mabuniagan, mapan iti templo, ken dadduma pay. Bay-an nga ipakita dagiti ubbing dagiti maitutop a ladawan bayat ti panangsungbatda iti daytoy a saludsod.)
 - e. Asino ti makadennatayo kalpasan ti biagtayo ditoy daga? (Ti Nailangitan nga Ama ken ni Jesus ken dagiti pamiliatayo.)

Dagiti Mainayon nga Aktibidad para kadagiti Babbabassit nga Ubbing

1. Babaen ti pammalubos ti presidenteyo iti Primary, mangawis iti maysa nga ama nga itugotna ti maladagana iti siled ti klase. Pagsasaritaan maipapan kadagiti amma ken no kasano nga ayatenda dagiti annakda. Ibaga kadagiti ubbing nga addaanda iti dua nga amma a mangipatpateg kadakuada: ti amada ditoy daga ken ti Nailangitan nga Amada. Sakbay a mayanak iti daga dagiti maladaga, agbibbiagda a kadenna ti Nailangitan nga Ama. (Palagip: Agbalinkayo a managrikna kadagiti kasasaad dagiti ubbing iti klaseyo, adda kadakuada ti mabalin nga awanan amma iti pagtaenganda.)
2. Mangitugot iti maysa wenno ad-adu pay a paris ti “Sapatos ni Tatang” iti klase. Pagsasaritaan no asino ti mangus-usar kadagitoy dadakkel a sapatos. Bay-an nga idilig dagiti ubbing ti rukod ti bukodda a sapatos wenno saka kadagiti dadakkel a sapatos. Bay-an nga agsisinnublat dagiti ubbing a magna nga us-usarenda ti “Sapatos ni Tatang.”
3. Sawen ti umuna a dua a binatog ti “I Lived in Heaven” (*Children’s Songbook*, p. 4).
Nagbiagak idiay langit nabayagen a panawen ti napalabas, pudno;
Nagbiagak idiay a kaduak dagiti am-ammok ken inayatko a tattao. Kasta met kadakayo.
(© 1987 ni Janeen Jacobs Brady. Naaramat nga addaan pammalubos.)
 - Asino ti kadennatayo a nagbiag idiay langit? (Ti Nailangitan nga Ama ken ni Jesus ken ti tunggal maysa.)

4. Tulongam nga aramiden dagiti ubbing dagiti garaw iti sumaganad a berso bayat ti panangisaom kadagiti balikas. Ulitem iti mamin-adu a gundaway no tarigagayam.

Patimbukel a tumakder ti tunggal maysa nga agiinniggem iti ima. Agiinniggem agingga a malpas ti aktibidad.

Nagkakaduatayo a nagbiag a kadenna ti Nailangitan nga Ama (*sangkamaysa nga agiinnasideg ti tunggal maysa, nga ipasango dagiti ima iti tengnga ti nagtimbukel*).

Imbaonnatayo tapno agbiag iti daga (*agwaras tapno dumakkel a maysa a nagtimbukel*).

Inikkannatayo iti pamilia nga agayat ken agisuro kadatayo (*agiinnasideg manen a sangkamaysa*).

Tulongandatayo dagiti pamiliatayo nga agbiag manen iti dennana (*agwaras tapno dumakkel a maysa manen a nagtimbukel*).

Makapagkararagak iti Nailangitan nga Ama

Adalen
4

Panggep

Tapno tulongan ti tunggal ubing a makasursuro no kasano ti agkararag iti Nailangitan nga Ama ken maammuanna nga isu ket dumngegto.

Panagsagana

1. Sikakararag nga adalen ti Daniel 6. Kitaen met iti *Pagbatayan ti Ebanghelio* (31110 864), maika-8 a paset.
2. Dagiti kasapulan:
 - a. Biblia.
 - b. Ladawan 1-9. Kararag iti Agsapa (62310 864); ladawan 1-10, Kararag ti Kaamaan (62275 864); ladawan 1-14, Ni Daniel iti Rukib dagiti Leon (Pakete ti Ladawan ti Arte ti Ebanghelio 117; 62096 864); ladawan 1-15, Panangbendision iti Taraon.
3. Aramidem dagiti nasken a panagsagana para kadagiti ania man nga aktibidad a mangpadur-as iti pannakaammo a kayatmo nga usaren.

Dagiti Aktibidad iti Pannakasursuro

Mangawis iti maysa nga ubing a mangted iti pangrugy a kararag.

Aktibidad a Pangawis
iti Panagdengngeg

Pagtalinaeden a nakatakder iti sango ti klase ti ubing a nangted iti pangrugy a kararag. Ipalagip kadagiti ubing nga iti napalabas nga adalen nasursuroda a nagbiagtayo a kadennatayo ti Nailangitan nga Ama sakbay a nayanaktayo. Imbaonnatayo ti Nailangitan nga Ama iti daga.

- Kasano a makasaritatayo ti Nailangitan nga Ama bayat ti kaddatayo iti daga?
- Asino ti kinasarsaritana (nagan ti ubing a nangted iti kararag) itay nagkararag?

Tulongan dagiti ubing a mangamiris a no agkararagtayo pudno a kasarsaritayo ti Nailangitan nga Ama.

Makapagkararagtayo iti Nailangitan nga Ama

Iburaymo ti pammaneknekmo nga uray pay no ditay makita isuna, makapagkararagtayo iti Nailangitan nga Ama ken denggenanto dagiti kararagtayo.

Ipakita ti ladawan 1-9, Kararag iti Agsapa.

- Ania ti ar-aramiden daytoy nga ubing a babai?
- Asino ti kasarsaritana?
- Ania iti panagkunayo ti mabalina nga ibagbaga daytoy nga ubing a babai iti Nailangitan nga Ama?

Usaren ti ladawan 1-9, Kararag iti Agsapa; ladawan 1-10, Kararag ti Kaamaan; ken ladawan 1-15, Panangbendision iti Taraon, bayat ti panangilawlawagmo kadagiti ubing dagiti gundaway no agkararagtayo. Ilawlawag a makapagkararagtayo iti Nailangitan nga Ama iti kaano man a kayattayo; dagiti gagangay unay

a gundaway ket no makariingtayo ken no maturogtayo, kadagiti oras ti panna-ngan, kadua ti pamiliatayo, ken no kasapulantayo ti naisangsangayan a tulong. Bay-am nga igganan dagiti ubbing dagiti maitutop a ladawan bayat ti panangilawlawagmo kadagitoy.

Sinuruannatayo ni Jesucristo nga Agkararag iti Nailangitan nga Ama

Ilawlawag a sinuruannatayo ni Jesus nga agaramid kadagiti umisu a banag no agkararagtayo. Bayat ti panagsaganatayo nga agkararag, panunotentayo ti maipapan iti Nailangitan nga Ama.

- Ania ti aramidentayo kadagiti takiagtayo no agkararagtayo?
- Ania ti aramidentayo kadagiti ulo ken matatayo no agkararagtayo?

Aktibidad

Ipatulad kadagiti ubbing dagiti garawmo bayat ti panangipakitam no kasano ti agsagana nga agkararag babaen ti panagdalikepkepyo, panagdumogyo, ken panagkidemyo. Kalpasanna mabalinmo a dawaten iti maysa nga ubbing a tumakder iti sango ti klase, ket patuladem kadagiti dadduma pay nga ubbing dagiti garawna bayat ti panangipakitana no kasano ti agsagana nga agkararag.

Kanta

Kagiddan dagiti ubbing, sawen dagiti balikas iti “A Prayer Song” (*Children’s Songbook*, p. 22) iti sumagmamano a gundaway. Aramiden dagiti garaw nga insingasing dagiti balikas ti kanta.

No agkararagtayo, agdumogtayo,
Agdalikepkeptayo,
Sa agkidemtayo,
Ket kasaritatayo ti Nailangitan nga Amatayo.

- Ania pay ti mabalintayo nga aramiden tapno makapagsagana nga agkararag?

Ilawlawag nga iti pagtaengan, no isaotayo dagiti kabukbukodan wenno sangapamiliaan a kararagtayo, saan laeng nga agdalikepkep, agdumog, ken agkidemtayo, ngem masansan nga agparintumengtayo pay.

Kanta

Ilawlawag nga adda dagiti naisangsangayan a banag a sawentayo no agkararagtayo. Isao dagiti balikas ti maikadua a berso ti “I Pray in Faith” (*Children’s Songbook*, p. 14) iti sumagmamano a gundaway. Paingato kadagiti ubbing ti maysa a ramay para iti tunggal maysa kadagiti uppat a naisangsangayan a banag nga isaotayo no agkararagtayo.

Mangrugiak iti “Patpatgek a Nailangitan nga Ama”;
Agyamanak kenkuana kadagiti parabur nga intedna;
Ket sipapakumbaba a dawatek kenkuana dagiti kasapulak,
Iti nagan ni Jesucristo, Amen.

(© 1987 by Janice Kapp Perry. Naaramat nga addaan pammalubos.)

- Kasano ti panangirugitayo kadagiti kararagtayo?
- Ania ti mabalin a pagyamanantayo iti Nailangitan nga Ama?
- Ania ti mabalin a dawotentayo iti Nailangitan nga Ama?
- Kasano ti panangileppastayo kadagiti kararagtayo?

Dumngeg Kadatayo ti Nailangitan nga Ama No Agkararagtayo

Estoria	<p>Ipakita ti ladawan 1-14, Ni Daniel iti Rukib dagiti Leon. Isalaysay ti estoria manipud iti Daniel 6. Basaen iti napigsa ti umuna a paset ti bersikulo 22 a mangilawlawag no apay a saan a nadangran ni Daniel bayat ti kaaddana iti rukib dagiti leon.</p> <p>Ilawlawag a kinayat ni Daniel ti agkararag gapu ta bilin daytoy manipud iti Nailangitan nga Ama ken gapu ta kinayatna pay ti agyaman iti Nailangitan nga Ama kadagiti bendisionna.</p> <ul style="list-style-type: none"> • Ania ti inaramid ti ari gapu ta nagkararag ni Daniel? (Kitaen iti Daniel 6:16.) • Ania ti napasamak ken ni Daniel iti rukib dagiti leon? (Kitaen iti Daniel 6:22.) • Kasano ti pannakaammoyo a dimngeg ti Nailangitan nga Ama iti kararag ni Daniel? (Kitaen iti Daniel 6:23.)
Pammaneknek	<p>Isaritam ti maysa a gundaway idi dimngeg ti Nailangitan nga Ama kadagiti kararagmo. Dawaten kadagiti ubbing a mangisarita iti ania man a padpadasda iti kararag.</p> <p>Ibagam kadagiti ubbing no kasano ti panagyamanmo gapu ta makapagkararagtayo iti Nailangitan nga Ama, ket ipanamnamam kadakuada a dumngeg kadatayo ti Nailangitan nga Ama no agkararagtayo.</p> <p>No dawatem iti maysa nga ubing a mangisao iti panggibus a kararag, subliem nga adalen no kasano nga agsaganatayo tapno agkararag.</p> <ul style="list-style-type: none"> • Ania ti aramidentayo tapno nakasagana nga agkararag? (Agdalikepkeptayo, agdumogtayo, ken agkidemtayo.) • Ania ti umuna a banag a nasken nga isao ni (nagan ti ubing) iti kararag? • Ania ti mabalina a pagyamanan ni (nagan ti ubing) iti Nailangitan nga Ama? • Ania ti mabalina a dawaten ni (nagan ti ubing) iti Nailangitan nga Ama? • Kasano ti panangileppas ni (nagan ti ubing) iti kararag?

Dagiti Aktibidad a Mangpadur-as iti Pannakaammo

- Pumili iti sumagmamano kadagitoy nga aktibidad tapno usaren bayat ti adalen.
1. Mangipasippaw iti maysa a nalukneng a banag, kas iti maysa a *beanbag* wenno bola, kadagiti ubbing. Kalpasan ti panangsippaw ti tunggal ubing iti banag, dawaten nga ileppasna ti binatangog a “No agkararagak, makapagyamananak iti Nailangitan nga Ama iti.” Mabalina a sungbatan ti ubing iti, “Pamilyiak.” No naaddaanen iti gundaway ti tunggal ubing, uliten ti aktibidad ket paibaga kadagiti ubbing dagiti banag a mabalinda a dawaten iti Nailangitan nga Ama no agkararagda. Mabalina nga ipakita dagiti ladawan tapno makatulong kadakuada nga agpanunot kadagiti kapununotan.
 2. Sawen dagiti balikas iti “A Song of Thanks” (*Children’s Songbook*, p. 20), nga ar-aramiden dagiti garaw a naipakita iti baba:

Agyamankam’ iti napintas a lubong (*pagsukogen dagiti ima iti patimbukel tapno mangibagi iti lubong*);

Agyamankam’ iti taraon a kanenmi (*agpammarang a mangisubsubo iti taraon iti bibig*);

Agyamankam' kadagiti tumatayab nga agkanta (*pagdekketen dagiti ramay ken tanyag tapno tuladen ti sippit ti tumatayab*);

Agyamankami kenka, Dios, iti amin a banag (*unnaten dagiti ima*)!
(Manipud iti *First Year Music* ni Hollis ken Dan. © 1957 ti D.C. Heath and Company. Naimaldit manen nga addaan pammalubos.)

3. Sawen ti berso ti "Agyamanak kadagiti Matak," nga itudtudo dagiti paset ti bagi bayat ti pannakadakamat dagitoy:
Agyamanak kadagiti matak,
Agong, bibig, ken lapayag;
Agyamanak kadagiti imak ken takiag,
Luppo, saka, ken ramay ti sakak.
(Naadaw manipud iti maysa a berso ni Lucy Picco.)
4. Paidrama kadagiti ubbing ti estoria ni Daniel iti rukib dagiti leon. Mabalimo ti mangitugot kadagiti simple a kawes (costume). No dimo kayat a paidrama ti sibubukel nga estoria, pagpammarangem dagiti ubbing nga isuda dagiti agngerngernerger a leon, ket kalpasanna ipakeppet dagiti bibigda a kasla sinerraan dagitoy ti maysa nga anghel.
5. Kantaen wenno sawen dagiti balikas iti "Thanks to Our Father" (*Children's Songbook*, p. 20) wenno "We Bow Our Heads" (*Children's Songbook*, p. 25).
6. Pagdrowingen dagiti ubbing iti ladladawan dagiti banag a mabalinda a pagyamanan iti Nailangitan nga Ama no agkararagda. Isurat ti *No agkararagak, makapagyamanak iti Nailangitan nga Ama iti*: iti tunggal ladawan.

Dagiti Mainayon nga Aktibidad para kadagiti Babbabassit nga Ubbing

1. Ipalagip kadagiti ubbing a no agkararagtayo kasarsaritatayo ti Nailangitan nga Ama, a mangipatpateg kadatayo ken dumngeg kadatayo. Tulongan dagiti ubbing a mangisao iti sumaganad a berso:
Ay-ayatek ti Nailangitan nga Amak;
Agyamanak kenkuana no agkararagak.
Ay-ayatennak ti Nailangitan nga Amak;
Denggenna dagiti banag nga ibagak.
2. Tulongan dagiti ubbing a mangisao iti maysa wenno agpada kadagiti sumaganad a berso, a mangiladladawan kadagiti maitutop a garaw:
Agdalikepkeptayo, agdumogtayo,
Agkidemtayo, nakasaganatayon.
Agdalikepkeptayo ken agdumogtayo,
Ket dumngeg bayat ti pannakaisao ti lualo.
3. Paugedan ti lawlaw ti ima ti tunggal ubing iti maysa a panid ti papel. Pagsasaritaan no ania ti nasken nga aramidentayo kadagiti takiag ken imatayo bayat ti panagkararagtayo. Bay-an a koloran dagiti ubbing dagiti uges ti imada. Suratniti nagan ti ubing ti tunggal ladawan.

Anak ti Nailangitan nga Ama Ni Jesucristo

Adalen
5

Panggep

Tapno tulongan ti tunggal ubing a makaawat nga anak ti Nailangitan nga Ama ni Jesucristo.

Panagsagana

1. Sikakararag nga adalen ti Mateo 3:13–17 ken Lucas 1:26–35; 2:1–7, 41–52. Kitaen met iti *Pagbatayan ti Ebanghelio* (31110 864), maika-3 a paset.
2. Babaen ti pammalubos ti presidenteyo iti Primary, awisem ti ama ti maysa kadagiti ubbing nga umay iti klase tapno isaritana maipapan ti anakna idi maladaga pay la daytoy. Dawaten kenkuana a mangitugot kadagiti retrato ken maysa a paggugusto nga ay-ayam, no mabalin. Allukoyem nga ipeksana ti ayatna para iti anakna.
3. Dagiti kasapulan:
 - a. Biblia.
 - b. Ladawan 1-16, Ti Pannakayanak (Pakete ti Ladawan ti Arte ti Ebanghelio 201; 62495 864); ladawan 1-17, Ni Ubing a Jesus iti Templo (Pakete ti Ladawan ti Arte ti Ebanghelio; 62500 864); ladawan 1-18, Ni Juan Bautista a Mangbumbuniag ken ni Jesus (Pakete ti Ladawan ti Arte ti Ebanghelio 208; 62133 864).
4. Aramidem dagiti nasken a panagsagana para kadagiti ania man nga aktibidad a mangpadur-as iti pannakaammo a kayatmo nga usaren.

Palagip iti mannursuro: Bayat ti panagsasaritayo maipapan kadagiti amma iti daytoy nga adalen, agbalinka a managrikna iti asino man nga ubbing iti klasem nga awan ammada iti pagtaenganda. Yunay-unay nga addaantayo *amin* iti Nailangitan nga Ama a mangipatpateg kadatayo. No adda kadagiti ubbing iti klasem ti adda agsiuman kadakuada, ilawlawag nga ay-ayatendatayo met dagiti agsiuman ken ay-aywanandatayo.

Dagiti Aktibidad iti Pannakasursuro

Mangawis iti maysa nga ubing a mangted iti pangrugji a kararag.

Aktibidad a Pangawis iti Panagdenggeg

Saludsoden kadagiti ubbing no am-ammoda ti sangaili. Awisen ti anak ti sangaili a mangyam-ammo kenkuana iti klase. Paisarita iti ama kadagiti ubbing maipapan iti anakna. Awisen ti tunggal ubing a mangisarita iti maysa a banag maipapan iti amana, kas iti maris ti buokna wenno ti pagtrabahuanna.

Ni Jesucristo ti Anak ti Nailangitan nga Ama

Ibaga kadagiti ubbing a dua ti ama ti tunggal maysa kadakuada: maysa a nainda-gaan nga ama ken maysa a Nailangitan nga Ama. Ti amatayo iti daga isu ti ama dagiti pisikal a bagitayo. Ti Nailangitan nga Ama isu ti ama dagiti espiritu iti uneg dagiti bagitayo. Maysa laeng ti ama ni Jesus, gapu ta ti Nailangitan nga Ama ti ama ti espiritu ni Jesus ken ti pisikal a bagina. Isu a ni Jesus ket naawagan nga Anak ti Dios.

Estoria Ipakita ti ladawan 1-16, Ti Pannakayanak, ket isalaysay ti estoria ti pannakayanak ni Jesus, a masarakan iti Lucas 1:26–35 ken 2:1–7. Yunay-unay a ti anghel ti nangibaga ken ni Maria nga agbalinto nga Anak ti Dios ti maladagana. Agibasar iti ladawan bayat ti panangdamag kadagiti sumaganad a saludsod:

- Asino ditoy ti ina ni Jesus?
- Ania ti naganna? (Kitaen iti Lucas 1:27.)
- Asino ti lalaki iti ladawan? (Kitaen iti Lucas 1:27.)
- Asino ti ama ni Jesus? (Ti Nailangitan nga Ama. Maysa a nasayaat a tao ni Jose a pinili ti Nailangitan nga Ama a mangaywan kada Maria ken Jesus.)

Kanta Patakderen dagiti ubbing ket pakanta wenno paisao dagiti balikas iti “Away in a Manger” (*Children’s Songbook*, p. 42). Mangparnuay kadagiti maitutop a garaw ti ima ken takiag kas isingasing dagiti balikas.

Iti kulluong, awan ti konana,
 Ni bassit nga Apo Jesus nagidda;
 Bituen ‘diay langit nangsilaw kenkuana,
 Ni Apo Jesus garami’t iddana.

Ay-ayaten ni Jesus ti Nailangitan nga Ama ken Agtungtungpal kenkuana

Estoria Ipakita ti ladawan 1-17, Ni Ubing a Jesus iti Templo, ket isalaysay ti estoria maipapan ken ni Jesus iti templo, a masarakan iti Lucas 2:41–52. Yunay-unay a napan ni Jesus iti templo gapu ta ay-ayatenna ti Nailangitan nga Ama ket kayatna a sursuruan dagiti tao maipapan kenkuana.

- Ania ti ar-aramiden ni Jesus iti templo? (Kitaen iti Lucas 2:46.)

Aktibidad Patakderen dagiti ubbing ket paaramid ti sumaganad a berso ti aktibidad iti sumagmamano a gundaway:

Ni ubing a Jesus napan iti templo (*magna iti nagtakderan*)
 Sakbay a dimmakel a napigsa ken natayag (*unnaten dagiti takiag nga agpangato*)
 Tapno aramiden ti trabaho ti Amana (*unnaten dagiti ima*)
 Gapu ta ay-ayatennatayo amin (*arakupen ti bagi*).

Estoria Ipakita ti ladawan 1-18, Ni Juan Bautista a Mangbumbuniag ken ni Jesus, ket isalaysay ti estoria maipapan iti panagbuniag ni Jesus, a masarakan iti Mateo 3:13–17. Ilawlawag a nabuniagan ni Jesus gapu ta ay-ayatenna ti Nailangitan nga Ama ket kayatna ti agtungtungpal kenkuana. Kayat pay ni Jesus ti mangipakita iti nasayaat a pagwadan para kadatayo. Basaen iti napigsa ti bersikulo 17 (a mangrugi iti *Daytoy ti dungdunguek nga Anak*), ket ilawlawag a balikas dagitoy ti Nailangitan nga Ama. Naragsakan ti Nailangitan nga Ama a nabuniagan ni Jesus.

- Nakakitakayo kadin iti maysa a tao a mabuniagan?
- Ilawlawag a ti maysa a wagas a mabalin a panagtungtungpal dagiti ubbing iti Nailangitan nga Ama ken ipakita kenkuana nga ay-ayatenda isuna ket babaen ti panagpabuniagda no agtawendan iti walo.

Pammaneknek Iburaymo ti pammaneknekmo a ni Jesucristo ti anak ti Nailangitan nga Ama. Ipeksam ti ayatmo ken ni Jesus ken agyamanka kenkuana.

Dagiti Aktibidad a Mangpadur-as iti Pannakaammo

Pumili iti sumagmamano kadagitoy nga aktibidad nga usaren bayat ti adalen.

1. Ipan a nakapakleb iti saklotmo wenno iti lamisaan ti tallo a ladawan manipud iti adalen. Mangawis iti maysa nga ubing a pumili iti maysa kadagiti ladawan, ipakita daytoy iti klase, ket isalaysay ti estoria a nailadawan. Aramiden ti kastoy iti sabali pay a dua a ladawan.
2. Pakanta wenno paisao kadagiti ubbing dagiti balikas iti umuna a berso ti "Tell Me the Stories of Jesus" (*Children's Songbook*, p. 57).
3. Paidrama kadagiti ubbing ti estoria maipapan iti pannakayanak ni Jesus, nga usaren dagiti simple a *props* kas iti maysa a munieka, abbong dagiti babbai (shawl), wenno dagiti dekolor a dadakkel a panio (scarf).

Dagiti Mainayon nga Aktibidad para kadagiti Babbassit nga Ubbing

1. Ipakita ti ladawan 1-16, Ti Pannakayanak, ket saludsoden kadagiti ubbing no asino ti maladaga iti ladawan. Isaritam kadakuada ti maipapan iti pannakayanak ni Jesus.

Ilawlawag a saanen a maladaga pay ni Jesus. Dakkelen ita ket isu ti kapatgan a katulongan ti Nailangitan nga Ama. Ipakita ti ladawan 1-3, Ni Jesus a Cristo, ket ibaga kadagiti ubbing nga ay-ayatennatayo ni Jesus ken tultulongannatayo iti adu a wagas.

2. Patakderen dagiti ubbing ken pakanta dagiti sumaganad a balikas iti ayug ti "Once There Was a Snowman" (*Children's Songbook*, p. 249). Usaren dagiti panagkummog a garaw para iti umuna a berso ken panagunnat para iti maikadua a berso.

Maysaak idi a maladaga.

Bassit idi a maladaga.

Dumakdakkell a dumakdakkellak,

Tumaytayag a tumaytayagak!

3. Ipasakbay a kasaritam dagiti nagannak dagiti miembro ti klasem tapno makaala kadagiti ladawan dagiti miembro ti klase idi maladagada pay laeng ken dagiti ay-ayam nga inay-ayamda idi. Ipakitam dagitoy iti klase. Lasinen ti maladaga iti tunggal ladawan wenno ti akinkukua iti tunggal ay-ayam. Ilawlawag nga idi maladagada pay laeng, dagiti ubbing ket karuprupada dagiti adda iti ladawan ken nagay-ayam kadagiti ay-ayam.

Ay-ayatennak ti Nailangitan nga Ama ken ni Jesucristo

Panggep

Tapno tulongan ti tunggal ubing a makarikna nga ay-ayaten ti Nailangitan nga Ama ken ni Jesucristo ti tunggal maysa kadayo.

Panagsagana

1. Sikakararag nga adalen ti Marcos 10:13–16; Juan 3:16; ken 3 Nephi 17:11–12, 21–24.
2. Dagiti kasapulan:
 - a. Biblia ken Libro ni Mormon.
 - b. Maysa a bassit a sarming.
 - c. Ladawan 1-1, Ti Lubong (62196 864); ladawan 1-3, Ni Jesus a Cristo (Pakete ti Ladawan ti Arte ti Ebanghelio 240; 62572 864); ladawan 1-4, Ti Umuna a Parmata (Pakete ti Ladawan ti Arte ti Ebanghelio 403; 62470 864); ladawan 1-19, Ni Cristo ken dagiti Ubbing (Pakete ti Ladawan ti Arte ti Ebanghelio 216; 62467 864); ladawan 1-20, Ni Jesus a Mangbembendision kadagiti Ubbing a Nephite.
3. Aramidem dagiti nasken a panagsagana para kadagiti ania man nga aktibidad a mangpadur-as iti pannakaammo a kayatmo nga usaren.

Dagiti Aktibidad iti Pannakasursuro

Mangawis iti maysa nga ubing a mangted iti pangrugi a kararag.

Aktibidad a Pangawis iti Panagdengngeg

Saggaysa nga alamanuen dagiti ubbing. Sawem ti nagan ti tunggal ubing ket ibagam iti tunggal maysa ti maysa a banag a magustuam maipapan kenkuana.

Dawaten iti tunggal ubing a mangibaga iti nagan ti maysa a tao a mangipatpateg kenkuana ket ibagana no ania ti ar-aramiden dayta a tao a mangiparparikna kenkuana nga isu ket maipatpateg.

Ilawlawag a daytoy nga adalen ket maipapan iti dua a tao a mangipatpateg kadayo amin. Intedda kadayo daytoy napintas a lubong ken ti ebanghelio ken ti Simbaan.

- Asino dagitoy dua a tao a mangipatpateg iti amin? (Ti Nailangitan nga Ama ken ni Jesucristo.)

Estoria

Ipakita ti ladawan 1-4, Ti Umuna a Parmata. Patulonganka kadagiti ubbing a mangisalaysay iti estoria ti no ania ti mapasasamak iti ladawan.

- Malagipyo kadi no asino dagiti tattao iti daytoy a ladawan?
- Ania ti ar-aramidenda?

Mangmangted Kadayo ti Nailangitan nga Ama ken ni Jesucristo kadagiti Parabur

Ipalagip kadagiti ubbing a sakbay nga immaytayo iti daga, nagbiagtayo a kadenna ti Nailangitan nga Ama ken ni Jesucristo. Plinanoda nga umaytayo iti daga tapno makasursuro ken dumur-astayo. Am-ammodatayo ken ipatpategdatayo.

Iparang ti ladawan 1-1, Ti Lubong.

- Ania ti dinawat ti Nailangitan nga Ama ken ni Jesucristo a parsuaenna para kadatayo?

Ilawlawag a binilin ti Nailangitan nga Ama ni Jesus a parsuaenna ti daga ken ti amin a banag nga adda ditoy. Tulongan dagiti ubbing a makaawat a plinano ti Nailangitan nga Ama ken ni Jesus ti amin a banag a kasapulantayo tapno agbiag ken agragsaktayo. Dagitoy a banag ti mangipalagip kadatayo iti ayatda para kadatayo.

- Ania dagiti banag ti mangipalagip kadakayo iti ayat kadakayo ti Nailangitan nga Ama ken ni Jesus? (Mabalin nga ibilang a sungbat dagiti banag a kas pamilia, gagayyem, ti Simbaan, mulmula, ken dagiti ayup.)

Kanta

Kantaen wenna basaen dagiti balikas iti “My Heavenly Father Loves Me” (*Children’s Songbook*, p. 228), nga usaren dagiti garaw a naipakita iti baba. Kalpasanna dawaten kadagiti ubbing a tumakder ket kantaenda ti kanta a kagid-dandaka.

No mangngegak (*ikabil a nakasukog dagiti ima iti lapayag*) kanta ti billit (*ukraden ken keppeteng dagiti ramay a kas iti sippit ti maysa a billit*)
Wenna kumita (*tumangad*) iti langit (*ingato dagiti takiag iti garaw nga immarko*),
No mariknak tudo ‘ti rupak (*agaramid kadagiti kasla tudo a garaw babaen dagiti ramay*)
Wenna ti puyupoy ti angin (*agsublisubli a yindayog dagiti ima*),
No masay-opko banglo ti rosas (*agpammarang a sagiden wenna angoten ti sabong*)
Wenna labsak kayo a lilac (*magna iti pagtaktakderan*),
Naragsakak ta agbibigay ito’y a lubong
A pinarsua’t Ama’t Langit para kaniak (*unnaten dagiti ima ken takiag*).

Ipakita ti ladawan 1-3, Ni Jesus a Cristo.

- Asino daytoy?
- Asino ti ama ni Jesus?

Basaen ti umuna a paset ti Juan 3:16 (agingga iti *Anak*) ket ilawlawag a ti kaindakanan a bendision nga inted kadatayo ti Nailangitan nga Ama ket ti panangibaonna ken ni Jesucristo iti daga.

Impakita ni Jesus ti Ayatna kadagiti Ubbing

Estoria

Ipakita ti ladawan 1-19, Ni Cristo ken dagiti Ubbing. Isalaysay ti estoria ni Jesus a mangbendision kadagiti ubbing, a masarakan iti Marcos 10:13–16.

Ilawlawag a nangipaay ni Jesus iti panawen nga ayaten ken bendisionanna dagiti ubbing uray pay no pinanunot ti sumagmamano kadagiti pasurotna a saan a masapul a singaen isuna dagiti ubbing.

- Ania ti inaramid ni Jesus idi immay dagiti ubbing? (Kitaen iti Marcos 10:16.)
- Ania iti panagkunayo ti narikna dagiti ubbing maipapan ken Jesus?

Kanta

Kagiddan dagiti ubbing, sawen dagiti balikas iti “Jesus Loved the Little Children” (*Children’s Songbook*, p. 59).

Inayat ni Jesus dagiti babassit nga ubbing,
Babassit nga ubbing a kas kaniak.
Bendisionan ken tulonganna ida
Ken innalana ida iti saklotna.

Estoria	<p>Ipakita ti ladawan 1-20, Ni Jesus a Mangbembendision kadagiti Ubbing a Nephite. Ilawlawag a kalpasan ti ipapatay ni Jesus, sinarungkaranna dagiti tao iti America. Adayo ti America iti lugar a nagnaedan ni Jesus iti daga.</p> <p>Isalaysay ti estoria ni Jesus a mangbembendision kadagiti ubbing a Nephite, a masarakan iti 3 Nephi 17:11–12, 21–24. Ilawlawag a saggaysa a binendisionan ni Jesus dagiti ubbing.</p> <ul style="list-style-type: none"> • Kasano nga impakita ni Jesus ti ayatna kadagiti ubbing? • Kasano ti pannakaammoyo nga ay-ayatennakayo ni Jesus?
Aktibidad	<p>Isao ti sumaganad a berso a kagiddan dagiti ubbing iti sumagmamano a gundaway, nga aramiden dagiti garaw a naipakita:</p> <p>Ay-ayaten ni Jesus ti Amin nga Ubbing</p> <p>Ay-ayaten ni Jesus ti amin nga ubbing (<i>unnaten dagiti takiag</i>), Dagiti babassit nga ubbing (<i>usaren ti ima a mangipakita iti nakabasbassit nga ubing</i>), Ti maladaga iti indayon (<i>agaramid iti indayon babaen dagiti takiag</i>), Dagiti ubbing a dadakel ken natatayag (<i>ingato dagiti ima iti ngatuen ti ulo</i>). (Manipud iti <i>Finger Fun for Little Folk</i> ni Thea Cannon. © 1949 ti Standard Publishing Company, Cincinnati, Ohio. Naaramat nga addaan pammalubos.)</p> <p>Ay-ayaten ti Nailangitan nga Ama ken ni Jesucristo ti Tunggal Maysa Kadatayo</p> <p>Tulongan dagiti ubbing a makaawat no kasano ti kinapateg ti tunggal maysa kada-kuada iti Nailangitan nga Ama ken ni Jesus. Ilawlawag nga ay-ayaten ti Nailangitan nga Ama ken ni Jesus ti tunggal maysa kadatayo ken am-ammonatayo iti nagan.</p>
Aktibidad	<p>Igganan ti maysa a sarming ket saggaysa a paasitgen dagiti ubbing. Bayat ti yaa-sideg ti tunggal ubing ken kumita iti sarming, sawen ti “Daytoy ni (nagan ti ubing), ket ay-ayaten unay ti Nailangitan nga Ama ken ni Jesus ni (nagan ti ubing).”</p>
Pammaneknek	<p>Iburaymo ti pammaneknekmo a sibibiag ti Nailangitan nga Ama ken ni Jesucristo ket ay-ayatenda ti tunggal maysa kadatayo. Ipeksam ti riknam iti panagyamanmo kadagiti adu a parabur nga inted kenka ti Nailangitan nga Ama ken ni Jesus.</p>

Dagiti Aktibidad a Mangpadur-as iti Pannakaammo

- Pumili iti sumagmamano kadagitoy nga aktibidad nga usaren bayat ti adalen.
1. Kantaen wenno sawen dagiti balikas iti “Jesus Is Our Loving Friend” (*Children’s Songbook*, p. 58). Ikkan ti tunggal ubing iti maysa a kopia ti “Jesus Is Our Loving Friend” (iti ungo ti adalen), ket bay-an a koloran dagiti ubbing dagiti naibunong a papelda.
 2. Kantaen wenno sawen dagiti balikas iti “I Know My Father Lives” (*Children’s Songbook*, p. 5) wenno “I Feel My Savior’s Love” (*Children’s Songbook*, p. 74).
 3. Ipakita dagiti ladawan dagiti banag nga inted kadatayo ti Nailangitan nga Ama ken ni Jesus, kas iti maysa a templo, dagiti ayup, sabsabong, pamilia, taraon, gagayyem, pagtaengan, maysa a balay a pagtataripnongan, wenno dagiti

nasantuan a kasuratan. (Mabalin a magun-od dagiti ladawan manipud iti biblioteka ti balay a pagtataripnongan, ti Pakete ti Ladawan ti Arte ti Ebanghelio wenno dagiti magasin ti Simbaan.) Tulongan dagiti ubbing a makaawat nga inted ti Nailangitan nga Ama ken ni Jesus dagitoy a banag kadatayo gapu ta ay-ayatendatayo.

4. Mangitugot iti maysa a banag, kas iti awan nagyanna a botelia ti inumen, a mabalin a mapuligos a kas pagitudo. Pagtugawen dagiti ubbing iti suelo iti pasirkulo ket ikabil ti botelia ti tengnga ti sirkulo. Puligosen ti botelia iti suelo. No nakatudo daytoy iti maysa nga ubing, nasken a manginagan dayta nga ubing iti maysa a banag nga inted kadatayo ti Nailangitan nga Ama ken ni Jesus a mangipakita iti panagayatda kadatayo. Tulongan ti tunggal ubing a mangpanunot iti maysa a sungbat no gundawaynan daytoy. Kalpasan a sumungbat ti ubing, papuligos kenkuana ti botelia tapno iti kasta maitudona iti sabali nga ubing.
5. Mangisagana iti maysa a kahon wenno supot a naglaon iti sumagmamano a banag a kasapulan tapno agbiagtayo iti daga, kas iti taraon, danum, wenno luplupot. Ilawlawag a plinano ti Nailangitan nga Ama ken ni Jesus daytoy a daga tapno pagyanantayo. Ilawlawag a naglaon ti kahon wenno supot iti sumagmamano kadagiti banag a kasapulantayo tapno agbiag iti daga. Ikkang dagiti ubbing iti pangibagnos (clue) maipapan iti maysa a banag agingga a mapugtuanda no ania daytoy. No mapugtuanda daytoy, ikkaten dayta a banag manipud iti kahon wenno supot. Ituloy ti ay-ayam agingga a mapugtuang dagiti ubbing amin dagiti banag.
6. Agaramid iti etiketa a mangibagbaga iti *Ay-ayatennak ti Nailangitan nga Ama ken ni Jesus* para iti tunggal ubing tapno maisuot wenno mayawid. Mabalinmo nga ipigket ti etiketa iti bado ti tunggal ubing wenno ikkan iti linas ti etiketa ket ikuentas daytoy iti ubing. Mabalin a kayatmo nga ilemmeng dagiti etiketa iti baba ti tugaw dagiti ubbing sakbay nga agklase ket bay-an a sapulen dagitoy dagiti ubbing.

Dagiti Mainayon nga Aktibidad para kadagiti Babbassit nga Ubbing

1. Tulongan dagiti ubbing a mangisao kadagiti balikas ken mangaramid kadagiti garaw iti sumaganad a berso:

No nakataytayagka (*yunnat ken ingato dagiti takiag*),
Adda lugar iti simbaan para kenka.
No nakabasbassitka (*agkummog*),
Adda lugar iti simbaan para kenka.

Natayag (*agunnat*),
Bassit (*agkummog*),
Natayag (*agunnat*),
Bassit (*agkummog*)—
Ay-ayatennatayo amin ti Nailangitan nga Ama ken Jesus.
2. Isao ti sumaganad a berso ket tulongan dagiti ubbing a mangaramid kadagiti garaw a naipakita:

Am-ammonak ti Nailangitan nga Ama

Am-ammonak ti Nailangitan nga Ama (*itudo ti bagi*)

Ken ti kayatko nga aramiden.

Ammona ti naganko ken ti pagnaedak (*agaramid iti atep babaen ti panamagdekket kadagiti murdong ti ramay ti agpada nga ima*).


Ammok nga ay-ayatennak met (*pagkrusen dagiti takiag ket iparabaw dagiti ima iti abaga nga ipaarakup*).

Ammona no ania ti mangparagsak kaniak (*ikabil dagiti ramay iti umis-isem a bibig*).

Ammona no ania ti mangpaliday kaniak (*ikabil dagiti ramay iti nakamisuot wenno naliday a bibig*).

Ammok a kayatna a tulongannak (*itudo ti bagi*).

Ket dayta ti mangparagsak kaniak!



Ni Jesus ti Managayat a Gayyemtayo

Panggep

Tapno tulongan ti tunggal ubing a makaawat a tultulongannatayo ti Espiritu Santo.

Panagsagana

1. Sikakararag nga adalen ti Juan 14:16–17; 2 Nephi 32:5; Moroni 10:4–5; ken Doktrina ken Katulagan 39:23; 130:22. Kitaen met iti *Pagbatayan ti Ebanghelio* (31110 864), maika-7 a paset.
 2. Dagiti kasapulan:
 - a. Biblia ken kopia ti Doktrina ken Katulagan.
 - b. Maysa a pamiliar a banag ken maysa a supot a pangikabilan iti daytoy.
 - c. Ladawan 1-3, Ni Jesus a Cristo (Pakete ti Ladawan ti Arte ti Ebanghelio 240; 62572 864); ladawan 1-4, Ti Umuna a Parmata (Pakete ti Ladawan ti Arte ti Ebanghelio 403; 62470 864).
 3. Aramidem dagiti nasken a panagsagana para kadagiti ania man nga aktibidad a mangpadur-as iti pannakaammo a kayatmo nga usaren.
-

Dagiti Aktibidad iti Pannakasursuro

Mangawis iti maysa nga ubing a mangted iti pangrugi a kararag.

Aktibidad a Pangawis iti Panagdengngeg

Paasitgem ti maysa nga ubing kenka. Yarasaasmo iti lapayagna ti maysa a banag maipapan iti Espiritu Santo, kas iti “Tultulongan ti Espiritu Santo ti Nailangitan nga Ama ken ni Jesus.” Ulitem iti tunggal ubing iti klase (mabalinmo a sawen ti isu met laeng a banag iti tunggal ubing). Damagem kadagiti ubbing no ammoda no asino ti pagsasaritaanyo ita nga aldaw. Ilawlawagmo a pagsasaritaanyo ti maipapan iti katulongan ti Nailangitan nga Ama ken ni Jesus, ti Espiritu Santo.

Ipakita ti ladawan 1-4, Ti Umuna a Parmata. Itudo ti Nailangitan nga Ama ken ni Jesus ket ilawlawag nga addaanda iti pisikal a bagi a kapada ti bagitayo. Ilawlawag a kapada ti Espiritu Santo ti Nailangitan nga Ama ken ni Jesus iti adu a wagas. Ay-ayatennatayo ken tultulongannatayo. Ngem awanan daytoy iti pisikal a bagi a kapada ti Nailangitan nga Ama ken ni Jesus. Isu ket maysa nga espiritu tapno siuu-limek a maikabilna dagiti kapanunotan iti isiptayo ken maikkannatayo iti rikna ti kinaragsak ken liwliwa.

Ikkannatayo ti Espiritu Santo iti Liwliwa ken Tulong

- No nasaktan wenno nalidayka, kasano a liwliwaen ken pasayaaten ni nanang wenno ni tatangmo ti riknam?

Ipakita ti ladawan 1-3, Ni Jesus a Cristo. Ibaga kadagiti ubbing nga ammo ni Jesus a dagiti disipulo, dagiti katulonganna, ket malidayandanto no isu ket matay, isu nga imbagana kadakuada a dawattennanto iti Nailangitan nga Ama a mangibaon iti maysa a Mangliwliwa a mangtulong kadakuada tapno saan unay a naliday ti riknada (kitaen iti Juan 14:16–17).

Ibaga kadagiti ubbing a daytoy a Mangliwliwa ket ti Espiritu Santo, ket maliwliwanatayo met. Ilawlawag a no malidliwayan wenno maup-upaytayo, tulongannatayo ti

Nailangitan nga Ama babaen ti panangibaonna iti Espiritu Santo a mangliwiwa kadatayo.

Estoria

llawlawag a maballaagannatayo ken matarabaynatayo pay ti Espiritu Santo no kasapulantayo ti tulong. Isalaysay iti bukodmo a balikas ti sumaganad nga estoria maipapan iti ubing a ni Harold B. Lee, a nagbalin a maikasangapulo-ket-maysa a Presidente ti Simbaan:

“Nalabit nga agtawenak idi iti walo, wenna ub-ubingak pay, idi intugotnak ni tatangko iti maysa a taltalon nga adayo iti pagtaenganmi. Bayat ti panagtrabahona pinadasko a kinumikom ti bagik iti panagaramid kadagiti banag a magustuan nga aramiden ti maysa nga ubing. Napudot dayta nga aldaw ken natapok ket nagay-ayamak iti aglawlaw agingga a nabannogak. Iti bangir ti alad adda maysa a daan a nadadael nga abong a kasla nakaay-aywak unay. Iti panunotko, impagarupko a maysa a kastilio daytoy a dadael nga abong a kayatko a sukisoken, isu a napanak iti alad ket rinugiak a kalay-aten tapno makapanak iti dayta nga abong. Adda nangngegak a timek a mangibagbaga iti daytoy nakapatpateg a banag, ‘Harold, saanka a mapan idia.’ Kinitak ti aglawlaw tapno kitaek no asino ti umaw-awag iti naganko. Adayo ni tatangko, adda iti bangir nga ungto ti taltalon. Dina makita no ania ti ar-aramidek. Awan ti makitak nga agsarsarita. Idin naamirisko nga adda maysa a diak makita a magbalballaag kaniak a diak mapan idia. No ania man ti adda idia diakto pulos maammuan, ngem naammuak a nasapsapa nga adda dagiti ditayo makitkita a mabalin a makisarita kadatayo” (iti Conference Report, Mexico City, Mexico Area Conference 1972, pp. 48–49).

llawlawag a no dadduma agyar-arasaas iti napigsa ti Espiritu Santo kas iti inaramidna ken ni Presidente Lee, ngem masansan nga ikkannatayo laeng iti panagrikna maipapan no ania ti nasken wenna ti saan a nasken nga aramidentayo.

Tultulongannatayo ti Espiritu Santo a Mangammo No Ania ti Nasayaat

llawlawag nga ay-ayatennatayo ti Espiritu Santo ken tultulongannatayo nga agpili iti nasayaat. Pagpanunoten dagiti ubbing iti sumagmamano a banag nga inaramiddan a naimbag, kas iti panagtungpal kadagiti nagannak kadakuada, panangtulong kadagiti dadduma, ken panangisao kadagiti kararagda.

- Kasano ti panagriknayo no ar-aramidenyo dagiti banag a nasayaat?
- Kasano ti panagriknayo no ar-aramidenyo dagiti banag a dakes?

llawlawag a tultulongannatayo ti Espiritu Santo a mangammo ti paggidiatan ti nasayaat ken dakes babaen ti panangtedna kadatayo iti nasayaat, nabara a rikna no agaramiddayo iti maysa a banag a naimbag ken naliday a rikna no agaramiddayo iti maysa a banag a dakes.

Paisarita kadagiti ubbing dagiti gundaway a nakariknaanda iti nasayaat, nabara a rikna gapu ta nakapagpilida iti nasayaat wenna nakatulongda iti maysa a tao. Tulongan ida a mangbigbig iti impluensia ti Espiritu Santo.

Kanta

Kagiddan dagiti ubbing, isao dagiti balikas iti “Listen, Listen” (*Children’s Songbook*, p. 107).

Dumngeg iti naalumamay ken bassit a timek!
Dumngeg! Dumngeg!
No agpilikayo.
Kanayon a tarabayennakayo.

Tulongannatayo ti Espiritu Santo a Mangammo a Pudno ti Nailangitan nga Ama ken ni Jesucristo

Ilawlawag a matulongannatayo ti Espiritu Santo a mangammo no agpayso wenna pudno ti maysa a banag. Ipakita kadagiti ubbing ti maysa a supot nga adda nagyanna a maysa a banag. Ibagam kadagiti ubbing nga adda maysa a banag a nagyan iti supot, ngem dimo ipakpakita ti banag kadakuada.

- Adda kadi nagyan iti daytoy a supot?

Ilawlawag nga uray pay di makita dagiti ubbing ti adda iti uneg ti supot, ammoda nga adda nagyanna gapu ta imbagam kadakuada nga adda nagyan iti daytoy. Uray no sumagmamano laeng a tattao ti nakakita iti Nailangitan nga Ama ken ni Jesus, matulongannatayo ti Espiritu Santo a mangammo a pudno ti Nailangitan nga Ama ken ni Jesus ken ay-ayatendatayo. Ilawlawag a maaw-awagan daytoy a pannakaammo iti pammaneknek. No dadduma iburay dagiti tao ti pammaneknekda kadagiti miting ti Simbaan ket ibagada kadaytoy nga ammoda a sibibiag ni Jesus. Tinulongan ida ti Espiritu Santo a nangammo a pudno daytoy.

Makaawattayo iti Sagut ti Espiritu Santo

Isaritam ti padasmo iti panagpabuniag ken panagpakompirma. Isaritam no kasano ti panagriknam idi ipatay dagiti lallaki nga addaan iti priesthood dagiti imada iti ulom ket intedda kenka ti sagut ti Espiritu Santo.

Basaen iti napigsa ti Doktrina ken Katulagan 39:23 agingga iti *Espiritu Santo*. Ilawlawag a no agtawen dagiti ubbing iti walo ken mabuniagan ken makompirmaan, maawatdanton ti sagut ti Espiritu Santo. Ti sagut ti Espiritu Santo ti tumulongto kadakuada a mangtungpal kadagiti kari nga aramidenda no mabuniaganda.

Pammaneknek

Ipeksam ti panagyamanmo para iti Espiritu Santo ket ibagam kadagiti ubbing no kasano a liniwliwanaka ti Espiritu Santo ken tinulongannaka a nangammo no ania ti umno.

Dagiti Aktibidad a Mangpadur-as iti Pannakaammo

Pumili iti sumagmamano kadagitoy nga aktibidad nga usaren bayat ti adalen.

1. Tulongam dagiti ubbing a mangkanta wenna mangisao kadagiti balikas iti “The Holy Ghost” (*Children’s Songbook* p. 105).
2. Ipakita dagiti ladawan ti tattao nga agar-aramid kadagiti nasayaat a banag, kas iti panangibinglay ken panangtulong iti tunggal maysa. Saludsoden kadagiti ubbing no kasano ti panagriknada no agaramidda kadagiti nasayaat a banag. Iladawan kadagiti ubbing ti sumagmamano a kasasaad dagiti tao nga agar-aramid kadagiti nasayaat ken dakes a banag, kas iti panangtulong kadagiti innada, pannakiapa kadagiti kakabsatda a lallaki, panangipaay-ayam kadagiti ay-ayamda, ken panagsukir kadagiti nagannak kadakuada. Paisemen dagiti ubbing no ti garaw ket nasayaat ken pagmisuoten ida no ti garaw ket saan a nasayaat.
3. Iti nalanay a timek, sawen ti “Tunggal maysa a makangngeg iti timekko, ikabilyo ti ramayyo iti agongyo. Tunggal maysa a makangngeg iti timekko, ikabilyo ti imayo iti uloyo.” Itultuloy, a dakamaten ti dadduma pay a paset ti bagi, agingga a dumdumnggeg ti amin nga ubbing iti nalanay a timekmo. Ilawlawag nga uray no

agsarsaritaka a silalanay, no dumnggeg dagiti ubbing, mangngegda ti timekmo ken matungpalda dagiti pangiturongmo. Ilawlawag a makisarita ti Espiritu Santo kadatayo iti nalanay a timek. No dumnggegtayo a nasayaat ibagana kadatayo dagiti napapateg a banag.

4. Isalaysay iti bukodmo a balikas ti sumaganad nga estoria maipapan ken ni Presidente Wilford Woodruff, ti maikapad a Presidente ti Simbaan:

Maysa a rabii bayat ti panagbaniaga ni Presidente Woodruff, ti asawana, ken ti uppat nga annakda, nagsardengda tapno makiturog iti balay ti maysa a gayyemda. Tallo kadagiti ubbing ti naturog iti balay idinto ta naturog ni Presidente Woodruff, ti asawana ken ti maysa nga anak iti ruar iti karuahe. Kinuna ni Presidente Woodruff: “Kaid-iddak laeng idi maysa a timek ti nagkuna kaniak: ‘Bumangonka ket yakarmo ti karuahem.’ Saan a gurrud, kimat wenno ginggined daytoy no di ket naalumamay ken bassit a timek ti Espiritu ti Dios—ti Espiritu Santo. . . . Bimmangonak ket inyakarko ti karuahek . . . ket impuestok daytoy iti abay ti balay. Bayat ti isusublik iti pagiddaak dayta met la nga Espiritu ti nagkuna kaniak, ‘Inka ket yadayom dagiti ayupmo manipud iti kayo.’ . . . Inyalisko dagitoy iti kakaywan ket inggalotko ida. Kalpasanna nagsubliak iti pagiddaak. Kalpasan ti tallupulo a minuto, maysa nga alipugpog ti dimmungpar iti kayo a nakaigalutan dagiti ayupko, pinarutna daytoy iti daga ket impuruakna iti sangagasut a metro ti kaadayona, a pinerdina ti dua nga alad a nagnaanna, ket intinnagna daytoy . . . iti lugar a naganan ti karuahe. . . . Babaen ti panagtungpal iti paltiing ti Espiritu ti Dios kaniak naisalakanko ti biagko ken ti biag ti asawak ken anakko, kasta met dagiti ayupko” (“Leaves from My Journal,” *Millennial Star*, 12 Dec. 1881, pp. 790–91).

Dagiti Mainayon nga Aktibidad para kadagiti Babbabassit nga Ubbing

1. Makalawas sakbay daytoy nga adalen, dawaten kadagiti nagannak ti tunggal ubing a pangitugoten ti ubing iti “makapagin-awa a banag” iti klase. Mabalina a daytoy ket maysa a naisangsangayan nga ules wenno ay-ayam wenno naisangsangayan a kanta a makanta. Mangitugot iti sumagmamano a dadduma pay a banag no kas pagarigan adda maysa a makalipad a mangitugot.

Iti klase, pagsasaritaanyo kadagiti ubbing maipapan no kasano nga iparikna kadakuada dagitoy a banag a natalged ken maipadpategda. Ilawlawag a maysa kadagiti napapateg a katulongan ti Nailangitan nga Ama ken Jesus ti mangipar-parikna kadatayo a natalged ken maipadpategtayo. No dadduma maaw-awagan daytoy a tao iti Mangliwiwa, gapu ta imbaon ti Nailangitan nga Ama daytoy a mangkadkadua kadatayo no mariknatayo ti liday wenno maburburiboran. Espiritu Santo daytoy a tao, maysa a nakaskasdaaw a gayyem!

2. Isao dagiti balikas kadagiti maudi a linia ti “The Still Small Voice” (*Children’s Songbook*, p. 106) ket tulongan dagiti ubbing nga aramidenda dagiti naipakita a garaw:

Dumnggeg, dumnggeg (*isukog ti ima iti lawlaw ti lapayag*).
Agyarasaas ti Espiritu Santo (*ikabil ti tammudo iti bibig*).
Dumnggeg, dumnggeg (*isukog ti ima iti lawlaw ti lapayag*)
Iti nalanay ken bassit a timek (*iparabaw ti ima iti barukong*).

Agyamanak iti Aldaw ken iti Rabii

Panggep

Tapno tulongan ti tunggal ubing a makaawat a kalpasan ti plano ti Nailangitan nga Ama, pinarsua ni Jesucristo ti aldaw tapno makapagtrabaho ken makapagay-ayamtayo ken ti rabii tapno makapaginanatayo.

Panagsagana

1. Sikakararag nga adalen ti Genesis 1:1, 3–5, 14–18; Helaman 14:1–13; ken 3 Nephi 1:15–23.
2. Dagiti kasapulan:
 - a. Biblia ken Libro ni Mormon.
 - b. Naggetteng a ladawan 1-1, init; naggetteng a ladawan 1-2, bulan; naggetteng a ladawan 1-3, dagiti bituen (masarakan met dagitoy kastoy met a ladawan iti Primary Visual Aids Cutouts Set 3).
 - c. Ladawan 1-21, Ni Samuel a Lamanite iti Pader (Pakete ti Ladawan ti Arte ti Ebanghelio 314; 62370 864).
3. Aramidem dagiti nasken a panagsagana para kadagiti ania man nga aktibidad a mangpadur-as iti pannakaammo a kayatmo nga usaren.

Dagiti Aktibidad iti Pannakasursuro

Mangawis iti maysa nga ubing a mangted iti pangrugi a kararag.

Aktibidad a Pangawis
iti Panagdengngeg

Ibagam kadagiti ubbing a pampanunotem ti maysa a banag a plinano ti Nailangitan nga Ama ken pinarsua ni Jesucristo. Dawatem kadagiti ubbing a pugtuanda no ania ti pampanunotem. Saggaysa nga itedmo dagiti sumaganad a singasing:

1. Pabaraennatayo.
2. Nagbukel ken amarilio daytoy.
3. Adda daytoy idiyang langit.
4. No dadduma kasla aglemlemmeng daytoy iti ulep wenno iti bantay.

Kalpasan a mapugtuang dagiti ubbing “ti init,” iparang ti naggetteng a ladawan ti init.

- Asino ti nangaramid iti init?

Agtrabaho ken Agay-ayamtayo iti Aldaw

Estoria

Isalaysay kadagiti ubbing ti estoria maipapan iti pannakaparsua ti aldaw ken rabii manipud iti Genesis 1:1, 3–5 ken ti pannakaparsua ti init, bulan, ken dagiti bituen manipud iti Genesis 1:14–18.

- Asino ti nangparsua iti aldaw ken ti rabii?
- Ania ti pinaikabil ti Nailangitan nga Ama ken ni Jesus iti langit tapno maibaga kadatayo no kaano ti aldaw?

Ibaga kadagiti ubbing a ti init mangted kadatayo iti lawag tapno makakitatayo. Ti init pay ti mangpabara kadatayo ken mangtulong kadagiti mula a dumakkel. Ditayo mabalina ti agbiag iti daga no awan ti init.

- Ania ti awagtayo iti panawen no ngimmaton ti init? (Aldaw.)

Ilawlawag nga adu a banag ti maaramidtayo iti aldaw. Makapagtrabaho, makapagay-ayam, ken makatulongtayo iti dadduma.

Aktibidad

Paisarita kadagiti ubbing maipapan kadagiti banag nga ar-aramidenda iti aldaw, kas iti pannangan, panagay-ayam, wenno panagsagad iti suelo. Patakderen ida ket paidrama ti sumagmamano kadagiti kapanunotanda. Mabalín a kayatmo nga aramiden ti sumagmamano kadagiti garaw a kagiddanmo ida.

- Ania ti maaramidyo tapno matulonganyo ti maysa a tao iti aldaw? (Mabalín nga iraman a sungbat ti panangpidut iti ay-ayam, panagugas iti nanganan, wenno pannakiay-ayam iti ading a lalaki wenno babai.)

Aginanatayo iti Rabii

- Makitkitatayo kadi a kanayon ti init?

Ilawlawag a tunggal rabii bumaba ti init ket sumipngget ti langit. Ditay makita ti init iti rabii.

- Ania ti awagtayo iti panawen no sumipngget? (Rabii.)
- Ania ti pinaikabil ti Nailangitan nga Ama ken ni Jesus iti langit tapno manglawag iti rabii? (Ti bulan ken dagiti bituen.)

Paiparang kadagiti ubbing dagiti nagetteng a ladawan ti bulan ken dagiti bituen iti abay ti nagetteng a ladawan ti init.

Aktibidad

Paisarita wenno paidrama kadagiti ubbing ti sumagmamano kadagiti banag nga ar-aramidenda iti rabii, kas iti panagkararag sakbay a maturog, panagdengngeg kadagiti estoria, panangsipilio kadagiti ngipenda, wenno pannaturog.

Ilawlawag a sumagmamano a tao, kas kadagiti doktor, nars, ken bombero, ket agtartrabaho iti rabii, ngem kaaduan kadatayo ti mangusar iti rabii tapno maturog. Adu nga ayup ti maturog met iti rabii.

- Apay a maturogtayo?

Tulongam dagiti ubbing a makaawat a ti pannaturog ket nasayaat para kadagiti bagitayo, ken kayat ti Nailangitan nga Ama ken ni Jesus nga aywanantayo a nasayaat dagiti bagitayo. No umdas ti pannaturogtayo, nasaysayaat ti panagriknatayo ken nasalsalun-attayo. No kurang ti turogtayo, mabannogtayo ken saantayo a naragsak.

No ti kaatiddog dagiti aldaw ket dakkal ti panagbaliwbaliwna iti nadumaduma a panawen iti lugaryo, ilawlawag a ti rabii ket mabalín nga at-atiddog iti sabali a panawen ti tawen ken ab-ababa iti dadduma a panawen. Tulongannatayo dagiti nagannak kadatayo no orasen ti pannaturog ken no orasen ti panagriing ken adu ti ar-aramiden.

Aktibidad

Patakderen dagiti ubbing ket paaramid ti sumaganad nga ay-ayam babaen ti ramay:

Daytoy Bassit a Tao

Mapan maturogen daytoy bassit a tao (*ingato ti maysa a ramay*).

Iti pungan nga impaidana ti ulona (*iparabaw ti ramay iti dakulap ti sabali nga ima*).

Iti ules a binungonna ti bagina (*ipetpet dagiti ramay iti umuna a ramay*),

Nagpatnag a naturog a kastoy ti langana.

Kabigatanna, immulagatna dagiti matana.
Ti ules impuruakna (*ukraden ti ima tapno ipakita ti ramay nga agin-inana*).
Di nagbayag bimmangon ket nagsukat iti badona (*ingato ti ramay*),
Nakasaganan nga umisem, agtrabaho ken agay-ayam.

Inusar ti Nailangitan nga Ama ti Aldaw ken Rabii Tapno Ipakaammo ti Pannakayanak ni Jesus

Estoria

Ibaga kadagiti ubbing nga inusar ti Nailangitan nga Ama ti aldaw ken ti rabii tapno makatulong a mangibaga maipapan iti pannakayanak ni Jesus. Iparang ti ladawan 1-21, Ni Samuel a Lamanite iti Pader, ket ilawlawag no ania ti mapasasamak iti ladawan. Ilawlawag nga imbaga ni Propeta Samuel kadagiti Nephite no anianto ti mapasamak iti langit no orasen ti pannakayanak ni Jesus. Lumnekto ti init, ngem saanto nga agsipngget ti langit. Ilawlawag nga adu a tao ti saan a namati ken ni Samuel, ngem napasamak no ania ti kinunana (kitaen iti Helaman 14:1–13 ken 3 Nephi 1:15–23).

Tulongan dagiti ubbing a makaawat a napateg unay ti pannakayanak ni Jesus nga iti adayo iti America, a nagnaedan dagiti Nephite ken Lamanite, inaramid ti Nailangitan nga Ama ti rabii idi nayanak ni Jesus a kas kalawag ti aldaw.

- Ania ti napateg a pasamak nga imbaga ni Samuel a Lamanite kadagiti tao?
- Ania ti nakita dagiti Nephite a napasamak iti langit iti rabii a pannakayanak ni Jesus?

Pammaneknek

Iburaymo ti pammaneknekmo a pinarsua ti Nailangitan nga Ama ken ni Jesucristo ti aldaw ken ti rabii tapno makatulong kadayo. Allukoyem dagiti ubbing nga agyamanda iti Nailangitan nga Ama iti agpada nga aldaw ken rabii.

Dagiti Aktibidad a Mangpadur-as iti Pannakaammo

Pumili iti sumagmamano kadagitoy nga aktibidad nga usaren bayat ti adalen.

1. Mangala iti maysa a panid ti puraw a papel ken kagudua a panid ti nangisit wenna napuskol nga asul a papel para iti tunggal ubing. Ipigket ti kagudua a panid ti nangisit iti maysa a bangir ti puraw a papel tapno mangibagi iti aldaw ken rabii. Gumetteng iti babassit a nagbukel a papel tapno mangibagi iti init ken bulan, ket tulongan dagiti ubbing a mangipigket kadagitoy iti umisu a lugar. Agusar iti adda pigketna wenna nagetteng a ladawan dagiti bituen a pangnayon iti buya ti rabii. Isurat iti papel ti tunggal ubing ti *Agyamanak iti aldaw ken iti rabii*.

2. Kagiddan dagiti ubbing, kantaen wenna isao dagiti balikas iti “The World Is So Lovely” (*Children’s Songbook*, p. 233), wenna ti maikadua a berso ti “The World Is So Big” (*Children’s Songbook*, p. 235). Aramiden dagiti garaw iti “The World Is So Big” kas naipakita iti baba:

Nakadakdakkal ken nakabukbukel ti lubong (*agaramid iti dakkal a nagtimbukel babaen kadagiti takiag*),
Ket adda ditoy dagiti pinarsua ti Dios;
Dagiti bituen agrimrimatda iti agpatnag (*unnaten ken iwagwag dagiti ramay*),
Init iti aldaw, nabara ken nalawag (*agaramid iti dakkal a nagtimbukel babaen kadagiti takiag*),
Nakadakdakkal ken nakabukbukel ti lubong.
Ay-ayatennatayo amin ti Dios; aduantayo iti parabur (*petpetan dagiti takiag ket arakupen ti bagi*).

3. Kantaen ti “Fun to Do” (*Children’s Songbook*, p. 253), nga usaren dagiti singasing dagiti ubbing para kadagiti berso. Sakbay ti panangkanta iti tunggal berso, saludsoden kadagiti ubbing no ti garaw nga insingasingda ket maar-aramid iti aldaw wenno iti rabii. Mangpartuat kadagiti garaw kas isingsingasing dagiti balikas.
4. Mangparnuayka iti estoria maipapan iti agkabsat a lalaki ken babai nga agay-ayam iti ruar kalpasan ti agmalem. Agusarka kadagiti nagnagan ken kasasaad nga ammo dagiti ubbing iti klasem. Ildawan no ania ti inaramid dagiti ubbing iti gibus ti agmalemda. Iraman dagiti detalye kas iti init a mangrurugi a lumnek, ti inada nga umaw-awag kadakuada a sumrek, ken dagiti ubbing nga agar-aramid kadagiti napapateg a trabaho, panagdalus, panagsagana para iti pangrabii, panangtulong nga agugas iti nanganan, panagsagana a maturog, panagdengngeg iti estoria sakbay a maturog, ken panagkararag sakbay a maturog. Ildawan no kasano nga agtalna ken mapan maturog ti agkabsat a lalaki ken babai, dadduma pay a tattao, ken dagiti tumatayab, insekto, ken ayup.

Tulongam dagiti ubbing a makaawat nga iti rabii, nasken nga ikidemtayo dagiti matatayo ket maturogtayo tapno dumakkel dagiti bagitayo a nasalun-at ken napigsa. Paset daytoy ti plano ti Nailangitan nga Ama para kadatayo.

Ildawan ti estoria babaen dagiti nagetteng a ladawan, wenno ituding dagiti parte kadagiti ubbing ket paidrama kadakuada ti estoria.

Dagiti Mainayon nga Aktibidad para kadagiti Babbabassit nga Ubbing

1. Ipakita dagiti nagetteng a ladawan ti init, bulan, ken dagiti bituen. Saludsoden dagiti sumaganad:
 - Sadino ti pakakitaantayo kadagitoy a banag?
 - Makitatayo kadi ti init iti rabii?
 - Makitatayo kadi dagiti bituen iti aldaw?

Ilawlawag a pinaaramid ti Nailangitan nga Ama ken ni Jesus ti init tapno mangted kadatayo iti lawag ken pagtalinaedennatayo a nabara iti aldaw ken ti bulan ken dagiti bituen tapno mangted kadatayo iti lawag iti rabii.

2. Tulongam dagiti ubbing a mangaramid kadagiti garaw iti sumaganad a berso bayat ti panangisaom kadagiti balikas:

Panagparsua ti Dios

Inaramid ti Dios ti bulan (*agaramid iti nagtimbukel babaen kadagiti ima*)

Ken dagiti agrimrimat a bituen (*ukraden ken keppeteng dagiti ima*)

Ket inkabilna iti tangatang (*gumaw-at nga agpangato*).

Inaramidna ti init (*agaramid iti nagtimbukel babaen dagiti ima iti ngatuen ti ulo*)

Ken dagiti kaykayo (*paglintegen nga ipangato dagiti takiag*)

Ken dagiti sabsabong (*isukog dagiti ima*)

Ken dagiti babassit a tumatayab nga agtaytayab (*ipayapay dagiti takiag*).

(Manipud iti *Fascinating Finger Fun* ni Eleanor Doan. © 1951. Naaramat nga addaan pammalubos.)

3. Kantaen wenno isao dagiti balikas iti “I Am Like a Star” (*Children’s Songbook*, p. 164) wenno “Jesus Wants Me for a Sunbeam” (*Children’s Songbook*, p. 60).

Panggep

Tapno tulongan ti tunggal ubing a makarikna iti panagyaman iti Nailangitan nga Ama ken ni Jesucristo para iti danum.

Panagsagana

1. Sikakararag nga adalen ti Genesis 1:9–10; Exodo 17:1–6; ken Mateo 3:13–17.
2. Dagiti kasapulan:
 - a. Biblia.
 - b. No mabalin, mangala kadagiti ladawan ti nadumaduma a bagi ti danum, kas kadagiti dan-aw, karayan, ken taaw.
 - c. Ladawan 1-8, Panangiwaras iti Sakramento (62021 864); ladawan 1-11, Ubing a Lalaki a Mabumbuniagan (62018 864); ladawan 1-18, Ni Juan Bautista a Mangbumbuniag ken ni Jesus (Pakete ti Ladawan ti Arte ti Ebanghelio 208; 62133 864).
3. Aramidem dagiti nasken a panagsagana para kadagiti ania man nga aktibidad a mangpadur-as iti pannakaammo a kayatmo nga usaren.

Dagiti Aktibidad iti Pannakasursuro

Mangawis iti maysa nga ubing a mangted iti pangrugi a kararag.

Aktibidad a Pangawis
iti Panagdengngeg

Dawaten iti maysa nga ubing nga umay iti sango ti klase. Yarasaas kenkuana ti maysa nga aktibidad a pangusaran iti danum kas iti panagsipilio iti ngipen, panagugas iti ima, wenna panagsibug iti mulmula. Payakem iti ubing ti aktibidad idinto ta pugtuan dagiti sabali nga ubbing no ania ti mayak-akem. (Mabalin a kasapulan nga ipakitam kadagiti ubbing no kasano a mayakem ti tunggal kasasaad.) Bay-an a maaddaan ti tunggal ubing iti gundaway a mangyakem iti maysa nga aktibidad.

Ilawlawag a tunggal aktibidad a nayakem ket agkasapulan iti danum. Ibagi kada-giti ubbing a nasken nga agyamantayo iti Nailangitan nga Ama ken ni Jesus iti panangtedda kadatayo iti danum.

Ti Danum ket Napateg a Paset ti Panagparsua

Basaen iti napigsa ket ilawlawag ti Genesis 1:9–10.

- Apay a napateg unay ti danum para kadatayo?
- Kasano a maalatayo ti danumtayo?

Tulongan dagiti ubbing a makaawat nga aggapu ti danum manipud iti adu a pagtaudan, a pakaibilangan dagiti dan-aw, karayan, taaw, tudo, ken niebe. Ilawlawag a timmangken a danum ti niebe ken yelo. Ipakitam dagiti ladawan ti danum a naalam ket pagsasaritaanyo no sadino ti paggapuan ti danum iti lugaryo.

Ibagam kadagiti ubbing nga agyamyamanka ta ti danum ket maysa a paset ti plano ti Nailangitan nga Ama.

Kanta

Kantaen ti “Fun to Do” (*Children’s Songbook*, p. 253). Para kadagiti berso, pai-baga kadagiti ubbing dagiti wagas a pangusaranda iti danum, kas iti panaglaba kadagiti lupot, panagdigos, wenna panagsipilio iti ngipen. Agpartuat kadagiti garaw para iti kanta kas isingasing dagiti balikas.

Panaglaba ket naragsak,
Naragsak nga ‘ramiden!
Panaglaba ket naragsak,
Naragsak nga ‘ramiden!

(© 1963 ti D.C. Heath and Company. Naimaldit manen nga addaan pammalubos.)

Kasapulantayo ti Danum para iti Adu a Banag

- Apay a kasapulantayo ti danum? Ania ti pakausaranna daytoy?

Ilawlawag nga amin a sibibiag a banag, agraman dagiti tao, ayup, ken mula, ket agkasapulan iti danum tapno agbiag. No mabalin, ikkan ti tunggal ubing iti maysa a bassit a sangatasa a danum nga inumen. Pagsasaritaan no kasano a di maka-pagbiag ti bagitayo no awan ti danum nga inumen.

- Kasano a maala dagiti ayup ken mula ti danum a kasapulanda?

Ilawlawag a kasapulantayo pay ti danum para iti dadduma pay a banag a kas iti panaglaba ken panagluto.

Inikkan ni Jesus ni Moises ken dagiti Israelita iti Danum iti Disierto

Estoria

Isalaysay ti estoria maipapan ken ni Moises a mangal-ala iti danum manipud iti maysa a bato, a masarakan iti Exodo 17:1–6. Ilawlawag nga adda dagiti tao iti maysa a napudot, namaga a disierto. Awan ti danum idiyay.

- Ania koma ti napasamak no saan nga immawat dagiti Israelita iti danum?
- Nawawkayo kadin iti napalalo? Kasano ti rikna ti makainum iti nalamiis a danum no mawawkayo?

Napateg ti Danum iti Simbaan

Estoria

Ipakita ti ladawan 1-18, Ni Juan Bautista a Mangbumbuniag ken ni Jesus. Isalaysay ti estoria maipapan iti panagbuniag ni Jesus, a masarakan iti Mateo 3:13–17.

- Sadino ti nakabuniagan ni Jesus?
- Kasano a nabuniagan ni Jesus?
- Ipakita ti ladawan 1-11, Ti Ubing a Lalaki a Mabumbuniagan.
- Sadino a mabuniagantayo no agtawentayon iti walo?
- Nakakitakayo kadin iti maysa a tao a mabuniagan?

Bay-an a pagsasaritaan dagiti ubbing no ania ti napasamak idi nakitada ti maysa a tao a mabuniagan. Ilawlawag a nasken nga addaantayo iti danum tapno mabuniagan.

Ipakita ti ladawan 1-8, Panangiwaras iti Sakramento.

- Kasano nga usarentayo ti danum iti miting ti sakramento?

Yebkasmō ti panagyamanmo iti danum tapno mabalintayo ti agbuniag ken makiranud iti sakramento.

Pammaneknek

Yebkasmō ti pammaneknekmo iti plano ti Nailangitan nga Ama ken ti ayatna kadayo iti panangtedna kadayo iti danum. Ibagam kadagiti ubbing nga agyamanka iti Nailangitan nga Ama ken ni Jesus iti daytoy nakaskasdaaw a sagut.

Dagiti Aktibidad a Mangpadur-as iti Pannakaammo

Pumili iti sumagmamano kadagitoy nga aktibidad tapno usaren bayat ti adalen.

1. Isao ti sumaganad a berso a kagiddan dagiti ubbing, nga aramiden dagiti garaw a naipakita:

Dagiti Tedted ti Tudo

No mawaw dagiti sabong

Ken magango dagiti bulong (*ukraden dagiti ima ket unnaten dagiti takiag nga ipangato*).

Dagiti naragsak babassit a tedted ti tudo

Ti agtinnag manipud iti tangatang (*ibaba dagiti takiag, ket iwagwag dagiti ramay*).

Iti amin a lawlaw nagparsiaparsiak dagitoy (*iwagwag dagiti ramay iti agsumbangir a sikigan*)

Iti naragsak a panagay-ayam dagitoy,

Agingga a sumingising ti napudot a lawag ti init (*ingato ti takiag iti ngatuen ti ulo ket agaramid iti nagtimbukel*)

A nangpapanaw kadagitoy (*ilemmeng dagiti ramay iti likud*).

2. Tulongan dagiti ubbing a mangkanta wenno mangisao iti “Rain Is Falling All Around” (*Children’s Songbook*, p. 241) wenno “Give,” Said the Little Stream (*Children’s Songbook*, p. 236).
3. Pagdrowingen ti tunggal ubing iti maysa a ladawan ti danum kas iti maysa a dan-aw, maysa a karayan, wenno dagiti tedted ti tudo. Isurat iti papel ti tunggal ubing ti *Agyamanak iti danum*.
4. Paisarita wenno paidrama kadagiti ubbing dagiti wagas a pakapagay-ayamanda iti danum, kas iti panaglangoy, panagisketing iti yelo, panagaramid iti tao a niebe, wenno panagsisinnay-o kadagiti lubnak.
5. Tulongan dagiti ubbing a makaawat a ti danum ket tumultulong kadayo a mangdalus kadagiti banag. Paidrama kadakuada dagiti aramiden a panagdalus a pakausaran ti danum kas iti panaglaba iti luplupot wenno panangbuggo kadagiti imada.

Dagiti Mainayon nga Aktibidad para kadagiti Babbassit nga Ubbing

1. Aramiden ti sumagmamano wenno amin kadagiti sumaganad nga aktibidad tapno matulongan dagiti ubbing a masursuruan kadagiti nadumaduma a wagas a panangusartayo iti danum:

- a. Ikkam ti tunggal ubing iti bassit a mainum a danum. Bayat ti yiinum dagiti ubbing, ilawlawag a ti danum ket paset ti plano ti Nailangitan nga Ama para iti daga. Mabalintayo ti uminum no mawawtayo.
 - b. Mangikabil iti bassit a danum iti maysa a palangganita ket tulongan ti tunggal ubing a mangbuggo iti imana. Ipalagip kadagiti ubbing a plinano ti Nailangitan nga Ama ken ni Jesus a maaddaantayo iti danum. Ilawlawag a mausartayo ti danum a pangugas kadagiti banag.
 - c. No mabalin, ipanmo iti ruar dagiti ubbing ket pagsibugem iti mula ti tunggal maysa. Wenno mangitugotka iti maysa a mula iti klase ket bay-am ti tunggal ubing a sibuganna iti bassit a danum ti mula. Ilawlawag a kasapulan met dagiti mula ti danum tapno agbiag ken dumakkelda.
2. Aramiden dagiti sumaganad a garaw bayat ti panagpammarang dagiti ubbing nga agtutudo—nakapsut iti rugina, ket kalpasanna in-inut a pumigpigs.
- a. Pikipiken a sangkamaysa dagiti murdong ti ramay.
 - b. Pikipiken a sangkamaysa dagiti ima.
 - c. Pikipiken dagiti tumeng, pagsinnublaten dagiti ima.
 - d. Pikipiken dagiti saka.

Agyamanak kadagiti Kaykayo, Mulmula, ken Sabsabong

Panggep

Tapno tulongan ti tunggal ubing a makarikna iti panagyaman iti Nailangitan nga Ama ken ni Jesucristo para kadagiti kaykayo, mulmula, ken sabsabong.

Panagsagana

1. Sikakararag nga adalen ti Genesis 1:11–13.
2. Mangikabil iti prutas, nateng, wenno bassit a sanga iti maysa a lupot wenno papel a supot.
3. Mangisagana iti babassit nga iparaman a prutas, nateng, wenno tinapay. Ammuen kadagiti nagannak dagiti ubbing tapno masigurado nga awan kadagiti ubbing ti adda alerdyina iti makan.
4. Dagiti kasapulan:
 - a. Biblia.
 - b. No mabalin, mangalaka iti ladawan dagiti kayo, mula ken sabong iti lugaryo, ket mangitugot iti sumagmamano a banag a naaramid iti kayo kas iti lapis, kutsara, ken malukong, manipud iti pagtaenganyo.
 - c. Nagetteng a ladawan 1-4, sabsabong (masarakan met dagiti isu met la a nagetteng a ladawan iti Primary Visual Aids Cutouts Set 3).
 - d. Ladawan 1-22, Agsabsabong a Kayo; ladawan 1-23, Maysa nga Umok nga Addaan kadagiti Babassit a Tumatayab.
5. Aramiden dagiti nasken a panagsagana para kadagiti ania man nga aktibidad a mangpadur-as iti pannakaammo a kayatmo nga usaren.

Dagiti Aktibidad iti Pannakasursuro

Mangawis iti maysa nga ubing a mangted iti pangrugi a kararag.

Aktibidad a Pangawis iti Panagdengngeg

Ipasa ti supot nga adda nagyanna a prutas, nateng, wenno sanga, a nakaserra tapno di makita dagiti ubbing ti nagyanna. Papisel kadagiti ubbing ti supot ket papugtuan no ania ti nagyanna. Ibaga kadakuada a dida ipigpigma ti mangpugto agingga a maaddaan ti amin iti gundaway a mangpisel iti supot. No napiselen ti amin ti supot, paibagam kadagiti ubbing no ania iti panangipagarupda ti naguneg ti supot. Alaen ti nagan iti supot ket pagsasaritaan ti langa ken pakausaran daytoy

Pagbalinen dagiti Kayo, Mula, ken Sabong ti Daga a Maysa a Napintas a Lugar a Pagnaedan

Ipalagip kadagiti ubbing a naparsua ti amin a banag iti daga a mayannurot iti plano ti Nailangitan nga Ama. Iti maikatlo nga aldaw ti panagparsua, pinarsua ni Jesus dagiti kayo, mula, ken sabong (kitaen iti Genesis 1:11–13). Ilawlawag a kayat ti Nailangitan nga Ama ken ni Jesus a pagbalinen ti daga a napintas babaen dagiti kayo, mula, ken sabong.

Iparangmo ti nagetteng a ladawan dagiti sabong ken ania man a ladawan ti kayo, mula, wenno sabong a naalam. Paisarita kadagiti ubbing maipapan kadagiti padasda iti kayo, mula, wenno sabong.

- Estoria Mangisalaysay iti maysa nga estoria a mangisuro kadagiti ubbing a dagiti kayo, mula, ken sabong ket mangpabalin iti daga a maysa a napintas a lugar a pagyanan. Pagsasaritaan maipapan kadagiti napipintas a mula a dumakel iti lugar a pagnaedanyo. No mayannatup iti lugaryo, mabalin a kayatmo nga usaren ti ladawan 1-22, Kayo nga Agsabsabong, ken dagiti sumaganad a kapanunotan:
- Adda kayo a kaay-ayo ni Kelly a pagay-ayaman iti linongna. Maysa a bigat riniing ni nanangna ket kinunana nga adda sorpresana nga ipakita ken ni Kelly. Napno ti kaay-ayo a kayo ni Kelly iti puraw a sabsabong a kasla papkorn. Sinaludsod ni Kelly no kasano a nagsabong iti papkorn ti kaay-ayona a kayo, ket inlawlawag ni nanangna ti kinapateg dagiti sabong.
- Kanta Patakderen dagiti ubbing ket kantaen ti “Popcorn Popping” (*Children’s Songbook*, p. 242), nga usaren dagiti garaw ti ima kas isingsingasing dagiti balikas. Ilawlawag nga iti panawen ti panagsusulbod agsabong iti puraw a kasla papkorn dagiti kayo nga apricot.
- Iti ruar ti tawa ket timman-awak,
 Papkorn iti sanga ti nakitak!
 No panagsusulbod nagpintas
 Sabsabong nagbukar sanguanak.
 Sangasakrui ti innak maala
 Bola’t papkorn nagbanglon aya!
 Sabong laeng daytoy ngem kasla latta
 Papkorn ‘ti sanga innak nakita.
- Ilawlawag nga adda dagiti sabsabong nga agrusing kadagiti kayo, adda dagiti agrusing kadagiti babassit a kaykayo ken lanut, ken adda dagiti agrusing iti daga. Awisen dagiti ubbing a mangisarita maipapan kadagiti sabong a nakitadan.
- Kasano nga usarentayo dagiti sabong tapno mapagbalin a napintas ti lubongtayo? (Imulatayo dagitoy kadagiti minuyongan ti sabsabong, agaramidtayo kadagiti *bouquet*, ket ikabiltayo iti buok wenno iti badotayo.)
 - Apay nga ikkantayo iti sabsabong ti maysa a tao? (Para kadagiti naisangsangayan nga okasion ken tapno mangparagsak kadagiti tao.)

Kasapulan dagiti Mula ken Kayo Tapno Agbiagtayo

- Estoria Ilawlawag a kasapulantayo dagiti mula ken kayo tapno agbiagtayo. Iparang ti ladawan 1-22, Kayo nga Agsabsabong, ket mangisalaysay maipapan iti adu a pakausaran iti maysa a kayo. Usaren dagiti sumaganad a kapanunotan wenno pagsasaritaan maipapan iti dadduma pay a wagas a pangusaran dagiti tao iti lugaryo kadagiti kayo.
- Umuna, usaren dagiti tumatayab ti kayo a kas pagtaenganda. Siaannad nga agaramidda iti umok, ket ditoy nga agitlog ti ina a tumatayab. (Ipakita ti ladawan 1-23, Maysa nga Umok nga Addaan kadagiti Babassit a Tumatayab.) No nagpessan dagiti babassit a tumatayab manipud kadagiti itlog, agpaay ti kayo a nasayaat a pagtaenganda. Daytoy ti mangsaluad kadakuada manipud iti pudot ti init, iti tudo, ken kadagiti ayup iti daga a mangdangran kadakuada. Mangted pay ti kayo iti bunga para iti pamilia nga agnanaed iti asideg. Agay-ayam dagiti ubbing iti linong ti kayo ket mangikabilda iti pagindayunan iti dakkal a sanga. No matay ti maysa a paset ti kayo, putden daytoy ti pamilia ket usarenda a pangsungrod tapno makapagluto wenno mangpapudot iti uneg ti balay.

- Apay a napateg kadatayo dagiti kayo? (Dagitoy ti mangted iti taraon, kayo, linong, ken lugar a pagay-ayaman.)

Ipakita ti sumagmamano a banag manipud iti pagtaenganyo wenno ti siled pagadalan a naaramid iti kayo, ket pagsasaritaan dagiti adu a pakausaran ti kayo.

- Ania dagiti dadduma pay a banag nga ammoyo a naaramid iti kayo?

Ilawlawag nga usarentayo pay dagiti mula iti adu a wagas. Maysa kadagiti kapatgan a banag nga it-ited dagiti mula kadatayo ket ti taraon.

- Ania dagiti kita ti mulmula a kanentayo?

No adda kadagiti ladawan a naalam iti lugaryo ti mangipakpakita kadagiti mula a maus-usar a kanen, ipakitam dagitoy itan.

Aktibidad

Kasaritam dagiti ubbing maipapan kadagiti bukbukel, prutas, ken nateng nga agtubtubo iti lugaryo. Ilawlawag a masansan a maaramid dagiti bukbukel iti tinapay ken *cereal*. Dawaten iti tunggal ubing a mangibaga iti paggugustona a kanen a naggapu iti maysa a mula. Paramanan kadagiti ubbing ti iparaman a prutas, nateng, wenno tinapay nga intugotmo. Ibagam kadakuada ti maipapan iti mula wenno kayo a naggapuan daytoy.

Ilawlawag a pinaparsua ti Nailangitan nga Ama ken ni Jesus ti adu a nadumaduma a mula ken kayo tapno maaddaantayo kadagiti nasayaat a banag a kanentayo.

- Kasano a makapagyamantayo iti Nailangitan nga Ama iti taraontayo? (Babaen ti pananglaglagip nga agyaman Kenkuana iti taraon no dumawattayo iti bendision iti taraon sakbay a mangantayo.)

Pammaneknek

Iburaymo ti pammaneknekmo maipapan iti ayat ti Nailangitan nga Ama ken ni Jesus para iti tunggal maysa kadatayo. Ipalagip kadagiti ubbing a laglagipenda dayta nga ayat iti inaldaw no makitada dagiti napipintas a kayo, mula, ken sabong.

Dagiti Aktibidad a Mangpadur-as iti Pannakaammo

Pumili iti sumagmamano kadagitoy nga aktibidad tapno usaren bayat ti adalen.

1. Mangitugot iti sumagmamano a bukbukel (kas kadagiti bukel ti sabong, utong wenno trigo) ken maysa a supot a napno iti daga tapno yawid ti tunggal ubing. Ipakita kadagiti ubbing no kasano nga imula dagiti bukelda, ket ipalagip kadakuada a masapul a mangtedda iti danum ken lawag ti init tapno agtubo dagiti bukel.
2. Pasurotem dagiti ubbing iti panangisaom kadagiti balikas iti kanta “Little Seeds Lie Fast Asleep” (*Children’s Songbook*, p. 243). Kalpasanna pagpammarangem dagiti ubbing a babassit a bukel a nagriing ken nagunat bayat ti panangikantam wenno panangisaom manen kadagiti balikas.
3. Manggetteng kadagiti petal, bulong, ken sanga manipud iti dekolor a papel ket paipigket iti tunggal ubing ti sumagmamano kadagitoy iti sukog a sinansabong iti sabali pay a papel. Suratan ti panid iti *Agyamanak kadagiti napipintas a sabong*.
4. Mangitugot iti prutas wenno nateng nga adda bukeln. Ibaga kadagiti ubbing nga adda sorpresa iti unegna. Pisien ti prutas wenno nateng tapno makita dagiti ubbing dagiti bukel. Ilawlawag a no maimula dagiti bukel ket maipaayan iti

danum ken lawag ti init, dumakkelto dagitoy ket agbunga iti ad-adu pay a prutas wenno nateng.

5. Papagnaen dagiti ubbing iti ruar tapno makitada ti nadumaduma a kita dagiti mula. No saan a nasayaat ti panawen iti ruar, mabalin a tuman-aw dagiti ubbing iti tawa ket agsisinnublatda a mangibaga no ania dagiti mula a makitada. No mayannatup, ilawlawag dagiti panagbalbaliw ti panawen a makaapekto kadagiti mula ken kayo.

Dagiti Mainayon nga Aktibidad para kadagiti Babbabassit nga Ubbing

1. Ipakita ti ladawan 1-22, Kayo nga Agsabsabong. Ibaga kadagiti ubbing a binilin ti Nailangitan nga Ama ni Jesus a parsuaenna dagiti mula ken kayo (kitaen iti Genesis 1:11–13). Ilawlawag a mangted kadatayo dagiti mula a kayo iti kayo ken prutas. Mangted kadatayo dagiti mula iti prutas ken nateng.
2. Mangitugot iti maysa a mula wenno maysa a paset ti mula (kas iti sabong wenno sumagmamano a bulong) tapno makita, maaprosan, ken maangot dagiti ubbing. Ikkang ti tunggal ubing iti gundaway a mangsagid wenno mangiggem iti mula. Ibaga ti maris, angot, wenno pintas daytoy. Yebkasmu ti panagyamanmo kadagiti mula, sabong, ken kayo.
3. Isaom ti sumaganad a berso, nga ipakitam dagiti garaw. Kalpasanna paaramidmo kadagiti ubbing dagiti garaw a kagiddandaka bayat ti panangisaom manen iti berso.

Agsukayak

Agsukayak, agsukayak, agsukayak (*agaramid kadagiti garaw ti panagsukay*),
Ket kalpasanna sumagmamano a bukel ti imulak (*agkummog ket agpammarang nga agmulmula iti bukbukel*),

Agkaraykayak, agkaraykayak, agkaraykayak (*agaramid kadagiti garaw ti panagkaraykay*),

Ket kalpasanna agparutak iti sumagmamano a ruot (*agkummog ket agaramid kadagiti garaw nga agparparut*).

Ti init naraniag ken napudot (*agaramid iti nagtimbukel babaen dagiti takiag*),

Immay ti tudo (*ibaba dagiti takiag, iwagwag dagiti ramay*)

Ket nakita dagiti matak mismo,

Dagiti bukelko nangrugi a nagtubo (*iduron nga agpangato dagiti ramay ti kanigid nga ima nga adda iti tengga dagiti ramay iti kanawan nga ima*).

4. Kantaen ti “In the Leafy Treetops” (*Children’s Songbook*, p. 240) a kagiddan dagiti ubbing.

Panggep

Tapno tulongan ti tunggal ubing a makarikna iti panagyaman iti Nailangitan nga Ama ken ni Jesucristo iti ikan ken ayup iti danum.

Panagsagana

1. Sikakararag nga adalen ti Genesis 1:20–23; Jonas 1–3; Mateo 14:15–21; ken Lucas 5:1–11.
2. Dagiti kasapulan:
 - a. Biblia.
 - b. Ikan a papel (kitaen ti pagtuladan iti ungtong ti adalen).
 - c. “Banniit”—maysa nga *stick* nga adda singdanna a tali iti murdongna ken maysa a pangsipit iti papel, sangapirasong a teyp, wenno magneto a naisingdan iti murdong ti tali. (Idulin daytoy a banniit nga aramaten kadagiti masakbayan nga adalen.)
 - d. Pagyanan ti ikan a papel.
 - e. No mabalin, mangala kadagiti ladawan ti ikan wenno dadduma pay nga ayup nga agindeg iti danum.
 - f. Naggetteng a ladawan 1-5, ikan (mabalin pay a masarakan ti isu met la a naggetteng a ladawan iti Primary Visual Aids Cutouts set 4).
 - g. Ladawan 1-1, Ti Lubong (62196 864); ladawan 1-24, Ni Jesus ken dagiti Mangngalap (Pakete ti Ladawan ti Arte ti Ebanghelio 210; 62138 864); ladawan 1-25, Ikan; ladawan 1-26, Tukak; ladawan 1-27, Pag-ong.
3. Aramidem dagiti nasken a panagsagana para kadagiti ania man nga aktibidad a mangpadur-as iti pannakaammo a kayatmo nga usaren.

Dagiti Aktibidad iti Pannakasursuro

Mangawis iti maysa nga ubing a mangted iti pangrugit a kararag.

Aktibidad a Pangawis iti Panagdengngeg

Pagpammarangen dagiti ubbing nga agtaktakderda iti maysa a rangtay a pakatan-awan iti maysa a karayan wenno dan-aw.

- Ania ti makitayo no kumitakayo iti danum?

Patakderen dagiti ubbing ket pagpammarangen nga aglanglangoyda iti danum a kasla maysa nga ikan.

Indawat ti Nailangitan nga Ama ken Jesucristo a Parsuaenna ti Ikan ken dagiti Dadduma pay nga Ayup iti Danum

Ipakita ti ladawan 1-1, Ti Lubong, ket sublien nga adalen ti sumagmamano kadagiti banag nga indawat ti Nailangitan nga Ama a parsuaen ni Jesus a napaglilinnawaganen kadagiti napalabas nga adalen. Ibaga kadagiti ubbing a pinarsua pay ni Jesus ti ikan (kitaen iti Genesis 1:20–23). Ti ikan ket paset ti plano ti Nailangitan nga Ama para iti daga. Ipakita ti ladawan 1-25, Ikan, ket pagsasaritaan no sadino ti pagnaedan ti ikan.

- Nakakitakayo kadin iti maysa nga ikan?

Bay-an a pagsasaritaan dagiti ubbing maipapan iti ikan a nakitadan.

Ipakita ti nagetteng a ladawan 1-5 ken ti ania man a dadduma pay a ladawan ti ikan a naalam. Pagsasaritaan dagiti nadumaduma a kita ti ikan, kas iti goldfish, salmon, tuna, yo wenno ania man nga ikan a familiar kadagiti ubbing iti klase.

- Ania dagiti dadduma pay nga ayup nga agnanaed iti danum malaksid iti ikan?

Ipakita ti ladawan 1-26, Tukak, ken ti ladawan 1-27, Pag-ong. Pagsasaritaan maipapan kadagiti tukak ken pag-ong ken no sadino ti pagnaedanda. Kasta met a pagsasaritaan maipapan kadagiti baliena, kappi, ayup iti baybay (seal), ken dadduma pay nga ayup iti danum. Ilawlawag nga agnanaed ti sumagmamano nga ayup iti danum iti taaw, dagiti dadduma iti dan-aw, ken dagiti dadduma iti karayan.

Aktibidad

Tulongan ti tunggal ubing a pumanunot iti maysa nga ayup iti danum ket agpam-marang a magna, aglagto, wenno aglangoy a kas iti ar-aramiden daytoy.

Estoria

Ingato ti Biblia ket ilawlawag a mabasatayo ti maipapan iti ikan kadagiti nasantuan a kasuratan. Isalaysay ti estoria maipapan ken ni Jonas, a masarakan iti Jonas 1–3. Ilawlawag nga insagana ni Jesus ti dakkel nga ikan tapno mangtilmon ken Jonas tapno saan a malmes ni Jonas. Adda trabaho a paaramid ni Jesus ken ni Jonas. Mabalnmo a basaen iti napigsa ti maysa wenno dua a bersikulo, kas iti Jonas 1:17 wenno Jonas 2:1, bayat ti panangisalaysaymo iti estoria. (No basaem iti napigsa ti maysa a bersikulo, ilawlawagmo a maaw-awagan ni Jesus no dadduma iti “Apo.”)

- Asino ti nangipatulod iti dakkel nga ikan a mangtilmon ken ni Jonas? (Kitaen iti Jonas 1:17.)
- Ania ti inaramid ni Jonas idi tinilmon ti ikan isuna? (Kitaen iti Jonas 2:1.)
- Ania ti inaramid ni Jonas idi nakaruar iti ikan? (Kitaen iti Jonas 3:1–3.)
- Namati kadi dagiti tao ken ni Jonas ket nagbabawida? (Kitaen iti Jonas 3:5, 10.)

Ibaga kadagiti ubbing a sumagmamano nga ikan ti dadakkel unay, kas iti ikan a nangtilmon ken Jonas, ken sumagmamano nga ikan ti babassit ken makapagna-edda uray pay iti maysa a malukong.

Aktibidad

Tulongan dagiti ubbing a mangaramid iti sumaganad nga ay-ayam iti ramay:

Ti Goldfish

Ti napintas a goldfishko awan ramay ti sakana (*sagiden dagiti ramay ti saka*).

Naulimek nga aglanglangoy ket idungdungparna ti agongna (*itudo ti agong*).

Saan a makaruar a makipagay-ayam kaniak, ken diak makastrek a makipaglangoy kenkuana (*agaramid kadagiti garaw ti panaglangoy*).

Ket no kunak, “Rummuarka ket agay-ayamta,”

Kasla kunkunana, “Umayka sumrekka” (*igaraw ti ima a kasla “mangpastrek”*).

Estoria

Ipakitam manen ti Biblia bayat ti panangisalaysaymo iti estoria maipapan ken ni Simon Pedro a masarakan iti Lucas 5:1–11.

Ipakita ti ladawan 1-24, Ni Jesus ken dagiti Mangngalap, iti maikanatad nga oras.

- Apay a limmugan ni Jesus iti bangka ni Simon Pedro? (Kitaen iti Lucas 5:3.)
- Ania ti imbaga ni Jesus nga aramiden ni Simon Pedro? (Kitaen iti Lucas 5:4.)
- Ania ti natiliw ni Simon Pedro iti iketna? (Kitaen iti Lucas 5:6.)

Pinaparsua ti Nailangitan nga Ama ken Jesucristo ti Ikan ken dagiti Ayup iti Danum nga Usarentayo

Ilawlawag a pinaparsua ti Nailangitan nga Ama ken ni Jesus ti ikan ken dagiti ayup iti danum tapno usarentayo a taraon ken kadagiti dadduma pay a panggep.

Estoria

Agibasar manen iti Biblia, isalaysay ti estoria a masarakan iti Mateo 14:15–21. Mabalainmo a basaen iti napigsa ti maysa wenno dua a bersikulo, kas iti Mateo 14:16–17, bayat ti panangisalaysaymo iti estoria.

- Ania ti inaramid ni Jesus idi mabisin dagiti tao? (Kitaen iti Mateo 14:15–16.)
- Ania ti impakan ni Jesus kadagiti tao? (Kitaen iti Mateo 14:19.)

Aktibidad

Ipakitam iti klase ti banniit nga insaganam, ket mangawis iti maysa kadagiti ubbing nga umasideg ket agbanniit. Mangikabil iti sumagmamano a naggetteng a papel nga ikan iti pagyanan, ket no pagbitinbitinen ti ubing ti tali iti batog ti pagyanan, mangisingdan iti maysa nga ikan iti pangsipit iti papel, teyp wenno magneto ket paguyod daytoy iti ubing. Ikkan iti gundaway ti tunggal ubing nga agbanniit.

Bay-an a pagsasaritaan dagiti ubbing maipapan kadagiti panawen a nagkalka-lapda wenno nangsidadan iti ikan.

Pammaneknek

Ipeksam ti panagyamanmo iti ikan ken dagiti ayup iti danum.

Dagiti Aktibidad a Mangpadur-as iti Pannakaammo

Pumili iti sumagmamano kadagitoy nga aktibidad tapno usaren bayat ti adalen.

1. Pakoloran kadagiti ubbing ti papel nga ikan a natiliwda iti aktibidad a panagbanniit (uliten ti aktibidad no tarigagayan). Isurat ti *Agyamanak iti ikan* iti likud ti ikan ti tunggal ubing.
2. Pagtugawen dagiti ubbing iti sukog a kagudua ti sirkulo. Ikabil ti ikan a kinoloran dagiti ubbing iti suelo iti sanguananda. Isao nga aggigiddan ti sumaganad a berso:
Bassit nga ikan iti waig
Matiliwka uray awan banniit.
Itudo iti maysa nga ubing ket papili iti ubing ti bukodna nga ikan babaen ti panangusarna iti banniit wenno babaen ti panangitudona iti ikan. Sawen ti ubing ti, “Nakatiliwak iti _____ nga ikan,” a sawenna ti kolor ti ikan. Idulin ngarud ti ubing ti ikan tapno yawid. Itultuloy agingga a maaddaan iti gundaway ti tunggal ubing.
3. Agkanta a kagiddan dagiti ubbing iti “Thanks to Our Father” (*Children’s Songbook*, p. 20).
4. Tulongan dagiti ubbing a mangaramid iti sumaganad nga ay-ayam iti ramay. Ilawlawag a ti *minnow* ket maysa a bassit nga ikan.

Ti Bassit a Pag-ong

Adda bassit a pag-ongko.

Aggigian iti maysa a kahon (*pagsukogen dagiti ima*).

Iti karayan nga aglanglangoy (*agaramid kadagiti garaw ti panaglangoy*),

Ket kadagiti bato nga umaaon (*igaraw dagiti ramay nga agpangato iti garaw nga umul-uli*).

Sinakmalna ti ikan a bassit (*pagsipaten dagiti ima*).
 Sinakmalna ti maysa a timel (*pagsipaten dagiti ima*).
 Sinakmalna ti maysa a lamok (*pagsipaten dagiti ima*).
 Ket sinakmalnak met (*pagsipaten dagiti ima*)!

Tiniliwna ti ikan a bassit (*pagsipaten dagiti ima*);
 Tiniliwna ti timel (*pagsipaten dagiti ima*);
 Tiniliwna ti lamok (*pagsipaten dagiti ima*);
 Ngem dinak natiliw!

(Vachel Lindsay, manipud iti *Collected Poems of Vachel Lindsay*. © 1920 ti Macmillan Publishing Co., Inc. napabaro idi 1948 ni Elizabeth C. Lindsay. Naaramat nga addaan pammalubos.)

5. Tulongan dagiti ubbing a mangisao kadagiti balikas iti sumaganad nga aktibidad. Ilawlawag a ti waig ket maysa a bassit a karayan ken ti suli ket maysa a lugar a paglemmengan.

Lima a Babassit nga Ikan

Patakderen ti lima nga ubbing iti sango ti klase, a nakaiggem ti tunggal maysa iti papel nga ikan.

Lima a babassit nga ikan ti aglanglangoy iti waig.
 Naglangoy ti maysa nga immadayo iti suli a nalemmeng (“*aglangoy*” ti maysa nga ubing nga agsubli iti tugawna).
 Babassit nga ikan, babassit nga ikan, naragsak nga agay-ayam.
 Babassit nga ikan, babassit nga ikan, aglangoy nga agmalmalem.

Kantaen ti sabali pay a berso nga addaan uppat nga ikan, sa tallo, sa dua. Aglangoy nga umadayo ti maysa nga ubing iti tunggal berso. No maysa laengen ti nabati nga ubing, usaren ti sumaganad a berso:

Maysa a bassit nga ikan ti aglanglangoy iti waig;
 Naglangoy nga immadayo iti suli a nalemmeng.
 Bassit nga ikan, bassit nga ikan, naragsak nga agay-ayam,
 Bassit nga ikan, bassit nga ikan, aglangoy nga agmalmalem.

Dagiti Mainayon nga Aktibidad para kadagiti Babbassit nga Ubbing





1. Ipakita ti ladawan 1-25, Ikan; ladawan 1-26, Tukak; ken ladawan 1-27, Pag-ong. Iti bukodmo a balikas, isalaysaymo ti estoria maipapan iti ikan ken dagiti ayup iti danum (kitaen iti Genesis 1:20–23). Yebkasmoo ti panagyamanmo iti ikan ken iti dadduma pay nga ayup iti danum.
2. Ibaga kadagiti ubbing nga agindeg ti adu nga ayup iti wenna asideg ti danum. Papugtuam kadakuada no ania nga ayup ti pampanunotem bayat ti panangtedmo kadagiti sumaganad a pangibagnos (clue):
 - a. Berde ken nalamuyot ken napigket ti kudilko. Aglagtoak. Agnanaedak iti asideg dagiti dan-aw, waig, wenna lubnak. Mapugtuanyo kadi no asinoak?
 (No napugtuanen dagiti ubbing ti “tukak,” ipakita ti ladawan 1-26, Tukak, wenna mangidrowing iti tukak iti pisarra.)

b. Nabuntogak unay nga aggunay. Aw-awitek ti natangken a balayko. No mabutengak, ilemmengko ti ulok, dagiti imak, ken sakak iti uneg ti balayko. Asinoak?

(No napugtuanen dagiti ubbing ti “pag-ong,” ipakita ti ladawan 1-27, Pag-ong, wenno mangidrowing iti pag-ong iti pisarra.)

Kalpasan a napugtuan dagiti ubbing ti agpada nga ayup, paglagtuen ida a manglawlaw a kas kadagiti tukak; kalpasanna pagkaradapen ida iti lawlaw a nainnayad a kas kadagiti pag-ong.

3. Kantaen a kagiddan dagiti ubbing ti “Oh, What Do You Do in the Summertime?” (*Children’s Songbook*, p. 245).



Panggep

Tapno tulongan ti tunggal ubing a makarikna iti panagyaman iti Nailangitan nga Ama ken ni Jesucristo kadagiti ayup.

Panagsagana

1. Sikakararag nga adalen ti Genesis 1:24–25 ken 6:5–8:19.
2. Dagiti kasapulan:
 - a. Biblia.
 - b. Nagetteng a ladawan 1-6 agingga iti 1-19, dagiti ayup (masarakan dagiti kastoy met la a nagetteng a ladawan iti Primary Visual Aids Cutouts set 4 ken 5).
 - c. Ladawan 1-28, Panagparsua—Dagiti Sibibiag a Parsua (Pakete ti Ladawan ti Arte ti Ebanghelio 100; 62483 864); ladawan 1-29, Panangbangon iti Daong (Pakete ti Ladawan ti Arte ti Ebanghelio 102; 62053 864); ladawan 1-30, Ni Noe ken ti Daong a Kadua dagiti Ayup (Pakete ti Ladawan ti Arte ti Ebanghelio 103; 62305 864).
3. Aramidem dagiti nasken a panagsagana para kadagiti ania man nga aktibidad a mangpadur-as iti pannakaammo a kayatmo nga usaren.

Dagiti Aktibidad iti Pannakasursuro

Mangawis iti maysa nga ubing a mangted iti pangrugi a kararag.

Aktibidad a Pangawis iti Panagdengngeg

Ikabil dagiti nagetteng a ladawan dagiti ayup iti suelo wenno lamisaan iti sango dagiti ubbing. Tulongan ti maysa nga ubing a pumidot iti maysa a nagetteng a ladawan, ibaga ti nagan dayta nga ayup, ket ipakita daytoy iti klase. Itultuloy agingga a maaddaan iti uray maysa la a gundaway ti tunggal ubing.

Indawat ti Nailangitan nga Ama nga Agparsua ni Jesucristo kadagiti Ayup

Subliem nga adalen a kaduam dagiti ubbing a pinaparsua ti Nailangitan nga Ama ken Jesucristo ti napintas a dagatayo, agraman ti aldaw ken rabii, dagiti taaw ken daga, ken dagiti mula ken kayo. Ipakita ti Biblia ket ipalagip kadagiti ubbing a mabasatayo maipapan iti Panagparsua iti daytoy a libro. Ilawlawag nga isalaysay kadaytoy ti Biblia a pinaparsua ti Nailangitan nga Ama ken Jesus ti amin nga ayup ket inkabilna ida iti daga.

Iparang ti ladawan 1-28, Panagparsua—Dagiti Sibibiag a Parsua.

- Asino ti nangparsua kadagiti banag a makitayo iti daytoy a ladawan?
- Ania dagiti nagan dagiti ayup iti daytoy a ladawan?

Ilawlawag a pinarsua ni Jesus ti amin a kita ti ayup tapno ikabil iti daga. Agnaed ti sumagmamano nga ayup kadagiti taltalon ken iti aglawlaw dagiti pagtaengantayo. Agnaed ti sumagmamano nga ayup iti kabakiran, dagiti dadduma pay iti bambantay, ken dagiti dadduma pay iti disierto. Agnaed ti sumagmamano nga ayup kadagiti nalamiis a paset ti lubong ken agnaed dagiti dadduma nga ayup iti napudot a luglugar.

- Ania dagiti ayup nga agnaed iti talon?
- Ania dagiti ayup nga agnaed iti kabakiran, kabambantayan, wenno disierto?
- Ania ti paggugustom nga ayup?

Aktibidad

Patakderen dagiti ubbing ket pagpammarangen nga isuda dagiti paggugustoda nga ayup.

Tultulongandatayo dagiti Ayup

llawlawag a pinaikabil ti Nailangitan nga Ama ken Jesus dagiti ayup iti daga tapno makatulong kadatayo. Usarentayo ti sumagmamano nga ayup a para iti taraon, agtrabaho dagiti dadduma para kadatayo, ken makaay-ayo dagiti dadduma a kitaen wenno kaay-ayam.

- Kasano a makatulong kadatayo dagiti ayup?
- Ania kadagiti ayup ti pagalaantayo iti taraon, kas iti gatas, itlog, wenno karne?
- Ania kadagiti ayup ti pagalaantayo iti aramaten a kasapulan para iti lupottayo?
- Ania kadagiti ayup ti makaay-ayo nga aywanan?
- Ania kadagiti ayup ti mabalintayo a sakayan?

Paisarita kadagiti ubbing ti maipapan iti padpadasda iti nadumaduma a kita ti ayup.

Naisalakan dagiti Ayup Manipud iti Layus

Isalaysay ti estoria maipapan ken Noe ken ti Daong, a masarakan iti Genesis 6:5–8:19. Ipakita ti ladawan 1-29, Panangbangon iti Daong, ken ladawan 1-30, Ni Noe ken ti Daong a Kadua Dagiti Ayup. Mabalnmo pay nga usaren dagiti nagetteng a ladawan a mangiladawan iti estoria.

- Kasano a nabendisionan ni Noe ken ti pamiliana iti panagtungpal ken Jesus?
- Kasano a naisalakan dagiti ayup?
- No makakitatayo iti bullalayaw, ania ti ipalpalagipna kadatayo?

Aktibidad

Patakderem dagiti ubbing ket paaramid dagiti garaw a kagiddandaka bayat ti panangisaom iti sumaganad a berso:

Noe

Nangbangon ni Noe iti nakadakkkel a bilog (*unnaten dagiti takiag*);

Ammona no ania ti aramidenna (*ikabil ti ramay iti bangir ti musing*).

Nagmartilio, nagragadi, nagrukod isuna (*agaramid kadagiti garaw kas naibaga*)

Kas iti naibilin kenkuana (*itung-ed ti ulo*).

Ket inayaban ni Noe ti pamiliana (*agpayapay*)

Tapno magnada a mapan iti bilog (*magna a siuulimek iti pagtakderan*)—

Ket, sagdudua dagiti ayup a naglugan (*ingato ti dua a ramay*)

Iiti bilog iti danum nga agtapaw (*agaramid iti garaw ti panagtapaw babaen kadagiti ima*).

Dagiti napuskol ken nangisit nga ulep naurnong a sangkamaysa (*ikabil dagiti ima iti ngatuen ti ulo*),
Nangrugi a nagtudo iti napigsa (*pagwarsien dagiti ramay a tuladen ti panagtudo*)—
Ket nalapunos ti sibubukel a daga (*agaramid iti garaw a pannakalapunos babaen iti ima ken takiag*);
Awanen a namimpinsan ti daga (*italiaw ti ulo iti agsumbangir*).

Sitalalged a nagtapaw ti bilog (*agaramid iti garaw ti panagtapaw babaen iti ima ken takiag*).

Iti adu nga aldaw ken rabii (*ikabil dagiti agpada nga ima iti maysa a bangir ti rupa*).
Agingga a rimmuar manen ti init (*ikabil dagiti takiag a pasirkulo iti ngatuen ti ulo*)
Ket naglawag a kasta unay pudot ken raniag.

Ket amin a danum alisto a namagaan (*pagkurusen dagiti takiag iti batog ti barukong*);

Ti namaga a daga nagparang (*ukraden dagiti takiag ket unnaten dagiti ima*).

Ti pamilia ni Noe nagyaman (*agdumog ken agdalikepkep*)

A ti Dios kanayon nga asideg.

(Naadaw manipud iti berso ni Beverly Spencer.)

Pammaneknek

Ibagam no kasano ti panagyamanmo iti napintas a lubong a pinarsua ni Jesucristo a mayannurot iti plano ti Nailangitan nga Ama. Ipeksam no kasano ti panagyamanmo kadagiti ayup a naikabil iti daytoy a daga tapno usaren ken pagragsakantayo.

Dagiti Aktibidad a Mangpadur-as iti Pannakaammo

Pumili iti sumagmamano kadagitoy nga aktibidad tapno usaren bayat ti adalen.

1. Agay-ayam iti “Ayup, Ayup, Asinoka?” Pagbukelen dagiti ubbing. Patakderem ti maysa nga ubing iti tengnga ti nagbukel ket pagpammarangen a maysa nga ayup. Ingato dagiti dadduma pay nga ubbing dagiti imada tapno pugtuanda no ania nga ayup ti tultuladen ti ubing iti tengnga. No napugtuang ti ubing a husto ti ayup, mapan iti tengnga ket tuladenna ti sabali pay nga ayup. Mabalina a kayatmo a payarasaas nga umuna kenka ti tunggal ubbing ti nagan ti ayup a tuladennanto tapno masigurado nga ammo ti ubing ti ayup.

2. Agay-ayam iti “Ania Daytoy Nga Ayup?” Ikkan dagiti ubbing iti pangibagnos (clues) maipapan iti maysa nga ayup. Dagiti pangibagnos ket mabalina a mangibaga no sadino ti pagnanaedan ti ayup, no kasano ti kadakkel daytoy, no ania ti uni daytoy, no ania ti maris daytoy, ken no kasano a tumultulong daytoy kadagiti tao. Ibagam kadagiti ubbing nga ingatoda ti imada no iti panagkunada ammoda no ania nga ayup ti sarsaritaem. Ulitem kadagiti sabali pay nga ayup agingga a kayatmo.

3. Kagiddan dagiti ubbing, isao dagiti balikas iti “The World Is So Big” (*Children’s Songbook*, p. 235). Aramiden dagiti garaw a naipakita iti baba:

Nakadakkkel ken nakabukbukel ti lubong, (*agaramid iti dakkkel a nagtimbukel babaen kadagiti takiag*),

Ket adda ditoy dagiti pinarsua ti Dios;

Dagiti bantay (*isukog dagiti ima a kasla bantay iti ngatuen ti ulo*)

Ken tantanap (*ikabil dagiti ima a nakapakleb iti sanguanan*)

Ken dagiti kayo a nakataytayag (*unnaten nga ipangato dagiti takiag*),

Ken dadakkkel nga ayup (*gumaw-at nga agpangato*)

Ken babassit nga ayup (*gumaw-at nga agpababa*).

Nakadakkkel ken nakabukbukel ti lubong, (*agaramid iti dakkkel a nagtimbukel babaen kadagiti takiag*).

Ay-ayatennatayo amin ti Dios; aduantayo iti parabur (*petpetan dagiti takiag ket arakupen ti bagi*).

4. Pagsaritaen dagiti ubbing maipapan kadagiti ania man a tarakenda nga ayup wenno dagiti kayatda a matagikua. Pagsasaritaan kadagiti ubbing no kasano ti nasken a panangtrato ken panangaywan kadagiti taraken nga ayup.
5. Ikkan dagiti ubbing iti papel ken krayola. Paidrowing iti tunggal ubing ti ladawan ti paggugustona nga ayup. Isurat iti tunggal ladawan ti *Agyamanak kadagiti ayup*.

**Dagiti Mainayon
nga Aktibidad
para kadagiti
Babbassit
nga Ubbing**

1. Ipakita ti ladawan 1-28, Panagparsua—Dagiti Sibibiag a Parsua. Iti bukodmo a balikas, isalaysay ti estoria maipapan iti pannakaparsua dagiti ayup (kitaen iti Genesis 1:24–25). Ipeksam ti panagyamanmo kadagiti ayup.
2. Pumili iti sumagmamano nga ayup a pamiliar kadagiti ubbing. Pagpammarangen nga ayup ti tunggal maysa kadagiti ubbing. Pagsasaritaan no ania ti langa ken uni dagiti ayup ken no ania ti pakausaranda.

Agyamanak kadagiti Tumatayab ken Insekto

Panggep

Tapno tulongan ti tunggal ubing a makarikna iti panagyaman iti Nailangitan nga Ama ken ni Jesucristo para kadagiti tumatayab, insekto, ken dagiti agkarkarayam a bambanag.

Panagsagana

1. Sikakararag nga adalen ti Genesis 1:20–25 ken 1 Ar-ari 16:29–17:6.
2. Dagiti kasapulan:
 - a. Biblia.
 - b. No mabalin, mangala kadagiti ladawan dagiti tumatayab, insekto, ken agkarkarayam a banag a gagangay iti lugaryo.
 - c. Dagiti nagetteng a ladawan 1-20 agingga iti 1-25, dagiti tumatayab ken insekto (mabalin pay a masarakan dagiti kastoy met la a nagetteng a ladawan iti Primary Visual Aids Cutouts Set 4 ken 5).
 - d. Ladawan 1-31, Ni Elias a Pakpakanen dagiti Wak; ladawan 1-32, Milagro dagiti Tumatayab iti Baybay (Pakete ti Ladawan ti Arte ti Ebanghelio 413; 62603 864).
3. Aramidem dagiti nasken a panagsagana para kadagiti ania man nga aktibidad a mangpadur-as iti pannakaammo a kayatmo nga usaren.

Dagiti Aktibidad iti Pannakasursuro

Mangawis iti maysa nga ubing a mangted iti pangrugi a kararag.

Aktibidad a Pangawis iti Panagdengngeg lted dagiti sumaganad a pangibagnos (clues) ket papugtuan kadagiti ubbing ti sungbat iti saludsod nga “Asinoak?”

1. Adda sippitko.
2. Adda dutdotko.
3. Adda payakko.
4. Agtayabak iti tangatang.

No napugtuan dagiti ubbing iti “maysa a tumatayab,” patuladka kadakuada ket pagpammarangem nga isuda dagiti tumatayab nga agtaytayab iti aglawlaw ti siled. Iturong ida nga agsubli kadagiti tugawda.

Binilin ti Nailangitan nga Ama ni Jesucristo a Mangparsua kadagiti Tumatayab

Ilawlawag a pinaparsua ti Nailangitan nga Ama ken ni Jesus dagiti tumatayab tapno agragsaktayo ken mapagbalin ti daga a maysa a napintas a lugar a pagyanan. Ipakita ti Biblia ket ibaga kadagiti ubbing a salaysayen kadayo ti Biblia maipapan iti panagparsua kadagiti tumatayab (kitaen iti Genesis 1:20–23).

llawlawag a nadumaduma a kita dagiti tumatayab ti agnanaed iti intero a lubong. Ipakitam dagiti ania man a ladawan dagiti tumatayab a naalam ken dagiti naget-teng a ladawan dagiti tumatayab, saggaysa iti maminsan.

- Tumatayab kadi daytoy?
- Kasano a maibagayo? (Adda payak, dutdot, ken sippitna.)

Bay-an a pagsasaritaan dagiti ubbing maipapan kadagiti ania man a padasda kadagiti tumatayab.

Makatulong Kadatayo dagiti Tumatayab

Estoria

Ipakita ti ladawan 1-31, Ni Elias a Pakpakanen dagiti Wak, ket isalaysay ti estoria maipapan kadagiti wak a mangpakpakan ken ni Elias a propeta, a masarakan iti 1 Ar-ari 17:1–6. Tulongan dagiti ubbing a makaawat nga adda bileg ti Nailangitan nga Ama ken ni Jesus iti amin a banag, uray pay kadagiti tumatayab. Imbaga ni Jesus kadagiti tumatayab nga aywananda ni Elias idi nasken nga ilemmenganna ti nadangkes nga ari Ahab.

- Kasano ti pannakaammo dagiti wak a nasken a yeganda iti taraon ni Elias? (Kitaen iti 1 Ar-ari 17:4.)
- Ania a kita ti taraon ti inyeg dagiti wak? (Tinapay ken karne; kitaen iti 1 Ar-ari 17:6.)

Aktibidad

Pumili iti maysa nga ubing nga agbalin nga Elias. Pagpammarangen dagiti dadduma pay nga ubbing nga isuda dagiti wak a mangyeyeg iti taraon iti bigat ken manen iti rabii.

Estoria

Isalaysaymo ti sumaganad nga estoria maipapan kadagiti tumatayab iti baybay (seagulls) ken dagiti kuriat iti bukodmo a balikas:

Idi sumangpet dagiti nagkauna a kameng iti Salt Lake Valley, nagmulada iti trigo ken dadduma pay a bukbukel. Kasapulanda ti bukbukel tapno makaaramidda iti tinapay ken dadduma pay a kita ti taraon a kanen. Dimmakel ken timmayag dagiti trigo. Sakbay laeng ti panawen a panagapit iti trigo, maysa a dakkal nga ulep ti nangpunno iti tangatang. Saan nga ulep ti tudo daytoy, ngem maysa nga ulep ti rinibribu a mabisin a nangisit a kuriat. Nagdisso dagiti kuriat kadagiti trigo ket rinugianda a kanen dagitoy.

Inaramid dagiti nagkauna a kameng ti amin a kabaelanda a manglapped kadagiti kuriat iti pannanganda iti trigoda. Nagpuorda, minalmaloda dagiti kuriat iti sagad ken ules, ken pinadasda pay a sinibugan dagiti kuriat iti danum. Ngem saan a nagsardeng dagiti kuriat. Nagbuteng dagiti nagkauna a kameng a maawanan iti taraon para iti panawen ti lamiis. Nagparintumengda nga agkararag ket dimmawat iti tulong ti Nailangitan nga Ama.

Di nagbayag dimteng ti dakkal nga arban dagiti tumatayab iti baybay (seagulls) ket rinugianda a kanen dagiti kuriat. (Iparang ti ladawan 1-32, Milagro dagiti Tumatayab iti Baybay.) Di nagbayag, kaaduan kadagiti kuriat ti naibus. Nagyaman dagiti nagkauna a kameng iti Nailangitan nga Ama iti panangipatulodna kadagiti tumatayab iti baybay ken panangisalakan kadagiti mulada (kitaen iti William E. Berrett, *The Restored Church*, [Salt Lake City: Deseret Book Co., 1961, pp. 283–85).

- Kasano a tinulongan dagiti tumatayab iti baybay [seagulls] dagiti nagkauna a kameng?

Binilin ti Nailangitan nga Ama ni Jesus a Parsuaenna dagiti Insekto ken dagiti Banag nga Agkarkarayam

Ibaga kadagiti ubbing a pinarsua pay ni Jesucristo dagiti insekto ken agkarkarayam a banag kas kadagiti lawwalawwa ken uleg. Paset ti plano ti Nailangitan nga Ama dagitoy a parsua.

Aktibidad

Papugtuang kadagiti ubbing dagiti insekto ken agkarkarayam a banag a nailadawan kadagiti sumaganad a burburtia. No napugtuang ti tunggal burburtia, iparang ket ilawlawag ti maitutop a nagetteng a ladawan.

1. Amarilioak ken wumaneswesak.
Napino a dutdot naibungon kaniak.
Agar-aramidak iti diro para kadakayo ken kaniak.
Siak ti _____. (Uyokan; agaramid iti uni a wumaneswes.)
2. Agtibbiak iti balayko tapno kanek matiliwko.
Addaanak iti walo a luppo.
Masansan a didak kayat dagiti tao.
Mapugtuanyo kadi no asinoak? (Lawwalawwa; igaraw dagiti ramay a kasla iti luppo.)
3. Naminsan idi nga iggesak.
Iti tangatang makatayabak.
Addaanak napipintas a payak.
Maysaak a _____. (Kulibangbang; nainnayad nga igaraw dagiti ramay a kasla iti payak.)

- Ania ti ammoyo maipapan kadagitoy a parsua?

Ilawlawag a naparsua dagiti insekto iti adu a pakaigapuan. Sumagmamano nga insekto ti mabalin a kanen dagiti tumatayab, ayup, ken dadduma pay nga insekto; sumagmamano ti makaay-ayo wenno napintas a buybuyaen ken sumagmamano ti makaay-ayo wenno napintas ti panagunida. Agaramid dagiti uyokan iti diro tapno kanentayo, ken tumulongda iti panagdakkel dagiti prutas, sabong, ken nateng.

Aktibidad

Ipakitam ti nagetteng a ladawan ti maysa nga uyokan wenno ania man a ladawan dagiti uyokan wenno balay ti uyokan a naalam. Iladawan no kasano nga urnongen dagiti uyokan ti nektar manipud kadagiti sabong tapno usarenda iti panagaramid iti diro, ket kalpasanna pagpamarangen dagiti ubbing nga isuda dagiti uyokan nga agakar-akar kadagiti sabsabong tapno agala iti nektar nga aramidenda a diro.

- Ania nga insekto ti magusgustuam? Apay?

Ipakitam ti ania man a ladawan dagiti insekto a naalam. Ilawlawag a sumagmamano nga insekto ti mangsinga kadatayo. Kanenda dagiti taraontayo ken mabalin a kagaten wenno siludentayo. Ipalagip kadagiti ubbing ti estoria maipapan kadagiti tumatayab iti baybay ken dagiti kuriat. Kankanen idi dagiti kuriat ti amin a taraon dagiti nagkauna a kameng.

Ilawlawag a gagangay a no dangran wenno singaendatayo dagiti insekto, padpasenda laeng a salakniban dagiti bagbaga.

Pammaneknek

Ipalagip kadagiti ubbing a napateg a paset ti dagatayo dagiti tumatayab, insekto, ken dadduma pay nga agkarkarayam a banag. Ipeksam ti riknam iti panagyaman para kadagito a parsua.

Dagiti Aktibidad a Mangpadur-as iti Pannakaammo

Pumili iti sumagmamano kadagito nga aktibidad tapno usaren bayat ti adalen.

1. Agay-ayam iti ay-ayam a kulibangbang. Pagtugawen dagiti ubbing iti pasirkulo. Pumili iti maysa nga ubing nga agbalin a kulibangbang. Iwagayway daytoy nga ubing ti papel a kulibangbang iti ngatuen ti ulo dagiti dadduma pay nga ubbing bayat ti pannagnana a manglawlaw iti ruar ti sirkulo. Bayat ti pannagna ti ubing iti lawlaw ti sirkulo, isao daytoy a berso:

Timmayab nga immadayo ti maysa a bassit a kulibangbang
 Iti maysa a nakalawlawag, napudot nga aldaw ti kalgaw.
 Timmayab daytoy iti nakaas-asul a tangatang,
 Ket idi nagdisso daytoy, nagdisso daytoy kenka!

No sawem ti “Nagdisso daytoy kenka,” ikabil ti ubing nga agpampamarang a kulibangbang ti papel a kulibangbang iti saklot ti sabali pay nga ubing. Dayta nga ubing ti kulibangbang itan. Uliten ti berso agingga a maaddaan iti gundaway nga agbalin a kulibangbang ti tunggal ubing.

2. Ilawlawag iti nalaka a balikas no kasano nga agbalin a kulibangbang ti maysa nga igges. Pagpamarangen dagiti ubbing nga isuda dagiti igges nga agtibtibbi kadagiti balay ti igges. Pagtugawen ida iti tugawda wenno iti suelo ket ipaarakup dagiti luppoda babaen kadagiti takiagda, nga agpampamarang a matmaturogda. Ibaga kadakuada a no agbalin ti maysa nga igges a maysa a kulibangbang, mangrugi nga aggaraw ken agunnat dagiti payakda. Payunnat kadagiti ubbing dagiti takiagda. Ipalagip kadagiti ubbing a nakaul-ulimek dagiti kulibangbang, uray no aggarawda. Patakderen dagiti ubbing ket pagpamarangen nga agtaytayabda a siuulimek nga aglawlaw iti kuarto.
3. Kagiddan dagiti ubbing, isao dagiti balikas iti “In the Leafy Treetops” (*Children’s Songbook*, p. 240), wenno “The World is So Big” (*Children’s Songbook*, p. 235). Usaren dagiti garaw iti baba iti “Nakadakkkel ti Lubong.”

Nakadakkkel ken nakabukbukel ti lubong (*agaramid iti dakkkel a nagtimbukel babaen kadagiti takiag*).

Ket adda ditoy dagiti pinarsua ti Dios;

Dagiti bantay (*isukog dagiti ima a kasla bantay iti ngatuen ti ulo*)

Ken tantanap (*ikabil dagiti ima a nakapakleb iti sanguanan*)

Ken dagiti kayo a nakataytayag (*unnaten nga ipangato dagiti takiag*).

Ken dadakkkel nga ayup (*gumaw-at nga agpangato*).

Ken babassit nga ayup (*gumaw-at nga agpababa*).

Nakadakkkel, ken nakabukbukel ti lubong (*agaramid iti dakkkel a sirkulo babaen kadagiti takiag*).

Ay-ayatennatayo amin ti Dios; aduantayo iti parabur (*petpetan dagiti takiag ket arakupen ti bagi*).

4. Isao dagiti balikas iti “All Things Bright and Beautiful” (*Children’s Songbook*, p. 231), nga usaren dagiti garaw a naipakita iti baba:

Amin a banag nalawag ken napintas (*agaramid iti dakkel a nagtimbukel babaen kadagiti takiag*).

Amin dadakkel ken babassit a parsua (*unnaten dagiti takiag, sa paginnasidegen dagiti ima*),

Amin a banag a nainsiriban ken nakaskasdaaw (*itudo ti maysa a ramay iti ulo*),
Ti Apo a Dios ti nangaramid amin kadagitoy (*idalikepkep dagiti takiag kas iti panagkararag*).

Tunggal bassit a sabong nga agbukar (*agaramid iti gemgem, sa ukraden ti ima*),
Tunggal bassit a tumatayab nga agkanta (*paginnasidegen dagiti ramay ken tammudo a kasla dagiti sippit ti tumatayab*),

Inaramidna dagiti agrimrimat a marisda (*iwagayway ti takiag iti sukog a kas iti bullalayaw*);

Inaramidna dagiti babassit a payakda (*ipayakpak dagiti ima a kas kadagiti payak*).

5. Mangitugot iti maysa a garapon ti diro ti uyokan tapno makita ken maramanan dagiti ubbing. (Ammuen iti nagannak dagiti ubbing tapno masigurado nga awan kadagiti ubbing ti adda alerdyina iti diro ti uyokan.)

6. Tulongan dagiti ubbing nga aramidenda ti maysa wenno agpada a sumaganad nga ay-ayam ti ima.

Dua a Babassit nga Agkankanta a Billit

Dua a babassit nga agkankanta a billit ti nagtugaw iti alad (*ikabil ti maysa a ramay iti agsumbangir nga abaga*),

Maysa ti agnagan iti Pedro (*ingato ti kanigid a ramay*)

Ket agnagan ti maysa iti Pablo (*ingato ti kanawan a ramay*)

Agtayabka, Pedro (*ikabil ti kanigid a ramay iti likudan*);

Agtayabka, Pablo (*ikabil ti kanawan a ramay iti likudan*),

Agsublika, Pedro (*ikabil manen ti kanigid a ramay iti abaga*);

Agsublika, Pablo (*ikabil manen ti kanawan a ramay iti abaga*).

Balay ti Uyokan

Daytoy ti balay ti uyokan (*ikeppet bassit a nakapakleb ti kanigid nga ima*),
Sadino ti yan dagiti uyokan?

Nakalemmeng iti di makita ti asino man (*ilemmeng dagiti ramay ti kanawan nga ima iti baba ti nakakeppet a kanigid nga ima*).

Di mabayag agtayabdan nga aggapu iti balay ti uyokan (*iruar ti kanawan nga ima ket ukraden a saggaysa dagiti ramay bayat ti panagbilang dagiti ubbing*)

Maysa, dua, tallo, uppat, lima! BZZZ!

**Dagiti Mainayon
nga Aktibidad
para kadagiti
Babbassit
nga Ubbing**

1. Ipakita ti simple a ladawan, nagetteng a ladawan, wenno drowing ti maysa a tumatayab. Ibagi kadagiti ubbing a pinaparsua ti Nailangitan nga Ama dagiti tumatayab ken ni Jesucristo (kitaen iti Genesis 1:20–23). Ipeksam ti panagyamanmo kadagiti tumatayab.

2. Ilawlawag nga addaan dagiti tumatayab kadagiti naisangsangayan a sippit tapno makatulong kadakuada a mangpidut iti taraonda. Paikabil kadagiti ubbing dagiti imada iti bibigda kas kadagiti sippit ket agpammarangda nga agpidpidutda iti taraon. Ilawlawag nga addaan met dagiti tumatayab kadagiti payak a makatulong kadakuada nga agtayab. Paipayakpak kadagiti ubbing dagiti takiagda ket agpammarangda nga agtaytayabda.

3. Isao dagiti balikas iti “Birds in the Tree” (*Children’s Songbook*, p. 241), nga usaren dagiti garaw a naipakita iti baba:

Makasaraktaayo iti bassit nga umok (*isukog dagiti ima*)

Kadagiti sanga ti kayo (*ingato dagiti takiag a patimbukel iti ngatuen ti ulo*).

Intay bilangen dagiti itlog;

Adda maysa, dua, tallo (*ingato ti maysa, dua, ken tallo a ramay*).

Adda ti ina a tumatayab iti umok (*isukog ti kanigid nga ima; iparabaw ti kanawan nga ima*)

Tapno ukopanna dagiti tallo nga itlog (*ingato ti tallo a ramay*).

Ti ama a tumatayab, agrikusrikus (*igaraw dagiti takiag a kasla agtaytayab*)

Tapno bantayanna dagitoy.

4. Tulongan dagiti ubbing a mangaramid iti sumaganad nga ay-ayam iti ima:

Bassit a Lawwalawwa

Bassit a lawwalawwa immuli’t diay sanga (*usaren ti dua a ramay ti maysa nga ima tapno “ulien” ti bangir a takiag*).

Immay ti tudo natnag diay daga (*ingato dagiti ima iti ngatuen ti ulo; sa ibaba bayat ti panangiwawarsi kadagiti ramay*).

Immay ti init amin nagmaga (*agaramid iti nagtimbukel iti ngatuen ti ulo babaen dagiti takiag*).

Bassit a lawwalawwa immuli’t diay sanga (*uliten ti garaw iti umuna a binatang*).

Naparsua da Adan ken Eva iti Ladawan ti Nailangitan nga Ama

Panggep

Tapno tulongan ti tunggal ubing a makaawat a naparsua da Adan ken Eva iti ladawan ti Nailangitan nga Ama.

Panagsagana

1. Sikakararag nga adalen ti Genesis 1; 2:15–25; ken 3. Kitaen met iti Pagbatayan ti Ebanghelio (31110 864), maika-5 ken 6 a paset.
2. Dagiti kasapulan:
 - a. Biblia.
 - b. Dagiti nagetteng a ladawan 1-1 agingga iti 1-25 (mabalín met a masarakan dagiti kastoy met la a nagetteng a ladawan iti Primary Visual Aids Cutouts Sets 3, 4, ken 5).
 - c. Ladawan 1-33, Da Adan ken Eva (Pakete ti Ladawan ti Arte ti Ebanghelio 101; 62461 864); ladawan 1-34, Isursuro da Ada ken Eva dagiti Annakda.
3. Aramidem dagiti nasken a panagsagana para kadagiti ania man nga aktibidad a mangpadur-as iti pannakaammo a kayatmo nga usaren.

Dagiti Aktibidad iti Pannakasursuro

Mangawis iti maysa nga ubing a mangted iti pangrugia a kararag.

Aktibidad a Pangawis
iti Panagdengngeg

Dawaten a tumakder ti amin nga annak ti Nailangitan nga Ama. Ipalagip kadagiti ubbing nga annaknatayo amin ti Nailangitan nga Ama, isu a nasken a tumakder ti tunggal maysa.

Kanta

Kantaen ti “I Am a Child of God” (*Children’s Songbook*, p. 2) a kagiddan dagiti ubbing. Isuro nga ibagbaga ti kanta kadatayo nga inikkannatayo ti Nailangitan nga Ama iti pagtaengan iti daga.

Siak ket anak ti Dios,

Imbaonnak ditoy,
Inikkannak pagtaengak
Naimbag a nagannak.
Iturongnak, idalannak,

Tarabayennak.
Suruannak ‘ramidek
Tapno makadennak.

Naparsua ti Daga a Mayannurot iti Plano ti Nailangitan nga Ama

Aktibidad

Ipan dagiti nagetteng a ladawan a nakapakleb iti rabaw ti lamisaan wenno iti saklotmo.

- Ania ti sumagmamano kadagiti banag a pinarsua ni Jesus para iti daga?

Bayat ti panangdakamat ti ubing iti tunggal maysa kadagiti naparsua, paiparang ti maibagay a nagetteng a ladawan.

- Ania dagiti naparsua a pagyamyamananyo?

Tulongan dagiti ubbing a makaawat a ti daga ken amin a banag nga adda iti daytoy ket naparsua nga aramaten ken pagragsakantayo. Ipalagip kadagiti ubbing a ti daga ken amin a banag nga adda iti daytoy ket paset ti plano ti Nailangitan nga Ama.

Kanta

Kantaen manen ti “I Am a Child of God” a kagiddan dagiti ubbing.

Paset ti Plano ti Nailangitan nga Ama da Adan ken Eva

Pakita kadagiti ubbing dagiti nagetteng a ladawan a naiparang.

- Ania pay dagiti nasken nga adda iti daga?

Ipakita ti ladawan 1-33, Da Adan ken Eva. Ilawlawag a kalpasan ti pannakaparsua ti amin a dadduma pay a banag, naparsua da Adan ken Eva. Isarita ti maipapan iti pannakaparsua dagiti tao, a masarakan iti Genesis 1:26–28. Ilawlawag a da Adan ken Eva ti immuna a dua a tao a nagnaed iti daga. Addaanda iti bagi nga addaan lasag ken tulang a kapada ti bagi ti Nailangitan nga Ama.

- Asino ti immuna a lalaki?
- Asino ti immuna a babai a nagnaed iti daga?
- Ania a kita dagiti bagi nga adda kada Adan ken Eva?

Pasagid kadagiti ubbing dagiti takiagda, ket ipalagip kadakuada a dagiti bagida ket maipada iti bagi da Adan ken Eva.

Estoria

Agibasar iti ladawan 1-33, Da Adan ken Eva, isalaysaymo ti estoria da Adan ken Eva iti bukodmo a balikas, nga ilawlawagmo dagiti sumaganad a banag (kitaen iti Genesis 2:15–25; 3):

1. Kalpasan nga immawat da Adan ken Eva iti pisikal a bagi, nagnaedda iti maysa a napintas a lugar a maaw-awagan iti Minuyongan ti Eden.
2. Pinagkasar ti Nailangitan nga Ama da Adan ken Eva para iti agnanayon.
3. Nalaka a dimmakel dagiti bunga ken sabong iti Minuyongan ti Eden, ken naamo dagiti amin nga ayup.
4. Saan nga ammo da Adan ken Eva ti paggidiatan ti nasayaat ken dakes.
5. Saan a mabalin a maaddaan iti annak da Adan ken Eva.
6. Mabalin a mangan da Adan ken Eva iti bunga ti kayo malaksid iti maysa.
7. Nangan da Adan ken Eva iti bunga dayta a kayo.
8. Nasken a pumanaw da Adan ken Eva iti Minuyongan ti Eden.
9. Nagbalbaliw ti sibubukel a lubong: Nasken nga agrabaho a nasayaat da Adan ken Eva tapno makaala iti taraon, nangrugi a nagtubo dagiti ruot ket nagbalin a naatap dagiti ayup.
10. Kalpasanna nangrugi a naaddaan iti annak da Adan ken Eva.

Ipakita ti ladawan 1-34, Isursuro da Adan ken Eva dagiti Annakda. Ilawlawag a naparaburan da Adan ken Eva iti adu nga annak. Isuda dagiti immuna a nagannak iti daga. Insuroda dagiti annakda maipapan iti Nailangitan nga Ama ken ni Jesus. Dimmakel ti pamiliada ket naiwaraswarasda iti intero a daga.

- Ania ti inaramid da Adan ken Eva kalpasan ti panangpanawda iti Minuyongan ti Eden?

Ilawlawag nga inusar ken nagragsakan da Adan ken Eva ken dagiti annakda dagiti mula ken ayup a naparsua para iti daga.

Aktibidad

Tulongan dagiti ubbing a mangaramid iti sumaganad nga ay-ayam iti ramay:

Da Adan ken Eva

Nagbiag iti daga da Adan ken Eva (*pagkaluben a nakasukog dagiti ima tapno mangipakita iti daga wenno lubong*)

Idi kabarbaro pay la daytoy.

Adu nga ayup ti inaywananda (*usaren ti maysa nga ima a mangapros iti sabali nga ima*)

Pinadakkelda dagiti mula a para taraonda (*ikabil dagiti ramay iti bibig, a kasla mangmangan*).

Adda anak da Adan ken Eva (*pagdinneketen ti dua a ramay*)

A naaddaan met bukod nga annakda (*inayon ti dua pay a ramay*).

Itan adu pay nga ubbing ti naipasngay (*iwagwag ti amin a sangapulo a ramay*).

Kitaen no kasano ti panagadu dagiti tao ti lubong (*usaren dagiti takiag nga agaramid iti dakkel a nagtimbukel; sa unnaten dagiti takiag iti sikigan*)!

Tulongan dagiti ubbing a makaawat a gapu ta da Adan ken Eva dagiti immuna a nagannak iti daga, pasettayo amin ti pamiliada.

Kinuna ti Nailangitan nga Ama ken ni Jesus a Nasayaat ti Daga

Basaen iti napigsa ti umuna a binatog ti Genesis 1:31. Paulit kadagiti ubbing ti binatog a kagiddandaka. Ilawlawag a marikrikna ti Nailangitan nga Ama ken ni Jesus a nasayaat amin a pinarsuada. Ti kapatgan, mariknada a nasayaattayo, ket ay-ayatenda unay unay ti tunggal maysa kadatayo.

Pammaneknek

Iburaymo ti pammaneknekmo maipapan iti ayat ti Nailangitan nga Ama ken ni Jesus para iti tunggal maysa kadatayo. Ilawlawag a ti daga ken amin a banag nga adda ditoy ket para kadatayo tapno usaren ken pagragsakantayo. Iti kanito a makakitatayo iti maysa a sabong, bituen, wenno ania man a dadduma pay a naparsua, maipalpalagip kadatayo nga ay-ayatennatayo ti Nailangitan nga Ama ken ni Jesus. Ipeksam ti panagyamanmo para iti ayatda ken para iti daga.

Dagiti Aktibidad a Mangpadur-as iti Pannakaammo

Pumili iti sumagmamano kadagitoy nga aktibidad tapno usaren bayat ti adalen.

1. Pumili iti sumagmamano nga aktibidad manipud kadagiti adalen 8 agingga iti 13, kas iti “Pinarsua ti Dios” wenno “Noe,” tapno aramiden a kadua dagiti ubbing.
2. Sublien nga adalen no ania ti napasamak iti tunggal aldaw ti Panagparsua bayat ti panangbilang dagiti ubbing kadagiti aldaw iti ramramayda.
3. Kantaen wenno isao dagiti balikas iti “My Heavenly Father Loves Me” (*Children’s Songbook*, p. 228), a kagiddan dagiti ubbing.
4. Ipadrowing wenno pakoloran kadagiti ubbing ti ladawan ti maysa a banag a paset ti plano ti Nailangitan nga Ama, kas iti maysa a sabong, maysa a kayo, wenno ti init. Isurat iti ngato ti papel ti tunggal ubing ti *Agyamanak para iti daga*.

**Dagiti Mainayon
nga Aktibidad
para kadagiti
Babbassit
nga Ubbing**

1. Isao dagiti balikas iti "The World Is So Big" (*Children's Songbook*, p. 235).
Tulongan dagiti ubbing a mangaramid kadagiti garaw a naipakita iti baba:

Nakadakkkel ken nakabukbukel ti lubong (*agaramid iti dakkkel a nagtimbukel babaen kadagiti takiag*),

Ket adda ditoy dagiti pinarsua ti Dios;

Dagiti bantay (*isukog dagiti ima a kasla bantay iti ngatuen ti ulo*)

Ken tantanap (*ikabil dagiti ima a nakapakleb iti sanguanan*)

Ken dagiti kayo a nakataytayag (*unnaten nga ipangato dagiti takiag*),

Ken dadakkkel nga ayup (*gumaw-at nga agpangato*)

Ken babassit nga ayup (*gumaw-at nga agpababa*).

Dagiti bituen agrimimat iti agpatnag (*unnaten ken iwagwag dagiti ramay*),

Init iti aldaw, nabara ken nalawag (*agaramid iti dakkkel a nagtimbukel babaen kadagiti takiag*),

Nakadakkkel ken nakabukbukel ti lubong.

Ay-ayatennatayo ti Dios, aduantayo iti parabur (*petpetan dagiti takiag ket arakupen ti bagi*).

2. Tulongan dagiti ubbing a mangaramid kadagiti garaw iti sumaganad nga ay-ayam iti ramay bayat ti panangisaom kadagiti balikas.

Ti Pinarsua ti Dios

Inaramid ti Dios ti bulan (*agaramid iti nagtimbukel babaen kadagiti ima*)

Ken dagiti agrimimat a bituen (*ukraden ken keppetien dagiti ima*)

Ket inkabilna iti tangatang (*gumaw-at nga agpangato*).

Inaramidna ti init (*agaramid iti nagtimbukel babaen kadagiti takiag iti ngatuen ti ulo*)

Ken dagiti kaykayo (*paglintegen nga ipangato dagiti takiag*)

Ken dagiti sabsabong (*isukog dagiti ima*)

Ken dagiti babassit a tumatayab nga agtaytayab (*ipayapay dagiti takiag*).

(Manipud iti *Fascinating Finger Fun* ni Eleanor Doan. © 1951. Naaramat nga addaan pammalubos.)

Panggep

Tapno tulongan ti tunggal ubing a makaawat a ti Sabbath ket aldaw a panagdaydayaw ken panaginana.

Panagsagana

1. Sikakararag nga adalen ti Genesis 2:1–3 ken Exodo 16:11–31. Kitaen met iti Pagbatayan iti Ebanghelio (31110 864), maika-24 a paset.
2. Dagiti kasapulan:
 - a. Biblia.
 - b. Ladawan 1-6, Family Home Evening (62521 864); ladawan 1-7, Maysa a Naayat a Pamilia; ladawan 1-8, Panangiwaras iti Sacramento (62021 864); ladawan 1-9, Kararag iti Agsapa (62310 864); ladawan 1-10, Kararag ti Kaamaan (62275 864); ladawan 1-35, Panangummong iti Manna; ladawan 1-36, Dagiti Annak ken Nagannak a Mangibasbasa iti Maysa nga Estoria iti Nasantuan a Kasuratan.
3. Aramidem dagiti nasken a panagsagana para kadagiti ania man nga aktibidad a mangpadur-as iti pannakaammo a kayatmo nga usaren.

Dagiti Aktibidad iti Pannakasursuro

Mangawis iti maysa nga ubing a mangted iti pangrugi a kararag.

Aktibidad a Pangawis iti Panagdengngeg

Tulongam dagiti ubbing a mangidrama iti tunggal aldaw ti Panagparsua bayat ti panangipalagipmo kadakuada maipapan iti no ania ti naparsua iti tunggal aldaw (kitaen iti Genesis 1):

- | | |
|---------|---|
| Aldaw 1 | Agpammarang a matmaturog ket kalpasanna agriing, tapno ipakita ti rabii ken aldaw. |
| Aldaw 2 | Tumakder, tumangad, ket unnaten dagiti takiag tapno ipakita ti tangatang. |
| Aldaw 3 | Agrukob a mangpuros iti maysa a sabong ket kalpasanna say-upen ti sabong. |
| Aldaw 4 | Agaramidka iti dakkel a sirkulo babaen dagiti takiagmo para iti init ken basbassit a sirkulo babaen dagiti imam para iti bulan, ket kalpasanna iwagwagmo dagiti ramaymo bayat ti panangigarawmo kadagiti takiagmo tapno mangibagi kadagiti agrimrimat a bituen. |
| Aldaw 5 | Agpammarang a maysa a tumatayab nga agtaytayab nga aglawlaw iti siled wenno ikan nga aglanglangoy iti baybay. |
| Aldaw 6 | Agpammarang a maysa nga ayup. Magna nga aglawlaw iti siled iti sumagmamano a gundaway a mangtultulad iti dayta nga ayup. Kalpasanna tumakder iti maysa a linia ket tunggal maysa mangisao iti, "(Ti naganko ket (bukod a nagan ti ubing). Siak ket anak ti Dios." |

Pagtugawen a siuulimek dagiti ubbing.

Ibaga kadagiti ubbing nga iti maikapito nga aldaw, naginana ti Nailangitan nga Ama ken ni Jesus. Inawaganda daytoy nga aldaw a panaginana iti Sabbath.

Paulit kadagiti ubbing ti balikas a *Sabbath* iti sumagmamano a gundaway.

Maysa a Nasantuan nga Aldaw ti Sabbath

Basaen iti napigsa ti Genesis 2:1–2 ken bersikulo 3 agingga iti balikas nga aldaw. Ilawlawag nga idi nalpas ti Nailangitan nga Ama ken ni Jesus iti panangparsua iti daga ken amin a banag nga adda ditoy, binendisionanda ti maikapito nga aldaw. Nagbalin daytoy a maysa a nasantuan nga aldaw, a maigiddiat iti dadduma nga aldaw ti lawas. Ti Sabbath ket aldaw a panaginanatayo iti trabaho ken panagdaydayawtayo iti Nailangitan nga Ama ken ni Jesus.

- Ania nga aldaw ti lawas ti Sabbath?
- Ania ti inaramid ti Nailangitan nga Ama ken ni Jesus iti aldaw ti Sabbath? (Kitaen iti Genesis 2:2.)

Aktibidad

Paingato kadagiti ubbing ti pito a ramayda. Agbilang agingga iti pito a kagiddan ida, a mangigaraw iti tunggal ramay bayat ti pannakabilang daytoy. Ilawlawag nga iti innem nga aldaw (iwagwag dagiti umuna nga innem a ramay), aramidentayo ti trabahotayo. Iti maikapito nga aldaw (iwagwag nga agmaymaysa ti maikapito a ramay), aginanatayo manipud iti trabahotayo gapu ta aldaw daytoy ti Sabbath.

Estoria

Ipakita ti ladawan 1-35, Panangummong iti Manna, ket isalaysay ti estoria maipapan kadagiti Israelita ken ti manna, a masarakan iti Exodo 16:11–31.

Tulongan dagiti ubbing a makaawat iti milagro ti manna. Ilawlawag nga inaldaw a nagurnong dagiti Israelita iti umdas laeng a manna para iti dayta nga aldaw, ngem iti maikanem nga aldaw nagurnongda iti umdas a manna para iti dua nga aldaw. No nagurnong dagiti Israelita iti sobra a manna iti ania man nga aldaw malaksid iti maikapito, mabangles daytoy. Iti maikapito nga aldaw a Sabbath idi, awan ti manna a maurnong. Iti daytoy nga aldaw kinnan dagiti Israelita ti sobra a manna nga inurnongda iti maikanem nga aldaw.

- Kasano ti panagala dagiti Israelita iti taraonda?
- Apay a dida nagurnong iti manna iti Sabbath?

Basaen iti napigsa ti Exodo 16:26. Ilawlawag a nasursuruan dagiti Israelita a saan nga agrabaho iti Sabbath. Iti Sabbath, kayat ti Nailangitan nga Ama ken ni Jesus a panunotentayo ida imbes a ti trabahotayo. Nasantuan unay nga aldaw ti Sabbath iti Nailangitan nga Ama ken ni Jesus.

Yunay-unay a ti Sabbath saan nga aldaw a panagtrabaho ken panagaramid kadagiti kadawyan a banag no di ket aldaw a panagdaydayaw iti Nailangitan nga Ama ken ni Jesus. Ti *panagdaydayaw* kayatna a sawen ti panagpanunot iti Nailangitan nga Ama ken ni Jesus ken panagaramid iti bambanag a mangipakita no kasano ti panagayattayo kadakuada.

Maysa nga Aldaw a Panagdaydayaw ti Sabbath

Tulongan dagiti ubbing a makaawat a naragsak nga aldaw ti Sabbath gapu ta makapagdaydayawtayo iti Nailangitan nga Ama ken ni Jesus iti adu a nadumaduma a wagas.

- Ania ti inaramidyo ita nga aldaw a mangipakita iti Nailangitan nga Ama ken Jesus nga ay-ayatenyo ida?

Ilawlawag a maysa a napateg a wagas tapno makapagdaydayawtayo iti Nailangitan nga Ama ken ni Jesus, wenna mangipakita kadakuada nga ay-ayatentayo ida, ket babaen ti papan iti Simbaan ken pannakiranud iti sakramento. Ipakita ti ladawan 1-8, Panangiwaras iti Sakramento. Maragsakan ti Nailangitan nga Ama ken ni Jesus no agkanta ken dumngegtayo ken no naulimek ken agtignaytayo iti rumbeng tapno mangngegtayo dagiti mannursurotayo ken mariknatayo ti ayat ti Nailangitan nga Ama ken ni Jesus para kadatayo.

Aktibidad

Tulongan dagiti ubbing a mangaramid iti sumaganad nga ay-ayam iti ramay:

Maragsakanak nga Immay iti Simbaan Ita

Maragsakanak nga immay iti Simbaan ita (*agaramid iti torre ti simbaan babaen ti panamagdekket kadagiti murdong dagiti ramay ti agpada nga ima*).

Magusgustuak a dumnggek (*pagsukogen ti ima iti lawlaw ti lapayag*).

Ken agkararag (*agdalikepkep ken agdumog*).

Agsursuroak maipapan ken ni Jesus nga adda idia langit (*itudo iti ngato*);

Pampanunotek ni Jesus ken ti ayatna (*arakupen ti bagi*).

Ipakpakitatayo pay iti Nailangitan nga Ama ken ni Jesus nga ay-ayatentayo ida babaen ti panagbalintayo a naurnos ken nadalus no umaytayo iti Simbaan.

Nasken a dalusantayo ti rupa ken buoktayo ket ikawestayo dagiti kapintasan a badotayo.

Aktibidad

Paidrama kadagiti ubbing ti panagsagana para iti simbaan.

- Ania ti aramidentayo tapno makapagdaydayawtayo iti Nailangitan nga Ama ken ni Jesus no addatayo iti Simbaan?
- Ania ti aramidentayo tapno makapagdaydayaw ita iti Nailangitan nga Ama ken ni Jesus no addatayo iti pagtaengan?

Tulongan dagiti ubbing a makaawat a masapul a saantayo a gumastos wenna gumatang iti Sabbath. Masapul a saantayo a mapan kadagiti aktibidad a pagay-ayaman wenna pagliwiwaan iti Sabbath. Masapul a saantayo nga agtrabaho iti arubayan wenna minuyongantayo wenna mapan agkalap wenna aganup iti Sabbath.

Ilawlawag nga adu a banag ti aramiden iti pagtaengan tapno mapagtalinaed a nasantuan ti aldaw ti Sabbath. Ipakita dagiti ladawan manipud iti benneg ti “Panagsagana” iti maitutop nga oras bayat daytoy a panaglilinnawag. Makapagay-ayamtayo kadagiti naulimek nga ay-ayam a kadua dagiti kameng ti pamilia, paibasa kadatayo dagiti estoria iti nasantuan a kasuratan, agaramid kadagiti album ti pamilia, sumarungkar kadagiti kabagian wenna kadagiti masakit, agdrowing kadagiti ladawan ti bambanag a pagyamanantayo, agpasiar a kadua ti maysa a kameng ti pamilia, agkararag, agkansion kadagiti kanta, ken dumnggek iti nasayaat a musika.

Aktibidad

Pagsisinnublaten dagiti ubbing a mangidrama kadagiti banag a paggugustoda nga aramiden iti pagtaengan tapno mapagtalinaed a nasantuan ti aldaw ti Sabbath.

Pammaneknek

Ibaga kadagiti ubbing a maragsakan ti Nailangitan nga Ama ken ni Jesus no mapantayo iti simbaan iti Sabbath ken no agkanta, agkararag, ken dumngegtayo kadagiti mannursurotayo. Maragsakanda pay no agtignaytayo iti umisu iti pagtaengan iti Sabbath. Isaritam ti maipapan iti sumagmamano a naraeman a bambanag

a kayatmo nga aramiden iti Sabbath, ket ipeksam no kasano ti ragsak a mariknam iti aldaw ti Sabbath. Allukoyen dagiti ubbing a mangisarita iti pamilyada no ania ti nasursuroda iti daytoy nga adalen.

Dagiti Aktibidad a Mangpadur-as iti Pannakaammo

Pumili iti sumagmamano kadagitoy nga aktibidad tapno usaren bayat ti adalen.

1. Aramidem ti sumaganad nga aktibidad, a mangpartuat iti maysa a berso para iti tunggal ubing iti klasem. Awisem dagiti ubbing a mangaramid kadagiti garaw a kagiddandaka.

Gapu ta Domingo Ita nga Aldaw

Itudom ti maysa nga ubing iti klasem ket sawem ti nagan dayta nga ubing bayat ti panangisaom iti daytoy a berso ken panangaramidmo iti naipakita a garaw:

Dimngeg ni (nagan ti ubing) iti nasantuan a kasuratan ita nga aldaw (*isukog ti ima iti li.kudan ti lapayag*).

Dimngeg ni (nagan ti ubing) iti nasantuan a kasuratan ita nga aldaw, gapu ta Domingo ita.

Isaom ti maysa a berso para iti tunggal ubing, nga usarem dagiti sumaganad a kapanunotan iti porma a kas iti ngato:

Nagkararag ni (nagan ti ubing) iti Primary ita nga aldaw (*agdalikepkep, agdumog, agkidem*).

Nagdrowing iti ladawan ni (nagan ti ubing) ita nga aldaw (*agpammarang nga agdrowing babaen iti ima*).

Simmarungkar ni (nagan ti ubing) iti maysa a tao a malidliayan ita nga aldaw (*alamanuen ti ubing a nadakamat*).

Nasursuro ni (nagan ti ubing) iti maipapan iti pakasaritaan ti pamilya ita nga aldaw (*agpammarang nga agluklukib kadagiti panid ket kumitkita kadagiti ladawan*).

Nagsurat ni (nagan ti ubing) kada Lelang ken Lelong ita nga aldaw (*igaraw dagiti ima a kasla agsursurat*).

Dimngeg ni (nagan ti ubing) iti estoria ita nga aldaw (*isukog ti ima iti lawlaw ti lapayag*).

2. Isalaysaymo kadagiti ubbing ti sumaganad nga estoria iti bukodmo a balikas:

Nagbaniaga dagiti nagkauna a kameng iti adu a milia tapno makadanonda iti Salt Lake Valley tapno agindeg. Simmangpetda sumagmamano laeng nga aldaw sakbay ti Sabbath. Nupay addaanda kadagiti ipatakder a balay ken bukukel nga imula, inkeddengda a saan nga agtrabaho iti aldaw ti Sabbath. Nagtrabahoda a nasayaat ken alistoda a nangkali iti daga ket insaganada daytoy a pagmulaan. Natangkeng unay ti daga, isu a nasken a basaenda daytoy a husto tapno maarado. Idi dimteng ti rabii ti Sabado, addaandan iti dakkal a taltalon a namulaan kadagiti nateng. Iti bigat ti Domingo, naguummongda para kadagiti mitingda iti Sabbath ken nagyamanda iti Nailangitan nga Ama iti panangyegna kadakuada iti maysa a baro a lugar a pagnaedan.

3. Padrowing iti tunggal ubing ti bagina nga agar-aramid iti maysa nga aktibidad iti Sabbath. Paisarita kadagiti ubbing iti tunggal maysa maipapan kadagiti ladawanda. Naganan ti tunggal ladawan iti nagan ti ubing ken ti aktibidad, kas iti daytoy a pagarigan: *Agkankanta ni David kadagiti kanta ti Primary iti aldaw ti Sabbath*.

**Dagiti Mainayon
nga Aktibidad
para kadagiti
Babbabassit
nga Ubbing**

1. Tulongam dagiti ubbing a mangaramid kadagiti garaw iti sumaganad a berso ti aktibidad bayat ti panangisaom kadagiti balikas:

Ti Panagparsua

Kinuna ni Jesus a masapul nga agraniag ti init (*agaramid iti dakkal a nagtimbukel iti ngatuen ti ulo babaen kadagiti takiag*),

Masapul nga agtudo (*ibaba dagiti ima iti sanguanan bayat ti panangiwagwag kadagiti ramay*),

Masapul a dumakkal dagiti sabong (*isukog dagiti ima, nakasango iti ngato dagiti dakulap*).

Kinuna ni Jesus a masapul nga agkanta dagiti tumatayab (*ukraden ken keppeteng dagiti ramay ken tammudo kas iti sippit ti maysa a tumatayab*),

Ket amin a kinuna ni Jesus a masapul a mapasamak, napasamak (*agdalikepkep*).

(Johnie B. Wood, iti *Sing, Look, Do, Action Songs for Children*, ed. Dorothy M. Peterson [Cincinnati: Standard Publishing Co., 1965].)

Ilawlawag a kalpasan ti pannakaparsua ti daga, naginana ti Nailangitan nga Ama ken ni Jesus. Ti Sabbath ket maysa nga aldaw a panaginana ken pananglagip iti Nailangitan nga Ama ken ni Jesus.

2. Ibaga kadagiti ubbing a no aramidentayo ti trabahotayo iti Sabado, maaramid a nalaklaka ti pananglagip ken ni Jesus ken ti Nailangitan nga Ama iti Domingo. Kantaen ti "Saturday" (*Children's Songbook*, p. 196), a mangparpartuat kadagiti garaw kas isingsingasing dagiti balikas.

Panggep Tapno tulongan ti tunggal ubing nga agyaman ken mangdayaw iti pisikal a bagina.

Panagsagana

1. Sikakararag nga adalen ti Daniel 1 ken Doktrina ken Katulagan 89. Kitaen met iti Pagbatayan ti Ebanghelio (31110 864), maika-29 a paset.
2. Dagiti kasapulan:
 - a. Biblia ken kopia ti Doktrina ken Katulagan.
 - b. Ladawan 1-5, Pamilia nga Addaan iti Maladaga (62307 864); ladawan 1-37, Ni Daniel a Mangkedkedked iti Karne ken Arak ti Ari (Pakete ti Ladawan ti Arte ti Ebanghelio 114; 62094 864); ladawan 1-38, Ubbing nga Agay-ayam iti Bola.
3. Aramidem dagiti nasken a panagsagana para kadagiti ania man nga aktibidad a mangpadur-as iti pannakaammo a kayatmo nga usaren.

Palagip iti mannursuro: Agbalinka a managrikna kadagiti asino man nga ubbing iti klasem nga addaan kadagiti pagkurangan iti bagi. Ipamaysam dagiti banag a kabaelan nga aramiden ti bagida, saan nga iti pagkuranganda.

Dagiti Aktibidad iti Pannakasursuro

Mangawis iti maysa nga ubing a mangted iti pangrugji a kararag.

Aktibidad a Pangawis iti Panagdengngeg Patakderen dagiti ubbing. Tulongan ida a mangkanta ken mangaramid kadagiti garaw iti “Head, Shoulders, Knees, and Toes” (*Children’s Songbook*, p. 275). Nainnayad a kantaen ti kanta tapno maitudo wenno maigaraw dagiti paset ti bagi bayat ti pannakadakamat dagitoy. Kas pagarigan, itung-ed ti ulo, ikuti ti abaga, ikukot ti tumeng, ken agtil-ay.

Ulo, abaga, tumeng, ramay ti saka,
Lapayag ken bibig, agong ken mata.

llawlawag kadagiti ubbing nga usarenda dagiti bagida tapno makatulung kadakuada a mangkanta iti daytoy a kanta.

Plinano ti Nailangitan nga Ama a Maaddaan ti Tunggal Maysa Kadatayo iti Pisikal a Bagi

Sublien nga adalen a kadua dagiti ubbing nga idi nagnaedtayo idiy langit a kadennatayo ti Nailangitan nga Ama ken ni Jesucristo, awanantayo kadagiti pisikal a bagi. Espiritutayo idi. Kinasapulantayo ti umay iti daga tapno manggun-od iti pisikal a bagi. Plinano ti Nailangitan nga Ama a maipasngaytayo iti daga ken maaddaan kadagiti naindagaan a nagannak tapno agaywan kadatayo.

Iparang ti ladawan 1-5, Pamilia nga Addaan iti Maladaga.

- Asino dagiti tao iti daytoy a ladawan?
- Asino ti nagplano nga umaytayo iti daga tapno manggun-od kadagiti bagi ken maaddaan iti pamilia?

Aktibidad

Patakderen dagiti ubbing ket ipatulad dagiti garawmo bayat ti panangilawlawagmo a dagiti bagitayo ket manipud iti tuktok ti ulotayo (sagiden ti ulo) agingga iti murdong dagiti ramay ti saksakatayo (sagiden dagiti ramay ti saka). Dagiti rupa (umisem) ken dagiti ramaytayo (iwagwag dagiti ramay) ket paset amin ti bagitayo. Pagpuligosen dagiti ubbing iti maminsan ket pagtugawen.

Ilawlawag a makaaramid dagiti bagitayo iti adu a banag. Adda naisangsangayan nga aramiden ti tunggal paset ti bagi.

- Ania ti mabalinyo nga aramiden babaen kadagiti matayo?
- Ania ti mabalinyo nga aramiden babaen kadagiti lapayagyo?
- Ania ti mabalinyo nga aramiden babaen kadagiti ngiwatyo?
- Ania ti mabalinyo nga aramiden babaen kadagiti imayo?
- Ania ti mabalinyo nga aramiden babaen kadagiti sakayo?

Aktibidad

Patakderen dagiti ubbing ket paaramid ti sumaganad a garaw iti berso:

Addaanak iti Nakaskasdaaw a Bagi

Addaanak iti nakaskasdaaw a bagi (*iparabaw dagiti ima iti barukong*)

A plinano ti Nailangitan nga Ama para kaniak.

Inikkannak kadagiti lapayag tapno makangngegak (*isukog ti ima iti lawlaw ti lapayag*)
Ken kadagiti mata tapno makakitaak (*itudo dagiti mata*).

Addaanak iti dua nga ima tapno makasipatak (*pagsipaten dagiti ima*),

Dua a saka tapno makapuligosak (*agpuligos*).

No kayatko, kabaalak

A sagiden dagiti ramay ti sakak a nakakummogak (*agkummog ken sagiden dagiti ramay ti saka*).

No panunotek maipapan iti bagik (*ipan ti ramay iti ulo*),

Ti kasayaatan daytoy a pasetna (*agtugaw a siuulimek*)

Ket plinano ti Nailangitan nga Ama

Tapno kalanglanga unay ti mismo a bagina.

Kayat ti Nailangitan nga Ama ken ni Jesucristo nga Aywanantayo dagiti Bagitayo

Ilawlawag a gapu ta napateg unay dagiti bagitayo, inikkannatayo ti Nailangitan nga Ama ken ni Jesus kadagiti annuroten tapno makatulong kadatayo a mangaywan iti bagitayo ken mangpatalinaed kadagitoy a napigsa ken nasalun-at. Maawagan dagitoy nga annuroten iti Word of Wisdom. Ipakita ti maysa a kopia ti Doktrina ken Katulagan (wenno ipakita no sadino ti rugi ti Doktrina ken Katulagan iti triple a kombinasion). Ilawlawag a naisurat ti Word of Wisdom iti daytoy a libro ti nasantuan a kasuratan.

Ilawlawag dagiti kita ti taraon nga ibagbaga kadatayo ti Word of Wisdom a makatulong a mangpatalinaed a nasalun-at dagiti bagitayo, kas kadagiti prutas, nateng, ken bukbukel. Kalpasanna ilawlawag dagiti banag nga imbaga ti Nailangitan nga Ama ken ni Jesus a ditayo usaren kas iti tabako, makabartek nga inumen, ken kape. Tulongan dagiti ubbing a makaawat a no agtungpaltayo iti Word of Wisdom ken kanentayo dagiti umno a taraon, maragsakan ti Nailangitan nga Ama ken ni Jesus kadatayo ken bendisionandatayonto.

Estoria

Isalaysay ti estoria iti Daniel 1 maipapan no kasano a kinnan ni Daniel ti taraon a kayat ti Nailangitan nga Ama a kanenna. Ipakita ti ladawan 1-37, Ni Daniel a Mangkedkedked iti Karne ken Arak ti Ari, iti maitutop nga oras.

- Ania ti inaramid ni Daniel idi imbaga kenkuana ti ari a kanenna dagiti banag a saan a nasayaat para kenkuana? (Kitaen iti Daniel 1:8; 12–13.)
- Kasano a naparaburan ni Daniel ken dagiti gagayyemna iti panangsurotna kadagiti annuroten ti Nailangitan nga Ama maipapan no ania ti kanen? (Kitaen iti Daniel 1:15, 17, 20.)
- Ania dagiti makapasalun-at a taraon a kankanenyo?
- Apay a nasken a mangankayo iti makapasalun-at a taraon?
- Kasano ti panagriknayo no mangankayo kadagiti taraon a nasayaat para kadakayo?

llawlawag a nasken pay nga aramidentayo dagiti dadduma pay a banag tapno mapagtalinaed a nasalun-at ken napigsa dagiti bagitayo.

Ipakita ti ladawan 1-38, Ubbing nga Agay-ayam iti Bola.

- Ania ti ar-aramiden dagitoy nga ubbing?
- Apay a napateg a watwatentayo dagiti bagitayo?
- Ania dagiti dadduma pay a wagas a pakawatwatantayo kadagiti bagitayo?

lkabil ti agpada nga imam iti maysa a bangir ti rupam ket agkidemka a kasla matmaturogka.

- Ania ti tultuladek nga aramiden?
- Apay a napateg a maaddaan iti umdas nga oras a pannaturog?

Aginkukunaka a bugbugguam dagiti imam.

- Ania ti tultuladek nga aramiden?
- Kaano ti nasken a panagugastayo kadagiti imatayo?
- Kaano ti nasken a panagdigostayo?
- Kaano ti nasken a panagsipilotayo?
- Apay a masapul nga agbalintayo a nadalus?

llawlawag ti dadduma pay nga annuroten iti salun-at, kas iti panagkawes iti maikana-tad para iti amin a kita ti panawen, panangsanay kadagiti nasayaat ken natalged a kaugalian, ken pananglang-ab iti sadiwa nga angin.

Kayat ti Nailangitan nga Ama ken ni Jesus a Saluadantayo dagiti Bagitayo

llawlawag a kayat ti Nailangitan nga Ama ken ni Jesus a saluadantayo dagiti bagitayo manipud iti pannakadangran ken pannakadunor. Saludsodem kadagiti ubbing maipapan kadagiti peggad a mabalinda a pakaipasangan, nga usarem dagiti sumaganad a saludsod wenno agaramidka iti bukodmo:

- Ania ti mabalin a mapasamak no agay-ayamkayo iti posporo?
- Ania ti mabalin a mapasamak no agay-ayamkayo iti kalsada wenno iti lawlaw dagiti lugan?

- Ania ti mabalin a mapasamak no saanka a naannad kadagiti natadem a banag kas kadagiti kutsilio ken kartib?
- Apay nga agusartayo iti barikes a pangsaluad (seat belt) no aglugantayo iti maysa a kotse?

llawlawag a masapul a saluadantayo dagiti bagitayo. Nasken a ditay agaramid kadagiti banag a napeggad kadagiti bagitayo ken mabalin a mangdangran kadagitoy. llawlawag a kayat ti Nailangitan nga Ama ken ni Jesus a mariknatayo ti talged ken ragsak. Kayatda nga aywanantayo dagiti bagitayo tapno agbalintayo a nasalun-at.

Pammaneknek

Ipeksam ti riknam iti panagyamanmo iti pisikal a bagim. Ipeksam ti panagyamanmo gapu ta ay-aywanan dagiti ubbing ti bagida tapno agbalinda a nasalun-at ken napigsa.

Dagiti Aktibidad a Mangpadur-as iti Pannakaammo

Pumili iti sumagmamano kadagitoy nga aktibidad tapno usaren bayat ti adalen.

1. Kantaen ti “Hinges” (*Children’s Songbook*, p. 277), nga aramiden dagiti garaw kas isingsingasing dagiti balikas. Ibaga kadagiti ubbing no kasano ti panagyamanmo para iti maysa a bagi a makaaramid iti adu a banag.
2. Mangitugot iti ladawan dagiti nadumaduma a banag a makan ken mainum. Paikeddeng kadagiti ubbing no nasayaat wenno dakes ti tunggal banag para iti bagida. llawlawag a nasayaat ti sumagmamano a banag, ngem saan a nasayaat no mapalaluantayo ti mangan wenno uminum kadagitoy. Kas pagarigan, naimas ti raman ti kendi, ngem pagsakitennatayo no mapalaluantayo. Iparang ti lادلadawan dagiti nasayaat a banag tapno makita dagiti ubbing.
3. Iti maysa a supot wenno kahon, mangitugot iti sumagmamano a banag a makatulong kadatayo a mangaywan kadagiti bagitayo. Iraman ti maysa a banag a makatulong a mangpatalinaed kadatayo a nadalus, kas iti sabon, labakara wenno bassit a tualia, wenno sipilio. Iraman ti nasayaat a taraon, bassit nga ules a mangisingasing iti pannaturrog, ken maysa a banag a mangisingasing iti panagwatwat, kas iti maysa a bassit a bola. Ikkan dagiti ubbing iti pangibagnos (clues) maipapan iti maysa a banag ket papugtuang no ania daytoy. Ipakitam kadakuada ti banag no mapugtuanda a husto daytoy. Itultuloy agingga a maipakaammo ti amin a banag.
4. Patakderen dagiti ubbing ket payakem (pantomime) kadakuada ti panangpatalinaed iti bagida a naurnos ken nadalus. Paginkukunaen ida a bugbuguanda dagiti imada, sipsipiluenda ti ngipenda, ken sagsagaysayenda ti buokda. Kalpasanna paidrama kadakuada ti paggugustoda a wagas ti panagwatwat, kas iti panaglagto, panagkingking, panaglaktaw, wenno panangibato iti bola.
5. Kasarita dagiti ubbing maipapan no kasano nga addaan pagkurangan iti bagi ti sumagmamano a tao. Nasken a ditay pagang-angawan dagitoy a tao wenno itudtudo wenno katkatawaan ida. Pagsasaritaan maipapan no kasano ti nasken a panangtratotayo kadagiti tao nga addaan kadagiti pagkurangan iti bagi (kasarita ida, agbalin a gayyemda, tratuen ida a gagangay, tulongan ida no kasapulanda ti tulong).

6. Paidrowing iti tunggal ubing ti ladawan ti bagina. Suratan ti tunggal papel iti *Agyamanak iti bagik*.

**Dagiti Mainayon
nga Aktibidad
para kadagiti
Babbabassit
nga Ubbing**

1. Ipakita ti ladawan 1-5, Pamilia nga Addaan iti Maladaga, ket paisarita kadagiti ubbing maipapan iti daytoy.

- Maladagakayo kadi idi?
- Makapagna wenno makapagsao kadi dagiti maladaga?

Ipalagip kadagiti ubbing a naminsan idi a maladagada, ngem itan dimmakkelen dagiti bagida ket makaaramidda iti ad-adu pay a banag. Bayat ti panagdakkel dagiti bagida, ad-adu pay ti kabaelanda nga aramiden.

Ipakita ti ladawan 1-16, Ti Pannakayanan, ket ipalagip kadagiti ubbing nga uray ni Jesus ket naminsan a maladaga idi.

2. Itudom ti ngiwatmo ket sawem, “Daytoy ti ngiwatko.” Kalpasanna saludsodem ti, “Maipakitayo kadi kaniak ti ngiwatyo?” ket tulongan dagiti ubbing a mangitudo iti bukodda a ngiwat. Uliten para iti mata, agong, lapayag, ima ken saka. Kalpasanna itudo ti tunggal paset ti bagi a saan nga ibagbaga ti nagan daytoy ket painaganan daytoy kadagiti ubbing. No mainaganan dagiti ubbing amin dagitoy a paset, mabalinmo pay a damagen ti nagan ti sumagmamano a paset ti bagi a di unay ammo dagiti ubbing, kas kadagiti siko, tumeng, pungupungan, ken lansa-lansa.
3. Mangparnuay iti simple nga estoria maipapan iti maysa a bassit nga ubing iti lugaryo. Isaritam ti maipapan iti panagriing ti ubing a nasapa, panagpelles, pannangan iti pamigat, ken dadduma pay iti unos ti agmalem. Bayat ti panangisaritam maipapan iti tunggal aktibidad, damagem kadagiti ubbing no ania dagiti paset ti bagi nga us-usaren dagiti ubbing.
4. Patakderem dagiti ubbing ket pakanta ti sumaganad a kanta iti ayug ti “Once There Was a Snowman” (*Children’s Songbook*, p. 299). Usaren dagiti garaw ti panagdumog para iti umuna a berso ken dagiti garaw ti panagunnat para iti maikadua a berso.

Maysaak idi a maladaga.

Bassit idi a maladaga.

Dumakdakkel a dumakdakkalak,

Tumaytayag a tumaytayagak!

Panggep

Tapno tulongan ti tunggal ubing nga agyaman kadagiti imana ken no ania ti kaba-elan nga aramiden dagitoy.

Panagsagana

1. Sikakararag nga adalen ti Mateo 19:13–15 ken Doktrina ken Katulagan 20:70; 35:6; 42:43–44.
2. Mangisagana iti maysa a supot wenno kahon a naglaon kadagiti kadawyan a banag a sabasabali ti pannakaapiras (texture) ken sukogda, kas iti bato, bulong, sangapedaso a tela, kutsara, sagaysay, ken lapis. Mangitugot ti uray maysa laeng a banag para iti tunggal ubing iti klase.
3. No mabalin, agaramid iti kopya ti maibunong a papel (handout) ti pannakisao babaen iti senias (a masarakan iti ungto ti adalen) para iti tunggal ubing.
4. Dagiti kasapulan:
 - a. Biblia.
 - b. Bassit a banag kas iti butones wenno sensilio.
 - c. Ladawan 1-8, Panangiwaras iti Sakramento (62021 864); ladawan 1-11, Ubing a Lalaki a Mabumbuniagan (62018 864); ladawan 1-12, Ubing a Babai a Makomkompirmaan (62020 864); ladawan 1-39, Panangbendision iti Maladaga; ladawan 1-40, Panangannong iti Masakit (62342 864).
5. Aramidem dagiti nasken a panagsagana para kadagiti ania man nga aktibidad a mangpadur-as iti pannakaammo a kayatmo nga usaren.

Palagip iti mannursuro: Agbalinka a managrikna kadagiti ania man nga ubbing iti klasem nga addaan kadagiti pagkurangan iti bagi. Ipamaysam kadagiti banag a *kabaelan* nga aramiden ti bagida, saan nga iti pagkuranganda.

Dagiti Aktibidad iti Pannakasursuro

Mangawis iti maysa nga ubing a mangted iti pangrugi a kararag.

Aktibidad a Pangawis
iti Panagdengngeg

Pagaw-at iti maysa nga ubing ti supot wenno kahon nga insaganam, a saanna a kitkitaen ti naguneg. Dawaten iti ubing nga arikapenna ti maysa kadagiti banag, ibagana no ania ti naapirasna (nalukneng, natangken, nalamuyot, nakersang), ket padasenna a pugtuan no ania daytoy. Kalpasanna paikkat iti ubing ti banag manipud iti supot wenno kahon ket ipakita daytoy iti klase. Bay-an nga aprosan dagiti dadduma pay nga ubbing daytoy. Itultuloy agingga a maaddaan ti tunggal ubing iti gundaway.

- Ania ti inusaryo tapno magaw-atyo ti supot (kahon)?
- Ania ti inusaryo tapno maapirasyo ti banag?

Ilawlawag a dakkal a parabur kadatayo dagiti imatayo. Mausartayo dagiti imatayo iti adu a wagas.

Makaaramidtayo iti Adu a Banag Babaen kadagiti Imatayo

Paingato kadagiti ubbing ti im-imada ket kitaenda dagitoy. Pagsasaritaan no ania ti maaramid dagiti ubbing babaen dagiti imada. Mabalinda a piduten ti maysa a banag babaen kadagiti ramay ken tanganda; mabalinda nga igganan ti maysa a banag iti dakulapda; makapagpayapay ken maisangoda dagiti imada iti amin a direksion.

Aktibidad

Usaren ti bassit a banag kas iti butones wenno sensilio, pagsisinnublaten dagiti ubbing a mangpadas a pumidot iti banag a di us-usaren dagiti tanganda. Ipalagip kadagiti ubbing a napateg ti tunggal maysa a paset dagiti bagitayo.

Aktibidad

- Kasano a tinulongannakayo dagiti imayo a makapagsagana nga umay iti simbaan?

Payakem (pantomime) kadagiti ubbing dagiti ar-aramiden iti agsapa, kas iti panagdiram-os, panagsukat iti bado, panagsagaysay, pannangan, ken panagsipilio.

- Kasano a tultulongannakayo dagiti imayo nga agay-ayam?

Payakem (pantomime) kadagiti ubbing dagiti wagas a pangusaranda kadagiti imada iti panagay-ayam kas iti panangpataltag iti bola, panagpammarang a panangpakan iti munieka, panagbangon kadagiti bloke (blocks) ken darat, wenno panagtambor.

- Kasano a tultulongannakayo dagiti imayo nga agrabaho?

Payakem (pantomime) kadagiti ubbing dagiti wagas a pangusaranda kadagiti imada nga agrabaho, kas iti panagpidut iti ay-ayam, panangisagana iti lamisaan, panagaramid iti katre, wenno panangpakan iti maysa nga aywan nga ayup.

- Kasano a tultulongannakayo dagiti imayo no umaykayo iti simbaan?

Payakem (pantomime) kadagiti ubbing dagiti wagas a pangusarantayo kadagiti imatayo iti simbaan, kas iti pannakialamano, panangiggem iti ladawan, panangi-ngato iti ima tapno sungbatan ti saludsod, wenno panangawat iti sakramento.

Tulongan dagiti ubbing a makaawat a dakkal a parabur kadatayo dagiti imatayo ken kayat ti Nailangitan nga Ama ken ni Jesus nga usarentayo dagiti imatayo tapno tulongantayo ti bagbagitayo ken dagiti sabali. Ilawlawag a di kayat ti Nailangitan nga Ama ken ni Jesus nga usarentayo dagiti imatayo tapno agbalintayo a natangsit iti sabali—tapno agkabil wenno agkuddot wenno agkaramut. Kayatda a sursurentayo nga usaren dagiti imatayo kadagiti umno a wagas.

Usaren dagiti Dadduma a Tao dagiti Imada Tapno Tulongandatayo

- Kasano nga usaren dagiti nagannak kadakayo ken ti dadduma pay a kameng ti pamiliayo dagiti imada tapno matulongandakayo?

Pagsasaritaan maipapan no kasano nga isagana dagiti pamiliatayo ti taraontayo, labaan ti badotayo, isiglot ti sapatostayo, makiay-ayam kadatayo, ken aramiden ti adu a dadduma pay a banag para kadatayo.

Ilawlawag a mabendisionandatayo dagiti lallaki nga addaan iti priesthood babaen ti panangipatay kadagiti imada. Saggaysa nga ipakita dagiti ladawan a nailista iti ben-neg ti “Panagsagana,” ket bay-an nga ibaga dagiti ubbing ti nadumaduma a kita ti bendision a maawattayo babaen dagiti ima dagiti addaan iti priesthood. Tulongan

ida a maawatan a mabalintayo a maikkan iti bendision no maladagatayo; mabalintayo a mabuniagan no agtawentayon iti walo; mabalintayo a makompirmaan kalpasan ti panagbuniag ken maikkan iti sagut ti Espiritu Santo; mabalintayo nga awaten ti tinapay ken danum, a binendisionan ken iwaras dagiti addaan iti priesthood, kabayatan ti sakramento iti tunggal lawas; ken mabalintayo nga awaten dagiti bendision no masakittayo.

Estoria

Lukibem ti Bibliam iti Mateo 19:13–15 ket salaysayem ti estoria maipapan ken ni Jesus a mangbendision kadagiti ubbing. Basaen iti napigsa ti umuna a paset ti bersikulo 13 (agingga iti agkararag). Pagsasaritaan no kasano nga inusar ni Jesus dagiti imana a nangbendision kadagiti ubbing.

llawlawag nga inusar pay ni Jesus dagiti imana a nangtulong kadagiti tao iti sabali a wagwagas, kas iti panangbendision kadakuada idi masakit, bulsek, wenno tulengda.

Makapagsao dagiti Imatayo

Usarem dagiti imam tapno agsenias wenno agpayapay. Saludsodem kadagiti ubbing no ania ti sasawem babaen kadagiti imam.

llawlawag nga adda dagiti tao a tuleng ken di makangngeg wenno di makapagsao ti agsenias babaen kadagiti imada a kayatna a sawen dagiti balikas. Agsaoda babaen dagiti imada. Maaw-awagan daytoy iti pannakisao babaen ti senias (sign language).

Aktibidad

Usaren ti maibunong a papel (handout) iti ungtu ti adalen, isuro kadagiti ubbing no kasano ti panangisao iti “ama,” “ina,” ken “ay-ayatenka” iti pannakisao babaen ti senias iti Ingles. No mabalin, ikkan ti tunggal ubing iti kopia ti maibunong a papel tapno yawidda ket ipakita wenno isaritada iti pamiliana.

Pammaneknek

Ingatom dagiti imam ket ipeksam ti panagyamanmo kadagitoy. Allukoyem dagiti ubbing tapno agyaman iti Nailangitan nga Ama para kadagiti imada ken tapno usarenda dagiti imada a pangtulong iti bagbagida ken kadagiti sabali.

Dagiti Aktibidad a Mangpadur-as iti Pannakaammo

Pumili iti sumagmamano kadagitoy nga aktibidad tapno usaren bayat ti adalen.

1. Ugedan ti ima ti tunggal ubing iti maysa a panid ti papel. Isurat ti *Agyamanak kadagiti imak* iti tunggal papel, ket pakoloran iti ubing ti naugedan ket yawidna daytoy.
2. Tulongan dagiti ubbing a mangkanta wenno mangisao kadagiti balikas iti “I Have Two Little Hands” (*Children’s Songbook*, p. 272). Mangpartuat kadagiti garaw kas isingsingasing dagiti balikas.
3. No ipalubos ti lugar ken panawen, ipan dagiti ubbing a magna iti ruar tapno agsagid kadagiti banag nga agduduma ti pannakaapirasna (texture) kas iti nardilio (brick), semento, puon ti kayo, ken ruot.
4. Aramiden ti sumaganad nga aktibidad tapno makatulong kadagiti ubbing nga agbilang kadagiti ramay ken tanganda:

Panagbilang kadagiti Ramay

Ingato ti maysa nga ima ket usaren ti maysa a ramay ti sabali pay nga ima nga agitudo ken agbilang, a mangrugi iti kikit.

Maysa, dua, tallo, uppat a ramay.
Ita adda pay nayonna a maysa a tangan.
Lima a ramay ti adda ditoy maysa nga ima,
Kas iti plano ti Nailangitan nga Ama.

Ingato ti sabali pay nga ima ket agitudo ken agbilang iti kasta met la a wagas.

Maysa, dua, tallo, uppat a ramay.
Ita adda pay nayonna a maysa a tangan.
Lima pay a ramay ti adda ditoy nga ima.
Maisurok kadakuada ti aramidenda.

Ingato ti agpada nga ima ket unnaten ti tunggal ramay apaman a mabilang daytoy.

Sangapulo amin—bilangentay manen.
Maysa, dua, tallo, uppat,
Lima, innem, pito, walo, siam, sangapulo—amin.
(*Paggigiddanen nga ilinteg ti amin a ramay.*)
Makatakderda a nalinteg ken atiddog amin.

5. Kantaen ti “Fun to Do” (*Children’s Songbook*, p. 253) iti sumagmamano a gundaway. Para iti tunggal berso, paibaga kadagiti ubbing iti maysa a banag a maaramid dagiti imada, kas iti panangpataltag iti bola, panagpuros iti sabong, panangindayon iti munieka, panagtokar iti piano, wenno panagpayapay iti panagpakada.
6. Tulongan dagiti ubbing a mangaramid iti sumaganad a berso ti aktibidad, nga usaren dagiti garaw nga isingsingasing dagiti balikas:

Magaw-atko ti Ngato

Magaw-atko ti ngato
Ken magaw-atko ti baba
Ket agpada nga ima pagabrasaeek ida.
Dagiti ramayko uk-ukradek ida,
Ket ita agar-aramidak gemgem a maysa.
Magaw-atko ti sango
Ket magaw-atko ti likud;
Pagsipatek dagiti imak
Iti kastoy a wagas.
Sa iti saklotko idissok ida,
A siuulimek a pagtalinaedanda.

**Dagiti Mainayon
nga Aktibidad
para kadagiti
Babbabassit
nga Ubbing**

1. Tulongam dagiti ubbing a mangaramid kadagiti garaw iti sumaganad a berso ti aktibidad bayat ti panangisaom kadagiti balikas:

Magustuak dagiti Imak

Magustuak dagiti imak; gagayyemko ida (*ipasango dagiti ima ket kitaen dagitoy*).
Adu't ar-aramidenda ken agmalmalem a tumultulongda (*yakem (pantomime) ti trabaho nga ar-aramiden ti ima*).

Siuulimek a makadalikepkepda (*agdalikepkep*) wenna makapagsipatda iti napigsa (*agsipat*)!

Maragsakanak no umno ti ar-aramidenda!

2. Pagtugawen iti patimbukel dagiti ubbing. Iladawan ti maysa a kasasaad ket payakem (pantomime) kadagiti ubbing no ania ti nasken nga aramiden dagiti imada iti dayta a kasasaad.

Dagiti pagarigan:

Ipakitayo kaniak no ania ti nasken nga aramiden dagiti imayo sakbay ti oras a pannangan.

Ipakitayo kaniak no ania ti nasken nga aramiden dagiti imayo no dumdumnggekayo iti maysa nga estoria.

Ipakitayo kaniak no ania ti nasken nga aramiden dagiti imayo no makiddaw kadakayo a pidutenyo dagiti ay-ayamy.

Ipakitayo kaniak no ania ti nasken nga aramiden dagiti imayo no mangisaokayo iti kararag.

Ilawlawag a nasken a tulongantayo dagiti imatayo a kanayon nga agaramid kadagiti banag a nasken nga aramidenda.

3. Isao ti sumaganad a berso a kagiddan dagiti ubbing, nga aramiden dagiti garaw nga isingsingasing dagiti balikas:

Agsipatkayo

Agsipatkayo, agsipatkayo,
Kas ar-aramidek, agsipatkayo.

Sagidenyo dagiti abagayo, Sagidenyo dagiti abagayo,
Kas ar-aramidek, sagidenyo.

Pikpikenyo dagiti tumengyo, Pikpikenyo dagiti tumengyo,
Kas ar-aramidek, pikpikenyo.

Igarawyo ti uloyo, Igarawyo ti uloyo,
Kas ar-aramidek, igarawyo.

Agsipatkayo, Agsipatkayo,
Ita bay-an nga agulimek dagitoy.



SIAK




MANGIPATPATEG



KENKA



TATANG



NANANG

Makapagsao dagiti Imatayo

Panggep

Tapno tulongan ti tunggal ubing nga agyaman kadagiti lapayagna ken no ania ti kabaelan dagitoy nga aramiden.

Panagsagana

1. Sikakararag nga adalen ti Marcos 7:32–35 ken Joseph Smith—Pakasaritaan 1:17.
2. Dagiti kasapulan:
 - a. Biblia ken Perlas a Kapatgan.
 - b. Ladawan 1-4, Ti Umuna a Parmata (Pakete ti Ladawan ti Arte ti Ebanghelio 403; 62470 864); ladawan 1-41, Ubing nga Addaan Pangtulong iti Panagdengngeg (Hearing Aid); maysa a ladawan ti sibibiag a propeta.
3. Aramidem dagiti nasken a panagsagana para kadagiti ania man nga aktibidad a mangpadur-as iti pannakaammo a kayatmo nga usaren.

Palagip iti mannursuro: Agbalinka a managrikna kadagiti asino man nga ubbing iti klasem nga addaan pagkurangan iti bagi. Ipamaysam kadagiti banag a *kabaelan* nga aramiden ti bagida, saan nga iti pagkuranganda.

Dagiti Aktibidad iti Pannakasursuro

Mangawis iti maysa nga ubing a mangted iti pangrugi a kararag.

Dagiti Aktibidad a Pangawis iti Panagdengngeg

Aramiden ti sumaganad babaen ti arasaas:

Kablaawam ti tunggal ubing. Iturongmo dagiti ubbing a mangaramid iti sumagma-mano a banag, kas iti panagtugaw, panangingatoy iti imada, panangibaba iti imada, ken panangingatoy iti dua a ramay.

Iti gagangay a timekmo, saludsodem kadagiti ubbing no kasano a naammuanda no ania ti aramidenda bayat ti panagar-arasaasmo.

- Ania a paset ti bagiyo ti nakatulong kadakayo a nangammo no ania ti kinunak?

Parabur Kadatayo dagiti Lapayagtayo

Kanta

Kagiddan dagiti ubbing, kantaen wenno sawen dagiti balikas kadagiti berso 1 ken 2 ti “Thanks to Our Father” (*Children’s Songbook*, p. 20).

Agyamantay’ iti Ama,
Iti amin a banag nga intedna.

Mata lapayag ima ken saka,
Kawes a mausar, ken taraon a makan.

- Ania ti kuna daytoy a kanta nga inted kadatayo ti Nailangitan nga Ama?
- Ania kadagitoy a banag ti tumultulong kadatayo a dumngeg? (Dagiti lapayagtayo.)

Dawaten kadagiti ubbing a siaannad nga aprosanda ti lapayagda. Ilawlawag a ti paset ti lapayagda iti ruar ti uloda ket saanda a pagdengngeg. Daytoy a paset ti

tumultulong iti uni a sumrek iti lapayag a mapan iti sarming ti lapayag (ear drum) ken dadduma pay a paset ti lapayag a tumultulong kadakuada a makangngeg.

- Kasano a maannadantayo dagiti lapayagtayo?

Ilawlawag a nasken a saluadantayo dagiti lapayagtayo manipud kadagiti napipigsa nga ariwawa ken manipud kadagiti banag a mabalin a makadadael kadagitoy.

Ilawlawag a gapu iti nadumaduma a pakaigapuan, saan unay a makangngeg dagiti sumagmamano a tao, isu a dida mangngeg ti amin nga uni a mabalin a denggen ti kaaduan a tattao. No adda maysa a tao nga am-ammo dagiti ubbing nga adda diperensiana iti panagdengngeg, mabalinmo nga ilawlawag maipapan iti pangtulong iti panagdengngeg (hearing aid) ti tao. Ipakita ti ladawan 1-41, Ubing nga Addaan iti Pangtulong iti Panagdengngeg, bayat ti panangilawlawagmo. Tulongan dagiti ubbing a makaawat a masansan a dagiti tao a saan a makangngeg a nasayaat ket saan pay a makapagsao a nasayaat, gapu ta masursuro dagiti tao ti agsao babaen ti panangtulad kadagiti uni a mangmangeganda.

Aktibidad

Aramiden ti senias ti pannakisao iti Ingles para iti “Siak mangipatpateg kenka” (kitaen iti adalen 17).

- Malagipyo kadi no ania ti kayat a sawen daytoy?

Paaramid kadagiti ubbing dagitoy a senias.

Ipalagip kadagiti ubbing nga itay napalabas a lawas napagsasaritaanyo no kasano a makapagsarita dagiti ima babaen ti senias ti pannakisao (sign language). Tulongan dagiti ubbing a makaawat a dagiti tao a di makangngeg ket mabalinda a makisao iti sabali a wagas, kas iti babaen ti senias ti pannakisao, babaen ti panagsurat, ken babaen ti panangbasa iti garaw dagiti bibig.

Estoria

Isalaysay ti estoria a maipapan ken ni Jesus ken ti tuleng a lalaki, a masarakan iti Marcos 7:32–35.

- Ania iti panagkunayo ti panagrikna ti tuleng a lalaki idi naammuanna a makangngeg daytoy?

Yunay-unay a maysa a parabur ti maaddaan iti kabaelan a dumngeg.

Makangngegtayo kadagiti Uni Babaen kadagiti Lapayagtayo

Aktibidad

Ibaga kadagiti ubbing nga agsanayda iti panangusar kadagiti lapayagda.

Pagsisinnublaten dagiti ubbing a mapan iti sango ti kuarto. Yarasaasmo iti lapayag ti ubing ti nagan ti kadawyan nga ayup wenno banag nga aguni. Patulad iti ubing ti uni para iti klase, ket papugtuan kadagiti dadduma pay nga ubbing no ania dayta nga uni. (Mabalin nga iraman dagiti uni ti panagungak ti baka, panagtaol ti aso, panagkiriring ti telepono, wenno panagbusina ti lugan.)

Pagsasaritaan kadagiti ubbing ti sumagmamano kadagiti napapateg nga uni a mabalin a mangngeganda iti lapayagda, kas iti panangawag dagiti nagannak kadakuada ken dagiti uni a mangbalballaag kadakuada a mabalin a madangranda.

- Ania dagiti uni a paggugustoyo a denggen?

Mabalintayo ti Dumngeg kadagiti Pannursuro ti Nailangitan nga Ama ken ni Jesucristo

Pagtugawen a siuulimek dagiti ubbing ket dumngegda.

- Ania ti mangmangneganyo?

Pagsasaritaan ti nadumaduma nga uni a mangngegda, kas iti panaglukat ken panagrikep kadagiti ridaw, panagsasarita dagiti tao iti uneg ti pasdek, ti musika ti organo, wenno ti angin.

- Ania pay dagiti dadduma nga uni a mangmangnegantayo iti simbaan?

Ilawlawag a mangmangnegantayo dagiti mannursurotayo, nagannak kadatayo, dadaulotayo iti Primary, bishop, ken dadduma pay a dadaulo iti simbaan.

- Apay a napateg a dumngegtayo kadagitoy a tao?

Ilawlawag a tultulongantayo dagitoy a tao a mangammo no ania ti kayat ti Nailangitan nga Ama ken ni Jesus nga aramidentayo.

Estoria

Iparang ti ladawan 1-4, Ti Umuna a Parmata, ket paibaga kadagiti ubbing no ania ti malagipda maipapan iti ladawan. Lukiben dagiti nasantuan a kasuratan iti Perlas a Kapatgan ket basaen iti napigsa no ania ti kinuna ti Nailangitan nga Ama ken ni Joseph Smith iti Joseph Smith—Pakasaritaan 1:17: “Daytoy ti Ay-ayatek nga Anakko. Dumngegka Kenkuana!”

Paulit kadagiti ubbing daytoy a binatog a kagiddandaka iti sumagmamano a gundaway. Ilawlawag a kayat ti Nailangitan nga Ama a dumngegtayo iti sasawenna ken ni Jesus. Tulongan dagiti ubbing a makaawat a mabalin a direkta a saan a makisarita ti Nailangitan nga Ama ken ni Jesus iti tunggal maysa, ngem mabalintayo ti dumngeg kadagiti nagannak, mannursuro ken dadaulotayo iti Simbaan. Maibagada kadatayo no ania ti kayat ti Nailangitan nga Ama ken ni Jesus nga aramidentayo. Matulonganntayo pay ti Espiritu Santo a mangammo no ania ti kayat nga ipaaramid kadatayo ti Nailangitan nga Ama ken ni Jesus.

Ipakita ti ladawan ti sibibiag a propeta.

- Asino daytoy?

Ilawlawag a makisarita kadatayo ti Nailangitan nga Ama ken ni Jesus babaen dagiti dadaulo ti Simbaan, nangnangruna iti propetatayo ken bishoptayo. Ibagi kadatayo dagitoy a dadaulo no ania ti kayat ti Nailangitan nga Ama ken ni Jesus nga aramidentayo. Nasken a dumngegtayo a nasayaat kadakuada.

Pammaneknek

Ipeksam ti panagyamanmo kadagiti lapayagmo ken iti sagut ti panagdengneg.

Dagiti Aktibidad a Mangpadur-as iti Pannakaammo

Pumili iti sumagmamano kadagitoy nga aktibidad tapno usaren bayat ti adalen.

1. Pagkidemen dagiti ubbing ket paappot dagiti matada kadagiti imada. Sagiden iti ulo ti maysa nga ubing. Nasken a sawen ti ubing, “Agyamanak kadagiti lapayagko.” Papugtuan kadagiti dadduma pay nga ubbing no asino ti akintimek ti nangngegda. Itultuloy agingga a maaddaan iti gundaway nga agsarita ti tunggal ubing.

2. Aramiden ti sumaganad a berso ti aktibidad a kagiddan dagiti ubbing:

Addaanak iti Nakaskasdaaw a Bagi

Addaanak iti nakaskasdaaw a bagi (*iparabaw dagiti ima iti barukong*)

A plinano ti Nailangitan nga Ama para kaniak.

Inikkannak kadagiti lapayag tapno makangngegak (*isukog ti ima iti lawlaw ti lapayag*)

Ken kadagiti mata tapno makakitaak (*itudo dagiti mata*).

Addaanak iti dua nga ima tapno makasipatak (*pagsipaten dagiti ima*),

Dua a saka tapno makapuligosak (*agpuligos*).

No kayatko kabaalak

A sagiden dagiti ramay ti sakak a nakakummogak (*agkummog ket sagiden dagiti ramay ti saka*).

No panunotek maipapan iti bagik (*ipan ti ramay iti ulo*),

Ti kasayaatan daytoy a pasetna (*agtugaw a siuulimek*)

Ket plinano ti Nailangitan nga Ama

Tapno kalanglanga unay ti mismo a bagina.

3. Pasanguem dagiti ubbing iti maysa a direksion idinto a nakatakderka iti likudanda. Agaramidka kadagiti uni babaen kadagiti imam wenna dadduma pay a banag a makaaramid iti uni, ket papugtuam kadagiti ubbing no ania ti ar-aramidem tapno makaaramid iti uni. Mabalnmo ti agsipat, pagrittuokem dagiti ramaymo, wenna paguniem ti kampana. Bay-am a padasen mismo dagiti ubbing ti panagaramid kadagiti uni.

4. Irekord dagiti uni iti sangakarrubaanyo, kas iti panagtaol ti aso, panagkanta dagiti billit, wenna panagkatawa. Patokaren ti teyp iti klase ket ipadengngeg ken papugtuam kadagiti ubbing no ania dagiti uni.

5. Mangisuro kadagiti ubbing iti simple a kanta wenna maysa a binatang ti senias ti pannakisao. No adda am-ammom a maysa a tao a nalaing nga agsenias, mabalnmo nga awisen ida nga umay iti klase ket isenias ti “Siak ket Anak ti Dios” bayat ti panagkanta ti klase.

6. Agtugaw iti patimbukel a kadua dagiti ubbing. Mangyarasaas iti ababa a mensahe iti ubing iti abaymo. Kalpasanna yarsaas met daytoy nga ubing ti mensahe iti sumaruno nga ubing, ket agtultuloy agingga a malawlaw ti nagtimbukel. Sawen ti maudi nga ubing ti mensahe a sipipigsa. Ibaga iti klase ti mensahe nga intedmo iti umuna nga ubing tapno makita no kasano a mabaliwan daytoy.

Kalpasan ti aktibidad saludsoden kadagiti ubbing no ania ti inusarda a dimngeg iti mensahe. (Dagiti lapayag.) Ipalagip kadakuada nga agyamanda iti Nailangitan nga Ama kadagiti lapayagda.

Dagiti Mainayon nga Aktibidad para kadagiti Babbabassit nga Ubbing

1. No mabaln, ipan iti ruar dagiti ubbing. Allukoyen ida a dumngeg a siuulimek babaen dagiti lapayagda. Ania dagiti uni a mangngeganda? No agsublikayo iti uneg ti siled ti klase, sublien nga adalen dagiti uni a nangngeganda.

2. Patakderen dagiti ubbing ket paisao ti sumaganad a berso, nga aramiden dagiti garaw nga isingsingasing dagiti balikas:

Sagidenyo dagiti Matayo

Sagidenyo dagiti matayo,
Sagidenyo dagiti agongyo,
Sagidenyo dagiti lapayagyo,
Sagidenyo dagiti ramay ti sakayo.

Unnatenyo dagiti imayo,
Igaw-atyo iti ngato,
Uray nangatngato pay
Dumanon langit nga ipayapay.

Ikabilyo dagiti imayo
Iti buokyo,
Siuulimek nga agtugawkayo
Iti tugawyo .

Panggep Tapno tulongan ti tunggal ubing nga agyaman kadagiti matana ken no ania ti kabaelan dagitoy nga aramiden.

Panagsagana

1. Sikakararag nga adalen ti Juan 9:1–7 ken 3 Nephi 11:1–17.
2. Dagiti kasapulan:
 - a. Biblia ken Libro ni Mormon.
 - b. Maysa a kareta ti panait nga adda dakkal nga abutna ken maysa a kurdon ti sapatos wenno sangapedaso a linas. (No dakkal ti klasem, mabalinmo ti mangitugot iti ad-adu pay para iti tunggal maysa.)
 - c. Maysa a bandana (scarf) wenno lupot a pangapput iti mata.
 - d. Ladawan 1-43, Ni Jesus a Mangag-agas iti Bulsek, (Pakete ti Ladawan ti Arte ti Ebanghelio 213; 62145 864); ladawan 1-44, Ni Jesus a Mangisursuro iti Deppaarna iti Laud (Pakete ti Ladawan ti Arte ti Ebanghelio 316; 62380 864).
3. Aramidem dagiti nasken a panagsagana para kadagiti ania man nga aktibidad a mangpadur-as iti pannakaammo a kayatmo nga usaren.

Palagip iti mannursuro: Agbalinka a managrikna kadagiti asino man nga ubbing iti klasem nga addaan kadagiti pagkurangan iti bagi. Ipamaysam kadagiti banag a *kabaelan* nga aramiden ti bagida, saan nga iti pagkuranganda.

Dagiti Aktibidad iti Pannakasursuro

Mangawis iti maysa nga ubing a mangted iti pangrugy a kararag.

Aktibidad a Pangawis iti Panagdengngeg Ipakita kadagiti ubbing no kasano ti kalaka ti mangyusok iti kurdon ti sapatos wenno linas iti karete ti panait a nakamulagatka. Kalpasanna agkidemka ket padasem a yusok ti kurdon iti kareta ti panait. Ikkan ti tunggal ubing iti gundaway a mangpadas.

Parabur Kadatayo dagiti Matatayo

Ilawlawag nga adda matatayo tapno makabasa ken makasursurotayo, makapag-trabaho ken makapagay-ayamtayo, ken makitatayo ti napintas a lubong.

Pagsasaritaan kadagiti ubbing no kasano a maiduma ti bagida no saanda koma a makakita.

- Kasano a kanenyo ti taraonyo?
- Kasano ti pannakaammoyo no ania dagiti bado nga ikawesyo?
- Kasano a masarakanyo ti dalanyo iti lawlaw ti pagtaenganyo?

Aktibidad

Tulongan dagiti ubbing a mangisao kadagiti balikas iti “Two Little Eyes” (*Children’s Songbook*, p. 268).

Agkiremkirem a dua a babassit a mata,
 Dua a babassit a mata a makakita;
 Ulo ken abaga; tumeng ken ramay ti saka;
 Ken adu pay a banag, bagik pasetda.
 Tra la la la la la,
 Dua a babassit a mata a makakita,
 Agkiremkirem a dua a babassit a mata,
 Ken adu pay a banag, bagik pasetda.

(Manipud iti *Merrily We Sing*, © 1948, 1975 ti Pioneer Press, Inc. [maysa a dibision ti Jackman Music]. Naaramat nga addaan pammalubos.)

Aktibidad

Patan-awem dagiti ubbing iti tawa (wenno pakita ti napintas a ladawan) ket pagpammarangen ida a daytoy ti umuna a gundaway a makakitada. Awisen ida a mangisarita maipapan iti no ania ti nakitada. Pagsasaritaan ti maipapan kadagiti maris ken sukog. Tulongan dagiti ubbing a mangamiris nga anian a parabur ti makakita.

- Ania dagiti sumagmamano a banag a paggugustoyo a kitaen?

Ilawlawag a saan unay a makakita dagiti dadduma a tao. Nasken nga agusar dagitoy a tao iti antehos wenno *contact lens* tapno makatulong kadakuada a makakita. Bulsek dagiti dadduma a tao ket saanda a makakita iti ania man.

Aktibidad

Ilawlawag no kasano a makasursuro dagiti bulsek a tao nga agpagnapagna kadagiti lugar nga is-isuda nga adda kaduada a mangiwanwan nga aso wenno sarukod. Apputem ti mata ti maysa kadagiti ubbing ket agpammarangka a sika ti mangiwanwan nga aso. Ingatom ti takiagmo tapno igganen ti ubing a kasla ti tali ti aso. Iturongmo ti ubing iti lawlaw ti siled. Bay-an nga agsisinnublat nga agpammarang dagiti ubbing a bulsek wenno mangiwanwan nga aso.

Estoria

Ipakita ti ladawan 1-43, Ni Jesus a Mangag-agas iti Bulsek, ket isalaysay ti estoria maipapan ken ni Jesus a mangag-agas iti bulsek a lalaki, a masarakan iti Juan 9:1–7.

- Ania ti inaramid ni Jesus iti pitak? (Kitaen iti Juan 9:6.)
- Ania ti napasamak idi nagugas ti bulsek a lalaki iti tanke (pagdigosan)? (Kitaen iti Juan 9:7.)
- Ania iti panagkunayo ti panagrikna ti bulsek a lalaki idi makakitan?

Agyamanak iti Nailangitan nga Ama kadagiti Matak

Aktibidad

Patakderen dagiti ubbing ket paulit ti sumaganad a berso a kagiddandaka, nga itudo iti tunggal paset ti bagi apaman a madakamat daytoy:

Agyamanak kadagiti Matak

Agyamanak kadagiti matak,

Ngiwat, agong ken lapayag;

Agyamanak kadagiti imak ken takiag,

Luppo, saka ken ramay ti sakak.

(Naadaw manipud iti berso ni Lucy Picco.)

Estoria	<p>Ipasa ti ladawan 1-44, Ni Jesus a Mangisursuro iti Deppaarna iti Laud, ket dawaten iti tunggal ubing a mangibaga iti maysa a banag a makitana iti ladawan. Isalaysay ti estoria maipapan iti isasarungkar ni Jesus iti Deppaarna iti Laud, a masarakan iti 3 Nephi 11:1–17.</p> <ul style="list-style-type: none"> • Asino ti nakita dagiti tao? • Ania ti narikna dagiti tao idi nakitada ni Jesus? (Kitaen iti 3 Nephi 11:16–17.) • Ania ti maris ti roba ni Jesus? (Kitaen iti 3 Nephi 11:8.) <p>Ilawlawag a mabalin a ditay kabaelan a makita a mismo ni Jesus kas iti inaramid dagiti tao ni Nephi, ngem no makitatayo ti napintas a lubong, malagiptayo ti ayatna para kadatayo.</p>
Pammaneknek	<p>Ipeksam kadagiti ubbing ti panagyamanmo kadagiti matam. Ibagam no kasano a dagiti napipintas a pinarsua a makitkitam iti tunggal aldaw ket mangipalpalagip kenka iti ayat kenka ni Jesus ken ti Nailangitan nga Ama. Ipalagip kadagiti ubbing nga agyamanda iti Nailangitan nga Ama para kadagiti matada.</p>

Dagiti Aktibidad a Mangpadur-as iti Pannakaammo

Pumili iti sumagmamano kadagitoy nga aktibidad tapno usaren bayat ti adalen.

1. Awisen dagiti ubbing a mingminganda a nasayaat ti mata, kalub ti mata, kiday ken kurimatmat ti tunggal maysa. Ilawlawag a dagiti kalub ti mata, kiday, ken kurimatmatayo ket makatulong a mangikkat iti rugit, tapok, ken ling-et iti matatayo.
2. Sakbay ti klase, usaren ti natirad a banag kas iti aspili tapno agaramid kadagiti buttaw iti maysa a pedaso ti papel kadagiti sukog a nagbukel ken kuadrado. Iti klase, saggaysa nga apputen ti mata dagiti ubbing ket dawaten kadakuada nga apirasenda dagiti paset a nabuttawan iti papel ket ibagada no ania a sukog dagitoy. Ilawlawag a daytoy ket kasla iti *braille*, a wagas tapno makabasa dagiti bulsek a tao.
3. Usaren dagiti supot a papel, agaramid kadagiti mata nga agmulagat ken agkidem (kitaen ti ladawan iti ungti ti adalen) para iti tunggal ubing. Isurat iti tunggal supot a papel ti Agyamanak kadagiti matak. Pakoloran kadagiti ubbing dagiti mata ket padrowingan iti buok kadagiti supot a papelda. Usaren dagiti mata a naaramid iti supot a papel, yakem (pantomime) a kaduam dagiti ubbing dagiti oras nga imulagat ken ikidemtayo dagiti matatayo, kas no agriingtayo wenno maturogtayo, no agkararagtayo, ken no mabutengtayo.
4. No mabalin, ipan dagiti ubbing iti ruar tapno magnada iti aglawlaw. Dawaten kadakuada nga agdalikepkep ken agulimekda unay bayat ti pannagnada, tapno makapagpanunotda a nasayaat nga usarenda dagiti matada. No agsublida iti klase, awisen ida nga agsisinnublat iti panangibaga no ania ti nakitada.

Dagiti Mainayon nga Aktibidad para kadagiti Babbabassit nga Ubbing

1. Kantaen wenno sawen dagiti balikas iti “Popcorn Popping” (*Children’s Songbook*, p. 242). Ilawlawag a kasla papkorn dagiti sabong ti dadduma a kayo.

- No tuman-awkayo iti tawa, kas iti kuna ti kanta, makitayo kadi ti papkorn iti sanga ti kayo? Ania ti makitayo no tuman-awkayo iti tawa?

Patan-awen dagiti ubbing iti tawa, wenno ipanmo ida iti ruar iti apagkanito. Agsubli iti klase ket sublien nga adalen no ania ti nakitada.

- Ania ti inusaryo a nangkita kadagitoy a banag? (Dagiti mata.)

Ilawlawag a nasken nga agyamantayo iti Nailangitan nga Ama para kadagiti matatayo.


2. Patakderen dagiti ubbing ket paisao dagiti balikas iti “Sagidenyo dagiti Matayo,” nga aramiden dagiti garaw nga isingsingasing dagiti balikas.

Sagidenyo dagiti matayo,
Sagidenyo ti agongyo,
Sagidenyo dagiti lapayagyo,
Sagidenyo dagiti ramay ti sakayo.

Unnatenyoy dagiti imayo
Igaw-atyo iti ngato,
Uray nangatngato pay
A dumanon iti tangatang.

Ikabiliyo dagiti imayo
Iti buokyo;
Siulimek nga agtugawkayo
Iti tugawyo.

3. Ipakita kadagiti ubbing ti maysa a bassit a banag. Ilawlawag nga ipanmo daytoy iti maysa a lugar iti siled, ket nasken nga usarenda dagiti matada a pangbirok iti daytoy. Pagkidemen dagiti ubbing, ket ikabil ti banag iti lugar a makita ngem saan unay a madlaw. Pagmulagaten dagiti ubbing ket pasapul ti banag a dida aggargaraw wenno agringringgor. Ibagi kadakuada nga agdalikepkep no nasarakandan ti banag. Ipalagip kadagiti ubbing a nasken nga agulimekda ket bay-an dagiti dadduma a mangsapul iti banag nga usarenda dagiti matada.



Agyamanak ta Makaangot ken Makaramanak

Adalen
20

Panggep Tapno tulongan ti tunggal ubing nga agyaman iti panagangot ken panagramanna.

Panagsagana

1. Sikakararag nga adalen ti Exodo 16:11–15, 31 ken Doktrina ken Katulagan 59:18–19.
2. Dagiti kasapulan:
 - a. Biblia ken kopia ti Doktrina ken Katulagan.
 - b. Maysa a bassit nga iparaman (sample) a naimas ti angotna a makan para iti tunggal ubing (kas iti prutas, tinapay, biskuit wenno napabusi a mais). Ikabil dagiti iparaman iti maysa a supot. Ammuen kadagiti nagannak dagiti ubbing tapno masigurado nga awan ubing nga adda alerdyina iti taraon.
 - c. Dagiti iparaman a naalsem (kas iti tubbog ti dalayap), naapgad (kas iti asin), ken nasam-it (kas iti asukar) tapno ramanan dagiti ubbing. Ammuen kadagiti nagannak dagiti ubbing tapno masigurado nga awan ubing nga adda alerdyina iti ania man kadagiti iparaman a taraon.
 - d. Ladawan 1-35, Panangummong iti Manna.
3. Aramidem dagiti nasken a panagsagana para kadagiti ania man nga aktibidad a mangpadur-as iti pannakaammo a kayatmo nga usaren.

Palagip iti mannursuro: Agbalinka a managrikna kadagiti asino man nga ubbing iti klasem nga addaan kadagiti pagkurangan iti bagi. Ipamaysam kadagiti banag a *kabaelan* nga aramiden ti bagida, saan nga iti pagkuranganda.

Dagiti Aktibidad iti Pannakasursuro

Mangawis iti maysa nga ubing a mangted iti pangrugit a kararag.

Aktibidad a Pangawis iti Panagdengngeg Dawaten kadagiti ubbing nga agkidemda. Bay-an nga angoten ti tunggal ubing dagiti iparaman a makan iti supot ket papugtuan no ania a taraon dagitoy. Idinto a nakakidemda pay laeng, ikkan dagiti ubing iti iparaman a taraon tapno kanenda. Pagmulagaten dagiti ubbing, ket ipakitam wenno ibagam kadakuada no ania ti kinnanda itay laeng.

- Ania ti angot daytoy a taraon?
- Ania ti raman daytoy a taraon?

Ibaga kadagiti ubbing a maimasda dagiti taraon uray no dida makita daytoy. Naaramidda daytoy gapu ta pinaraburan ida ti Nailangitan nga Ama iti panagangot ken panagraman.

Adda agong ti tunggal maysa kadatayo tapno makaangottayo

- Kasano a maangottayo dagiti banag?

Ilawlawag kadagiti ubbing ti sumagmamano kadagiti banag a naangotda kabayatan dayta a lawas, kas iti malutluto a taraon, sadiwa nga angin kalpasan ti tudo, wenno

sabsabong. Ibaga kadagiti ubbing a nasken nga agyamantayo iti Nailangitan nga Ama para iti panagangottayo.

- Ania dagiti banag a magustuanyo nga angoten?

Aktibidad

Tulongan dagiti ubbing a mangaramid iti sumaganad a berso ti aktibidad:

Adda Agongko

Adda agongko (*itudo ti agong*).

Iti rupak a nakapuesto (*ikabil dagiti ima iti agsumbangir a pingping*),

Iti tengnga a mismo

Iti kapintasan a disso (*usaren ti ramay a mangidrowing iti partuat-panunot a nagtimbukel iti lawlaw ti agong*).

Dagiti agongko makasinglot (*suminglot*);

Dagiti agongko makaangot (*umanges iti nauneg babaen ti agong ket isang-aw daytoy*).

Iti Nailangitan nga Ama agyamanak (*agdalikepkep*)

Gapu ta ti agongko mangted pagsayaatak.

Addaan ti tunggal maysa kadatayo iti dila tapno makaramantayo

Ilawlawag a binendisionan ti Nailangitan nga Ama ti tunggal maysa kadatayo iti dila tapno makaramantayo. Iparaman kadagiti ubbing ti naalsem, naapgad, ken nasam-it a bambanag no kayatda.

- Ania ditoy ti naalsem?
- Ania ditoy ti naapgad?
- Ania ditoy ti nasam-it?
- Ania ti paggugustom a ramanan?

Ipakitam ti kopia ti Doktrina ken Katulagan (wenno ti paulo a panid ti Doktrina ken Katulagan iti triple a kombinasion). Ilawlawag a naibaga kadatayo iti daytoy a libro ti nasantuan a kasuratan a dagiti banag a nabanglo ken naimas ket agpaay nga usaren ken nanamentayo (kitaen iti DkK 59:18–19).

Estoria

Ipakita ti ladawan 1-35, Panangummong iti Manna. Isalaysay ti estoria maipapan iti manna, a masarakan iti Exodo 16:11–15, 31.

- Ania ti raman ti manna? (Kitaen iti Exodo 16:31.)
- Nakaramankayo kadin iti diro ti uyokan?
- Ania ti ramanna?

Ilawlawag nga adu a banag ti saan a natalged a kanen: sumagmamano a *berries*, dagiti usaren iti panagdalus, dagiti banag manipud kadagiti botelia wenno lata nga awan markana, wenno agas wenno pildoras nga awan pammalubos dagiti naganak. Dagitoy a banag ti mangted sakit kadatayo. Yunay-unay kadagiti ubbing a nasken a kanayon nga agdamagda iti maysa a nataengan no rumbeng a ramanan wenno kanenda ti ania man a banag a makitada.

Pammaneknek

Ipeksam ti panagyamanmo iti maysa nga agong nga agangot kadagiti banag ken maysa a dila nga agraman kadagiti banag. Ipalagip kadagiti ubbing nga agyamanda iti Nailangitan nga Ama iti panagangot ken panagramanda.

Dagiti Aktibidad a Mangpadur-as iti Pannakaammo

Pumili iti sumagmamano kadagitoy nga aktibidad tapno usaren bayat ti adalen.

1. Mangitugot iti sumagmamano a banag a nakabangbanglo ti angotna, kas iti sabon, sabong, ken dalayap, ken sumagmamano a banag nga awan ti angotna, kas iti sangapanid a papel ken ay-ayam. Papidut kadagiti ubbing no ania dagiti maangotda. Saggaysa a pagkidemen dagiti ubbing, paangot ti maysa kadagiti banag ket papugtuan no ania daytoy. Ikkan iti gundaway ti tunggal ubing.
2. Bay-an a kitaen dagiti ubbing ti dilada iti sarming. Ilawlawag nga adda dagiti paset a pagraman (tastebuds) dagiti dilatayo a tumultulong kadatayo nga agraman kadagiti banag a nasam-it, naalsem, ken naapgad. Iparaman kadagiti ubbing ti sumagmamano a danum. Ilawlawag a makatulong pay dagiti dilatayo a mangibaga no nabasa wenno nalamiis dagiti banag.
3. Bay-an nga agdrowing ti tunggal ubing iti maysa a ladawan ti paggugustona a taraon. Paipakita kadagiti ubbing dagiti ladawanda ket paibaga no ania dagiti paggugustoda a taraon.
4. Mangiruar iti saggabassit a paset dagiti banag nga agkalanga ngem aggidiat ti ramanda, kas iti asin ken asukar wenno arina ken gawgaw. Paramanan ti tunggal ubing iti sangkabassit ti tunggal banag. Kalpasanna damagen kadagiti ubbing no ania ti raman ti tunggal banag. Ilawlawag no kasano a makapagpada ti langa ngem aggidiat ti raman ti sumagmamano a banag. (Ammuen kadagiti nagannak dagiti ubbing tapno masigurado nga awan kadagiti ubbing ti adda alerdyina iti ania man a banag nga itugotmo.)
5. Kantaen ti “For Health and Strength” (*Children’s Songbook*, p. 21).

Dagiti Mainayon nga Aktibidad para kadagiti Babbabassit nga Ubbing

1. Mangidrowing iti sukog a maratimbukel iti pisarra wenno iti panid ti papel. Ilawlawag a ladawan ti rupayo daytoy a maratimbukel.
 - Ania ti kurang?

Bayat ti panangdakamat dagiti ubbing kadagiti mata, lapayag, agong, ken ngiwat, idrowing dagitoy iti ladawan. Kalpasanna sublien nga adalen no ania ti ar-aramiden ti tunggal paset. Ipeksam no kasano ti panagyamanmo iti Nailangitan nga Ama para iti bagim.
2. Itudom ti ngiwatmo ket sawem ti, “Daytoy ti ngiwatko.” Kalpasanna saludsodem, “Maipakitayo kadi kaniak ti ngiwatyo?” ket tulongam dagiti ubbing a mangitudo iti bukodda a ngiwat. Uliten para kadagiti mata, agong, lapayag, ima, ken saka. Kalpasanna itudo ti tunggal paset ti bagi a di ibagbaga ti nagan daytoy ket paibaga ti nagan daytoy kadagiti ubbing. No maibaga ti nagan dagiti ubbing ti amin kadagitoy a paset, mabalín a damagem pay ti nagan dagiti sumagmamano a paset ti bagi a di unay ammo dagiti ubbing, kas kadagiti siko, pungupungan, ken lansa-lansa.
3. Patakderen dagiti ubbing ket paisao ti sumaganad a berso, nga aramiden dagiti garaw nga isingsingasing dagiti balikas:

Sagidenyo dagiti Matayo

Sagidenyo dagiti matayo,
Sagidenyo ti agongyo,
Sagidenyo dagiti lapayagyo,
Sagidenyo dagiti ramay ti sakayo.

Unnatenyo dagiti imayo
Igaw-atyo iti ngato,
Uray nangatngato pay
A dumanon iti tangatang.

Ikabilyo dagiti imayo
Iti buokyo;
Siuulimek nga agtugawkayo
Iti tugawyo.

Panggep Tapno tulongan ti tunggal ubing a makaawat ken mangilasin kadagiti rikna ken makasursuro kadagiti wagas tapno agbalin a naragsak.

Panagsagana

1. Sikakararag nga adalen ti Lucas 15:11–32.
2. Dagiti kasapulan:
 - a. Biblia.
 - b. Ladawan ti Nakaisem/Nakarupanget a Rupa (kitaen ti pagtuladan iti ungtong ti adalen).
 - c. Tisa ken pagpugas.
 - d. Ladawan 1-45, Panagugas iti Lunglongan; ladawan 1-46, Dagiti Ubbing a Mangmangted iti Sabsabong iti Ina; ladawan 1-47, Dagiti Ubbing nga Aggaapa; ladawan 1-48, Dagiti Ubbing nga Agay-ayam iti Bloke [Blocks]; ladawan 1-49, Ti Nayaw-awan nga Anak (Pakete ti Ladawan ti Arte ti Ebanghelio 220; 62155 864).
3. Aramidem dagiti nasken a panagsagana para kadagiti ania man nga aktibidad a mangpadur-as iti pannakaammo a kayatmo nga usaren.

Dagiti Aktibidad iti Pannakasursuro

Mangawis iti maysa nga ubing a mangted iti pangrugui a kararag.

Aktibidad a Pangawis iti Panagdengngeg Ipakita ti ladawan ti Nakaisem/Nakarupanget a Rupa. Kantaen wenno sawen dagiti balikas iti “Smile” (*Children’s Songbook*, p. 267) iti sumagmamano a gundaway a kagiddan dagiti ubbing. Ikkan dagiti sumagmamano nga ubbing iti gundaway a mangbaliktad iti rupa a nakaisem wenno nakarupanget kadagiti maitutop a gundaway.

No nakarupangetka,
Saan a pagbayagen.

Dagus a baliktaden
Sukatan iti isem.

Awan agrupangeten.
Suktan ‘ti isem.


Lubong pagragsakenen
Kanayon nga umisem.

Makita iti Rupa ken Tignaytayo dagiti Riknatayo

- Ania ti riknayo no nakaisem ti rupayo?
- Ania ti riknayo no nakarupanget ti rupayo?

Ilawlawag a masansan a maibaga dagiti tao no ania ti riknatayo babaen ti panangkita kadagiti rupertayo. Paipakita kadagiti ubbing dagiti naragsak a rupada.

Mangidrowing iti uppat a dadakkel a nagtimbukel iti pisarra. Mangidrowing kadagiti simple a panaglanglanga tapno makaaramid kadagiti rupa a mangipakita iti nadumaduma a rikna: naragsak, naliday, naunget, ken mabuteng (kitaen ti panangiladawan iti baba). Bayat ti pannakaidrowing ti tunggal rupa, dawaten kadagiti ubbing nga iladawanda dagiti rikna a maipakpakita iti rupa, ket kalpasanna dawaten kadakuada nga aramidenda dagiti bukodda a rupa nga aglanglanga a naragsak, naliday, naunget, ken mabuteng.



- Ania ti mangparparagsak kadakayo?
- Ania ti mangpalpaliday kadakayo?
- Ania ti mangpapaunget kadakayo?
- Ania ti mangpabpabuteng kadakayo?

Isalaysay kadagiti ubbing maipapan iti maysa a panawen idi nagliday, nagpungtot wenna nagbutengka ken maysa a panawen idi nagragsakka.

Masursurotayo ti Mangtengngel kadagiti Riknatayo

Ilawlawag a nasayaat nga ipakita ti amin a nadumaduma a riknatayo, ngem nasken nga ipakitatayo kadagiti umisu a wagas, nangnangruna no makapungtottayo.

Ipakita ti ladawan 1-47, Dagiti Ubbing nga Aggaapa.

- Ania iti panagkunayo ti panagrikna dagitoy nga ubbing?
- Ania iti panagkunayo ti pagsasaritaanda?
- Ania ti nasken nga aramidenyo no makaungetkayo?

Ilawlawag a nupay mabalin a mariknatayo a kayattayo a kabilen, bugkawan, wenna dangran ti maysa a tao no makaungettayo, masursurotayo ti mangipakita kadagiti riknatayo a sidadayaw ken siaayat. No agkabil wenna agbugkawtayo, ad-adda ketdi a mariknatayo ti agpungtot, ngem no ti panagbalin a nasingpet ket makatulong kadatayo a makarikna iti nasaysayaat.

Bay-an dagiti ubbing nga agsisinnublat nga agbalin nga ubbing iti ladawan. Tulongan ida a mangpanunot kadagiti banag a mabalin a pagsasaritaan dagiti ubbing iti ladawan imbes a panagbugkaw wenna panagkabil, kas iti “Mabalin kadi a siak met itan?” “Agsisinnublattayo,” “Malidayanak no sutsutilennak,” wenna “Diak magustuan no aramidem dayta.”

Ipakita ti ladawan 1-48, Dagiti Ubbing nga Agay-ayam iti Bloke (Blocks). Itudo a dagitoy nga ubbing ket naragsak nga agay-ayam a sangkamaysa ken naragsak dagiti rupada gapu ta agbibinnulod ken sisasayaat nga agsisinnaritada.

- Asino ti makatulong kadakayo a mangpasayaat iti riknayo no naliday, makapungtot, wenno mabutengkayo?

llawlawag a no makisaritatayo kadagiti inna, ammatayo, ken dadduma pay a mangipatpateg kadayo, matulongandatayo a makaawat no apay a mariknatayo ti kastoy. No agkararagtayo iti Nailangitan nga Ama, matulongannatayo ti Espiritu Santo a sumayaat ti riknatayo. Tulongannatayo ti Espiritu Santo a mangammo no ania ti aramidentayo tapno makapagbalintayo manen a naragsak.

Aktibidad

Patakderen dagiti ubbing ket paaramid ti sumaganad a berso ti aktibidad iti sumagmamano a gundaway:

Dagiti Riknak

No maminsan no nakalidlidayak (*pagbalinen a nakalidliday ti rupa*), Arakupennak ti inak ket naragsakak (*arakupen ti bagi ket pagbalinen a naragsak ti rupa*).

No maminsan no makapungtotak (*pagbalinen a makapungtot ti rupa*). Pumanawak ket kasaritak ti amak (*magna iti pagtaktakderan ket itung-ed ti ulo, a kasla makisarsarita*).

No adda man mangpabuteng kaniak (*pagbalinen a mabuteng ti rupa*), Agkararagak tapno malinglingayak (*agdalikepkep*).

Ket no rummuarak tapno agay-ayamak, Inaldaw nga agbalinak a naragsak (*pagbalinen a naragsak ti rupa*).

Naragsaktayo No Tulongantayo dagiti Dadduma

Ipakita ti ladawan 1-46, Dagiti Ubbing a Mangmangted iti Sabsabong iti Ina.

- Ania iti panagkunayo ti panagrikna dagiti tao iti daytoy a ladawan?
- Apay iti panagkunayo a mariknada ti kasdiay?
- Ania ti riknayo no mangtedkayo iti maysa a banag iti maysa a tao?

Ipakita ti ladawan 1-45, Panagugas kadagiti Lunglongan.

- Ania ti ar-aramiden daytoy nga ubing a babai?
- Ania iti panagkunayo ti panagrikna ti ubing a babai iti ladawan? Apay?
- Kasano ti panagriknayo no tultulonganyo ti maysa a tao?

Aktibidad

Tulongan dagiti ubbing a mangaramid iti sumaganad a berso ti aktibidad:

Ti Itutulong Mangparparagsak Kaniak

Kayatko a tulongan ni nanang (*agpammarang a mangyus-usong iti apron*); Nakaad-adu ti ar-aramidenna.

Tultulongak a mangpamaga kadagiti lunglongan (*agpammarang a mangpampamaga kadagiti lunglongan*)

Ken mangpakpakan pay iti maladaga (*agpammarang a mangpaspasuso iti maladaga babaen iti mamador*).

Kayatko a tulongan ni tatang (*agpammarang a mangyus-usong iti guantes iti panagmula*);
Nakaad-adu ti ar-aramidenna (*agpammarang nga agpukpukis kadagiti mula wenno agparparut kadagiti ruot*).
Tultulongak iti minuyongan (*agpammarang nga agsibsibug kadagiti mula*)
Agingga a malpas ti trabahona.

Ti itutulong mangparparagsak kaniak (*itudo iti umis-isem a rupa*).
Daytoy ti mangpasasayaat iti riknak (*ikabil dagiti ima iti agsumbangir nga abaga ket arakupen ti bagi*).
Gapu ta no dagiti dadduma tultulongak (*unnaten dagiti takiag*),
Ar-aramidek ti nasken kaniak (*itung-ed ti rupa ket agdalikepkep*)!

Kayat ti Nailangitan nga Ama ken ni Jesus nga Agragsaktayo

Ilawlawag a kayat ti Nailangitan nga Ama ken ni Jesus nga agragsaktayo.
Ammoda a makapagbalintayo a naragsak no aramidentayo no ania ti ibagada nga aramidentayo.

Estoria

Ipakita ti ladawan 1-49, Ti Nayaw-awan nga Anak, ket isalaysay ti estoria a masarakan iti Lucas 15:11–32. Ibagada dagiti nadumaduma a rikna nga impeksa ti ama ken dagiti annakna a lalaki. Bayat ti pannakaimeksa ti tunggal rikna, mabalina a paitudo iti maysa nga ubing ti maitutop a rupa iti pisarra. Kas pagarigan, mabalina a sawen ti: Kayat ti ubing a lalaki ti pumanaw iti pagtaenganna ket napan iti adayo a pagilian. Idi pumanaw, *nagliday* ti amana. Kalpasan ti ababa a panawen, pinanawan dagiti gagayemna ti ubing a lalaki. Nakarikna iti *liday*. Di nagbayag, awanen ti kuartana. *Nagbuteng* gapu ta mabisin ken awan ti mangted kenkuana iti ania man a taraon . . . ken dadduma pay.

- Ania iti panagkunayo ti panagrikna ti anak a lalaki idi agawid?
- Apay a naragsakan ti ama idi nagsubli ti anakna a lalaki? (Kitaen iti Lucas 15:24.)
- Apay a nagpungtot ti in-inauna a kabsat a lalaki idi nagsubli ti in-inaudi a kabsatna a lalaki? (Kitaen iti Lucas 15:28–30.) Ania ti mabalina nga aramiden tapno agbalin manen a naragsak?

Pammaneknek

Ipanamnama kadagiti ubbing a marikna ti tunggal maysa ti ragsak, liday, gura, wenno buteng no dadduma. Nasken a sursuruentayo ti mangipakita kadagitoy a rikna iti umno a wagwagas. Ipalagip kadagiti ubbing a kayat ti Nailangitan nga Ama ken ni Jesus nga agragsaktayo. Ibagada kadagiti ubbing no kasano ti karagsakmo no ar-aramidem no ania ti kayat ti Nailangitan nga Ama ken ni Jesus nga aramidentayo.

Dagiti Aktibidad a Mangpadur-as iti Pannakaammo

Pumili iti sumagmamano kadagitoy nga aktibidad tapno usaren bayat ti adalen.


1. Patakderen dagiti ubbing iti patimbukel. Dawaten kadakuada nga ilinteg dagiti bibigda ket saan nga umis-isem. Kalpasanna irugi ti isem iti lawlaw ti nagtimbukel babaen ti panagisem ken panangisao kadagiti sumaganad a balikas: “Isemak ni (nagan ti ubing).” Ti nagan a dinakamatmo ket nasken nga umisem ket ulitenna ti sao, a dakamatenna ti nagan ti sumaruno nga ubing. Itultuloy agingga nga umisem amin nga ubbing iti nagtimbukel.

Ipalagip kadagiti ubbing a no isemantayo dagiti dadduma a tao, masansan nga isemandatayo met. Narigat ti agbalin a naliday, napungtot, wenna mapabutngan no umis-isemtayo.

2. Kantaen ti “When We’re Helping” (*Children’s Songbook*, p. 198) wenna “Jesus Wants Me for a Sunbeam” (*Children’s Songbook*, p. 60).
3. Pagpanunoten dagiti ubbing iti maysa a banag a mabalinda nga aramiden tapno agragsak. Mangipasippaw iti *beanbag* wenna nalukneng a banag iti ubing ket sawen ti, “Naragsak ni (nagan ti ubing) no _____.” Pasuraten ti ubing iti blangko iti maysa a banag a mangparparagsak kenkuana ket kalpasanna isublina kenka ti *beanbag*. Itultuloy agingga nga adda gundaway ti tunggal ubing.
4. Mangisalaysay iti estoria maipapan iti ubing nga agar-aramid iti nasayaat a banag para iti inana, kas iti panagaramid iti maysa nga aramiden iti balay. Saan nga ammo ti ina no asino ti nangtulong kenkuana, isu a dinamagna iti tunggal ubing iti pamilia no asino ti timmulong kenkuana. Idi makadanon iti ubing a nangaramid iti nasayaat a trabaho, ammona nga inaramid daytoy nga ubing gapu iti dakkel nga isem ti ubing. Marikrikna ti ubing ti ragsak gapu ta nakaaramid iti maysa a nasayaat a banag.

Dagiti Mainayon nga Aktibidad para kadagiti Babbabassit nga Ubbing

1. Bayat ti panangisaom iti sumaganad a berso, idauluam dagiti ubbing kadagiti garaw. Uliten no tarigagayan dagiti ubbing.
Aramiden a Naragsak dagiti Aldaw
Dua a mata tapno makita dagiti nasayaat a banag nga aramiden (*itudo iti agpada a mata*).
Dua a bibig tapno umisem iti agmalmalem (*umisem iti dakkel*).
Dua a lapayag tapno sasao’t dadduma mangngegan (*ikabil dagiti ima iti lapayag*),
Dua nga ima tapno mangipakni kadagiti ay-ayam (*agpammarang nga agpidpidut kadagiti ay-ayam ken mangiduldulin kadagito*).
Maysa a dila tapno inaldaw nga agsasao iti nasayaat (*itudo ti ngiwat*),
Maysa a puso tapno agrabaho ken agay-ayam a siaayat (*paginniggemen dagiti ima iti batog ti puso*).
Dua a saka tapno tumaray a siraragsak (*itudo ti saka*)—
Para iti tunggal maysa, aramiden dagiti aldaw a naragsak.
2. Kantaen ti “If You’re Happy” (*Children’s Songbook*, p. 266) ket aramiden dagiti garaw nga isingsingasing dagiti balikas. Uliten kadagiti nayon a binatang kas kadagiti naisingsingasing iti baba ti panid ti libro a pagkantaan.
3. Paaramid kadagiti ubbing ti naragsak a rupa, naliday a rupa, naunget a rupa, ken nabannog a rupa. Ilawlawag a maibagada kadagiti balikas no kasano ti riknada imbes nga agsangit wenna mariribukanda. No pagsasaritaantayo maipapan iti riknatayo masansan a sumayaat ti riknatayo.



Panggep Tapno tulongan ti tunggal ubing a mangammo a kas annak ti Nailangitan nga Ama makaaramid ti tunggal maysa kadayo iti adu a banag.

Panagsagana

1. Sikakararag nga adalen ti 1 Samuel 17.
2. Kauman ti nagannak ti tunggal ubing iti klase tapno ammuen ti maysa a banag a kabaelan nga aramiden wenno masursuro nga aramiden ti ubing.
3. Mangisagana kadagiti panid ti papel nga addaan kadagiti simple a pangiturong, kas iti panagsipat, panagbilang agingga iti tallo, pannagna a manglawlaw iti klase, panaglagto, panagdrowing iti nagtimbukel (iti pisarra wenno iti panid ti papel), panagtakder iti maysa a saka, panagdalikepkep, wenno panangitudo iti maysa a banag nga asul ti marisna. Maaddaan kadagiti panid ti papel a kas iti kaadu dagiti ubbing iti klase. Ammuem dagiti ubbing iti klasem nga addaan kadagiti pagkurangan, ket siguraduem nga iraman dagiti banag a mabalinda nga aramiden.
4. Isurat ti nagan ti tunggal ubing iti naisina a panid ti papel.
5. Dagiti kasapulan:
 - a. Biblia.
 - b. Maysa a bassit a banniit (opsional; kitaen iti adalen 11).
 - c. Maysa a pagikabilan iti nagnagan (opsional).
 - d. Ladawan 1-5, Pamilia nga Addaan iti Maladaga (62307 864); ladawan 1-10, Kararag ti Kaamaan (62275 864); ladawan 1-38, Dagiti Ubbing nga Agay-ayam iti Bola; ladawan 1-50, Makapagbadoak; ladawan 1-51, Maysa a Pamilia nga Agtitinnulong nga Agtrabaho (62313 864); ladawan 1-52, Patayen ni David ni Goliat (Pakete ti Ladawan ti Arte ti Ebanghelio 112; 62073 864).
6. Aramidem dagiti nasken a panagsagana para kadagiti ania man nga aktibidad a mangpadur-as iti pannakaammo a kayatmo nga usaren.

Palagip iti mannursuro: Agbalinka a managrikna kadagiti asino man nga ubbing iti klasem nga addaan kadagiti pagkurangan iti bagi. Ipamaysam kadagiti banag a *kabaelan* nga aramiden ti bagida, saan nga iti pagkuranganda.

Dagiti Aktibidad iti Pannakasursuro

Aktibidad a Pangawis iti Panagdenggeg

Mangawis iti maysa nga ubing a mangted iti pangrugji a kararag.

Ikupin dagiti panid ti papel nga addaan nagnagan dagiti ubbing ket ikabil dagitoy iti maysa a pagikabilan wenno iti suelo. Pausar iti maysa nga ubing ti banniit wenno ti imana a mangpidut iti maysa kadagiti panid ti papel. Patakerem iti abaymo ti ubing a nabunot ti naganna. Ibagam iti klase ti maysa a banag a kabaelan nga aramiden wenno sursuruen nga aramiden ti ubing. Ulitem agingga a maaddaan gundaway ti tunggal ubing a pumili iti maysa a nagan ken naibagamon ti maysa a banag maipapan iti tunggal ubing. Kablaawam dagiti ubbing iti no ania ti kabaelanda nga aramiden ken sursuruenda nga aramiden.

Makaaramid dagiti Bagitayo iti Adu a Banag

Kanta

Kantaen ti “I Am a Child of God” (*Children’s Songbook*, p. 2) a kagiddan dagiti ubbing.

Siak ket anak ti Dios,
Ditoy imbaonnak,
Inikkannak pagtaengak
Naimbag a nagannak.

Iturongnak, idalannak,
Tarabayennak.
Suruannak ‘ramidek
Tapno makadennak.

- Asino ti ama ti espirituyo?
- Asino ti nangibaon kadakayo ditoy daga tapno manggun-od iti bagi?

Sublien nga adalen a kadua dagiti ubbing a plinano ti Nailangitan nga Ama nga umaytayo iti daga tapno manggun-od iti bagi. Ilawlawag a kayatnatayo nga agsur-suro nga agaramid iti adu a banag babaen kadagiti bagitayo ken kayatna nga usarentayo dagiti bagitayo iti umno a wagwagas tapno makapagbalintayo a kas kenkuana.

- Ania ti kabaelanyo nga aramiden babaen dagiti imayo? sakayo? ngiwatyo? matayo?

Ipakita ti ladawan 1-5, Pamilia nga Addaan iti Maladaga.

- Ania iti panagkunayo ti kabaelan nga aramiden daytoy a maladaga?

Damagen dagiti sumaganad a saludsod wenno kapada daytoy tapno mailawlawag no kasano ti kaadu ti banag a nasursuron nga aramiden dagiti ubbing manipud pay idi maladagada.

- Makapagna kadi ti maladaga?
- Makapagsao kadi ti maladaga?
- Mapakan kadi ti maladaga ti bagina?
- Mabaduan kadi ti maladaga ti bagina?
- Makasirko kadi ti maladaga?
- Makakanta kadi ti maladaga?
- Makalugan kadi ti maladaga iti traysikel?

Ilawlawag a dumakdakkal dagiti ubbing ket masursurodanto nga aramiden ti adu pay a banag. Saggaysa nga ipakita dagiti ladawan 1-10, 1-38, 1-50, ken 1-51. Paiggnam iti maysa nga ubing ti ladawan idinto nga ilawlawag dagiti dadduma nga ubbing no ania ti mapasasamak iti ladawan. Kalpasan a sumungbat dagiti ubbing, dayawen ida kadagiti banag nga ammoda a kabaelan nga aramiden dagiti bagida.

Aktibidad

Bay-an a pumili ti tunggal ubing iti maysa a panid ti papel nga adda pangiturong a naisurat ditoy. Basaen iti napigsa ti pangiturong ket paaramid iti ubing no ania ti ibagbaga daytoy. Ikkan iti gundaway ti tunggal ubing.

- Ania ti masursuroyo nga aramiden itan?
- Ania ti kayatyo a sursuruen nga aramiden no dumakdakkelayo?

Ibaga kadagiti ubbing nga agyamankayo iti Nailangitan nga Ama gapu ta addaan-tayo iti bagi a makaaramid iti nakaad-adu a banag.

Matulongannatayo ti Nailangitan nga Ama nga Agaramid iti Adu a Banag

Ibaga kadagiti ubbing a no dadduma maidawat kadatayo nga agaramid kadagiti banag a narigat.

- Ania ti napadasamon a narigat nga aramiden?
- Asino ti makatulong kadatayo a mangsursuro kadagitoy a banag? (Nagannak, kakabsat, mannursuro.)
- Asino ti mabalintayo a pagkararagan tapno agkiddaw iti tulong no nasken nga agaramiditayo iti maysa a banag a narigat? (Nailangitan nga Ama.)

Ilawlawag a matulongannatayo pay ni Jesucristo no narigat nga aramiden dagiti banag.

Estoria

Iparang ti ladawan 1-52, Patayen ni David ni Goliat, ket isalaysay ti estoria maipapan kada David ken Goliat, a masarakan iti 1 Samuel 17. Ilawlawag a tinulongan ni Jesus ni David nga agaramid iti narigat a banag.

- Asino ti nangbutbuteng iti buyot nga Israelita? (Kitaen iti 1 Samuel 17:4–8.)
- Asino ti ninamnama ni David a tumulong kenkuana? (Kitaen iti 1 Samuel 17:37.)

Pammaneknek

Ipeksam no kasano ti panagyamanmo iti Nailangitan nga Ama para iti bagim ken ti adu a banag a kabaelan nga aramiden daytoy. Allukoyen dagiti ubbing a kiddawenda iti Nailangitan nga Ama a tulonganna ida a mangusar iti bagida nga agaramid iti adu a banag.

Dagiti Aktibidad a Mangpadur-as iti Pannakaammo

Pumili iti sumagmamano kadagitoy nga aktibidad tapno usaren bayat ti adalen.

1. Kagiddan dagiti ubbing, kantaen ti “Fun to Do,” (*Children’s Songbook*, p. 253) ket aramiden dagiti maitutop a garaw. Bay-an nga isingasing dagiti ubbing dagiti garaw para kadagiti nayon a berso.
2. Ikkan dagiti ubbing iti papel ken krayola ket bay-an nga agdrowing ti tunggal ubing iti maysa wenno ad-adu pay a banag a kabaelanna nga aramiden. Isurat ti *Makaaramidak iti adu a banag* iti papel ti tunggal ubing.
3. Tulongan dagiti ubbing a mangikeddeng iti maysa a banag a kabaelanda nga aramiden iti pagtaengan tapno makatulong iti maysa a tao, kas iti panangisagana iti lamisaan, panangsagad iti suelo, wenno panangpakan iti aywan nga ayup. Ipalagip kadakuada nga ibagada kadagiti nagannak kadakuada maipapan iti daytoy kalpasan ti Primary tapno matulongan ida dagiti nagannak kadakuada a manglagip a mangaramid iti daytoy.
4. Uliten ti sumagmamano kadagiti maitutop nga aktibidad kadagiti adalen 16 agingga iti 20.

**Dagiti Mainayon
nga Aktibidad
para kadagiti
Babbabassit
nga Ubbing**

1. Patakderen dagiti ubbing ket pakanta dagiti sumaganad a balikas iti ayug ti “Once There Was a Snowman” (*Children’s Songbook*, p. 249). Usaren dagiti garaw ti panagdumog para iti umuna a berso ken dagiti garaw ti panagunnat para iti maikadua a berso.

Maysaak idi a maladaga,
Bassit idi a maladaga.

Dumakdakkell a dumakdakkellak,
Tumaytayag, a tumaytayagak!

Bay-an a pagsasaritaan dagiti ubbing maipapan kadagiti banag a nasursuroda nga aramiden manipud pay idi maladagada pay laeng.

2. Ipakita ti garaw kas iti panagkingking, panagsipat, wenno panaglagto, ket dawatem nga ibaga dagiti ubbing no ania ti ar-aramidem. Kalpasanna paaramid met kadagiti ubbing ti kasta met la a garaw. Ikkan ti tunggal ubing iti gundaway a mangipakita iti garaw. Pailbaga kadagiti dadduma pay nga ubbing no ania ti garaw ket kalpasanna tuladenda.

Panggep

Tapno tulongan ti tunggal ubing a makaawat a plinano ti Nailangitan nga Ama a maikameng ti tunggal maysa kadatayo iti maysa a pamilia nga agkasapulan kadatayo ken mangipatpateg kadatayo.

Panagsagana

1. Sikakararag nga adalen ti Lucas 1:26–35.
2. Am-ammuem a naimbag dagiti pamilia dagiti ubbing iti klasem ket agsagana a mangdakamat iti maysa a napintas a banag a mapasasamak iti tunggal maysa, kas iti maysa a kayyanak a maladaga, maysa a kabsat a lalaki wenno babai nga adda iti mision, wenno panagpasiar ti pamilia.
3. Dagiti kasapulan:
 - a. Biblia.
 - b. Tisa ken pagpugas.
 - c. Ladawan 1-5, Pamilia nga Addaan iti Maladaga (62307 864); ladawan 1-7, Maysa a Naayat a Pamilia; ladawan 1-16, Ti Pannakayanak (Pakete ti Ladawan ti Arte ti Ebanghelio 201; 62495 864); ladawan 1-23, Maysa nga Umok nga Addaan iti Babassit a Tumatayab; ladawan 1-51, Maysa a Pamilia nga Agtitinnulong nga Agrabaho (62313 864); ladawan 1-53, Panagragragsak ti Kaamaan (62384 864).
4. Aramidem dagiti nasken a panagsagana para kadagiti ania man nga aktibidad a mangpadur-as iti pannakaammo a kayatmo nga usaren.

Palagip iti mannursuro: Agbalinka a managrikna kadagiti kasasaad ti pamilia dagiti ubbing iti klasem. Tulongan dagiti ubbing a makaawat a ti kapatgan a banag maipapan iti pamilia ket saan a ti bilang dagiti tao iti pamilia, no di ti panagiinaywat dagiti miembro ti pamilia ken panagiinaywanda iti tunggal maysa.

Dagiti Aktibidad iti Pannakasursuro

Mangawis iti maysa nga ubing a mangted iti pangrugy a kararag.

Aktibidad a Pangawis iti Panagdengngeg

Ipakita ti ladawan 1-23, Maysa nga Umok nga Addaan iti Babassit a Tumatayab. Bay-an a pagsasaritaan dagiti ubbing ti maipapan iti ladawan ket pailasin kada-kuada dagiti tumatayab ken ti umok.

- Asino ti nangaramid iti umok para kadagiti babassit a tumatayab?
- Apay a kasapulan dagiti babassit a tumatayab ti maysa nga ina ken ama a mangaywan kadakuada? (Tapno mangpakan kadakuada, tapno mapagtalinaed a napudotda, ken tapno masaluadanda manipud iti peggad.)
- No dumakdakkal bassit ken napigpigsa dagiti babassit a tumatayab, asinonto ti mangisuro kadakuada nga agtayab?

Ilawlawag a kameng dagiti babassit a tumatayab ti maysa a pamilia a tumulong a mangted kadagiti kasapulanda.

Kamengak ti Maysa a Pamilia

- Adda kadi pamiliayo?
- Apay a kasapulanyo ti maysa a pamilia nga agaywan kadakayo?

Ipakita ti ladawan 1-5, Pamilia nga Addaan iti Maladaga. Sublien nga adalen no kasano a plinano ti Nailangitan nga Ama nga umay ti tunggal maysa kadatayo iti daga ket agbalin a paset ti maysa a pamilia. Ilawlawag a no mayanak ti maysa a maladaga, saan a kabaelan nga aywanan ti maladaga ti bagina. Saan a kabaelan a pakanen wenno baduan ti maladaga ti bagina. Kasapulanna ti maysa a pamilia a mangaywan kenkuana.

- Asino ti nangaywan kadakayo idi nayanakkayo?
- Ania dagiti sumagmamano a banag nga inaramid ti pamiliayo para kadakayo idi maladagakayo pay laeng?
- Ania dagiti sumagmamano a banag nga ar-aramiden ti pamiliayo para kadakayo ita?
- Asino ti nagplano tapno maikamengkayo iti maysa a pamilia?

Tulongan dagiti ubbing a makaawat no kasano ti karagsak dagiti pamiliada idi nayanakda. Yunay-unay no kasano ti panagayat dagiti nagannak kadakuada ken dadduma pay a miembro ti pamilia ken kayatda ida nga agragsak.

Kanta

Tulongan dagiti ubbing a mangkanta wenno mangisao kadagiti balikas iti "I Am a Child of God" (*Children's Songbook*, p. 2).

Siak ket anak ti Dios,
Ditoy imbaonnak,
Inikkannak pagtaengak
Naimbag a nagannak.

Iturongnak, idalannak,
Tarabayennak.
Suruannak 'ramidek
Tapno makadennak.

Ipakita ti ladawan 1-16, Ti Pannakayanak, ket ilawlawag a nayanak ni Jesus iti maysa a pamilia idi immay iti daga (kitaen iti Lucas 1:26–35).

- Asino dagiti tao iti daytoy a ladawan?
- Asino ti ina ni Jesus?
- Asino ti ama ni Jesus? (Ipalagip kadagiti ubbing a ti Nailangitan nga Ama ti ama ni Jesus; maysa a nasayaat a tao ni Jose a pinili ti Nailangitan nga Ama tapno mangaywan kada Maria ken Jesus.)
- Ania iti panagkunayo ti panagrikna da Maria ken Jose maipapan ken Jesus?
- Ania ti panagkunayo ti inaramid da Maria ken Jose tapno maaywanan ni maladaga a Jesus?
- Asino ti nagplano tapno maaddaan ni Jesus iti pamilia nga agayat ken agaywan kenkuana?

Ay-ayaten ti Nailangitan nga Ama ken ni Jesus ti Tunggal Pamilia

Ipakita ti ladawan 1-7, Maysa a Naayat a Pamilia. Ilawlawag nga adda ina ken ama ti sumagmamano a pamilia, ken adda maysa laeng a naganak ti sumagmamano a pamilia. Adda maysa laeng a lelong wenno lelang wenno sabali a tao kadagiti sumagmamano a pamilia a tumultulong nga agaywan kadagiti ubbing. Sumagmamano a pamilia ti adu ti annakna, idinto ta maymaysa ti anak wenno awanan iti anak dagiti dadduma a pamilia. Tulongan dagiti ubbing a makaawat nga aggigidiat ti tunggal pamilia ken ay-ayaten ti Nailangitan nga Ama ken ni Jesus ti tunggal pamilia.

Aktibidad

Awisen ti tunggal ubing nga agsarita maipapan iti pamiliiana. Saggaysa a tulongan ti tunggal ubing nga agdrowing kadagiti ladawan a sinantao iti pisarra tapno mangibagi kadagiti miembro ti pamiliiana. Paisao iti napigsa iti ubing ti nagan ti tunggal miembro ti pamilia. Apaman a malpas ti tunggal ubing, isalaysaymo iti klase ti maysa a banag a nasursurom maipapan iti pamilia ti ubing.

Kayat ti Nailangitan nga Ama ken ni Jesus nga Ipakita dagiti Miembro ti Pamilia ti Ayatda para iti Tunggal Maysa

Kanta

Tulongan dagiti ubbing a mangkanta wenno mangisao kadagiti balikas ti “A Happy Family” (*Children’s Songbook*, p. 198).

Patpatgek ni nanangko,
Patpatgek ni tatangko;
Dakami patpatgenda,
Naragsakkam a pamilia.

(Manipud iti *Merrily We Sing*, © 1948, 1975 ti Pioneer Music Press, Inc. [maysa a dibision ti Jackman Music]. Naaramat nga addaan pammalubos.)

- Kasano ti pannakaammoyo nga ay-ayatennakayo ti pamiliayo?
- Ania ti aramidenyo tapno maipakitayo nga ay-ayatenyo dagiti kameng ti pamiliayo?

Ipakita ti ladawan 1-53, Panagragragsak ti Kaamaan.

- Naragsak kadi daytoy a pamilia? Kasano ti pannakaammoyo?
- Ania ti kayatyo nga aramiden iti pamiliayo?
- No nasayaat ti amin iti tunggal maysa, kasano ti panagriknayo?

Ipakita ti ladawan 1-51, Maysa a Pamilia nga Agtitinnulong nga Agrabaho.

- Ania ti ar-aramiden daytoy a pamilia?
- Ania ti aramidenyo tapno makatulong iti pamiliayo?
- Kasano ti panagriknayo no tultulonganyo dagiti kameng ti pamiliayo?

Aktibidad

Pagpanunoten dagiti ubbing maipapan kadagiti nadumaduma a wagas a pakatulonganda kadagiti pamiliada iti pagtaengan, kas iti panangpidut kadagiti ay-ayam, pannakiay-ayam iti maladaga, wenno panangtulong nga agugas iti nanganan. Bay-an nga idrama dagiti ubbing dagiti kapanunotanda. Allukoyen dagiti ubbing a tulonganda ti pamiliada bayat ti lawas.

Pammaneknek

Ipeksam ti riknam iti panagyaman iti Nailangitan nga Ama para iti bendision ti panagbalin a paset ti maysa a pamilia.

Dagiti Aktibidad a Mangpadur-as iti Pannakaammo

Pumili iti sumagmamano kadagitoy nga aktibidad nga usaren bayat ti adalen.

1. Kantaen manen ti “A Happy Family.” Pumili iti uppat nga ubbing nga agbalin a familia iti kanta. Paiggaman kadakuada dagiti tanda a mangipakita no ania a miembro ti familia ti ibagbagian ti tunggal maysa. Tumakder iti likudan ti uppat nga ubbing ket itudo ti ulo ti maitutop nga ubing bayat ti panangikanta wenno panangisao kadagiti balikas a kagiddan dagiti ubbing. Uliten ti kanta, a palubosan dagiti dadduma pay nga ubbing nga agbalin a miembro ti familia. Itultuloy agingga a maaddaan iti gundaway ti tunggal ubing.
2. Ibaga kadagiti ubbing ti maipapan kadagiti pangiturong ni Ari Benjamin kadagiti familia, a masarakan iti Mosiah 4:14–15. Basaen iti napigsa ti maudi a kagudua ti bersikulo 15. Paisingasing kadagiti ubbing dagiti wagas a makapagpipinnateg ken makapagpipinnaay dagiti miembro ti familia iti tunggal maysa.
3. Tulongan dagiti ubbing a mangaramid iti sumaganad nga ay-ayam iti ramay:

Ti Pamiliak

Daytoy ti napintas a nanangko (*itudo ti tammudo*);

Daytoy ti natayag a tatangko (*itudo ti nagtengnga a ramay*).

Daytoy ti manangko (*itudo ti pasiraw-it*),

Ket saanda la nga is-isu.

Daytoy ti maladaga a lalaki nga adingko (*itudo ti kikit*).

A nakabasbassit nga agpayso.

Asino met daytoy maysa pay a tao (*itudo ti tangan*)?

Siempre ammoyo a siak daytoy.

Maysa, dua, tallo, uppat, lima, makitayo (*sagiden ti tunggal ramay bayat ti panagbilangmo*),

Buklen ti nakasaysayaat a familia!

Tulongan ti tunggal ubing a mangipakita iti umisu a bilang dagiti ramay tapno mangibagi iti bilang dagiti tao iti pamiliana (no nasurok a sangapulo a tattao ti familia ti maysa nga ubing, agpatulong iti maysa pay nga ubing). Tulongan ti tunggal ubing a mangulit iti maudi a dua a linia ti berso, a bilbilangen ti bilang dagiti tao iti pamiliana sakbay ti panangisao iti “buklen ti nakapimpintas a familia!”

Dagiti Mainayon nga Aktibidad para kadagiti Babbabassit nga Ubbing

1. Ipakita ti ladawan 1-23, Maysa nga Umok nga Addaan Babassit a Tumatayab. Tulongan dagiti ubbing a mangaramid kadagiti garaw iti “Birds in the Tree” (*Children’s Songbook*, p. 241) bayat ti panangisaom kadagiti balikas:

Masarakantayo ti maysa a bassit nga umok (*agpada nga isukog dagiti ima*)

Kadagiti sanga ti maysa a kayo (*ingato dagiti takiag a patimbukel iti ngatuen ti ulo*).

Dagiti itlog bilangentayo;

Adda maysa, dua, tallo (*ingato ti maysa, dua, ken tallo a ramay*).

Adda ti ina a tumatayab iti umok (*isukog ti kanigid nga ima, iparabaw ti kannawan nga ima*)

Tapno ukopanna ti tallo nga itlog (*ingato ti tallo a ramay*).

Ti ama a tumatayab agrikusrikus (*igaraw dagiti takiag a kasla agtaytayab*)
Tapno bantayanna ti pamiliana.

2. Sawen dagiti balikas iti “Here We Are Together” (*Children’s Songbook*, p. 261),
nga usaren ti *ama, ina, kabsat a babai*, ken *kabsat a lalaki*.

Adtoykami a sangkamaysa, sangkamaysa, sangkamaysa;
O, adtoykami a sangkamaysa iti pamiliami.
Adda ni tatang ken ni nanang ken ti kabsatko a babai ken lalaki;
O, adtoykami a sangkamaysa iti daytoy nalawag ken nainit nga aldaw.

3. Tulongam dagiti ubbing nga aramidenda dagiti garaw iti sumaganad a berso
bayat ti panangisaom kadagiti balikas:

Ti Pamiliak

Kas kadagiti tumatayab iti ngato ti kayo (*ipayakpak dagiti takiag a kasla payak*),
Adda pamiliak a bukbukodko (*itudo ti bagi*).
Ik-ikkandak iti taraonko (*agpammarang a mangmangan*)
Ken sursuruandak nga agay-ayam (*aglagto*).
Tapno agbalinak a natalged ken naragsak iti agmalem (*umisem iti dakkel*).

4. Isao dagiti sumaganad a balikas ken kantaen dagitoy iti ania man nga ayug a
maibagay:

Ay-ayatennaka ni Nanangmo.
Kasta met ni Tatangmo.
Dagiti tattao iti pamiliayo,
Patpatgendaka a pudno.

Panggep

Tapno allukoyen ti tunggal ubing a mangipakita iti ayat kadagiti kakabsatna.

Panagsagana

1. Sikakararag nga adalen ti Exodo 1:22–2:10.
2. Babaen ti pananganamong ti presidenteyo iti Primary, mangawis iti maysa nga ina nga itugotna ti maladagana iti klase. Dawaten kenkuana a mangisarita iti maipapan no kasano ti panangaywanna iti maladaga, agraman kadagiti banag nga ar-aramidenna ken ti pamiliiana tapno mapagtalinaed a natalged ti maladaga. Allukoyen isuna nga ibagana maipapan ti ayat a marikriknana para iti maladagana. No awan ti ina nga addaan anak a maladaga, mabalinmo nga awisen ti maysa nga ina nga umay nga itugotna ti retrato ti anakna idi maladaga pay la daytoy.
3. Dagiti kasapulan;
 - a. Biblia.
 - b. Maysa a munieka.
 - c. Ladawan 1-2, Ni Moises iti Runo (Pakete ti Ladawan ti Arte ti Ebanghelio 106; 62063 864); ladawan 1-13, Joseph Smith (Pakete ti Ladawan ti Arte ti Ebanghelio 400; 62449 864).
4. Aramidem dagiti nasken a panagsagana para kadagiti ania man nga aktibidad a mangpadur-as iti pannakaammo a kayatmo nga usaren.

Palagip iti mannursuro: Iti panangtedmo iti daytoy nga adalen, agbalinka a managrikna kadagiti ubbing iti klasem nga awan ti asino man a kakabsatna.

Dagiti Aktibidad iti Pannakasursuro

Mangawis iti maysa nga ubing a mangted iti pangrugi a kararag.

Aktibidad a Pangawis iti Panagdengngeg

Yam-ammom ti ina iti klase ket paisaritam kenkuana kadagiti ubbing ti maipapan iti maladagana. Bay-an dagiti ubbing nga agdamag kadagiti saludsod iti ina maipapan iti maladaga. Pailawlawag iti ina no kasano a naggagar ti pamilia a maaddaan iti kayyanak a maladaga a dumteng iti pagtaenganda.

Maayattayo dagiti Kakabsattayo

- Adda kadi kadakayo ti adda kabsatna a maladaga?

Bay-an dagiti ubbing nga addaan kabsat a maladaga nga agsarita maipapan iti maladaga ken paibaga no kasano a nagsagana dagiti pamiliada para iti maysa a kayyanak a maladaga.

- Adda kadi kadakayo ti adda manong wenno manangna?

Bay-an dagiti ubbing a pagsasaritaanda iti sumagmamano a kanito maipapan kadagiti kakabsatda. Ipalagip kadagiti ubbing a naisaritan iti napalabas nga adalen maipapan no kasano nga agduduma ti amin a pamilia. Sumagmamano a tattao ti addaan iti adu a kakabsat, ken sumagmamano a tattao ti addaan laeng iti

manmano wenna awan a pulos. Mano man ti kakabsattayo, nasken nga ayaten-tayo ida ken agbalintayo a nasayaat kadakuada.

Estoria

Ipakita ti ladawan 1-13, Joseph Smith, ket ilawlawag a ni Propeta Joseph Smith, ti umuna a Presidente ti Simbaan, naaddaan iti kabsat nga agnagan iti Hyrum nga impatpategna unay. Nasayaat nga aggayyem da Hyrum ken Joseph ken nagtinnulongda iti unos ti panagbiagda. Iti bukodmo a balikas, isalaysaymo ti sumaganad nga estoria maipapan iti panawen idi tinulongan ni Hyrum ni Joseph.

Idi ubing pay ni Joseph Smith, nagsakit iti nakaro. Naaddaan iti naut-ot unay nga impeksion iti luppona. Nagsakit ni nanangna iti panangasikasona kenkuana iti rabii ken aldaw ket kinasapulanna ti aginana. Dinamag ni manongna a Hyrum no mabalinna a sublatan ni nanangna. Ammo dagiti nagannak ni Hyrum a mapagtal-kanda isuna nga agaywan a nasayaat ken ni Joseph, isu nga immanamongda. Dumani nagtultuloy iti sumagmamano nga aldaw a binantayan ni Hyrum ti agrigrigat a kabsatna. Impetpetna ti agpada nga imana iti luppo ni Joseph, a daytoy ti kakaisuna a pamuspusan tapno maep-eapan bassit ti nakaro nga ut-ot (kitaen iti Lucy Mack Smith, *History of Joseph Smith*, ed. Preston Nibley [Salt Lake City: Bookcraft, 1954], p. 55).

- Kasano ti pannakaammoyo nga impateg ni Hyrum ti kabsatna a ni Joseph?

Ilawlawag a ti maysa a wagas a maipakitatayo ti pammategtayo kadagiti kakabsattayo ket babaen ti panangtulongtayo kadakuada.

Matulongantayo dagiti Kakabsattayo

- Kasano a matulonganyo dagiti kakabsatyo?
- Kasano a matulongandakayo dagiti kakabsatyo?

Aktibidad

Iladawan ti sumagmamano a garaw a mangipakita no kasano ti mabalin a reaksion dagiti ubbing kadagiti kakabsatda a lalaki ken babai. Paingato kadagiti ubbing ti tammudoda no ti garaw ket maysa a wagas ti panangtulongda iti maysa a kabsat a lalaki wenna babai ken paibaba dagiti tammudoda no ti garaw ket saan a makatulong iti kabsat a lalaki wenna babai. Mabalin a kayatmo nga usaren ti sumagmamano kadagiti sumaganad a kapanunotan:

- Ipaay-ayammo ti kabarkaro nga ay-ayammo iti kabsatmo a babai.
- Bulodem ti bola ti kabsatmo a lalaki a dika dumawat iti pammalubosna.
- Tulongam ti kabsatmo a babai a mangpidut kadagiti ay-ayamna.
- Dawatem iti kabsatmo a lalaki ti pammalubosna tapno ay-ayamem ti bolana.
- Agkedkedka a makiay-ayam iti kabsatmo a babai.
- Agbalinka a nasingpet no malidlidayan ti kabsatmo a lalaki.
- Kaay-ayammo ti kabsatmo a babai no isu ket malidlidayan.

Matulongantayo dagiti maladaga a kakabsattayo

Ilawlawag a no dadduma narigat no maipasngay ti maysa a maladaga iti maysa a familia gapu ta alaen ti maladaga ti adu a panawen ken panangasikaso dagiti nagannak. Tulongan dagiti ubbing a makaawat nga uray no mabalin a pakakumikoman dagiti nagannak ti kayyanak a maladaga, ay-ayatenda pay laeng ti amin a dadduma pay nga annakda. Ipalagip kadagiti ubbing a kasapulan ti maladaga ti

tulong iti dumani amin a banag, idinto ta maaramid dagiti daddadakkel nga ubbing (kas kadagiti adda iti klasem) ti adu a banag para iti bagbagida ken para iti kabsat a maladaga.

- Kasano a matulonganyo dagiti nagannak kadakayo nga addaan iti maladaga a kabsatyo?

Aktibidad

Ipakita kadagiti ubbing no kasano ti panangiggem a naimbag ti maladaga a munieka. Isuro kadakuada ti simple a duayya wenno kantaen ti “I Am a Child of God” (*Children’s Songbook*, p. 2) bayat ti panagsisinnublatda iti panangiggem iti munieka.

Siak ket anak ti Dios,
Ditoy imbaonnak,
Inikkannak pagtaengak
Naimbag a nagannak.

Iturongnak, idalannak,
Tarabayennak.
Suruannak ‘ramidek
Tapno makadennak.

Estoria

Ilawlawag a naaddaan ni Moises iti manang a nangipatpateg kenkuana ken nangitulong kenkuana idi maladaga pay laeng. Usaren ti ladawan 1-2, Ni Moises iti Runo, sublien nga adalen ti estoria maipapan iti maladaga a ni Moises, a masarakan iti Exodo 1:22–2:10. Yunay-unay no kasano a binantayan ni Miriam ti adingna a maladaga.

- Kasano a tinulongan ni Miriam ni maladaga a Moises?

Pammaneknek

Ipeksam ti riknam maipapan iti kinapatag dagiti agkakabsat nga agtitinnulong ken agiinnayat iti tunggal mayasa. No mabalín, isaritam ti bukodmo a padas idi ubingka pay laeng idi nagtitinnulongkayo nga agkakabsat. Ipalagip kadagiti ubbing a no tultulongantayo dagiti kakabsattayo ipakpakitatayo ti ayattayo kadakuada. Ipeksam no kasano ti panagyamanmo iti Nailangitan nga Ama iti panangipanna kadatayo kadagiti pamília.

Dagiti Aktibidad a Mangpadur-as iti Pannakaammo

Pumili iti sumagmamano kadagitoy nga aktibidad tapno usaren bayat ti adalen.

1. Ikkan dagiti ubbing iti papel ken krayola wenno lapis, ket pagdrowingen ida iti ladawan dagiti kakabsatda. Bay-an nga agsisinnublat dagiti ubbing iti panangipakitada kadagiti ladawanda ken panangisaritada maipapan kadagiti kakabsatda. Allukoyen dagiti ubbing a mangibaga kadagiti banag a magustuanda nga aramiden a kaduada dagiti kakabsatda.
2. Mangala iti retrato ti tunggal ubing idi maladagada pay laeng ket papugtuán kadagiti ubbing no asino ti tunggal maladaga. (Siguraduen nga isubli dagiti retrato kadagiti nagannak a di madadael.) Ipalagip kadagiti ubbing nga adda manong ken manangda a timmulong dagiti kakabsatda a nangaywan kadakuada idi maladagada pay laeng.
3. Kantaen wenno sawen dagiti balikas iti “Fun to Do” (*Children’s Songbook*, p. 253), nga usaren dagiti binatang kas iti “Panangitulod iti maladaga ket

naragsak nga aramiden” wenna “Panangtulong iti manangko ket naragsak nga aramiden.” Mangpartuat kadagiti garaw kas isingsingasing dagiti balikas.

4. Kantaen wenna sawen dagiti balikas iti umuna a berso ti “When We’re Helping” (*Children’s Songbook*, p. 198), a sukatan iti *kabsat a babai* wenna *kabsat a lalaki* para iti *ina*, wenna kantaen ti maikadua a berso ti “A Happy Family” (*Children’s Songbook*, p. 198).
5. Mangitugotka iti retrato ti bukodmo a pamilia ket isaritam kadagiti ubbing maipapan kadagiti kakabsatmo. Mabalina a kayatmo a salaysayen ti maipapan iti sumagmamano a naragsak a padasyo nga agkakadua.
6. Usaren dagiti banag (props) kas iti munieka a maladaga, bassit a basket wenna kahon, ules, ken bandana, tulongan dagiti ubbing a mangidrama iti estoria maipapan ken ni Miriam ken ni maladaga a Moises iti runo.

Dagiti Mainayon nga Aktibidad para kadagiti Babbassit nga Ubbing

1. Mangikabil iti bassit ngem nalaka a mailasin a banag a kasapulan ti maladaga iti uneg ti supot wenna dakkal a medias. Pakaut kadagiti ubbing ti uneg a saanda a kitkitaen ket padasenda a pugtuan no ania ti banag babaen ti panangsigidda iti daytoy.
2. Kantaen wenna sawen dagiti balikas iti agpada a berso ti “A Happy Family” (*Children’s Songbook*, p. 198). Bayat ti panagkantayo, aggiinniggem ket agtignay nga agpatimbukel a kadua dagiti ubbing, wenna agaramid kadagiti simple a garaw a maibagay iti kanta.
3. Tulongan dagiti ubbing a mangaramid kadagiti garaw iti sumaganad nga ay-ayam iti ramay bayat ti panangisaom kadagiti balikas:

Daytoy ti ar-aramiden ti maladaga:
Sipsipat a sipsipat (*agsipat*)!

Daytoy ti ar-aramiden ti maladaga:
Ba-a! nakitaka (*ay-ayamen ti “ba-a” babaen dagiti ima*)!

Daytoy ti ar-aramiden ti maladaga:
Agkaradapen, agkaradapen (*“papagnaen” dagiti ramay iti angin*).

Daytoy ti ar-aramiden ti maladaga:
Maturogen, maturogen (*isadag ti pingping iti napagdekket a dua a palad ti ima*).
4. Tulongan dagiti ubbing a mangaramid kadagiti garaw iti sumaganad a berso ti aktibidad bayat ti panangisaom kadagiti balikas:

Ni Bassit a Maladaga a Moises

Ni Bassit a Maladaga a Moises adda bilog nga iddana (*isukog ti maysa nga ima ket ikabil ti tammudo ti sabali nga ima iti daytoy*).

Binantayan ti managayat a manangna iti karuotan a naglemmenganna (*sumirip babaen ti panangikabil kadagiti ramay iti asideg dagiti mata*).

Maysa nga aldaw nasarakan isuna ti maysa a prinsesa (*agrukob a kumitkita iti baba*) Ket innalana daytoy nga inubba (*agpammarang a mangbagbagkat iti ubing*).

Kinunana, “Alaek daytoy a maladaga ket aywanak isuna” (*agpammarang nga ilallay ti maladaga iti takiag*).

(Manipud iti *Fascinating Finger Fun* ni Eleanor Doan. © 1951. Naaramat nga addaan pammalubos.)

Panggep Tapno tulongan ti tunggal ubing a makarikna iti ayat para iti amin a miembro ti pamilia.

Panagsagana

1. Sikakararag nga adalen ti Lucas 1:36–44, 56.
2. Dagiti kasapulan:
 - a. Biblia.
 - b. Ladawan 1-7, Maysa a Naayat a Pamilia; ladawan 1-18, Ni Juan Bautista a Mangbumbuniag ken ni Jesus (Pakete ti Ladawan ti Arte ti Ebanghelio 208; 62133 864); ladawan 1-54, Templo ti Salt Lake (Pakete ti Ladawan ti Arte ti Ebanghelio 502; 62433 864), wenna maysa a ladawan ti lokal a templo.
3. Aramidem dagiti nasken a panagsagana para kadagiti ania man nga aktibidad a mangpadur-as iti pannakaammo a kayatmo nga usaren.

Dagiti Aktibidad iti Pannakasursuro

Mangawis iti maysa nga ubing a mangted iti pangrugi a kararag.

Aktibidad a Pangawis iti Panagdengngeg Kantaen ti “A Happy Family” (*Children’s Songbook*, p. 198), a kagiddan dagiti ubbing.

Patpatgek ni nanangko.
Patpatgek ni tatangko;
Dakami patpatgenda,
Naragsakkam a pamilia.

Patpatgek ni manangko
Patpatgek ni manongko;
Dakami patpatgenda,
Naragsakkam’ a pamilia.

(Manipud iti *Merrily We Sing*, © 1948, 1975 ti Pioneer Music Press, Inc. [maysa a dibision ti Jackman Music]. Naaramat nga addaan pammalubos.)

Bay-an a pagsasaritaan dagiti ubbing maipapan no ania ti inaramidda a kaduada dagiti pamiliada bayat ti napalabas a lawas. Painaganan iti tunggal ubing ti maysa a tao iti pamiliana, kas iti ama, ina, kabsat a lalaki, wenna kabsat a babai.

- Asino pay ti paset ti pamiliayo?

Napateg a Paset ti Pamiliatayo dagiti Lelong ken Lelang, likit, Uuliteg, ken Kakasinsin

Ipakita ti ladawan 1-7, Maysa a Naayat a Pamilia.

- Kasano a maipada daytoy a pamilia iti pamiliayo?
- Kasano a maigiddiat daytoy a pamilia iti pamiliayo?
- Asino kadagiti tao ti lelang ken lelong iti daytoy a ladawan?

Ilawlawag a dagiti lelong ken lelang ti nagannak dagiti inna ken ammatayo. Addaantayo amin iti lelong ken lelang nupay no dadduma ditayo am-ammo unay ida gapu ta pimmusaydan wenna agnanaedda iti adayo.

- Mano kadakayo ti makaam-ammo kadagiti lelong ken lelangyo?
- Agnanaed kadi dagiti lelong ken lelangyo iti asidegyo wenna iti adayo?
- Ania ti kayatyo nga aramiden a kaduayo ida?

Kanta

Kantaen wenna sawen dagiti balikas iti umuna a dua a berso ti “Grandmother” (*Children’s Songbook*, p. 200), nga usaren dagiti sumaganad a garaw. Uliten no tarigagayan, nga usaren ti *lelong* a kasukat ti *lelang* iti maudi a linia ti tunggal berso.

Bisbisongennak (*ikabil dagiti ramay iti bibig; kalpasanna yadayo dagitoy*).

Arakupennak (*yarakup dagiti takiag iti bagi*).

Isemannak no makitanak (*umisem*).

Sapay ta tunggal ubing adda (*unnaten dagiti takiag*)

Lelangna a kas kenka (*itudo*).

Ibasaannak (*agpammarang nga agig-iggem iti libro*).

Kankantaannak (*ungapen ti ngiwat a kasla agkankanta*).

Yarasaasmo, patpatgennak (*ikabil dagiti ima iti bibig*).

Sapay koma ta tunggal ubing adda (*unnaten dagiti takiag*)

Lelangna a kas kenka (*itudo*).

- Asino pay ti adda iti pamiliayo? (Dagiti iikit, uuliteg, ken kakasinsin.)

Ilawlawag iti ababa no kasano nga agkakabagian dagiti iikit, uuliteg, ken kakasinsin (kas pagarigan, ti ulitegmo ket kabsat ti nanang wenna tatangmo). Bay-an nga ibaga dagiti ubbing ti maipapan kadagiti iikit, uliteg, ken kasinsinda.

Estoria

Ipakita ti Biblia ket ipalagip kadagiti ubbing a mabasatayo ti maipapan iti biag ni Jesus iti daytoy a libro. Lukiben iti Lucas 1:36–44, 56 ket ilawlawag a sakbay a nayanak ni Jesus, napan sinarungkaran ni Maria ti kasinsinna a ni Elisabet, nga agdadagsen met. Napanaganan iti Juan ti maladaga ni Elisabet, ket isu ti kasinsin ken gayyem ni Jesus. Idi dimmakel da Juan ken Jesus, binuniagan ni Juan ni Jesus. Ipakita ti ladawan 1-18, Ni Juan Bautista a Mangbumbuniag ken ni Jesus, ket paitudo kadagiti ubbing da Jesus ken Juan.

Nasayaat a Gagayyemtayo dagiti Miembro ti Pamiliatayo

Ilawlawag a makapagbalin a nasayaat a gagayyemtayo dagiti amin a miembro ti pamiliatayo. No adda maysa a kabagiam nga asideg kenka, ibagam kadagiti ubbing no kasano ti riknam maipapan iti daytoy a tao.

- Apay a kayatyo a makadua ti pamiliayo?

Kanta

Kantaen manen ti “A Happy Family” a kagiddan dagiti ubbing. Iti daytoy a gundaway iraman dagiti berso para iti iikit, uliteg, kasinsin ken lelang ken lelong.

- Ania ti ar-aramidenyo a kaduayo dagiti iikit, uuliteg, kakasinsin, ken lelang wenna lelongyo?

Isarita kadagiti ubbing maipapan iti maysa a panagtitiyon ti familia wenna iti sabali pay a panawen idi naguummong ti pamiliayo para iti naisangsangayan nga okasyon. Bay-an nga isarita dagiti ubbing ti maipapan kadagiti pasken ti familia wenna isasarungkar a malagipda.

Ilawlawag a nagplano ti Nailangitan nga Ama ken ni Jesucristo tapno makadenna-tayo dagiti pamiliatayo iti agnanayon. Ipakita ti ladawan 1-54, Templo ti Salt Lake, wenno maysa a ladawan ti lokal a templo. Ilawlawag iti ababa a no agkallaysatayo iti templo ket agbiag a nalinteg, makadennatayo dagiti pamiliatayo iti agnanayon.

Pammaneknek

Ibagam kadagiti ubbing maipapan iti ayatmo para kadagiti miembro ti pamiliam. Yunay-unay a maysa a parabur kadatayo dagiti pamiliatayo. Allukoyen dagiti ubbing nga agbalin a managayat ken nasingpet kadagiti miembro ti pamiliada.

Dagiti Aktibidad a Mangpadur-as iti Pannakaammo

Pumili iti sumagmamano kadagitoy nga aktibidad tapno usaren bayat ti adalen.

1. Babaen ti pammalubos ti presidenteyo iti Primary, dawaten iti lelong wenno lelang ti maysa kadagiti ubbing, wenno maysa a tao iti ward a lelong wenno lelang, tapno bisitaenna ti klase. Paisarita iti sangaili kadagiti ubbing maipapan iti ayatna para kadagiti appokona. (Wenno mabalinmo nga awisen ti maysa nga ikit, uliteg, wenno kasinsin ti maysa kadagiti ubbing tapno isaritana maipapan iti panagayatna para iti amin a miembro ti familia.)
2. Mangitugotka iti maysa wenno dua a retrato ti pamiliam, nangnangruna dagiti retrato a pakairamanan dagiti lelong ken lelang, iikit, uuliteg, wenno kakasinsin. Ibagam kadagiti ubbing a sapulendaka ken ti asino man a mabalin nga ammoda (kas iti asawam wenno annakmo) kadagiti retrato. Ibagam kadagiti ubbing ti maipapan iti dadduma pay a tao kadagiti retrato.
3. Ikkan ti tunggal ubing iti etiketa (tag) nga adda nagan ti miembro ti familia ditoy, kas iti “Ina,” “Ama,” “Kabsat a lalaki,” “Kabsat a babai,” “Lelang,” “Lelong,” “Uliteg,” “Ikit,” wenno “Kasinsin.” (No bassit laeng dagiti ubbingmo iti klasem, usaren laeng ti sumagmamano kadagitoy a nagan; no adu dagiti ubbingmo iti klasem, mabalin nga agpada ti nagan ti ad-adu ngem maysa nga ubing.) Paumayem iti sango ti klase ti tunggal ubing bayat ti panangisaom iti nagan iti etiketana. Ilawlawag a napateg dagiti familia ken naituding nga agkakadua. Pagtimbukelen dagiti ubbing ket aggiiniggem iti ima. Dawaten kadakuada nga aramidenda ti sumagmamano a garaw bayat ti panaggiiniggemda, kas iti panangindayon iti takiagda, pannagna iti nagtimbukel, ken panagkanta iti “A Happy Family.”
4. Pagdrowingen ti tunggal ubing iti ladawan dagiti lelong ken lelangda wenno dagiti dadduma pay a kabagianda. Naganan ti ladawan iti *Dagiti Lelang ken Lelongko* wenno ania man a maitutop.

Dagiti Mainayon nga Aktibidad para kadagiti Babbassit nga Ubbing

1. Agaramid iti kahon wenno supot nga addaan iti sinanpuso iti rabawna tapno mangibagi iti ayat. Aggetteng kadagiti simple a ladawan wenno drowing a mangibagi kadagiti asideg a miembro ti familia ken dagiti kabagian. Damagen kadagiti ubbing, “Asino ti mangipatpateg kadakayo?” Bayat ti panangsungbat dagiti ubbing, ikabil dagiti maitutop a ladawan iti kahon wenno supot a saggaysa. No adda aminen dagiti ladawan iti kahon wenno supot, ingato daytoy ket ibaga kadagiti ubbing, “Ay-ayatendakayo unay amin dagitoy a tattao.”

2. Ikabil dagiti naggetteng a ladawan dagiti kameng ti pamilia (kitaen iti aktibidad 1, iti panid 111) iti lamisaan wenno suelo. Pagpuligosen dagiti ubbing wenno pagkidemen ida bayat ti panangikkatmo iti maysa a naggetteng a ladawan. Papugtuan kadagiti ubbing no asino ti awan. Uliten iti mamin-adu no tarigagayan. Isubli amin dagiti naggetteng a ladawan ket ibaga kadagiti ubbing a kayat ti Nailangitan nga Ama a makidennanto manen dagiti pamilia kenkuana, nga awan ti mapukaw.
3. Kantaen ti “When We’re Helping” (*Children’s Songbook*, p. 198), nga usaren ti nagnagan dagiti kabagian a pagsukat iti *ina*. Bay-an a yakem (pantomime) dagiti ubbing dagiti banag a mabalinda nga aramiden tapno makatulong kadagitoy a miembro ti pamilia.

Makapagdedenna dagiti Pamilia iti Agnanayon

Adalen
26

Panggep

Tapno tulongan ti tunggal ubing a makaawat a sagrado a lugar dagiti templo a pakailantipan a sangkamaysa dagiti pamilia iti agnanayon, ken tapno allukoyen ti tunggal ubing tapno agsagana a sumrek iti templo.

Panagsagana

1. Sikakararag nga adalen ti Doktrina ken Katulagan 97:15–17 ken 124:37–41. Kitaen met iti *Pagbatayan ti Ebanghelio* (31110 864), maika-36 a paset, ken “Templo” iti Pangiwawan iti Nasantuan a Kasuratan.
2. Dagiti kasapulan:
 - a. Maysa a kopia ti Doktrina ken Katulagan.
 - b. Ladawan 1-5, Pamilia nga Addaan iti Maladaga (62307 864); ladawan 1-7, Maysa a Naayat a Pamilia; ladawan 1-54, Templo ti Salt Lake (Pakete ti Ladawan ti Arte ti Ebanghelio 502; 62433 864); dagiti ladawan ti dadduma pay a templo no adda magun-od (Pakete ti Ladawan ti Arte ti Ebanghelio 505; 62334 864–62448 864, 62566 864–62569 864, 62583 864–62601 864, 62613 864–62619 864); ti panid dagiti drowing iti ungti ti adalen.
3. Aramidem dagiti nasken a panagsagana para kadagiti ania man nga aktibidad a mangpadur-as iti pannakaammo a kayatmo nga usaren.

Dagiti Aktibidad iti Pannakasursuro

Mangawis iti maysa nga ubing a mangted iti pangrugi a kararag.

Aktibidad a Pangawis iti Panagdengngeg Ipakita ti ladawan 1-54, Templo ti Salt Lake, ken dagiti ladawan ti sumagmamano a dadduma pay a templo, agraman ti templo iti distrito ti templo, no adda a magun-od. Palubosan dagiti ubbing a mangisarita no ania ti ammoda maipapan kadagiti templo.

- Nakakitakayo kadin iti maysa a templo?
- Ania ti mapanunoty no makakitakayo iti maysa a templo?

Ilawlawag ti kinangayed dagiti templo, nga itudo dagiti dawis, tawa, ken ridaw. Ilawlawag nga iti akinruar a diding ti templo, adda dagiti balikas a *Ti Balay ti Apo*. Mapan dagiti miembro ti Simbaan iti templo tapno agsursuro maipapan iti Nailangitan nga Ama ken ni Jesus ken ti ayatda para kadayo.

Aktibidad

Paikabil kadagiti ubbing dagiti imada iti ngatuen ti uloda tapno mangaramid iti dawis ti templo. Dawaten kadakuada nga agtakderda a nalinteg ken natayag ket agpammarang nga isuda ti napintas a templo. Kalpasanna dawaten kadakuada nga agtugawda a siuulimek.

Maysa a sagrado a lugar ti templo

Ilawlawag a maysa a sagrado a lugar ti templo (kitaen iti DkK 97:15–17). Dawaten kadagiti ubbing nga ulitenda ti balikas a *sagrado*. Kaipapanan daytoy a ti templo

ket naisangsangayan unay a lugar a pangipalagipan kadatayo ti amin a banag maipapan iti Nailangitan nga Ama ken ni Jesus.

Ibaga kadagiti ubbing a no tungpalenda dagiti bilin ti Nailangitan nga Ama, maka-panda iti templo inton dumadakkelda. Ilawlawag nga iti templo aramidentayo dagiti naisangsangayan a kari iti Nailangitan nga Ama nga agtungpal kadagiti bilinna. Makapagkallaysatayo pay iti templo, ken makapagbuniagtayo para kadagiti tao a saan pay a nabuniagan bayat ti panagbiagda iti daga.

Paingato kadagiti ubbing ti tallo a ramayda ket paulit ti tallo a banag a mabalinda nga aramiden iti templo inton dumadakkelda:

“Iti templo makaaramidak kadagiti naisangsangayan a kari iti Nailangitan nga Ama.”

“Iti templo makapagkallaysaak.”

“Iti templo makapagbuniagak para kadagiti dadduma.”

Kanta

Patakderen dagiti ubbing ket pakanta wenno paisao dagiti balikas iti umuna a paset ti “I Love to See the Temple” (*Children’s Songbook*, p. 95), nga usaren dagiti sumaganad a garaw:

“Gustuak makita’t templo (*pagsinnillapiden dagiti ramay ket ingato ti tammudo ti agpada nga ima tapno mangaramid iti dawis*).

Idiay ket mapanakto (*magna iti pagtaktakderan*)

Riknaek Espiritu (*ikabil ti ima iti barukong*),

Dumngeg ken aglualo (*ikabil ti ima iti likud ti lapayag, sa agdalikepkep*).

(© 1980 ni Janice Kapp Perry. (Naaramat nga addaan pammalubos.)

Ilawlawag a gapu ta sagrado a lugar ti templo, agaruattayo iti puraw a kawes no addatayo iti uneg. Ti kawes ti mangipalagip kadatayo a kayat ti Nailangitan nga Ama ken ni Jesus nga agbalintayo a nadalus ken natarnaw ken kanayon nga agpili iti naimbag.

- Ania a maris ti kawes ti us-usarenyo ita?
- Ania a maris ti kawes ti usarenyo iti uneg ti templo?

Ilawlawag a gapu ta sagrado a lugar ti templo, naraemtayo no addatayo iti uneg. Agarasaas wenno agsaotayo iti nakapsut. Payarasaas kadagiti ubbing ti “Ay-ayatek ti Nailangitan nga Ama ken ni Jesus.” Ilawlawag a makariknatayo iti ragsak ken talna iti templo gapu ta mariknatayo nga asidegtayo iti Nailangitan nga Ama ken ni Jesus.

Estoria

Isalaysaymo ti sumaganad nga estoria maipapan ken ni Presidente Lorenzo Snow iti bukodmo a balikas:

Ammo ni Lorenzo Snow nga iti saan a mabayag, isunto ti agbalin a propeta ti Simbaan. Napan iti templo, nagaruat iti puraw a kawesna, ket nagparintumeng iti maysa a naisangsangayan a siled tapno agkararag. Kayatna nga ibaga kenkuana ti Nailangitan nga Ama no ania ti nasken nga aramidenna tapno maidaaluanna ti Simbaan. Nagkararag a nagkararag ngem saan a nakaawat iti sungbat. Idi rum-muar ni Presidente Snow iti siled a pagkarkaraganna, nagparang ni Jesus kenkuana. Nagaruat ni Jesus iti napintas a puraw a roba ket nakalawlawag ken agrimrimat ti itsurana ta narigat a kumita ni Presidente Snow kenkuana. Makita ni Jesus a kasla agtaktakder iti solido a balitok. Imbaga ni Jesus ken ni Presidente

Snow dagiti banag nga inkararaganna nga ammuen (kitaen iti LeRoi C. Snow, "An Experience of my Father's," *Improvement Era*, Sept. 1933, p. 677).

- Apay iti panagkunayo a nagkararag ni Presidente Snow iti templo imbes nga iti sabali a lugar? (Gapu ta mariknana nga as-asideg iti Nailangitan nga Ama ken ni Jesus iti uneg ti templo.)

Tumultulong dagiti Templo kadagiti Pamilia nga Agdedenna iti Agnanayon

Iparang ti ladawan 1-5, Pamilia nga Addaan iti Maladaga, ken ladawan 1-7, Maysa a Naayat a Pamilia. Ilawlawag a makatulong dagiti templo a makapagdedenna dagiti pamilia iti agnanayon. No agkallaysa ti maysa a lalaki ken maysa a babai iti templo ken agtungpal kadagiti bilin, ikari ti Nailangitan nga Ama kadakuada a makapagdedennada ken makadennada amin nga annakda iti agnanayon. Aw-awagantayo daytoy iti pannakailantip kas maysa a sangapamilia.

- Asino dagiti tao iti pamiliayo?
- Ania ti riknayo no kaduayo ti pamiliayo?
- Kasano a makapagdedenna iti agnanayon ti maysa a pamilia?

Ipanamnama kadagiti ubbing nga ay-ayaten ti Nailangitan nga Ama ken ni Jesus ti tunggal pamilia ket kayatda a mailantip ti tunggal pamilia a sangkamaysa iti agnanayon. Ilawlawag a dagiti pamilia a saan pay a nailantip iti templo ket maisagadada ti bagbagida babaen ti panagtungpal kadagiti bilin ti Nailangitan nga Ama. Kalpasanna, makapanda iti templo tapno mailantip kas maysa a pamilia.

Kanta

Kagiddan dagiti ubbing, kantaen wenno sawen dagiti balikas iti koro ti "Families Can Be Together Forever" (*Children's Songbook*, p. 188) iti sumagmamano a gundaway.

Ti pamilia makapagdedenna
Iti plano ti Ama.
Kayatko a kadenna ti pamiliak,
Ket impakita't Apo kaniak.
Dalan insurona kaniak.

Makapagsaganaak a Mapan iti Templo

Ipalagip kadagiti ubbing a tunggal maysa nga agtungtungpal kadagiti bilin ti Nailangitan nga Ama ket makapan iti templo. Ipakita ti panid dagiti drowing a nairaman iti ungti ti adalen ket bay-an nga ilawlawag dagiti ubbing dagiti bilin a nailadawan. Ilawlawag a ti panagtungpal kadagitoy a bilin ket mangtunglong kadagiti ubbing nga agbalin a maikari a mapan iti templo inton dumakdakkelda.

- Agkararag.
- Agtungpal kadagiti nagannak.
- Aggiinnayat iti tunggal maysa.
- Mapan iti simbaan.
- Agbayad iti apagkapullo.
- Mangan kadagiti nasayaat a taraon (agtungpal iti Word of Wisdom).
- Agbalin a napudno.

Ipeksam ti riknam maipapan iti pateg iti panagdedenna dagiti pamilia iti agnanayon ken maipapan kadagiti bendision ti templo. Ipalagip kadagiti ubbing a ti panagtungpal kadagiti bilin ti Nailangitan nga Ama ket napateg a wagas a panagsagana tapno makapan iti templo.

Dagiti Aktibidad a Mangpadur-as iti Pannakaammo

Pumili iti sumaganad kadagitoy nga aktibidad tapno usaren bayat ti adalen.

1. Tulongam dagiti ubbing a makaawat a napaut a panawen ti agnanayon. Mabalina nga ibagam kadakuada a napapaut pay daytoy ngem iti panawen a panagur-urayda iti panagkasangayda wenno iti sumaruno a piesta opisial; napapaut daytoy ngem iti panawen a nagbibig ti kalakayan wenno kabaketan a tao nga am-ammoda; napapaut daytoy ngem iti panawen a panagbiag da Adan ken Eva. Ilawlawag a ti *agnanayon* ket maysa a banag nga awan patinggana.

Tulongan dagiti ubbing a mangaramid kadagiti garaw iti sumaganad a berso bayat ti panangisaom kadagiti balikas:

Kasano ti Kapaut ti Agnanayon?

Kasano ti kapaut ti agnanayon (*itudo ti ulo, a kasla agpampanunot*)?

Napapaut pay daytoy ngem iti makatawen (*ikabil ti gemgem iti baba ti timid, iparabaw ti siko iti sabali nga ima*)

Napapaut pay daytoy ngem iti panawen (*ikabil ti sabali pay a gemgem iti baba ti timid, iparabaw ti siko iti ima*)

Ti idadateng ti Paskua nga ur-urayen.

Kasano ti kapaut ti agnanayon (*itudo ti ulo, a kasla agpampanunot*)?

Saan unay a napaut tapno palabasen (*igaraw nga agsublisubli ti ramay*)

A kadua dagiti pamilia nga ay-ayaten (*arakupen ti bagi*),

Gapu ta iti kaano man, dinto pulos aggibusen!

2. Babaen iti pamalubos ti presidenteyo iti Primary, awisem dagiti nagannak ti maysa nga ubing iti klasem a mangipeksa iti riknada maipapan iti kinapateg ti pannakailantip iti templo.
3. Agaramid iti kopia ti panid dagiti drowing iti ungtu ti adalen para iti tunggal ubing. Pakoloran kadagiti ubbing dagiti drowing.
4. Babaen iti pamalubos ti presidenteyo iti Primary, mangawis iti maysa a pamilia iti wardyo a napan itay nabiit iti templo tapno mailantip tapno isaritana iti klase maipapan iti dayta a padas.

Dagiti Mainayon nga Aktibidad para kadagiti Babbassit nga Ubbing

1. Tulongam dagiti ubbing a mangaramid kadagiti garaw iti sumaganad a berso bayat ti panangisaom kadagiti balikas:

Maysaak a Katulongan

Itan ta dakkkel ken natayagak (*agtakder a nakatil-ay ket unnaten dagiti takiag nga agpangato*),

Nasingpet a katulongan pagbalinak.

Maysa a katulongan ti amak (*ingato ti umuna a ramay*),

A naasi ken nasayaat;

Aramidek para iti inak (*ingato ti maikadua a ramay*)

Dagiti nasken a banag.

Maysaak a katulongan ni manangko (*ingato ti maikatlo a ramay*),

Maysaak a katulongan pay ni manongko (*ingato ti maikapal a ramay*);

Maysaak a katulongan ti amin a napudno a gagayyemko (*ingato ti tangan*).

Ken agbalin a katulongan ti Dios ikarkarigatak

Babaen ti panangipategko iti dadduma kas panangipategna kaniak (*agdalikepkep*).

Kayatko ti agbalin a katulongan iti tunggal maysa (*unnaten nga ukraden dagiti takiag*),

Itan ta dakkkelak ken natayagak (*agtakder a nakatil-ay ket unnaten dagiti takiag nga agpangato*).

2. Tulongam dagiti ubbing nga aramiden dagiti garaw iti sumaganad a berso ti aktibidad bayat ti panangisaom kadagiti balikas. Ulitem iti mamin-adu a daras no tarigagayam.

Agaramid iti nagtimbukel a nakatakder ti amin, nga aggiinniggem iti ima.

Aggiinniggem agingga a malpas ti aktibidad.

Nagakaduatayo a nagbiag a kadenna ti Nailangitan nga Ama (*agdedekket a sangkamaysa ti amin, nga ipan dagiti ima iti tengnga ti nagtimbukel*).

Imbaonnatayo nga agbiag ditoy daga (*agwaras tapno agbalin a dakkkel a nagtimbukel*).

Inikkannatayo kadagiti familia a mangipateg ken mangisuro kadatayo (*agdedekket a sangkamaysa manen*).

Tulongannatayo dagiti pamiliatayo nga agbiag manen a kadennatayo (*agwaras manen tapno agbalin a dakkkel a nagtimbukel*).

3. Mangted iti simple a balabala ti templo iti papel tapno koloran dagiti ubbing.

Makapagsaganaak a Mapan iti Templo




Agkararag




Agtungpal kadagiti
Nagannak



Aggiinnayat



Mapan iti Simbaan



Agbayad iti Apagkapullo



Mangan kadagiti
Nasayaat a Taraon



Agbalin a Napudno

Makapagkararagtayo kas Maysa a Pamilia

Adalen
27

Panggep Tapno tulongan ti tunggal ubing a makaawat a ti kanayon a panagkararag ti pamilia ket makatulong a mangpatalinaed nga asideg ti pamilia iti Nailangitan nga Ama ken iti tunggal maysa.

Panagsagana

1. Sikakararag nga adalen ti Alma 34:19–27 ken 3 Nephi 18:17–21. Kitaen met iti *Pagbatayan ti Ebanghelio* (31110 864), maika-8 a paset.
2. Dagiti kasapulan:
 - a. Libro ni Mormon.
 - b. Nagetteng a ladawan 1-26, ama; nagetteng a ladawan 1-27, ina; nagetteng a ladawan 1-28, ubing a babai; nagetteng a ladawan 1-29, ubing a lalaki nga agtawen iti edad ti misionario (mabalin pay a masarakan dagiti kastoy met la a nagetteng a ladawan iti Primary Visual Aid Cutouts set 1.
 - c. Ladawan 1-10, Kararag ti Kaamaan (62275 864); ladawan 1-15, Panangbendision iti Taraon; ladawan 1-44, Ni Jesus a Mangisursuro iti Deppaarna iti Laud (Pakete ti Ladawan ti Arte ti Ebanghelio 316; 62380 864).
3. Aramidem dagiti nasken a panagsagana para kadagiti ania man nga aktibidad a mangpadur-as iti pannakaammo a kayatmo nga usaren.

Dagiti Aktibidad iti Pannakasursuro

Mangawis iti maysa nga ubing a mangted iti pangrugi a kararag.

Aktibidad a Pangawis iti Panagdengngeg Dawaten kadagiti ubbing a mangibagada iti maipapan iti maysa a banag nga ar-aramidenda a kaduada dagiti pamiliada. Ikkan ti tunggal ubing iti gundaway a sumungbat. Kalpasanna ipakita ti ladawan 1-10, Kararag ti Kaamaan.

- Ania ti ar-aramiden daytoy a pamilia?

llawlawag a no agkararagtayo kas maysa a pamilia, ar-aramidentayo ti maysa a banag a kayat ti Nailangitan nga Ama ken ni Jesus nga aramidentayo. Ti panagkararag kas maysa a pamilia ket maawagan iti kararag ti pamilia.

Kayat ti Nailangitan nga Ama ken ni Jesucristo nga Agkararagtayo a Kaduatayo dagiti Pamiliatayo

Estoria

Ipakita ti ladawan 1-44, Ni Jesus a Mangisursuro iti Deppaarna iti Laud. Isalaysay ti maipapan iti isasarungkar ni Jesucristo kadagiti Nephite ken panangbilinna kada-kuada nga agkararag, a nailadawan iti 3 Nephi 18:17–21. Ipakita kadagiti ubbing ti Libro ni Mormon ket basaen iti napigsa ti 3 Nephi 18:21. Tulongan dagiti ubbing a makaawat a kayat ni Jesus nga agkararagtayo a kaduatayo dagiti pamiliatayo. Kas iti pannakaparabur dagiti ubbing a Nephite babaen ti panagkararag a sangapamilia, kasta met a maparaburantayo babaen ti kararag ti pamilia.

Mabalinyo ti Maaddaan iti Kararag ti Pamilia iti Inaldaw

Ilawlawag a kayat ti Nailangitan nga Ama ken ni Jesus nga agkararagtayo a kaduatayo dagiti pamiliatayo iti tunggal bigat ken rabii. Gagangay a ti ama wenno ti tao a mangiturturong iti pamilia ti agkiddaw iti maysa a tao a mangisao iti kararag. Asino man iti pamilia ket mabalinna ti mangisao iti kararag ti pamilia.

- Kaano ti nasken a panagkararagtayo a kadua dagiti pamiliatayo?
- Asino ti mabalin a mangisao iti kararag ti pamilia?

Kanta

Kantaen wenno sawen dagiti balikas iti “Family Prayer” (*Children’s Songbook*, p. 189).

Agummongtay’ nga aglikmut

Ti kararag ti pamilia

Agyamantay’ iti Ama

‘Ti parabur nga intedna.

- Ania ti sawentayo kadagiti kararag ti pamilia?

Ilawlawag nga isaotayo dagiti isu met la a kita ti bambanag kadagiti kararag ti pamilia a kas iti panangisaotayo kadagiti bukodtayo a kararag iti bigat ken iti rabii. Ngem iti kararag ti pamilia maibagatayo maipapan kadagiti banag a maipanggep iti sibubukel a pamilia, saan laeng nga iti bagbagitayo.

Kanta

Sublien nga adalen dagiti banag a sawentayo no agkararagtayo babaen ti panangisao kadagiti balikas iti maikadua a berso ti “I Pray in Faith” (*Children’s Songbook*, p. 14).

Irugik babaen ti panangisaok iti “Patgek a Nailangitan nga Ama”;

Agyamanak kenkuana kadagiti parabur nga it-itedna;

Sa sipapakumbaba a dawatek kenkuana dagiti banag a kasapulak,

Iti nagan ni Jesucristo, Amen.

(© 1987 ni Janice Kapp Perry. (Naaramat nga addaan pammalubos.)

- Ania ti sawentayo iti rugi ti kararag?
- Ania ti sawentayo iti gibus ti kararag?
- Ania ti nasken nga aramiden ti tunggal maysa bayat ti pannakaisao ti kararag?

Ilawlawag a ti panangisao iti “amen” iti gibus ti kararag ket kayatna a sawen nga umanamongtayo iti no ania ti naisawang iti kararag.

Ipakita ti ladawan 1-15, Panangbendision iti Taraon. Ilawlawag nga agkararagtayo pay kas maysa a pamilia no dumawattayo iti pammendision iti taraontayo.

- Ania ti sawentayo no agdawattayo iti pammendision iti taraon? (Agyamantayo iti Nailangitan nga Ama para iti taraon ket dawaten kenkuana a bendisionanna daytoy.)
- Asino ti mabalin a mangisao iti kararag tapno dawaten ita iti Nailangitan nga Ama a bendisionanna ti taraon?

Kanta

Isao manen dagiti balikas iti maikadua a berso ti “I Pray in Faith.”

Umaw-awattayo iti Adu a Parabur Babaen ti Panagkararag a Sangkamaysa kas Maysa a Pamilia

Estoria

Usaren dagiti nagegetteng a ladawan 1-26 agingga iti 1-29, isalaysay ti maysa nga estoria maipapan iti maysa a pamilia nga agkarkararag a sangkamaysa para iti maysa a miembro ti pamilia nga agserserbi iti mision. Mabalina a kayatmo nga usaren dagiti sumaganad a kapanunotan:

Maysa nga ubing ni Catherine. Patpatgenna ti pamiliana ket ammona a patpatgenda isuna. No dadduma isalaysay kenkuana ni manongna a Paul dagiti estoria manipud iti Biblia ken iti Libro ni Mormon. Ad-adalen ni Paul dagitoy a libro gapu ta kayatna ti mapan iti mision ken ibaga iti dadduma a tao ti maipapan kadagitoy.

Maysa nga aldaw nakaawat ni Paul iti maysa a surat. Idi naluktanna ti surat, naragsakan. “Innak agmision!” kinunana. Kalpasan ti sumagmamano a lawas nakasaganan ni Paul a mapan iti kamaudiananna. Sakbay a pimmanaw, nagparintumeng ti pamilia para iti kararag ti pamilia. Nagyaman ti ama ni Catherine iti Nailangitan nga Ama para iti adu a parabur a naited iti familiada ken para iti gundaway ni Paul a mapan iti mision. Indawatna iti Nailangitan nga Ama a bendisionanna ni Paul, saluadanna, ken tulonganna nga agbalin a nasingpet a misionario. Ti kararag ti nangiparikna ken ni Catherine iti ragsak iti kaungganna. Ammona a tulonganto ti Nailangitan nga Ama ni Paul iti misionna. Inkarragan ni Catherine ken ti pamiliana ni Paul iti inaldaw bayat ti kaaddana iti misionna.

Ilawlawag a makapagkararag a sangkamaysa dagiti pamilia para iti maysa a tao a masakit, para iti tulong iti maysa a problema ti pamilia, para iti misionario nga agkasapulan iti tulong ti Nailangitan nga Ama, ken para iti adu a dadduma pay a gapu. Ilawlawag a makapagkararagtayo maipapan iti ania man a banag a napateg kadatayo. Usaren ti Alma 34:19–27 tapno tulongan dagiti ubbing a makaawat no kaano nga agkararagtayo.

Basaen manen ti 3 Nephi 18:21 iti napigsa. Ipalagip kadagiti ubbing nga inkari ni Jesus a mabendisionantayo no adda kararagtayo a sangapamilia.

Pammaneknek

Ipeksam ti pammaneknekmo iti kararag ti pamilia. Mabalina a tarigagayam a salaysayen ti maipapan iti maysa a panawen idi pinapigsa ti kararag ti pamilia ti bukodmo a pamilia.

Dagiti Aktibidad a Mangpadur-as iti Pannakaammo

Pumili iti sumagmamano kadagitoy nga aktibidad tapno usaren bayat ti adalen.

1. Aramiden ti sumagmamano a berso ti aktibidad a kagiddan dagiti ubbing:

Daytoy ni nanangko, a tumultulong kaniak iti panagay-ayam (*ingato ti umuna a ramay*);

Daytoy ni tatangko, nga agtartrabaho iti agmalmalem (*ingato ti maikadua a ramay*).

Daytoy ni manongko, nakapigpigsak ken nakataytayag (*ingato ti maikatlo a ramay*);

Daytoy ni manangko, nga agusto nga agay-ayam iti bola (*ingato ti maikapad a ramay*).

Ket siak daytoy; maragsakanak nga agkuna (*ingato ti tangan*)

Sangkamaysa nga agparintumeng ti pamiliak tapno agkararag (*ikeppet ti gemgem*).

2. Saggaysa nga ipasippaw wenno yawat ti maysa a nalukneng a banag kas iti *beanbag* wenno bola kadagiti ubbing. Kalpasan a masippaw dagiti ubbing ti banag, dawaten kadakuada a manginagan iti maysa a banag a mabalin a pagyamananda iti Nailangitan nga Ama no mangisaoda iti maysa a kararag ti pamilia. Kalpasan a naaddaan iti gundaway ti tunggal ubing, uliten ti aktibidad, painaganan kadagiti ubbing dagiti banag a mabalinda a dawaten iti Nailangitan nga Ama no isaoda ti kararag ti pamilia.
3. Ikkan ti tunggal ubing iti maysa a panid ti papel ken krayola wenno lapis. Bay-an nga agdrowing dagiti ubbing iti ladawan ti familiada nga agkarkararag. Suratan ti tunggal ladawan iti *Naragsakak no agkararag a sangkamaysa ti familiak*.

**Dagiti Mainayon
nga Aktibidad
para kadagiti
Babbassit
nga Ubbing**

1. Tulongan dagiti ubbing a mangulit iti daytoy a berso, ti tunggal binatog:
Ay-ayatentayo ti Nailangitan nga Ama;
Agyamantayo kenkuana no agkararagtayo.
Ay-ayatennatayo ti Nailangitan nga Ama;
Dengdenggenna dagiti banag nga isaotayo.
2. Isalaysay ti estoria ti maysa a pamilia a sangkamaysa nga agkarkararag ken umaw-awat iti kasapulan a tulong. Kas pagarigan, mabalin a mapukaw ti pamilia ket kalpasanna masarakanda ti dalanda; mabalin a mapukawda ti maysa a banag ket kalpasanna masarakanda daytoy; wenno maysa a tao iti pamilia ti mabalin a masaksakit ket kalpasanna maimbagan. Isingasing a kas mainayon iti panagkararag para iti tulong, nasken a laglagipen ti pamilia ti mangidaton iti maysa a kararag ti panagyaman kalpasan ti panangawat iti tulong a kasapulanda. Ipalagip kadagiti ubbing a maragsakan ti Nailangitan nga Ama no agyamantayo kenkuana kadagiti parabur nga it-itedna kadaytoy.
3. Kantaen wenno sawen dagiti balikas iti umuna ken maikatlo a berso ti "A Song of Thanks" (*Children's Songbook*, p. 20).

Makapagbalinak a Managtungpal

Adalen
28

Panggep

Tapno mapapigsa ti tarigagay ti tunggal ubing nga agtungpal iti Nailangitan nga Ama ken ni Jesucristo ken agtungpal kadagiti nagannak kenkuana.

Panagsagana

1. Sikakararag nga adalen ti Daniel 3; Juan 14:15; ken Taga-Efeso 6:1. Kitaen met iti *Pagbatayan ti Ebanghelio* (31110 864), maika-35 a paset.
2. Dagiti kasapulan:
 - a. Maysa a set dagiti nasantuan a kasuratan.
 - b. Ladawan 1-5, Pamilia nga Addaan iti Maladaga (62307 864), ladawan 1-8, Panangiwaras iti Sakramento (62021 864); ladawan 1-9, Kararag iti Agsapa (62310 864); ladawan 1-46, Dagiti Ubbing a Mangmangted iti Sabsabong iti Ina; ladawan 1-55, Sermon iti Bantay (Pakete ti Ladawan ti Arte ti Ebanghelio 212; 62166 864); ladawan 1-56, Tallo a Lallaki iti Umap-apuy nga Urno (Pakete ti Ladawan ti Arte ti Ebanghelio 116; 62093 864).
3. Aramidem dagiti nasken a panagsagana para kadagiti ania man nga aktibidad a mangpadur-as iti pannakaammo a kayatmo nga usaren.

Dagiti Aktibidad iti Pannakasursuro

Mangawis iti maysa nga ubing a mangted iti pangrugji a kararag.

Aktibidad a Pangawis
iti Panagdengngeg

Sidadayaw nga idawat kadagiti ubbing nga aramidenda dagiti sumagmamano a garaw, kas iti tumakder, agpuligos, gumaw-at iti ngato, sagiden dagiti ramay ti sakada, ken agtugaw. Agyamanka kadakuada iti panangaramidda iti dawatmo. llawlawag a nagbalinda a managtungpal. Tinungpalda dagiti pangiturong.

Kayat ti Nailangitan nga Ama ken ni Jesus nga Agtungpaltayo kadagiti Nagannak Kadatayo

Ipakita ti ladawan 1-5, Pamilia nga Addaan iti Maladaga.

- Ania ti ipakpakita daytoy a ladawan?

Itudo ti maladaga iti ladawan ket saritaen ti maipapan no kasano nga immay ti tunggal maysa kadatayo iti daga kas maysa a maladaga. Ipalagip kadagiti ubbing a gapu ta babassit unay ken awan ti maaramid dagiti maladaga, kasapulanda ti maysa a tao a natataengan ken dakdakkal a mangaywan kadakuada.

- Asino ti nangaywan kadakayo idi maladagakayo pay laeng?
- Asino ti agay-aywan kadakayo itan?

llawlawag kadagiti ubbing nga ay-ayaten ida dagiti tao nga agay-aywan kada-kuada, kas kadagiti nagannak kadakuada ken dadduma pay a miembro ti pamilia, ken kayatda a natalged ken naragsakda.

- Ania ti isursuro kadakayo dagiti nagannak kadakayo a diyo ar-aramiden?

Pagsasaritaan maipapan kadagiti banag a mabalin nga aramiden dagiti ubbing a makapasakit kadakuada wenno makapaliday kadakuada, kas iti panagay-ayam iti kalsada, panangsagid iti napudot a dalikan, panangpidut iti natadem a kutsilio, panagtaray iti nasang-at a turod, wenno pannakiapa kadagiti kakabsatda a lallaki ken babbai.

- Apay a di kayat dagiti nagannak kadakayo nga aramidenyo dagitoy a banag?

Pagsasaritaan maipapan dagiti banag a mabalin nga aramiden dagiti ubbing a sitatalged ken siraragsak kas iti panagay-ayam kadagiti ay-ayamda, panagpasiar a kadua dagiti nagannak kadakuada, ken panagbalin a nasingpet kadagiti kakabsatda a lallaki ken babbai.

- Apay a palubosandakayo dagiti nagannak kadakayo a mangaramid kadagitoy a banag?
- Apay a nasken a tungpalenyo dagiti nagannak kadakayo?

Ilawlawag nga ay-ayatendatayo dagiti nagannak kadatayo ken kayatda nga aramidenyo dagiti banag a mangpatalinaed a natalged ken naragsaktayo.

Aktibidad

Patakderen dagiti ubbing ket paaramid ti sumaganad a berso ti garaw:

Magustuan dagiti sakak ti agtaray (*agtaray a siuulimek iti pagtaktakderan*),
Magustuan dagiti imak ti agay-ayam (*iwagwag dagiti ima*),
Ngem no kuna ni Nanang [wenno Tatang] kaniak, “Umayka” (*isenias babaen ti ima*),
Dagus nga agtungpalak.

- Ania ti panagriknayo no agtungpalkayo kadagiti nagannak kadakayo ken umasideg no ayabandakayo?
- Ania ti panagriknayo no aramidenyo ti dadduma pay a banag nga idawat dagiti nagannak kadakayo nga aramidenyo?

Ilawlawag a no agtungpaltayo kadagiti nagannak kadatayo, makariknatayo iti ragsak. Maragsakan met dagiti nagannak kadatayo no agtungpaltayo.

Ibaga kadagiti ubbing a kayat ti Nailangitan nga Ama ken ni Jesus nga agtungpaltayo kadagiti nagannak kadatayo. Ibasa ken ilawlawag ti Taga-Efeso 6:1 kadagiti ubbing.

Kanta

Kantaen wenno sawen dagiti balikas iti amin a tallo a berso ti “Quickly, I’ll Obey” (*Children’s Songbook*, p. 197).

Yaawag ti inak,
Managtungpalak.
Inaldaw agaramidak
Iti nasayaat.

Yaawag ti amak,
Managtungpalak.
Inaldaw agaramidak
Iti nasayaat.

Amak ay-ayatennak,
Bendisionannak.
Inaldaw agaramidak
Iti nasayaat.

Kayats ti Nailangitan nga Ama ken ni Jesus nga Agtungpaltayo kadagiti Bilin

Ipakita ti ladawan 1-55, Sermon iti Bantay.

- Asino ti adda iti daytoy a ladawan?

Ilawlawag nga idi adda ni Jesus iti daga, sinuruanna dagiti tao iti no ania ti kayats ti Nailangitan nga Ama nga aramidenda. Maaw-awagan dagitoy a pannursuro kadagiti bilin. Ingato dagiti nasantuan a kasuratan. Ibagas kadagiti ubbing a naisurat dagiti bilin kadagiti nasantuan a kasuratan.

Aktibidad

Lukibem ti Bibliam ket basaem ti Juan 14:15. Ilawlawag nga insao ni Jesus dagitoy a balikas. Ilawlawag a ti *tungpalen* kaipapananna ti agtulnog. Paulit kadagiti ubbing ti nasantuan a kasuratan a kagiddandaka iti sumagmamano a daras.

- Ania ti sumagmamano kadagiti bilin a kayats ti Nailangitan nga Ama ken ni Jesus a tungpalentayo?

Usaren dagiti sumaganad a ladawan, pagsasaritaan ti maipapan iti sumagmamano kadagiti bilin a mabalin a tungpalen dagiti ubbing:

Ladawan 1-5, Pamilya nga Addaan iti Maladaga—ayaten dagiti pamiliatayo
Ladawan 1-8, Panangiwaras iti Sakramento—dumar-ay kadagiti miting iti Simbaan
Ladawan 1-9, Kararag iti Agsapa—agkararag iti Nailangitan nga Ama
Ladawan 1-46, Dagiti Ubbing a Mangmangted iti Sabsabong iti Ina—agbalin a nadungma iti dadduma

- Ania ti aramiden ti Nailangitan nga Ama no agtungpaltayo kadagiti bilinna?

Bendisionannatayo ti Nailangitan nga Ama No Agtungpaltayo

Estoria

Isalaysay iti ababa ti estoria maipapan kada Sidrac, Misac, ken Abdenago, a masarakan iti Daniel 3. Iparang ti ladawan 1-56, Tallo a Lallaki iti Umap-apuy nga Urno, iti maitutop nga oras. Ilawlawag a maysa kadagiti bilin ti Nailangitan nga Ama ti panagkararagtayo kenkuana laeng. Saantayo nga agkararag iti sabali a tao wenna kadagiti ladawan a kas kadagiti estatua. Ilawlawag nga ammo da Sidrac, Misac, Abdenago dagiti bilin ti Nailangitan nga Ama ken kayatda a tungpalen dagitoy. Sinaluadan ti Nailangitan nga Ama dagitoy a lallaki manipud iti apuy gapu ta nagtungpalda kenkuana. Saan nga inuram ida ti apuy.

- Apay a saan a dinangran ti apuy da Sidrac, Misac, ken Abdenago?
- Ania iti panagkunayo ti panagrikna da Sidrac, Misac ken Abdenago idi sinaluadan ida ti Nailangitan nga Ama manipud iti apuy?

Pammaneknek

Ipeksam ti riknam maipapan iti kinapateg ti panagtungpal kadagiti nagannak kadatayo ken iti Nailangitan nga Ama ken ni Jesus. Ibagas kadagiti ubbing no kasano a matulongannaka nga agragsak iti panagtungpal kadagiti bilin.

Dagiti Aktibidad a Mangpadur-as iti Pannakaammo

Pumili iti sumagmamano kadagitoy nga aktibidad tapno usaren bayat ti adalen.

1. Kantaen wenna sawen dagiti balikas iti umuna a berso ti “Keep the Commandments” (*Children’s Songbook*, p. 146) wenna ti maikadua a berso ti “I Have Two Little Hands” (*Children’s Songbook*, p. 272).

2. Bay-an nga agsisinnublat dagiti ubbing iti panangted iti klase iti sumagmamano a pangiturong, kas iti “tumakder” ken “ikabilmo dagiti imam iti ulom.” Pagtungpalen dagiti dadduma pay nga ubbing kadagiti pangiturong.
3. Usaren ti banniit manipud iti adalen 11 ken isagana ti sumagmamano a papel nga ikan a naisurat ditoy dagiti simple a pangiturong, kas iti “agdalikepkep,” “uliten ti ‘kuna ni Jesus, no ayatendak, tungpalenyoy dagiti bilinko,’” “magna a siuulimek nga aglawlaw iti siled,” “umisem iti dadduma nga ubbing,” ken “tulongan ti klase a mangkanta iti ‘Siak ket Anak ti Dios.’” Pagsisinnublaten dagiti ubbing a tumiliw iti papel nga ikan ken agtungpal iti pangiturong a naisurat iti ikan.
4. Sublien nga adalen ti estoria maipapan ken ni Noe, a mangyunay-unay a naisalakan ni Noe ken ti pamiliana manipud iti layus gapu ta tinungpalda dagiti bilin.
5. Ikkam ti tunggal ubing iti maysa a panid ti papel a nangidrowingam iti naragsak a rupa ken sinuratam kadagiti balikas a *Naragsakak no agtungpalak*. Bay-an a koloran dagiti ubbing dagiti rupa.

**Dagiti Mainayon
nga Aktibidad
para kadagiti
Babbassit
nga Ubbing**

1. Tulongan dagiti ubbing a mangaramid kadagiti garaw iti sumaganad nga ay-ayam iti ramay:
Nagagaget a babassit a ramramay (*ingato iti maysa a gemgem*),
Asino ti mangtulongto kadatayo nga agtungpal?
“Siak.” “Siak.” “Siak.” “Siak.” “Siak.” (*ingato ti maysa a ramay iti tunggal “Siak” agingga a maukrad ti amin a ramay*),
Kuna dagiti nagagaget a ramramay.
2. Mangitugot iti sumagmamano a banag a mangted iti saluad, kas kadagiti sapatos, kallugong, ken guantes. Damagen kadagiti ubbing no ania a kita ti pangsaluad ti it-ited ti tunggal banag (kas pagarigan, saluadan dagiti sapatos dagiti sakatayo; saluadan dagiti kallugong dagiti ulotayo manipud iti lamiis wenno dagiti matatayo manipud iti init). Ibaga kadagiti ubbing a no tungpalentayo dagiti nagannak kadatayo, masaluadantayo met. Pagsasaritaan ti maipapan kadagiti sumagmamano nga annuroten ken no kasano a saluadantatayo dagitoy.
3. Ingatom dagiti imam ket ipakitam kadagiti ubbing no kasano a maigarawmo dagiti ramaymo. Paingatom kadagiti ubbing dagiti imada, paigaraw dagiti ramayda, ken paukrad ken pakeppet dagiti imada. Ilawlawag a maigarawtayo dagiti bukodtayo nga ima ken ramay, ngem saan a ti sabali. Ilawlawag a maaramidntayo nga agtungpal dagiti imatayo no idawat ti maysa a tao nga aramidntayo ti maysa a banag. Ti panangaramidntayo iti daytoy ket mangiparikna kadatayo iti ragsak iti kaunggan.
4. Tulongam dagiti ubbing a mangaramid kadagiti garaw iti sumaganad a berso ti aktibidad bayat ti panangisaom kadagiti balikas:

Magustuak dagiti Imak

Magustuak dagiti imak; gagayyemko ida (*ipasango dagiti ima ket kumita kadagitoy*).

Agmalmalem nga adu't aramidenda ken manangtulongda (*yakem ti trabaho nga ar-aramiden dagiti ima*).

Siuulimek a nakadalikepkepda (*agdalikepkep*) wenna makapagsipatda iti napigsa (*agsipat*)!

Maipagpanakkelko ida no umno ti aramidenda!

Panggep

Tapno tulongan ti tunggal ubing a makaawat a no agaramidtayo iti maysa a banag a biddut, nasken a sawentayo a ladingitentayo ket ikarigatantayo nga aturen ti biddut a banag nga inaramidtayo.

Panagsagana

1. Sikakararag nga adalen ti Mosiah 27:8–37.
2. Dagiti kasapulan:
 - a. Libro ni Mormon.
 - b. Maysa a bassit nga ay-ayam a maibolsa.
3. Aramidem dagiti nasken a panagsagana para kadagiti ania man nga aktibidad a mangpadur-as iti pannakaammo a kayatmo nga usaren.

Dagiti Aktibidad iti Pannakasursuro

Mangawis iti maysa nga ubing a mangted iti pangrugi a kararag.

Aktibidad a Pangawis iti Panagdengngeg

Bayat ti iseserrek dagiti ubbing iti siled wenno aguummong para iti adalen, igagara nga agaramid iti sumagmamano a biddut iti panangurnos iti siled a pagadalan wenno iti panangisagana iti adalen. Mabalinko ti—

- Mangitinnag iti maysa banag iti suelo.
- Mangikabil iti maysa a tugaw a nakatallikud.
- Mangiparang iti ladawan a baliktd.
- Mangrugi a mangisurat iti maysa a banag iti pisarra wenno iti maysa a panid ti papel ket kalpasanna pugasen daytoy wenno kurusan daytoy.

Kalpasan ti tunggal biddut sawen ti, “Ladingitek; nagbiddutak.” Kalpasanna aturen ti biddut.

Saludsoden kadagiti ubbing no nadlawda amin a biddut a naaramidmo. Ilawlawag a tunggal maysa ket makaaramid iti biddut.

No Dadduma Makaaramidtayo kadagiti Banag a Maikaniwas

Ilawlawag a bayat ti panagdakkal ken panagsursurotayo nga agpili iti umno, no dadduma makaaramidtayo kadagiti di umisu a panagpili. Saan laeng a biddut dagitoy a kasla iti panangikabiltayo iti ladawan a nakabaliktd; dagitoy dagiti gundaway a makaaramidtayo iti maysa a banag a maikaniwas, maysa a banag a di kayat nga aramidentayo ti Nailangitan nga Ama ken ni Jesus ken dagiti nagannak kadaytoy. Babaen ti panagaramid kadagiti di umisu a panagpili, mabalin a mapagladingittayo ti bagbagitayo ken ti dadduma a tao.

Estoria

Isalaysay ti sumaganad nga estoria iti bukodmo a balikas, nga usaren ti bassit nga ay-ayam a pangiladawan iti daytoy:

Naragsak nga agay-ayam da Travis ken Matt iti balay da Matt. Magustuan ni Travis dagiti ay-ayam ni Matt ket tinarigagayanna a kukuana la koman dagitoy. Inkeddeng ni Travis a buloden ti sumagmamano kadagiti ay-ayam, ket imbolsana dagitoy a dina impakada ken ni Matt.

Idi inay-ayam ni Travis dagiti ay-ayam iti pagtaenganda, saan unay a naragsak. Dinamag ni nanangna no apay a saan a naragsak. Imbaga ni Travis ken ni nanangna nga innalana dagiti ay-ayam ni Matt a di nagpakpakada ket ita paglad-ladingitanna daytoy.

Imbaga ti nanang ni Travis kenkuana a dakes ti agala iti maysa a banag a kukua ti maysa a tao. Dinamagna ken ni Travis no ania ti nasken nga aramidenna tapno maatur ti saan nga umisu a panagpilina. Kayat ni Travis nga isubli dagiti ay-ayam, ngem mabuteng amangan ta makagura kenkuana ni Matt. Kinuna ti nanang ni Travis nga uray pay no makagura ni Matt, ti panangisubli kadagiti ay-ayam ti umno a banag nga aramiden. Imbagana pay ken ni Travis a ti panangibagana ken ni Matt nga isu ket agladingit ket makatulong a mangikkat kadagiti naliday a riknana iti panagaramidna iti maysa a banag a maikaniwas.

Insubli ni Travis dagiti ay-ayam ken ni Matt. Kinunana a ladingitenna ti panangalana kadagiti ay-ayam a dina impakpakada ket inkarina a dinanto pulos aramiden pay daytoy. Naragsak ni Matt gapu ta insubli ni Travis dagiti ay-ayam. Naragsak ni Travis gapu ta imbagana ti kinapudno ken inaramidna dagiti umno a banag (naadaw manipud iti Pat Graham, "Travis Repents," *Friend*, Mar. 1987, pp. 40–41).

- Ania ti inaramid ni Travis a saan nga umno?
- Ania ti narikna ni Travis idi innalana dagiti ay-ayam ni Matt?

llawlawag a no agaramiddayo iti maysa a banag a di umno, aglidaydayo iti kaunggan. Daytoy ti maysa a wagas a matulongannatayo ti Nailangitan nga Ama a mangammo a nakaaramiddayo iti maysa a banag a maikaniwas.

- Ania ti inaramid ni Travis tapno maikkat ti naliday a riknana?
- Ania ti narikna ni Travis idi insublina dagiti ay-ayam ni Matt ken nagladingit?

Nasken a Sawentayo a Ladingitentayo

- Kasano ti panagriknayo no agaramidkayo iti maysa a banag a saan nga umno?
- Ania ti maaramidyo tapno maikkat dagiti naliday a rikna?

Tulongan dagiti ubbing a makaawat a no ammotayo a nagaramiddayo iti maysa a banag a maikaniwas, nasken nga akuentayo daytoy. Kalpasanna masapul a sawentayo ti "Ladingitek." Masapul pay nga ikarigatantayo nga aturen no ania ti inaramiddayo a dakes ket ikaritayo a ditayton aramiden daytoy.

Aktibidad

Patakderem dagiti ubbing ket paaramidmo ti sumaganad a berso ti aktibidad a kagiddandaka:

No agaramidak iti banag a maikaniwas (*iwagwag ti ramay iti agsumbangir a sikigan*),

"Ladingitek," ti innakto yebkas.

Mariknak a nalidayak unay (*ibaba dagiti pingir ti bibig babaen kadagiti ramay, nga agaramid iti naliday a rupa*)

Iti inaramidko ita nga aldaw.

Agsingsingpetak (*ikabil dagiti ima iti padingpading ket agtung-ed-tung-ed*);
Ikarigatak iti amin a kabaalak.
Agbalinakto a naragsak (*umisem*)
No agaramidak iti nasayaat (*agdalikepkep ket agtung-ed*).

Nasken nga Aramidentayo ti Amin a Kabaalantayo a Mangatur iti Biddut

Estoria

Ipakita kadagiti ubbing ti Libro ni Mormon. Isarita kadakuada nga ibagbaga ti Libro ni Mormon maipapan iti maysa a tao a nagaramid iti maysa a banag a maikaniwas.

Lukiben ti Libro ni Mormon ket isalaysay ti estoria maipapan ken ni Alma, a masarakan iti Mosiah 27:8–37. Ilawlawag a saan a dimngeg ni Alma iti amana. Saanna a tinungpal ti Nailangitan nga Ama ken ni Jesus. Adu ti inaramidna a maikaniwas. Imbagana kadagiti tao dagiti banag a saan a pudno maipapan iti Simbaan. Adu a tao ti namati kenkuana ken saan a dimngeg kadagiti dadaulo ti Simbaan.

Ilawlawag a binaliwan ni Alma iti panagaramidna kadagiti maikaniwas a banag iti panagaramidna kadagiti umno a banag. Inkarigatanna nga inatur dagiti maikaniwas nga inaramidna babaen ti panangisurona iti kinapudno kadagiti tao.

- Ania iti panagkunayo ti panagrikna ni Alma idi maamirisna nga agar-aramid isuna kadagiti maikaniwas a banag? (Kitaen iti Mosiah 27:29.)
- Kasano nga inkarigatan ni Alma nga aturen dagiti dakes a banag nga inaramidna? (Kitaen iti Mosiah 27:32, 35–36.)
- Ania iti panagkunayo ti panagrikna ni Alma idi rinugianna ti panangisuro iti kinapudno kadagiti tao?
- No nagaramidkayo iti maysa a banag a dakes, apay a nasken nga ikarigatanyo nga aturen daytoy?

Isalaysay ti simple a bukod a padas maipapan iti maysa a panawen idi insaom a nagladingitka. Ibagam kadagiti ubbing no kasano ti panagriknam ken kasano nga inkarigatam nga inatur ti dakes a banag a naaramidmo.

Sublien nga adalen dagiti banag a nasken nga aramidentayo no ammotayo a nakaaramidtayo iti dakes a banag:

1. Akuentayo a nakaaramidtayo iti dakes a banag.
2. Sawen ti “Ladingitek.”
3. Ikari a saanen nga aramiden pay daytoy.
4. Aramidentayo ti amin a kabaalan a mangatur iti inaramidtayo a biddut.

Ilawlawag nga amin dagitoy sangkamaysa nga addang ket maawagan iti panagbabawi. Maragsakan ti Nailangitan nga Ama ken ni Jesus no agbabawitayo kadagiti di umno a banag nga aramidentayo.

Pailawlawag kadagiti ubbing no kasano a masurotda dagitoy nga addang ti panagbabawi kadagiti sumaganad a kasasaad:

- Ania ti nasken nga aramidenyo no agalakayo iti maysa a banag a diyo kukua?
- Ania ti nasken nga aramidenyo no naisaoyo ti maysa a banag a saan a nasayaat iti maysa a tao?

- Ania ti nasken nga aramidenyo no diyo imbaga ti kinapudno kadagiti nagannak kadakayo?
- Ania ti nasken nga aramidenyo no naiduronyo ti maysa a tao?

Pammaneknek

Ipeksam ti pammaneknekmo nga ay-ayatennatayo ti Nailangitan nga Ama ken ni Jesus uray pay no makaaramidtayo kadagiti maikaniwas a banag. Ibagam kadagiti ubbing nga ammom nga agragsakdanto no isaoda nga agladingitda para kadagiti banag nga ar-aramidenda a maikaniwas ken no padpadasenda a saandan nga aramiden manen dagiti maikaniwas a banag.

Dagiti Aktibidad a Mangpadur-as iti Pannakaammo

Pumili iti sumagmamano kadagitoy nga aktibidad tapno usaren bayat ti adalen.

1. Ikkan ti tunggal ubing iti maysa a pedaso a *clay* wenno ay-ayam a masa (play dough). Ipakita kadagiti ubbing no kasano nga ipatulid ti *clay* wenno ay-ayam a masa tapno aramiden a bola ket kalpasanna pitpiten daytoy. Tulongan ida a mangaramid iti umis-isem a rupa iti *clay* wenno ay-ayam a masa tapno mangipalagip kadakuada a no sawenda ti “Ladingitek” nasaysyaat ti panagriknada. (Masarakan ti resipe ti ay-ayam a masa iti panid xxi daytoy a pagbasaan.)
2. Ikkan ti tunggal ubing iti maysa a panid ti papel ken krayola wenno lapis. Paidrowing iti tunggal ubing ti umis-isem a rupa. Suratan ti ladawan iti *Makapagbalinak a naragsak no sawek ti ladingitek*.
3. Kantaen wenno sawen dagiti balikas iti “I Want to Live the Gospel” (*Children’s Songbook*, p. 148).

Dagiti Mainayon nga Aktibidad para kadagiti Babbabassit nga Ubbing

1. “Saan nga igagara” nga ibukbok ti sangakahon a krayola wenno dadduma pay a babassit a banag iti suelo. Ibagam kadagiti ubbing a ladingitem ti pannakaibukbokmo kadagiti krayola, ket kalpasanna saludsodem no ania ti nasken nga aramidem tapno sumayaat ti kasasaad. Bayat ti panangdalusmo, ibagam kadagiti ubbing a nasaysyaat ti riknam no naurnos ken nadalus manen ti suelo.

Ilawlawag a no dadduma makaaramidtayo kadagiti banag a mamagliday kadatayo wenno iti dadduma a tao. No mapasamak daytoy, nasken nga isaotayo ti “ladingitek” ket padasen a pasayaaten dagiti banag. Agyamanka kadagiti ubbing iti panangtulongda kenka nga agdalus, ket ipalagip kadakuada a mariknada ti ragsak no tulonganda dagiti dadduma.

2. Kantaen wenno sawen dagiti balikas iti “Jesus Said Love Everyone” (*Children’s Songbook*, p. 61).
3. Paisao kadagiti ubbing ti dakkal a balikas, kas iti *hippopotamus*. Ibagam kadakuada a no dadduma narigat nga isao ti sumagmamano a balikas. Ilawlawag a mabalina a narigat nga isao ti “ladingitek” no nakaaramidtayo iti maysa a banag a maikaniwas. Ilawlawag nga uray no narigat a sawen dagiti balikas a “ladingitek” makatulong dagitoy a mamagbalin kadagiti naliliday a rikna a nararagsak a rikna.

4. Isalaysay ti ababa nga estoria maipapan iti dua nga ubbing nga agkadua nga agay-ayam. No madungpar ti maysa kadagiti ubbing ti sabali, kuna ti umuna nga ubbing, "ladingitek" ket padasenna a tulongan ti maysa a nasaktan a sumayaat ti riknana. Iraman ti kapanunotan a panamagbalin iti naliday a rikna a naragsak a rikna. Mabalina kayatmo nga usaren ti ladawan ti Nakaisem/Nakarupangget a Rupa manipud iti adalen 21. Paiggeman iti maysa nga ubbing dagiti ladawan ket pabaliktad daytoy tapno maipakita ti rikna dagiti ubbing iti estoria.

Mabalinko a Pakawanen dagiti Dadduma

Adalen
30

Panggep

Tapno allukoyen ti tunggal ubing nga agbalin a managpakawan.

Panagsagana

1. Sikakararag nga adalen ti Genesis 37:12–28; 41:38–43; 42:1–8; 45:1–15; Mateo 18:21–22; ken Lucas 23:33–34.
2. Mangisagana iti babassit a panid ti papel ket isurat iti tunggal papel ti maysa a binatang kas iti maysa kadagiti sumaganad:
 - Kinabilnakayo ti maysa a tao ken induronnakayo.
 - Di kayat ti maysa a tao nga agay-ayamkayo.
 - Binuong ti maysa a tao ti maysa a banag a kukuayo.
 - Inawagannakayo ti maysa a tao iti nalaad a nagan.
 - Innala ti maysa a tao ti ay-ayamem ket dina kayat nga ipaay-ayam daytoy.Mangisagana iti maysa a panid ti papel para iti tunggal ubing ti klase (mangparnuay iti ad-adu pay a kasasaad no kasapulan). Ikabil dagiti papel iti maysa a bassit a kahon a nasuratan iti “Kahon ti Pammakawan.”
3. Dagiti kasapulan:
 - a. Biblia.
 - b. Ladawan 1-47, Dagiti Ubbing nga Aggaapa; ladawan 1-57, Inlako dagiti Kakabsatna ni Jose (Pakete ti Ladawan ti Arte ti Ebanghelio 109; 62525 864); ladawan 1-58, Ni Jose a Mangyam-ammo iti Bagina kadagiti Kakabsatna; ladawan 1-59, Ti Pannakailansa iti Krus (Pakete ti Ladawan ti Arte ti Ebanghelio 230; 62505 864).
4. Aramidem dagiti nasken a panagsagana para kadagiti ania man nga aktibidad a mangpadur-as iti pannakaammo a kayatmo nga usaren.

**Dagiti Aktibidad iti
Pannakasursuro**

Mangawis iti maysa nga ubing a mangted iti pangrugy a kararag.

Aktibidad a Pangawis
iti Panagdengngeg Iparang ti ladawan 1-47, Dagiti Ubbing nga Aggaapa.

- Ania ti ar-aramiden dagitoy nga ubbing?
- Apay iti panagkunayo nga aggaapada?
- Ania iti panagkunayo ti riknada?
- Ania ti mabalina a sawen dagitoy nga ubbing iti tunggal maysa tapno isardengda ti panaggaapa ket aramidenda a nasaysayaat ti riknada?

Sublien nga adalen manipud iti napalabas nga adalen no kasano ti kinapateg ti panangisao iti “ladingitek.” Ilawlawag a kalpasan nga isao dagiti ubbing a ladingitenda, nasken nga agpipinnakawanda. Kayat a sawen daytoy a nasken a saandan nga aggiginnura pay ken nasken nga aggagayyemda. Ipalagip kadagiti ubbing ti estoria maipapan kada Matt ken Travis manipud iti napalabas nga adalen. Pinakawan ni Matt ni Travis iti panangalana kadagiti ay-ayamna. Aggayyemda pay laeng.

Pinakawan ni Jose dagiti Kakabsatna

Estoria

Iparang ti ladawan 1-57, Inlako dagiti Kakabsatna ni Jose. Isalaysay ti estoria maipapan ken Jose a nailako iti Egipto, a masarakan iti Genesis 37:12–28.

- Ania iti panagkunayo ti panagrikna ni Jose idi inlako isuna dagiti kakabsatna tapno agbalin nga adipen iti Egipto?

Ilawlawag a nagbalin a napateg a tao iti Egipto ni Jose (kitaen iti Genesis 41:38–43). Kalpasan ti adu a tawen, napan dagiti kakabsat ni Jose iti Egipto tapno mangala iti taraon gapu ta awan umdas a kanenda iti bukodda a pagilian. Naammuanda a sibibiag pay laeng ni Jose ken isu ket maysa a napateg a tao iti Egipto (kitaen iti Genesis 42:1–8; 45:1–15).

Iparang ti ladawan 1-58, Ni Jose a Mangyam-ammo iti Bagina kadagiti Kakabsatna.

- Ania iti panagkunayo ti panagrikna ni Jose a makadenna manen dagiti kakabsatna? (Kitaen iti Genesis 45:14–15.)
- Nagpungtot kadi ni Jose kadagiti kakabsatna? (Kitaen iti Genesis 45:5.)
- Ania iti panagkunayo ti panagrikna dagiti kakabsat ni Jose kenkuana?
- Kasano nga impakita ni Jose a pinakawannan dagiti kakabsatna? (Kitaen iti Genesis 45:5–15.)

Aktibidad

Pagpammarangen ti maysa nga ubing nga isu ni Jose ken pagpammarangen dagiti dadduma pay nga ubing nga isuda dagiti kakabsat ni Jose. Tulongan dagiti ubing a mangidrama ti estoria ni Jose a nakadenna manen dagiti kakabsatna ken pinakawanna ida.

Imbaga Kadatayo ni Jesus nga Agbalintayo a Managpakawan

Ingato ti maysa a kopia ti Biblia. Ilawlawag nga iti Biblia, imbaga kadatayo ni Jesus nga agbalintayo a managpakawan. Sinaludsod ti maysa kadagiti apostol ni Jesus kenkuana maipapan iti panangpakawan kadagiti sabali (kitaen iti Mateo 18:21–22). Imbaga kenkuana ni Jesus a nasken a kanayontayo a managpakawan. Ilawlawag nga ibaga ti Biblia a managpakawan ni Jesus.

Iparang ti ladawan 1-59, Ti Pannakailansa iti Krus. Ilawlawag a naulpit unay ken ni Jesus dagiti soldado. Sinaplit ken tinupraanda. Inlansa dagiti soldado dagiti ima ken saka ni Jesus ket imbitinda iti krus tapno matay. Ilawlawag a pinakawan ni Jesus dagiti soldado. Saanna a kinagura dagiti soldado iti inaramidda kenkuana. (Annadan nga agbalinka a managdrama unay iti panangisalaysaymo iti daytoy nga estoria. Mabalina nga adda dagiti ubing a managrikna unay iti kapanunotan a saksaktan dagiti tao ni Jesus.)

Lukiben iti Lucas 23:34 ket salaysayen kadagiti ubing no ania ti kinuna ni Jesus idi nagkararag iti Nailangitan nga Ama sakbay a natay: “Ama, pakawanem ida.” Paulit kadagiti ubing iti napigsa daytoy a binatog iti sumagmamano a gundaway.

- Uray pay no sinaktan dagiti soldado ni Jesus, ania ti inaramidna?
- Ania ti kayat ni Jesus nga aramidentayo no pagpungtoten wenno paglidayennatayo ti maysa a tao?

Aktibidad Dawaten kadagiti ubbing nga aramidenda ti amin a banag nga ar-aramidem. Pasurotem ida kenka bayat ti panagtakder, panagunnat, panagisem, panagtugaw, ken panagdalikepkep. Ilawlawag a gapu ta inaramidda ti amin a banag nga inaramidmo, sursurotendaka. No surottem ti maysa a tao, aramidem met ti kasta a banag nga ar-aramiden dayta a tao. No pakawanentayo dagiti sabali, sursurotentayo ni Jesus. Ar-aramidentayo no ania ti inaramidna. Kayat ni Jesus a pakawanentayo dagiti mangpalpaliday wenno mangburburibor kadatayo.

Mabalinyo a Pakawanen dagiti Sabali

Aktibidad Ipakita ti “Kahon ti Pammakawan” ket saggaysa nga awisen dagiti ubbing a mangala iti maysa a panid ti papel manipud iti daytoy.

Basaen ti tunggal binatang ket agsaludsod kas iti sumaganad:

- Napasamak kadin daytoy kadakayo?
- Ania ti mabalin a riknayo iti daytoy?
- Ania ti nasken a sawen kadakayo ti tao a nangpaliday wenno nangpapungtot kadakayo?
- Ania ti nasken nga aramidenyo wenno sawen iti maysa a tao a nagbalin a natangsit kadakayo wenno nangpaliday wenno nangpapungtot kadakayo?

Isalaysaymo maipapan iti maysa a panawen idi pinakawanmo ti maysa a tao ken no kasano ti panagriknam. Tulongam dagiti ubbing a makaawat a kayat ti Nailangitan nga Ama ken ni Jesus nga agbalintayo a managpakawan.

Kanta Tulongan dagiti ubbing a mangkanta wenno mangisao kadagiti balikas iti “Help Me, Dear Father” (*Children's Songbook*, p. 99).

Ama, tulongannak a mamakawan
 Amin a natangsit kaniak.
 Tunggal aldaw, aglualoak;
 Tapno siak kenka, asidegak.

Pammaneknek Iburaymo ti pammaneknekmo a kayat ti Nailangitan nga Ama ken ni Jesus nga agbalintayo a managpakawan. Allukoyem dagiti ubbing nga agkararag ket dawa-tenda iti Nailangitan nga Ama a tulonganna ida a mamakawan iti dadduma.

Dagiti Aktibidad a Mangpadur-as iti Pannakaammo

Pumili iti sumagmamano kadagitoy nga aktibidad tapno usaren bayat ti adalen.

1. Sublien nga adalen ti estoria maipapan iti nayaw-awan nga anak a lalaki, a masarakan iti Lucas 15:11–32. Usaren ti ladawan 1-49, Ti Nayaw-awan nga Anak a Lalaki. Tulongan dagiti ubbing a makaawat nga inayat ti ama ti anakna a lalaki ket pinakawanna daytoy.
2. Aramiden ti sumaganad nga ay-ayam ti ima. Awisen dagiti ubbing a mangaramid kadagiti garaw a kagiddandaka.

Dua a babassit nga aggayem, maysa a kanigid, maysa a kanawan (*ingato ti agpada nga ima a nakakeppet dagiti gemgem*),
 Nangrugida a nagapa ken nagkabil (*iwagayway dagiti gemgem iti tunggal maysa*).

Ita saan a naragsak dagitoy dua a babassit nga aggayem iti dayta nga aldaw, Gapu ta nasuruanda iti umno a wagas nga agay-ayam. Kalpasanna nagdumog ti maysa a bassit a gayyem gapu iti bain (*ibaba ti kanawan a gemgem ket paglikuden*); Kasta met ti inaramid ti maysa pay a gayyem, ta nariknana met iti bain (*ibaba met ti kanigid a gemgem ket paglikuden*). Kinuna ti umuna a bassit a gayyem, “Ammokon no ania ti aramidek (*pagsinnipaten dagiti ima*). Tapno maipakitak kenka nga agladingitak, dawatek a pakawanennak.” “Ladingitek met,” kinuna ti maikadua, “Intan agay-ayam ket agmalmalem nga agragragsakta a dua” (*agdalikepkep ket agtugaw*).

3. Mangaramid iti simple nga etiketa (badge) para iti tunggal ubing tapno usarenda iti pagtaenganda. Isurat iti tunggal etiketa ti *Makapagbalinak a managpakawan*.

**Dagiti Mainayon
nga Aktibidad
para kadagiti
Babbabassit
nga Ubbing**

1. Sublien nga adalen ti estoria manipud iti adalen 29 maipapan iti dua nga ubbing nga agay-ayam (kitaen iti Dagiti Mainayon nga Aktibidad para kadagiti Babbabassit nga Ubbing, aktibidad 4). Ibagi no kasano a pinakawan ti nasaktan nga ubing ti maysa pay.
2. Kantaen wenno sawen dagiti balikas iti “Jesus Said Love Everyone” (*Children’s Songbook*, p. 60).
3. Kantaen wenno sawen dagiti balikas iti “When You’re Happy” (*Children’s Songbook*, p. 266). Ilawlawag kadagiti ubbing a no pakawanentayo dagiti natangsit kadatayo, mariknatayonto ti ragsak.

Panggep Tapno allukoyen ti tunggal ubing a makarikna iti panagyaman iti pagtaenganna ken tapno tulongan a mangaywan iti daytoy.

Panagsagana

1. Sikakararag nga adalen ti 1 Nephi 2:2–6; 17:7–8; 18:6, 23.
2. Dagiti kasapulan:
 - a. Libro ni Mormon.
 - b. Maysa a pagikkan nga adda danumna, maysa a pagikkan nga adda dagana, ken maysa a sanga. No kaykayatmo, mangitugot kadagiti ladawan ti dan-aw, daga, ken kayo.
 - c. Papel ken krayola wenno laplapis.
 - d. Ladawan 1-60, Sumangpet ni Lehi ken dagiti Taona iti Naikari a Daga (Pakete ti Ladawan ti Arte ti Ebanghelio 304; 62045 864); ladawan 1-61, Ipapanaw Manipud iti Nauvoo (Pakete ti Ladawan ti Arte ti Ebanghelio 410; 62493 864).
3. Aramidem dagiti nasken a panagsagana para kadagiti ania man nga aktibidad a mangpadur-as iti pannakaammo a kayatmo nga usaren.

Dagiti Aktibidad iti Pannakasursuro

Mangawis iti maysa nga ubing a mangted iti pangrugji a kararag.

Aktibidad a Pangawis iti Panagdengngeg Ipakita ti pagikkan wenno ladawan ti danum ket damagen no ania dagiti ayup wenno insekto nga aggigian iti danum. Tulongan nga agpanunot dagiti ubbing iti adu agingga a mabalin. Ipakita ti daga ket kalpasanna ti sanga, ket tulongan dagiti ubbing nga agpanunot kadagiti ayup ken insekto nga aggigian iti daga ken kadagiti kayo.

- Ania iti panagkunayo ti langa ti pagtaenganyo no adda iti danum?
- Ania ti mabalin a mapasamak no adda iti maysa a kayo ti pagtaenganyo?

Adu a Nadumaduma a Kita dagiti Pagtaengan

Ilawlawag nga agnanaed dagiti ayup ken insekto iti adu a nadumaduma a kita dagiti pagtaengan. Agnanaed met dagiti tao iti nadumaduma a kita dagiti pagtaengan.

Estoria

Iparang ti ladawan 1-60, Sumangpet ni Lehi ken dagiti Taona iti Naikari a Daga, ket iparangmo ti Libro ni Mormon bayat ti panangisalaysaymo maipapan ken ni Lehi ken ti pamiliana ken dagiti kita ti pagtaengan a nagnaedanda (kitaen iti 1 Nephi 2:2–6; 17:7–8; ken 18:6, 23). Nagin-awa ti pagtaengan ti pamilia ni Lehi iti Jerusalem, ngem idi imbaga ti Apo kadakuada a pumanaw iti Jerusalem, nagdaliasatda iti disierto ket nagnaedda kadagiti tolda. Kalpasan ti adu a tawen binilin ti Apo ni Nephi, ti anak ni Lehi, tapno agaramid iti maysa a barko. Nagnaed ni Lehi ken ti pamiliana iti barko bayat ti panagdaliasatda nga agturong iti naikari a daga, ti lugar nga insagana ti Nailangitan nga Ama ken ni Jesus a pagnaedanda. Kalpasan a nakasangpetda iti

naikari a daga, nagnaed manen ni Lehi ken ti pamiliana kadagiti tolda agingga a nakapagpatakderda iti ad-adu a permanente a pagtaengan.

- Ania dagiti nadumaduma a kita ti pagtaengan a nagnaedan ni Lehi ken ti pamiliana?

Estoria

Iparang ti ladawan 1-61, Ipapanaw manipud iti Nauvoo. Saritaen ti maipapan kadagiti nagkauna a kameng ti Simbaan a nangbangon iti siudad a maawagan iti Nauvoo. Nagtrabahoda a nasayaat tapno mabangon dagiti pagtaenganda ken ti maysa a napintas a templo. Ngem saan a nagustuan dagiti sumagmamano a tao iti aglawlaw ti Nauvoo dagiti miembro ti Simbaan ket pinilitda ida a pinapanaw. Nagdaliasat dagiti miembro ti Simbaan nga intugotda dagiti tagikuada nga umanay laeng kadagiti adda linongna a karison. Gapu ta babassit dagiti adda linongna a karison, adu kadagiti ubbing ti nangibati kadagiti ay-ayamda. Nagindeg ti sumagmamano a tattao kadagiti adda linongna a karison ken kadagiti tolda iti nabayag a panawen.

- Apay nga agbalin a narigat ti agnaed iti maysa nga adda linongna a karison wenno tolda?

Aktibidad

Patakderen dagiti ubbing ket paaramid ti sumaganad a berso ti garaw:

Nagnagna ken nagsasarita dagiti nagkauna a kameng nga ubbing (*magna iti pagtaktakderan*);

Kalpasanna nagay-ayam ken naglalagtoda (*aglagto iti pagtaktakderan*).

Idi rumabiin, nagrimat ken naglawag dagiti bituen (*keppetien ken ukraden dagiti ima*); Iti uneg dagiti karison naturog ken nagtagtagainepda (*agkidem, ipatay ti ulo iti rabaw dagiti ima*).

Ti Pagtaengan ket Maysa a Lugar a Maipatpategtayo

Ilawlawag a saan a napateg ti kita ti pagtaengan a pagnanaedantayo. Mabalin nga agnanaedantayo iti maysa a dakkal a balay, bassit a balay, paupaan a balay, tolda, wenno bilog. Ti napateg a banag ket lugar dagiti pagtaengantayo a pagiinayatan dagiti miembro ti familia. Isaritam ti maipapan iti bukodmo a pagtaengan ken no ania ti aramidem tapno maaramid a makaay-ayo a lugar daytoy.

- Apay a magustuanyo ti agyan iti pagtaengan?
- Kasano ti pannakaammoyo nga ay-ayatendakayo ti pamiliayo?
- Pinalabasyo kadin ti rabii nga adayo iti pagtaenganyo?
- Sadino ti nagturoganyo?
- Kasano ti panagriknayo idi nagsublikayo iti bukodyo a pagtaengan?

Ipalagip kadagiti ubbing no kasano ti ragsak ti agsubli iti bukodda a pagtaengan ken pagturogan.

Aktibidad

Patakderem dagiti ubbing ket pagdenggem ida bayat ti panangisaom kadagiti balikas iti “Home” (*Children’s Songbook*, p. 192). Ibaga kadagiti ubbing nga arakupenda ti bagida no mangngegda ti balikas a *taeng*. No tarigagayam, ulitem ti berso ket paisao kadagiti ubbing dagiti balikas a kagiddandaka.

Ti taeng ti yan dagiti tao nga ay-ayaten
 Ken dagiti tao a mangipatpateg kenka.
 Ti taeng ti yan ti ayat ken taklin
 A maited iti tunggal ubing ken iti sangapamilia.

(© 1975 ti Sonos Music, Orem, Utah. Nailatang amin a karbengan. Naaramat nga addaan pammalubos.)

Matulongantayo dagiti Pamiliatayo a Mangaywan iti Pagtaengantayo

llawlawag a nasken nga aywanantayo dagiti pagtaengantayo tapno agbalin dagitoy a nasayaat a lugar a pagnaedan. Nasken a tumulong ti tunggal pamilia a mangpatalinaed a naurnos ken nadalus ti pagtaengan.

Aktibidad

Payakem (pantomime) kadagiti ubbing ti sumagmamano a banag a mabalinda nga aramiden a makatulong a mangpatalinaed a naurnos ken nadalus kadagiti pagtaenganda, kas iti panangpidut kadagiti ay-ayamda, panagsagad iti suelo, panagkupin ken panangidulin kadagiti lupotda.

Awisem dagiti ubbing a saggaysa nga umasideg ket agtakder iti abaymo. lladawam iti tunggal ubing ti maysa a kasasaad a pakapagbalinanna a maysa a nasayaat a katulungan iti pagtaengan. Damagem iti ubing no ania ti aramidenna tapno makatulong iti dayta a kasasaad. Usarem dagiti sumaganad a pagarigan wenno mangaramidka kadagiti bukodmo a kasasaad a maibagay kadagiti miembro ti klase:

- Naibellengmo ti sangabaso a danum iti suelo a saanmo nga inggagara. Ania ti nasken nga aramidem?
- Nagay-ayamka kadagiti blokem iti unos ti agmalem. Ita orasen ti pannangan. Ania ti nasken nga aramidem kadagiti blokem?
- Agdardaras ni nanangmo nga agisagana iti pangrabii iti lamisaan. Kasapulanna ti maysa a tao nga agidasar iti lamisaan sakbay a mangan ti pamilia. Ania ti mabalainmo nga aramiden?
- Nalabaan ken naurnos a nakupin dagiti lupotmo. Ania ti nasken nga aramidem ita kadagitoy?
- Madamaka nga agay-ayam iti ruar ket napno iti pitak dagiti sapatosmo. Ania ti nasken nga aramidem sakbay a sumrekka iti pagtaengan?
- Nakuso ti pagiddaan no bumangonka iti agsapa. Ania ti nasken nga aramidem?

AllukoyeM dagiti ubbing nga agsarita maipapan kadagiti banag nga ar-aramidenda a makatulong a mangpatalinaed a naurnos ken nadalus dagiti pagtaenganda. lbagaM kadagiti ubbing no kasano nga agrabahoka tapno mapagtalinaed a naurnos ken nadalus ti pagtaengan.

Aktibidad

Ikkan dagiti ubbing iti papel ken krayola wenno lapis ket pagdrowingen ti tunggal ubing iti maysa a banag nga aramidennanto bayat ti lawas tapno makatulong iti pagtaengan. Suratan ti tunggal ladawan iti *Agyamanak iti pagtaengak*.

Pammaneknek

Ipeksam ti riknam maipapan iti pagtaengan ken ti panagyamanmo iti Nailangitan nga Ama ken ni Jesucristo iti panangparaburna kenka iti maysa a pagtaengan.

**Dagiti Aktibidad a
Mangpadur-as iti
Pannakaammo**

Pumili iti sumagmamano kadagitoy nga aktibidad nga usaren bayat ti adalen.

1. Mangitugot iti sumagmamano a banag nga aramaten iti balay (uray saggaysa laeng dagiti ubbing) a naipan iti maysa a supot. Bay-an a pumili ti tunggal ubing iti maysa a banag manipud iti supot ket ilawlawagna no kasano nga usaren daytoy bayat ti itutulong iti uneg ti balay. Kas pagarigan, mausar ti lupot a pagpunas iti tapok wenno panangpamaga kadagiti lunglongan, mausar ti kutsara no isagana ti lamisaan para iti pannangan, ken maipakni ti ay-ayam no dalusan ti maysa a siled.
2. Kantaen wenno sawen dagiti balikas iti “Fun to Do” (*Children’s Songbook*, p. 253), nga usaren dagiti binatang a kas “Ti panagidulin iti nagiddaan ket naragsak nga aramiden” wenno “Ti panangisagana iti lamisaan ket naragsak nga aramiden” bayat ti panangyakem iti garaw.
3. Patugotan dagiti ima ti tunggal ubing iti maysa a papel tapno yawid. Suratan ti tunggal papel iti *Addaanak kadagiti makatulong nga ima*. Pagsasaritaan no ania ti kabaelan nga aramiden dagiti ima dagiti ubbing tapno makatulong.
4. Pagpammarangen dagiti ubbing nga adda linongna a karison dagiti tugawda. Paguyod kadakuada dagiti tugawda iti urnos a nagtimbukel kas iti inaramid dagiti nagkauna a kameng iti rabii kas pangsaluad kadagiti natangsit a tattao ken naatap nga ayup. Paidrama kadakuada nga agar-aramidda iti apuy iti kampo ken aglutluto iti pangrabii, agkakanta ken agsasalada kalpasan ti panangrabii, ken agluganda kadagiti karisonda (tugaw) tapno maturog.
5. Mangitugot kadagiti ladawan ti nadumaduma a kita dagiti pagtaengan, wenno idrowing dagitoy iti pisarra wenno iti maysa a panid ti papel. Ilawlawag kadagiti ubbing no ania ti nakaaramidan ti tunggal balay ken ania koma ti langa daytoy tapno pagindegan. Mabalina nga iramanmo ti maysa a tolda, maysa nga *igloo*, maysa a kastilio, maysa a kalapaw, ken maysa a balay iti kadangkadang.

**Dagiti Mainayon
nga Aktibidad
para kadagiti
Babbassit
nga Ubbing**

1. Kantaen wenno sawen dagiti balikas iti “When We’re Helping” (*Children’s Songbook*, p. 198). Bay-an nga idrama dagiti ubbing dagiti banag a kabaelanda nga aramiden a makatulong iti aglawlaw ti pagtaenganda.
2. Tulongan dagiti ubbing a mangaramid kadagiti garaw iti sumaganad nga ay-ayam ti ima:

Nagagaget a babassit a ramramay (*ingato ti maysa a gemgem*),

Asino ti mangtulongto kadatayo nga agtungpal?

“Siak.” “Siak.” “Siak.” “Siak.” “Siak.” (*ingato ti maysa a ramay iti tunggal “Siak” agingga a maukrad ti amin a ramay*),

Kuna dagiti nagagaget a ramramay.

Agyamanak iti Taraon ken Lupot

Adalen
32

Panggep

Tapno tulongan ti tunggal ubing a makarikna ken mangyebkas iti panagyaman para iti taraon ken lupot.

Panagsagana

1. Sikakararag nga adalen ti Genesis 1:11–12 ken 1 Ari 17:8–16.
2. Dagiti kasapulan:
 - a. Biblia.
 - b. Maysa a prutas wenno nateng nga adda dagiti bukeln.
 - c. Maysa a *beanbag* wenno sabali pay a nalukneng a banag.
 - d. Nagetteng a ladawan 1-5, ikan; nagetteng a ladawan 1-7, baboy; nagetteng a ladawan 1-8, karnero; nagetteng a ladawan 1-9, baka; nagetteng a ladawan 1-22, dagiti manok (masarakan pay dagiti kastoy met a ladawan iti Primary Visual Aids Cut-outs Primary Visual Aids Cutouts set 4; wenno agbirok kadagiti ladawan dagiti ayup a mangted iti taraon ken lupot iti lugaryo.
 - e. Ladawan 1-15, Panangbendision iti Taraon, ladawan 1-50, Makapagbadoak.
3. Aramiden dagiti nasken a panagsagana para kadagiti ania man nga aktibidad a mangpadur-as iti pannakaammo a kayatmo nga usaren.

Dagiti Aktibidad iti Pannakasursuro

Mangawis iti maysa nga ubing a mangted iti pangrugy a kararag.

Aktibidad a Pangawis iti Panagdengngeg lted dagiti sumaganad a pangiturong, a punnuan dagiti blangko kadagiti gaganay a taraon a pamigat:

No kayatmo a kanen ti _____ a pamigat, ingato ti maysa nga ima.

No kayatmo a kanen ti _____ a pamigat, ingato ti sabali pay nga ima.

No kayatmo a kanen ti _____ a pamigat, tumakder.

Itultuloy kadagiti dadduma pay a garaw agingga a mainaganan ti uray maysa laeng a taraon a magustuan a kanen ti tunggal ubing. Kalpasanna sawen ti “No agyamankayo iti Nailangitan nga Ama para iti taraon a kankanenyo, agtugawkayo ket agdalikepkep kayo.”

Usarentayo dagiti Mulmula ken Ayup a para iti Taraon

- Ania dagiti dadduma pay a taraon a kayatyo a kanen?
- Sadino ti pangal-alaantayo iti taraontayo?
- Asino ti nangparsua kadagiti mula ken ayup a pagal-alaantayo iti taraon a kanen?

Pagsasaritaan maipapan iti sumagmamano kadagiti taraon a kankanenyo ken no sadino ti paggapapuan dagitoy. Ilawlawag nga adu dagiti taraon a maal-alatayo kadagiti mula.

Guduaen wenno pisiem ti prutas wenno nateng nga intugotmo ket itudom dagiti bukel.

- Ania dagitoy?
- Apay nga adda bukel dagiti mula?

Ilawlawag a plinano ti Nailangitan nga Ama nga adda bukel dagiti mula tapno makapagtubo dagiti bukel nga agbalin iti ad-adu pay a mula tapno mangipaay iti taraon para kadatayo (kitaen iti Genesis 1:11–12). No dumakkel ti maysa a mula a mangipaay iti prutas wenno nateng, ad-adu pay a bukel ti maparnuay.

Aktibidad

Aramiden ti sumaganad a berso ti aktibidad a kagiddan dagiti ubbing:

Maimula iti Nauneg dagiti Bukel

Maimula iti nauneg dagiti bukel (*agkummog ket isagid dagiti ima iti suelo*).

Iti daga a maturog dagitoy (*iparabaw ti maysa nga ima iti sabali, agdekket dagiti dakulap*).

Nagraniag a naglawag ti amarilio nga init (*ikabil dagiti takiag iti ngatuen ti ulo a patimbukel*).

Agtinnag ti tudo a saggabassit (*iwagwag dagiti ramay bayat ti pannakaibabada*).

Agpul-oy ti nalanay nga angin (*ipayapay dagiti takiag iti ngatuen ti ulo*).

Mangrugi nga agtubo dagiti babassit a bukel (*iwagwag dagiti ramay nga agpa-ngato manipud iti suelo*).

- Timmulongkay kadin a nagmula kadagiti bukel?
- Ania ti immulayo?
- Ania dagiti taraon a maalatayo kadagiti mula?

Tulongan dagiti ubbing nga agpanunot iti sumagmamano a prutas, nateng, ken bukbukel. Ilawlawag a maaramid ti tinapay ken cereal manipud iti bukbukel. Ibagi kadagiti ubbing no kasano ti panagyamanmo iti Nailangitan nga Ama para kadagiti bukel nga agtubo ken dumakkel a mangipaay iti prutas, nateng, ken bukbukel.

Ipakita manen dagiti bukel.

- Ania ti kasapulan dagitoy a bukel tapno dumakkel?

Estoria

Isalaysay ti estoria maipapan ken ni Elias ti balo ni Sarepta, a masarakan iti 1 Ari 17:8–16. Tulongan dagiti ubbing a makaawat nga awan ti umdas a taraon gapu ta awan ti tudo. No awan ti tudo a mangted iti danum, awan ti agtubo a taraon.

- Kasano ti panagriknayo no awan ti ania man a kanenyo a taraon?
- Kasano a naparaburan ti balo iti panangibinglayna ken ni Elias iti sangkabassit a taraon nga adda kenkuana? (Kitaen iti 1 Ari 17:15–16.)

Ilawlawag a saan nga aggapu ti amin a taraontayo kadagiti mula.

- Sadino ti pangal-alaantayo iti gatas?
- Sadino ti pangal-alaantayo iti itlog?
- Sadino ti pangal-alaantayo iti karne?

Pagsasaritaan ti maipapan no kasano nga aggapu kadagiti ayup ti sumagmamano a taraon. Usaren dagiti maitutop a nagegetteng a ladawan, ilawlawag dagiti ayup a maus-usar a taraon iti lugaryo.

Us-usarentayo dagiti Mula ken Ayup a para Lupot

Ilawlawag a saan laeng a taraon ti maalatayo manipud kadagiti mula ken ayup. Ipakita ti ladawan 1-50, Makapagbadoak.

- Ania ti ar-aramiden daytoy nga ubing a lalaki?
- Ania ti yusongyo no agsukat kayo?

Aktibidad

Payakem kadagiti ubbing nga agyus-usongda kadagiti aruaten a kas iti kamiseta, bado, sapatos, amerikana, ken kallugong.

- Apay a kasapulantayo ti lupot? (Tapno maabbongan dagiti bagitayo, tapno masalakniban dagiti bagitayo, tapno mangpapudot kadaytoy no nalam-ek.)
- Iti ania a banag a naaramid ti lupot?

No makainagan dagiti ubbing iti sumagmamano kadagiti material a maus-usar iti panagaramid iti lupot, saludsoden no ammoda no sadino ti paggapuan dagiti a material. Ilawlawag a maal-alatayo dagiti material iti panagaramid iti lupot ken sapatos manipud kadagiti mula ken ayup. Ibaga kadagiti ubbing no ania a mula ken ayup dagiti mangmangted iti material a gagangay a maus-usar a para lupot iti lugaryo. Kas pagarigan, aggapu ti katsa ken linen kadagiti mula, aggapu ti seda kadagiti igges (silkworms). Aggapu ti delana iti karnero, ken aggapu ti kaaduan a lalat kadagiti baka.

Makapagyamantayo para iti taraon ken lupot

Aktibidad

Dawaten kadagiti ubbing nga agpanunotda kadagiti taraon a pagyamananda. Saggaysa nga ipasippaw wenno yawat ti *beanbag* wenno nalukneng a banag iti tunggal ubing. Painaganan iti tunggal ubing ti maysa taraon a pagyamananna ket kalpasanna isublina nga ipasippaw wenno yawat ti *beanbag* kenka. Ilawlawag no sadino ti paggapuan ti taraon a nadakamat sakbay ti panangipasippaw iti supot iti sumaruno nga ubing. Ipalagip kadagiti ubbing a pinarsua ni Jesus ti tunggal mula wenno ayup, babaen ti panangiturong ti Nailangitan nga Ama.

Uliten ti aktibidad, a dawaten iti tunggal ubing a manginagan iti maysa a banag nga aruaten imbes a taraon.

Ipakita ti ladawan 1-15, Panangbendision iti Taraon.

- Asino ti nasken a pagyamanantayo para iti taraontayo?
- Asino ti nasken a pagyamanantayo para iti lupottayo?
- Kasano a makapagyamantayo iti Nailangitan nga Ama para kadagitoy a banag? (Maysa a wagas ket panangdakamat kadagitoy kadagiti inaldaw a kararagtayo.)

Pammaneknek

Ipeksam ti panagyamanmo ta inaramid a mabalin ti Nailangitan nga Ama ken ni Jesus a maaddaantayo iti lupot nga aruaten ken taraon a kanen.

Dagiti Aktibidad a Mangpadur-as iti Pannakaammo

Pumili iti sumagmamano kadagitoy nga aktibidad nga usaren bayat ti adalen.

1. Ikkan ti tunggal ubbing iti papel nga adda naidrowing a linia iti tenggana ken dagiti balikas nga *Agyamanak para iti*: a nakasurat iti ngato. Bay-an nga

agdrowing ti tunggal ubing iti ladawan ti taraon iti maysa a bangir ti linia ken banag nga aruaten iti sabali a bangir.

2. Tulongan dagiti ubbing a mangkanta wenno mangisao kadagiti balikas iti umuna a dua a berso ti "Thanks to Our Father" (*Children's Songbook*, p. 20).
3. Pagpammarangen dagiti ubbing nga isuda dagiti bukel. Pagkummogen ida a kasla naimulada iti daga, kalpasanna siiinnayad a tumakder bayat ti panagraniag ti init ken silalanay a panagtinnag ti tudo kadagitoy. Mabalina a kayatmo a pagsisinnublaten dagiti ubbing nga agbalin nga init ken tudo.
4. Mangitugot iti maysa a prutas wenno nateng ket ikkan dagiti ubbing iti bassit a ramananda. Iladawan ti kita ti bukel ken mula a naggapuan ti prutas wenno nateng. (Ammuen iti nagannak dagiti ubbing tapno masigurado nga awan asino man nga ubing ti adda alerdyina iti taraon nga itugotmo.)
5. Iladawan ti maysa a kadawyan a taraon kadagiti ubbing ket dawatem a pugtuanda no ania a taraon ti iladladawam. Kas pagarigan, mabalimo a sawen ti "Puraw daytoy a taraon wenno maris kape ti ruarna. Adda ukisna. Naikabil iti maysa nga umok daytoy. Ania daytoy" (Itlog.) Uliten iti mamin-adu no tarigagayam. Mabalina a kayatmo ti mangitugot iti maysa a pagarigan ti tunggal taraon nga iladawam.
6. Mangitugot kadagiti banag nga aruaten kas iti pagimeng, amerikana, ken kallugong ket bay-an nga ipadas dagiti ubbing dagitoy bayat ti panangisaritam iti maipapan iti lupot a pagyamanan dagiti ubbing.

**Dagiti Mainayon
nga Aktibidad
para kadagiti
Babbabassit
nga Ubbing**

1. Tulongan dagiti ubbing a mangkanta wenno mangisao kadagiti balikas iti "For Health and Strength" (*Children's Songbook*, p. 21).
2. Payakem kadagiti ubbing nga agsuksukatda bayat ti panangisaom kadagiti balikas iti sumaganad a berso ti aktibidad:

Ubbing, isuotyo ti pantalonyo, pantalonyo.
Ubbing isuotyo ti pantalonyo, maysa, dua, tallo.

Ubbing, isuotyo ti paldayo, paldayo, paldayo.
Ubbing, isuotyo ti paldayo, maysa, dua, tallo.

Ubbing, isuotyo ti kamisetayo, kamisetayo, kamisetayo.
Ubbing, isuotyo ti kamisetayo, maysa, dua, tallo.

Ubbing, isuotyo ti mediasyo, mediasyo, mediasyo.
Ubbing, isuotyo ti mediasyo, maysa, dua, tallo.

Ubbing, isuotyo ti sapatasyo, sapatasyo, sapatasyo.
Ubbing, isuotyo ti sapatasyo, maysa, dua, tallo.

Amin nga ubbing, nakasukaten, nakasukaten, nakasukaten (*agsipat*).
Amin nga ubbing, nakasukaten; agay-ayamtayo!

Makapagbalinak a Maysa a Gayyem

Adalen
33

Panggep Tapno tulongan ti tunggal ubing nga agtarigagay nga agbalin a maysa a naimbag a gayyem.

Panagsagana

1. Sikakararag nga adalen ti Juan 6:1–13 ken 11:1–7, 17–44.
2. Dagiti kasapulan:
 - a. Bibilia.
 - b. Ladawan 1-3, Ni Jesus a Cristo (Pakete ti Ladawan ti Arte ti Ebanghelio 240; 62572 864).
3. Aramidem dagiti nasken a panagsagana para kadagiti ania man nga aktibidad a mangpadur-as iti pannakaammo a kayatmo nga usaren.

Dagiti Aktibidad iti Pannakasursuro

Mangawis iti maysa nga ubing a mangted iti pangrugit a kararag.

Aktibidad a Pangawis iti Panagdengngeg Itudom ti bagim ken saludsoden, “Asinoak?” Mabalina nga isungbat dagiti ubbing ti naganmo wenno ti balikas a *maestra*. Ilawlawag a sika pay ti gayyemda, ket isuda dagiti gagayyemmo. Ilawlawag a dagiti aggayyem isuda dagiti tao a mangayat iti tunggal maysa.

Agummong a kaduam dagiti ubbing iti patimbukel. Saggaysa a kumita kadagiti ubbing ket sawen ti, “Gayyemko ni (nagan ti ubing).” Bay-an a maaddaan iti gundaway ti tunggal ubing a mangaramid iti daytoy, a siguraduen a madakamat ti tunggal ubing iti tunggal gundaway.

Adu dagiti Gagayyemtayo

- Asino dagiti gagayyemyo?

Palubosan nga agsarita dagiti ubbing maipapan iti gagayyemda. Ilawlawag a mabalina a gagayyem ti uray ania ti tawenna. Mabalina a dagiti miembro ti familia ti sumagmamano a kasingedan a gayyemtayo. Yunay-unay a maysa a gayyem ti tunggal tao iti klase.

Ipakita ti ladawan 1-3, Ni Jesus a Cristo. Ilawlawag a ti tao iti ladawan ket naimbag unay a gayyem iti tunggal maysa iti klase.

- Asino ti gayyemtayo iti daytoy a ladawan?
- Kasano ti pannakaammoyo a gayyemyo ni Jesus?

Kanta

Kantaen wenno sawen dagiti balikas iti “Jesus Is Our Loving Friend” (*Children’s Songbook*, p. 58).

Ni Jesus ti managayat a gayyem.
Isu't kanayon nga asideg.
Tarabayennatayo no agkararagtayo;
Ay-ayatenna't tunggal ubing.

Estoria

Isalaysay ti estoria maipapan iti panangpagungar ni Jesus ken ni Lazaro manipud iti patay, a masarakan iti Juan 11:1–7, 17–14. Yunay-unay a gagayyem ni Jesus ni Lazaro ken dagiti kakabsatna a babbai. Idi adda ni Jesus idia Betania, nagyan iti pagtaenganda ket nakipangrabii kadakuada.

- Kasano ti panagrikna ni Jesus maipapan ken ni Lazaro? (Kitaen iti Juan 11:3, 35–36.)
- Ania ti inaramid ni Jesus para ken ni Lazaro? (Kitaen iti Juan 11:43–44.)
- Ania iti panagkunayo ti panagrikna da Lazaro, Maria, ken Marta ken ni Jesus?

Makapagbalintayo a Nasayaat a Gagayyem

- Kasano ti nasken a panangtratotayo kadagiti gagayyemtayo?

Ilawlawag a no agbalintayo a nasayaat a gagayyem, tultulongantayo dagiti dadduma nga agaramid iti nasayaat a bambanag. Maseknantayo kadagiti gagayyemtayo ket kayattayo nga agragsakda. Ilawlawag ti kinapateg ti panangtrato kadagiti dadduma iti wagas a kayattayo a pannakatrato. Saludsoden kadagiti ubbing no kasano a makapagbalinda a nasayaat a gayyem kadagiti kasasaad a kas kadagitoy:

- Agay-ayamkayo iti gayyemmo, ket umasideg ti maysa pay nga ubing ket kayatna ti makiay-ayam kadakayo.
- Umay ti kabarbaro nga ubing iti klase iti umuna a gundaway ket managbabain wenno mabuteng.
- Maysa nga ubing ti masutsutil ken malidlidayan.

Kanta

Kantaen wenno sawen dagiti balikas iti “Kindness Begins With Me” (*Children’s Songbook*, p. 145).

Kayatko nga agsingsingpetak,
Ta dayta ti umno.
‘Sa kunak ‘ti bagik, “Mangrugi
kaniak kinasingsingpet.”

- Kasano ti panagriknayo no nasingpet kadakayo dagiti gagayyemyo?
- Ania iti panagkunayo ti panagriknada no nasingpettayo kadakuada?

Tulongan dagiti ubbing a makaawat a no kayatda ti maaddaan kadagiti gagayyem, masapul nga agbalinda a nasingpet a gagayyem mismo.

Agbibinninglay dagiti Aggagayyem

- No agay-ayamka iti (manginagan iti ay-ayam wenno maysa a banag), ket umasideg ti maysa a gayyem tapno makiay-ayam kenka, ania ti nasken nga aramidem?

Ilawlawag a no bay-antayo a makiay-ayam kadatayo ti sabali a tao, wenno no mangtedtayo iti sumagmamano iti adda kadatayo iti maysa a tao, mangibingbinglaytayo.

No dadduma ditay mabalin a bingayen ti adda kadayo, isu a pagsisinnublatantayo daytoy. Panagbibinninglay pay daytoy.

- No mabisin ti maysa kadagiti gagayyemyo ket adda kanenyo, ania ti nasken nga aramidenyo?

Estoria

Ipakita ti Biblia ket isalaysay ti estoria maipapan iti panangpakan ni Jesus iti lima ribu, a masarakan iti Juan 6:1–13. Yunay-unay a gapu ta imbingay ti ubing a lalaki ti kanenna, kinabaelan ni Jesus nga inusar ti bilegna nga agaramid iti umdas a taraon tapno mapakan ti amin a tattao.

Ipalagip kadagiti ubbing ti estoria maipapan ken ni Elias ken ti balo iti Sarepta (naisalaysay iti adalen 32). Naparaburan ti balo gapu ta imbinglayna ti taraonna uray no saan unay nga adu ti adda kenkuana.

- Ania ti mabalintayo nga ibinglay kadagiti gagayyemtayo?
- Ania ti mabalintayo nga ibinglay kadagiti pamiliatayo?

Kanta

Patakderen ket ipakanta kadagiti ubbing ti “Fun to Do” (*Children’s Songbook*, p. 253), nga aramaten ti binatang a “Panagpabulod (ay-ayam, libro wenna ania man nga isingasing dagiti ubbing) ket naragsak nga aramiden.” Paaramid kadagiti ubbing dagiti garaw a maigiddan kadagiti balikas.

Panagpabulod ay-ayam,
Naragsak ng’aramiden!
Panagpabulod ay-ayam,
Naragsak ng’aramiden!

(© 1963 ti D.C. Heath and Company. Naimaldit manen nga addaan pammalubos.)

Ipalagip kadagiti ubbing nga agtitinnulong dagiti aggagayyem, ket allukoyen ida a tumulong nga agdalus iti siled a pagadalan no kasapulan.

Pammaneknek

Iburaymo ti pammaneknekmo maipapan iti kinapateg ti panagbalin a naimbag a gayyem. Mabalinmo a salaysayen ti bukodmo a padas maipapan iti maysa a gayyemmo. Ipalagip kadagiti ubbing a gagayyemtayo ti Nailangitan nga Ama ken ni Jesus ken ay-ayatendatayo. Allukoyen dagiti ubbing nga agbalin a nasingpet kadagiti gagayyemda iti daytoy a lawas.

Dagiti Aktibidad a Mangpadur-as iti Pannakaammo

Pumili iti sumagmamano kadagitoy nga aktibidad tapno usaren bayat ti adalen.

1. Kantaen wenna sawen dagiti balikas iti “ ‘Give,’ Said the Little Stream” (*Children’s Songbook* p.236), “Jesus Said Love Everyone” (*Children’s Songbook*, p. 262).
3. Patakderen dagiti ubbing ket paaramid ti garaw ti berso a “Patpatgek a Bassit a Gayyem”:

Addanak iti patpatgek unay a babassit a gayyem (*arakupen ti bagi*);

Makitkitak isuna iti inaldaw.

Ay-ayatek ti mannakigayyem a bassit a gayyem.

Agay-ayamkami iti kastoy:

Agay-ayamkami iti munieka (*agpammarang nga in-indayonen ti munieka iti takiagmo*);

Agsisinnippawkami iti bolami (*agpammarang nga ipasippawmo ti bola*);
Agmartsakami pay a kasla soldado (*agmartsa a siuulimek iti pagtaktakderan*).
Agay-ayamkami iti indayon (*agpammarang nga agin-indayon*);
Agsarsarita ken agkankantakami;
Kas iti nasken nga ar-aramiden ti amin a nasingpet nga aggagayem
(*agdalikepkep ket agtung-ed*).

3. Mangitugot iti bassit a makan para iti klase (ammuen kadagiti nagannak dagiti ubbing tapno masigurado nga awan ubing ti adda alerdyina iti makan). Ikabil ti makan iti lugar a makita dagiti ubbing. Dakamaten no kasano ti kapintas daytoy a buybuyaen ket saludsoden kadagiti ubbing no kayatda nga ibinglayan ida iti daytoy. Saludsoden kadagiti ubbing no kasano koma ti panagriknada no imbinglaymo ti makan iti manmano laeng kadakuada. Ilawlawag no kasano ti panagrikna dagiti dadduma no saanda a mairaman. Ibinglay ti makan kadagiti ubbing.
4. Pagdrowingen ti tunggal ubing iti ladawan ti bagina a mangibingbinglay iti maysa a gayyem. Suratan ti tunggal ladawan iti *Mabalinko nga ibinglayan ti gayyemko*.
5. Salaysayen ti sumaganad a pudno nga estoria iti bukodmo a balikas:

Ti Sapatos a Tanso ti Murdongna

Idi immay dagiti nagkauna a kameng tapno agindeg iti Utah, kaaduan kadakuada ti nakurapay. Binubosda ti amin a kuartada a pinaggatang kadagiti banag para iti naunday a panagbaniaga ken pinaggatang kadagiti ramit a kasapulanda iti panagbangon kadagiti pagtaengan ken panagmula iti muyong. Gapu ta awan ti umdas a kuarta dagiti tao, adu nga ubbing ti addaan laeng iti sangaparis a sapatos, nga isuotda iti Domingo. Masansan a magmagnada a sakasaka kadagiti dadduma pay nga aldaw ti lawas.

Maysa a nagkauna a kameng nga agnagan iti Melinda ti addaan iti sangaparis a nadagsen, nalaad, ken tanso ti murdongna a sapatos nga isuotna bayat ti panawen ti lamiis. Iti kalgaw inggatangan ti pamiliiana iti baro a paris a napintas, naging-awa a sapatos para iti Domingo, ket isuotnanto dagitoy iti maysa a parada.

Awan a pulos ti sapatos ti kasingedan a gayyem ni Melinda, a ni Amanda. Nagladingit ni Melinda para ken ni Amanda ket dinawatna ti pammalubos ti inana a mangipabulod iti maysa a paris kadagiti sapatosna ken ni Amanda tapno isuotna iti parada. Bayat ti panangala ni Melinda iti daan, nadagsen, tanso ti murdongna a sapatosna tapno ipanna iti gayyemna, kinuna ni nanangna, "No mangibinglayka, nasken a mangtedka iti maysa a banag a kayatmonto mismo nga awaten."

Nagpanunot a nasayaat ni Melinda iti sumagmamano a minuto. Pinanunotna ti maipapan no ania ti inaramid koma ni Jesus. Pinanunotna no ania a paris ti sapatos ti ad-adda a magustuanna nga isuot, ket kalpasanna nangikeddeng. Impanna ti baro a sapatosna a para iti Domingo tapno isuot ti gayyemna, ket napan iti parada a nakasuot iti daan, nalaad, tanso ti murdongna a sapatosna. Ngem nakaragragsak unay ni Melinda! Ammona a mangibingbinglay laeng isuna a kas iti kayat ni Jesus a kayatna nga aramiden.

**Dagiti Mainayon
nga Aktibidad
para kadagiti
Babbabassit
nga Ubbing**

1. Mangisagana iti sumagmamano nga ay-ayam tapno ay-ayamen dagiti ubbing. Ilawlawag ti kinapateg ti panangisao iti “pangngaasim man” ken “agyamanak.” Allukoyen dagiti ubbing nga agpipinnabulodda kadagiti ay-ayam no panagay-ayam ken agtitinnulongda a mangidulin kadagiti ay-ayam no nalpasdan nga agay-ayam.
2. Bayat ti panangisaom iti sumaganad a berso, idauluan dagiti ubbing kadagiti garaw. Uliten no tarigagayan dagiti ubbing.

Mangaramid Nararagsak nga Aldaw

Dua a mata a kumita iti napipintas a banag nga aramiden (*itudo dagiti mata*),

Dua a bibig nga umisem iti agmalmalem (*umisem iti dakkel*).

Dua a lapayag a dumngeg iti sawen dagiti sabali (*ikabil dagiti ima iti lapayag*),

Dua nga ima a mangidulin kadagiti ay-ayam (*agpammarang a mangpidpidut kadagiti ay-ayam ket idulin dagitoy*).

Maysa a dila nga agsarita iti nasayaat a balikas iti inaldaw (*itudo ti ngiwat*),

Maysa a puso a naayat nga agrabaho ken agay-ayam (*paginniggemen dagiti ima iti batog ti puso*).

Dua a saka a naragsak nga agtartaray (*itudo ti saka*)—

Ti mangaramid nararagsak nga aldaw para iti amin.

3. Kantaen wenno sawen dagiti balikas iti “I Have Two Little Hands” (*Children’s Songbook*, p. 272).

Panggep

Tapno allukoyen ti tunggal ubing a mangipeksa iti ayat iti dadduma babaen dagiti nasayaat a balikas ken aramid.

Panagsagana

1. Sikakararag nga adalen ti Mateo 7:12; Marcos 10:13–16; Lucas 10:30–37; ken Juan 13:34.
2. Sublien nga adalen ti estoria manipud iti adalen a maipapan iti panangagas ni Jesus iti bulsek a lalaki (kitaen iti Juan 9:1–7).
3. Agaramid iti sinanpuso a papel para iti tunggal ubing iti klase. Isurat ti *ay-ayatenka* iti tunggal puso.
4. Dagiti kasapulan:
 - a. Biblia.
 - b. Ladawan 1-3, Ni Jesus a Cristo (Pakete ti Ladawan ti Arte ti Ebanghelio 240; 62572 864); ladawan 1-43, Ni Jesus a Mangag-agas iti Bulsek (Pakete ti Ladawan ti Arte ti Ebanghelio 213; 62145 864); ladawan 1-48, Dagiti Ubbing nga Agay-ayam kadagiti *Bloke*; ladawan 1-62, Ti Naimbag a Samaritano (Pakete ti Ladawan ti Arte ti Ebanghelio 218; 62156 864).
5. Aramidem dagiti nasken a panagsagana para kadagiti ania man nga aktibidad a mangpadur-as iti pannakaammo a kayatmo nga usaren.

Dagiti Aktibidad iti Pannakasursuro

Mangawis iti maysa nga ubing a mangted iti pangrugi a kararag.

Aktibidad a Pangawis
iti Panagdengngeg

Ipakita ti ladawan 1-48, Dagiti Ubbing nga Agay-ayam iti *Bloke*.

- Ania ti ar-aramiden dagitoy nga ubbing?
- Iti panagkunayo aggagayyem dagitoy nga ubbing?
- Kasano ti panangtrato dagiti aggagayyem iti tunggal maysa?

Ipalagip kadagiti ubbing a tratuen iti kinaasi dagiti aggagayyem ti tunggal maysa. No naasitayo kadagiti sabali, pakpakitaantayo ida iti ayat.

Kanta

Kagiddan dagiti ubbing, kantaen wenno sawen dagiti balikas iti “Jesus Said Love Everyone” (*Children’s Songbook*, p. 61), nga aramaten dagiti garaw a naipakita iti baba:

Ayaten tunggal maysa (*unnaten a nasayaat dagiti takiag*);
Kuna ni Jesus (*agtung-ed-tung-ed*).

No pusom napno’t ayat (*iparabaw dagiti ima iti batog ti puso*).
Ayatendaka (*arakupen ti bagi*).

Impakita ni Jesus ti Ayatna kadagiti Dadduma Babaen ti Panagbalinna a Naasi

Ipakita ti ladawan 1-3, Ni Jesus a Cristo, ket ibaga kadagiti ubbing a kinuna ni Jesus kadatayo a tratuentayo dagiti dadduma a kas iti kayattayo a panangtrato dagiti dadduma kadatayo. Ipakita ti Biblia ket basaen ti Mateo 7:12 agingga iti *kasta met ti aramidenyo kadakuada*. Ilawlawag a ti kayat a sawen daytoy a nasantuan a kasuratan a no kayattayo a manangngaasi dagiti dadduma kadatayo, nasken a manangngaasitayo met kadakuada.

Estoria

Iparang ti ladawan 1-43, Ni Jesus a Mangag-agas iti Bulsek. Bay-an a tulongandaka dagiti ubbing a mangisalaysay iti estoria a naipakita iti ladawan (kitaen iti Juan 9:1–7).

- Kasano a nangngaasi ni Jesus iti bulsek a lalaki?

Estoria

Isalaysay ti estoria maipapan iti panangbendision ni Jesus kadagiti babassit nga ubbing, a masarakan iti Marcos 10:13–16.

- Kasano a nangngaasi ni Jesus kadagiti ubbing?

Yunay-unay a binubos ni Jesus ti biagna a timmultulong iti dadduma a tattao. Babaen ti panagbalinna a naasi, impakpakita ni Jesus ti ayatna kadagiti sabali. Ilawlawag a binilinnatayo ni Jesus nga agiinnayat. Ibasa ti Juan 13:34 kadagiti ubbing. Paulit kadagiti ubbing ti “agayan-ayatkayo iti maysa ken maysa kas iti panagayatko kadakayo” iti sumagmamano a gundaway.

Kanta

Kagiddan dagiti ubbing, kantaen wenno sawen dagiti balikas iti “Love One Another” (*Children’s Songbook*, p. 136).

Kas ‘ti ayatko,
Agiinnayatkayo.
Baro a bilin:
Agiinnayatkayo.
Maammuan tattao
Dakay disipulok,
No tunggal maysa
Ayatenyo.

(© 1961, 1989 ni Luacine C. Fox. Naaramat nga addaan pammalubos.)

Maipakitayo ti Ayattayo iti Dadduma Babaen ti Panagbalin a Naasi

Estoria

Ipakita ti ladawan 1-62, Ti Naimbag a Samaritano, ket isalaysay ti estoria maipapan iti naimbag a Samaritano, a masarakan iti Lucas 10:30–37.

- Asino ti naasi iti estoria?
- Ania ti inaramid ti Samaritano tapno tulongan iti lalaki a nadangran?

Tulongan dagiti ubbing nga agpanunot kadagiti wagas a pakapagbalinanda a naasi iti dadduma. Paibaga kadakuada dagiti kapanunotanda iti dadduma a miembro ti klase.

Ilawlawag a no dadduma narigat ti agbalin a naasi iti maysa a tao gapu ta mabalina a kasla saan a mannakigayyem wenno maisabsabali kadatayo dayta a tao. Tulongan dagiti ubbing a makaawat a kasapulan ti tunggal maysa ti matrato a

siaasi. Uray no kasla saan a mannakigayyem wenna maisabsabali kadayo dagiti tao (kas pagarigan, no sabali ti maris ti kudilda wenna addaanda iti pagkurangan), nasken a tratuentayo ida a siaasi.

Pagsasaritaan maipapan iti pateg ti panangipakita iti ayat ken panangngaasi kadayo pamiliatayo.

- Kasano a maipakitayo ti ayatyo iti amayo? iti inayo? kadayo kakabsatyo?

Yunay-unay a no manangngaasitayo kadayo pamiliatayo, saan laeng a dagiti pamiliatayo ti naragsak, no di ket naragsak pay ti Nailangitan nga Ama ken ni Jesus.

Ilawlawag a no dadduma dagiti maladaga wenna babbabassit nga ubbing ket agala wenna agbuong kadayo banag a kukuatayo. Tulongan dagiti ubbing a makaawat a saan a kanayon a maawatan dagiti babassit unay nga ubbing no ania ti ar-aramidenda. Nasken a tratuentayo ida a siaasi ket saan a kapungtot ida. No addaantayo kadayo mabuong a banag, nasken a yadayotayo iti magaw-at dagiti babassit nga ubbing.

- Kasano a maipakitayo ti ayat iti Nailangitan nga Ama ken ni Jesus?

Yunay-unay a maipakitayo ti ayat iti Nailangitan nga Ama ken ni Jesus babaen ti panagtungpal kadayo bilin, babaen ti panagbalin a naraem iti simbaan, ken babaen ti panagbalin a naasi ken manangtulog kadayo adda iti aglawlawtayo.

Maipakitayo ti Ayat Babaen ti Panagsarita iti Nasayaat

Aktibidad

Dawaten kadayo ubbing a surotenda dagiti pangiturong iti baba. Kalpasan nga aramiden dagiti ubbing ti tunggal garaw, agyaman kadakuada iti panangsurotenda iti pangiturong.

1. Pangngaasiyo ta tumakderkayo.
2. Pangngaasiyo ta agtugawkayo.
3. Pangngaasiyo ta tumakderkayo ket agpuligorskayo. Pangngaasiyo ta agtugawkayo. Pangngaasiyo ta tumakderkayo manen.
4. Pangngaasiyo ta unnatenyoy dagiti imayo nga ipangato iti ngatuen ti uloyo.
5. Pangngaasiyo ta agtugawkayo a siuulimek.

- Ania dagiti nadayaw, wenna nasayaat a balikas nga insaok?
- Kasano ti panagriknayo no sawen kadakayo ti maysa a tao ti “pangngaasim” ken “agyamanak” kadakayo?

Tulongan dagiti ubbing a makaawat a no kayattayo nga agsao iti nasayaat kadayo dagiti dadduma, nasken nga agsaotayo iti nasayaat kadakuada.

Ipalagip kadayo ubbing dagiti dadduma pay a nadayaw a balikas, kas iti “Ladingitek” ken “Dispensarennak koma,” ken dagiti kasasaad a nasken a pakausaran dagita a balikas. Damagen dagiti sumaganad a saludsod wenna dagiti maipada a maitutop iti kulturayo:

- Kasanokayo a dumawat iti inumen a danum a sidadayaw?
- Ania ti nasken a sawenyo no adda mangted kadakayo iti maysa a regalo?
- Ania ti mabalina a sawenyo no napaglidayyo ti maysa a tao?

- Ania ti mabalin a sawenyo tapno maawisyo a sidadayaw ti imatang ti maysa a tao? Ilawlawag nga uray no agsao dagiti dadduma iti saan a nasayaat kadatayo, nasken nga agsaotayo latta kadakuada iti nasayaat.

Kanta

Kantaen manen ti “Jesus Said Love Everyone” a kagiddan dagiti ubbing.

Pammaneknek

Dayawem dagiti ubbing kadagiti wagas a napaliwmo kadakuada iti panagbalinda a naasi. Ilawlawag a gapu ta ay-ayaten ti Nailangitan nga Ama ken ni Jesus ti tunggal maysa, maragsakanda no makitadatayo nga agbalin a naasi iti tunggal maysa. Iburay ti pammaneknek a kayat ti Nailangitan nga Ama ken ni Jesus nga agbalintayo a naasi. Ikkan ti tunggal ubing iti sinanpuso a papel. Ibagam kadagiti ubbing no ania ti ibagbaga dagita a balikas kadagiti puso, ket yebkasmu ti ayatmo para kadagiti ubbing.

Dagiti Aktibidad a Mangpadur-as iti Pannakaammo

Pumili iti sumagmamano kadagitoy nga aktibidad nga usaren bayat ti adalen.

1. Basaen dagiti sumaganad a pagarigan (wenno agaramidka iti sumagmamano a bukodmo), ket paingato kadagiti ubbing dagiti sinanpuso a papelda no ti nailadawan a garaw ket mangipakpakita iti panangngaasi wenno ayat. Paikabil kadakuada dagiti sinanpuso iti saklotda no ti garaw ket saan a mangipakpakita iti panangngaasi wenno ayat.

- Panagsisinnublat no agay-ayam iti maysa nga ay-ayam.
- Panagpasugnod.
- Panangtulong iti maysa nga ubing a nadangran.
- Panangdanog iti maysa a tao a nangpapungtot kenka.
- Pannagna a sidadayaw iti balay a pagmimiting.
- Panagkuna iti “pangngaasim” ken “agyamanak.”
- Panangilukat iti ridaw para iti maysa a tao.
- Panagringgor iti simbaan.
- Panangtulong iti panagdalus.

Ipalagip kadagiti ubbing a no manangngaasitayo kadagiti dadduma, ipakpakitatayo ti ayat, ket maragsakan kadatayo ti Nailangitan nga Ama ken ni Jesus.

2. Agpanunot iti sumagmamano a familiar a kasasaad a pakaaddaan dagiti ubbing iti gundaway nga agbalin a naasi ken mangipakita iti ayat iti dadduma. Isurat dagitoy a kasasaad kadagiti panid ti papel ket papili iti tunggal ubing ti maysa a panid ti papel. Basaen ti tunggal kasasaad ket paibaga iti ubing a nakapili iti daytoy no kasano ti panagtignay iti dayta a kasasaad. Mabalina a tarigagayam nga usaren dagiti sumaganad a pagarigan:

- Agkaduakayo nga agay-ayam iti gayyemmo, ket immay iti uneg ti kuarto ti sabali pay nga ubing. Ania ti nasken nga aramidem?
- Kayatmo ken ti kabsatmo a babai ti agay-ayam iti maymaysa nga ay-ayam. Ania ti nasken nga aramidem?

- Innala ti bassit nga adingmo a lalaki ti maysa a banag a kukuam. Ania ti nasken nga aramidem?
3. Usaren dagiti familiar a pagarigan manipud iti ward wenno lugaryo a masakupan, ilawlawag no kasano ti panangipakita iti panangngaasi ken ayat kadagiti addaan iti pagkurangan. Tulongan dagiti ubbing nga agpanunot kadagiti naipangpangruna a wagas a makatulongda iti maysa a tao nga adda pagkuranganna.
 - Kasano a maipakitatayo ti ayat iti maysa a tao a saan a makakita?
 - Kasano a maipakitatayo ti ayat iti maysa a tao a saan a makangngeg?
 - Kasano a maipakitatayo ti ayat iti maysa a tao nga agus-usar iti tugaw nga adda pilidna [wheel chair] wenno sarukod?
 4. Tulongan dagiti ubbing a makaawat nga uray no mabalin a sabali ti pagsasao ti sumagmamano a tattao wenno maiduma ti maris ti kudilda kadakuada annaknatayo amin ti Nailangitan nga Ama. Nasken nga agkikinnaasitayo amin iti tunggal maysa. Nasken a tratuentayo ti tunggal maysa kas iti kayattayo a pannakaratotayo. Ilawlawag a maiduma ti tunggal tao iti tunggal maysa iti maysa a wagas.

**Dagiti Mainayon
nga Aktibidad
para kadagiti
Babbabassit
nga Ubbing**

1. Basaen wenno kantaen dagiti balikas ti “Kindness Begins With Me” (*Children’s Songbook*, p. 145).
2. Tulongan dagiti ubbing a mangaramid iti sumaganad a berso ti aktibidad:

Makaakar ti maysa nga isem (*iduron dagiti suli ti ngiwat tapno umisem*),
 Isu a no mariknak ti liday (*iduron dagiti suli ti ngiwat tapno agmuregreg*),
 Padasek ti umisem (*iduron dagiti suli ti ngiwat tapno umisem*),
 Ket madagdagus a mariknak ti ragsak (*iparabaw ti agpada nga ima iti batog ti puso*)!

(Naadaw manipud iti Pat Graham, “Feeling Good, “*Friend*,” Mar. 1990, p. 21.)

Makapagbalinak a Naasi kadagiti Ayup

Adalen
35

Panggep Tapno tulongan ti tunggal ubing a makaawat iti kinapateg ti panagbalin a naasi kadagiti ayup.

Panagsagana

1. Sikakararag nga adalen ti Genesis 2:19–20; 6–8.
2. Dagiti kasapulan:
 - a. Biblia.
 - b. Ladawan 1-28, Panagparsua—Dagiti Sibibiag a Parsua (Pakete ti Ladawan ti Arte ti Ebanghelio 100; 62483 864); ladawan 1-30, Ni Noe ken ti Daong nga Addaan kadagiti Ayup (Pakete ti Ladawan ti Arte ti Ebanghelio; 62305 864).
3. Aramidem dagiti sumaganad a panagsagana para kadagiti ania man nga aktibidad a mangpadur-as iti pannakaammo a kayatmo nga usaren.

Dagiti Aktibidad iti Pannakasursuro

Mangawis iti maysa nga ubing a mangted iti pangrugi a kararag.

Dagiti Aktibidad a Pangawis iti Panagdengngeg Agpammarang a maysa nga ayup a familiar kadagiti ubbing. Papugtuan kadagiti ubbing no ania nga ayupka. Bay-an a maaddaan iti gundaway ti tunggal ubing nga agpammarang a maysa nga ayup idinto ta pugtuan dagiti dadduma nga ubbing no ania nga ayup isuna.

Inikkan ni Adan iti Nagan ti Tunggal Maysa kadagiti Ayup

Ipalagip kadagiti ubbing a nagplano ti Nailangitan nga Ama ket pinarsua ni Jesus ti amin nga ayup, ikan, tumatayab, ken insekto iti daga. Ipakita ti Biblia ket ilawlawag nga ibagbaga dagiti nasantuan a kasuratan kadatayo a pinanaganan ni Adan ti amin nga ayup (kitaen iti Genesis 2:19–20). Ipakita ti ladawan 1-28, Panagparsua—Dagiti Sibibiag a Parsua.

- Ania ti nagnagan dagiti ayup iti daytoy a ladawan? (Bay-an nga agsisinnublat dagiti ubbing iti panangitudo iti maysa nga ayup iti ladawan ken panangibaga iti nagan daytoy.)

Kayat ti Nailangitan nga Ama ken Jesus nga Agbalintayo a Naasi kadagiti Ayup

Estoria Ipakita ti ladawan 1-30, Ni Noe ken ti Daong nga Addaan kadagiti Ayup, ket sublien nga adalen ti estoria maipapan ken ni Noe ken ti Daong, a masarakan iti Genesis 6–8. Yunay-unay nga uray kaskasano naisalakan iti pannakalmes ti uray dua laeng iti tunggal kita ti ayup. Ipatpateg ti Nailangitan nga Ama ken ni Jesus dagiti ayup ket kayatda nga agyan dagitoy iti daga.

- Apay nga impan ni Noe dagiti ayup iti daong?
- Ania dagiti ayup a pagyamananyo nga impan ni Noe iti daong?

- Ania iti panagkunayo ti kayat ti Nailangitan nga Ama ken ni Jesus a panangtratotayo kadagiti ayup?

Estoria

Iti bukodmo a balikas, isalaysaymo ti sumaganad nga estoria maipapan ken ni Presidente Spencer W. Kimball, ti maikasangapulo-ket-dua a Presidente ti Simbaan:

Idi ubing pay ni Presidente Spencer W. Kimball, trabahona ti mangipan kadagiti baka iti maysa a pagpasturan agarup maysa ket kagudua a kilometro ti kaadayona iti pagtaenganna. Maysa nga aldaw, nagaramid iti bukodna a palsiit, maysa nga ay-ayam a mausarna a pagpunta iti batbato kadagiti poste ti alad ken puon dagiti kayo. Nagbalin a nakalalaing ket mapuntaanna ti maysa a kayo wenno poste ti alad nga adayo.

Natatayag a kayo ti nagtubo iti igid ti kalsada a pangipagnaanna kadagiti baka. Nadlaw ni Spencer nga adu dagiti babassit a tumatayab kadagita a kayo. Idi makitana dagiti tumatayab, nasulisog a mangpalsiit kadagito tapno maipakita a nalang nga agpalsiit. Ngem idi agangay nalagipna ti maysa a kanta a kinantana iti Primary. Kuna ti kanta, “Saan a patayen dagiti babassit a tumatayab. . . . Kukua ti Dios daytoy daga, ket mangted iti taraon kadagiti babassit kasta met kadagiti dadakkel a sibibiag a parsua.” Pinanunot ni Spencer dagita a balikas a kinantana. Inkeddengna a napateg dagiti tumatayab iti Nailangitan nga Ama, ket saan a rum-beng a patayen ida. Isu a kanayon a nagannad iti panagpalsiitna kadagiti lugar nga awan ti mapuntaanna nga ania man a tumatayab (kitaen iti Conference Report, Apr. 1978, p. 71; wenno *Ensign*, May 1978, p. 47).

- Kasano nga impakita ni Spencer W. Kimball ti panangngaasina kadagiti tumatayab?

Ibaga kadagiti ubbing a kayat ti Nailangitan nga Ama ken ni Jesus nga agbalintayo a naasi kadagiti amin nga ayup.

Kanta

Kantaen wenno sawen dagiti balikas iti “Kindness Begins With Me” (*Children’s Songbook*, p. 145).

Kayatko ti agsingsingpet,
Ta dayta ti nasken.
Kunak iti bagik, “Mangrugi
kaniak kinasingpet.”

- Adda kadi tarakenyo nga ayup?

Aktibidad

Awisen dagiti ubbing nga agsarita maipapan kadagiti tarakenda nga ayup ken no kasano nga aywananda dagitoy. Basaen dagiti sumaganad a binatang ket paingato kadagiti ubbing dagiti tammudoda no ti binatang ket maysa a nasayaat a wagas a panangtrato kadagiti taraken nga ayup. Paibaba kadakuada dagiti tammudoda no daytoy ket saan a nasayaat a wagas a panangtrato kadagiti taraken nga ayup.

- Pakanen ida iti nasayaat a taraon iti inaldaw.
- Malipatan a pakanen ida.
- Malipatan nga ikkan ida iti danum.
- Adda sidadaan a nadalus a danum nga inumenda.
- Mangted iti natalged, nagin-awa a lugar a pagturoganda.
- Pagtalinaeden a nakapupokda iti napudot a lugar iti agmalmalem.
- Ayaten ken asikasuen ida.

Pammaneknek

Ipalagip kadagiti ubbing a pinarsua ni Jesus dagiti ayup ken pasetda ti plano ti Nailangitan nga Ama. Kayat ti Nailangitan nga Ama ken ni Jesus nga agbalintayo a naasi kadagiti ayup. Ipeksam ti riknam maipapan iti maysa a taraken nga ayup wenno maipapan kadagiti ayup.

Dagiti Aktibidad a Mangpadur-as iti Pannakaammo

Pumili iti sumagmamano kadagitoy nga aktibidad tapno usaren bayat ti adalen.

1. Agaramid iti kopia ti koneho iti ungtong ti adalen para iti tunggal ubing, ket bay-an a koloran dagiti ubbing dagiti konehoda. Mangpipigket iti nabukel a kapas iti ipus ti tunggal koneho tapno mapagbalin a nadutdot daytoy.
2. Kantaen wenno sawen dagiti balikas iti “My Heavenly Father Loves Me” (*Children’s Songbook*, p. 228).
3. Usaren ti banniit manipud iti adalen 11 ken dagiti nagetteng a ladawan dagiti ayup a karagpin ti pagbasaan, bay-an nga agsisinnublat dagiti ubbing nga agbanniit iti ayup. No makatiliw ti tunggal ubing iti ayup, bay-an nga agsisinnublat dagiti ubbing a mangipakita kadagiti ayupda ken mangisarita no ania ti ammoda maipapan kadagitoy.
4. Agaramid iti etiketa nga agkunkuna iti “*Agbalinak a naasi kadagiti ayup*” para iti tunggal ubing nga isuot iti pagtaengan.
5. Tulongan dagiti ubbing a mangaramid kadagiti garaw iti sumaganad nga ay-ayam iti ima:

Ti Bassit a Kutingko

Nagtaray nga immuli iti kayo ti bassit a kutingko (“*paulien*” dagiti ramay ti kanawan nga ima iti kanigid a takiag)

Ket nagtugaw iti sanga a nangkita kaniak (*isadag ti kanawan nga ima iti kanigid nga abaga*).

Kinunak, “Umayka, muning,” ket bimmaba a timmaray (*pababaen dagiti ramay iti takiag*)

Ket kinnanna ti amin a taraon nga inkabilko iti pangananna (*isukog ti kanigid nga ima; pagpammarangen a kuting a mangmangan iti taraon ti kanawan nga ima*).

6. Patakderen dagiti ubbing ket paaramid dagiti garaw a kagiddandaka bayat ti panangisaom iti sumaganad a berso:

Noe

Nangbangon ni Noe iti nakadakkak a bilog (*unnaten dagiti takiag*);

Ammona no ania ti aramidenna (*ikabil ti ramay iti bangir ti musing*).

Nagmartilio, nagragadi, nagrukod isuna (*agaramid kadagiti garaw kas naibaga*)

Kas iti naibilin kenkuana (*itung-ed ti ulo*).

Ket inayaban ni Noe ti pamiliana (*agpayapay*)

Tapno magnada a mapan iti bilog (*magna a siuulimek iti pagtakderan*)—

Ket, sagdudua dagiti ayup a naglugan (*ingato ti dua a ramay*)

Iti bilog iti danum nga agtapaw (*agaramid iti garaw ti panagtapaw babaen kadagiti ima*).


Dagiti napuskol ken nangisit nga ulep naurnong a sangkamaysa (*ikabil dagiti ima iti ngatuen ti ulo*),
 Nangrugi a nagtudo iti napigsa (*pagwarsien dagiti ramay a tuladen ti panagtudo*)—
 Ket nalapunos ti sibubukel a daga (*agaramid iti garaw a pannakalapunos babaen iti ima ken takiag*);
 Awanen a namimpinsan ti daga (*italiaw ti ulo iti agsumbangir*).

Sitalged a nagtapaw ti bilog (*agaramid iti garaw ti panagtapaw babaen iti ima ken takiag*).
 Iti adu nga aldaw ken rabii (*ikabil dagiti agpada nga ima iti maysa a bangir ti rupa*).
 Ayingga a rimmuar manen ti init (*ikabil dagiti takiag a pasirkulo iti ngatuen ti ulo*)
 Ket naglawag a kasta unay pudot ken raniag.

Ket amin a danum alisto a namagaan (*pagkurusen dagiti takiag iti batog ti barukong*);
 Ti namaga a daga nagparang (*ukraden dagiti takiag ket unnaten dagiti ima*).
 Ti pamilia ni Noe nagyaman (*agdumog ken agdalikepkep*)
 A ti Dios kanayon nga asideg.
 (Naadaw manipud iti berso ni Beverly Spencer.)

**Dagiti Mainayon
 nga Aktibidad
 para kadagiti
 Babbassit
 nga Ubbing**

1. Bay-an a pagsasaritaan dagiti ubbing maipapan kadagiti ania man a taraken nga ayup nga adda kadakuada wenno kayatda a maaddaan. Ilawlawag kadagiti ubbing no kasano ti nasken a panangtrato ken panangaywantayo kadagiti taraken nga ayup.
2. Kantaen wenno sawen dagiti balikas ti “The World Is So Big” (*Children’s Songbook*, p. 235). Aramiden dagiti garaw kas naipakita iti baba:
 Nakadakkkel ken nakabukbukel ti lubong, (*agaramid iti dakkkel a nagtimbukel babaen kadagiti takiag*).
 Ket adda ditoy dagiti pinarsua ti Dios;
 Dagiti bantay (*isukog dagiti ima a kasla bantay iti ngatuen ti ulo*)
 Ken tantanap (*ikabil dagiti ima a nakapakleb iti sanguanan*)
 Ken dagiti kayo a nakataytayag (*unnaten nga ipangato dagiti takiag*),
 Ken dadakkkel nga ayup (*gumaw-at nga agpangato*)
 Ken babassit nga ayup (*gumaw-at nga agpababa*).
 Nakadakkkel, ken nakabukbukel ti lubong (*agaramid iti dakkkel a nagtimbukel babaen dagiti takiag*).
 Ay-ayatennatayo amin ti Dios; aduantayo iti parabur (*petpetan dagiti takiag ket arakupen ti bagi*).
3. Saggaysa nga ipakita ti sumagmamano kadagiti nagetteng a ladawan ti ayup, ket bay-an nga ibaga dagiti ubbing kenka no ania ti maipapan iti tunggal ayup, kas koma iti no sadino ti pagnanaedanda, no ania ti unida, ken no ania ti magusgustuanda maipapan iti daytoy.



Makapagbalinak a Nasayaat a Pagwadan

Panggep

Tapno tulongan ti tunggal ubing a mangipakita iti nasayaat a pagwadan kadagiti sabali babaen ti panangsurot iti pagwadan ni Jesus.

Panagsagana

1. Sikakararag nga adalen ti Mateo 4:19; Lucas 19:1–10; Juan 13:15; ken 3 Nephi 17:11–24.
2. Dagiti kasapulan:
 - a. Biblia ken Libro ni Mormon.
 - b. Sumagmamano a tugot a nagetteng manipud iti papel.
 - c. Ladawan 1-3, Ni Jesus a Cristo (Pakete ti Ladawan ti Arte ti Ebanghelio 240; 62572 864); ladawan 1-63, Ni Zaqueo iti Maysa a Kayo; ladawan 1-64, Ni Jesus a Makipagkarkarag kadagiti Nephite (62542 864).
3. Aramidem dagiti nasken a panagsagana para kadagiti ania man nga aktibidad a mangpadur-as iti pannakaammo a kayatmo nga usaren.

Dagiti Aktibidad iti Pannakasursuro

Mangawis iti maysa nga ubing a mangted iti pangrugi a kararag.

Aktibidad a Pangawis
iti Panagdengngeg

Kantaen wenno sawen dagiti balikas iti “Do As I’m Doing” (*Children’s Songbook*, p. 276), a kagiddan dagiti ubbing. Patulad kadagiti ubbing dagiti ania man a garaw nga aramidem, kas iti panangigaraw kadagiti takiagmo, panagsipat, wenno panagpammarang nga agtaytayab a kas iti tumatayab.

Siak tuladenyo;

Sumurotkayo!

Siak tuladenyo;

Sumurotkayo!

Nababa ken nangato,

Nabayag ken alisto,

Siak tuladenyo;

Sumurotkayo!

Siak tuladenyo;

Sumurotkayo. .

(© 1963 ti D.C. Heath and Company. Naimaldit manen nga addaan pammalubos.)

Ilawlawag kadagiti ubbing nga idi inaramidda dagiti garaw a kas iti inaramidmo, tultuladenda ti pagwadam. No tultuladentayo ti pagwadan ti maysa a tao, ar-aramidentayo ti ar-aramidenna. Ibaga kadagiti ubbing a kinuna ni Jesus, “Umaykay sumurot kaniak” (kitaen iti Mateo 4:19).

Imbaon ti Nailangitan nga Ama ni Jesucristo iti Daga Tapno Agbalin a Pagwadan Kadatayo

Iparang ti ladawan 1-3, Ni Jesus a Cristo. Ilawlawag a maysa kadagiti gapu ti immayan ni Jesus iti daga ket tapno agbalin a pagwadan kadatayo ken ipakitana

kadatayo no kasano ti agbiag. Perpekto ni Jesus. Kayatna a sawen nga inaramidna ti amin a banag iti umno a wagas. Ti wagas ti panagbiagna idi adda iti daga ket isu ti wagas a nasken nga ikarigatantayo a pagbiagan.

Lukiben ti Biblia ket ibasa ti Juan 13:15 kadagiti ubbing. Ibaga kadagiti ubbing a dagitoy ti balikas ni Jesus. Yunay-unay a kayattayo ti agbalin a kas ken ni Jesus ken sumurot iti pagwadanna.

- Kanta
- Tulongan dagiti ubbing a mangkanta wenno mangisao kadagiti balikas iti umuna a paset ti “I’m Trying To Be Like Jesus” (*Children’s Songbook*, p. 78).
- Ikarigatak a tuladen
Wagas ni Apo Jesus.
Ikarigatak a tuladen
Saona ken tignay.
(© 1980 ni Janice Kapp Perry. Naaramat nga addaan pammalubos.)
- Ania dagiti kita ti bambanag a nasken nga aramidentayo no ikarkarigatantayo a tuladen ni Jesus?
- Estoria
- Ipakita ti ladawan 1-63, Ni Zaqueo iti Maysa a Kayo, ket isalaysay ti estoria maipapan kada Jesus ken Zaqueo, a masarakan iti Lucas 19:1–10. Ilawlawag a nangipakita ni Jesus iti nasayaat a pagwadan para kadatayo idi nangngaasi ken ni Zaqueo. Uray no saan a magustuan dagiti dadduma a tao ni Zaqueo, kayat ni Jesus ti mapan iti balayna ket agbalin a gayyemna.
- Kasano a nangngaasi ni Jesus ken ni Zaqueo? (Kitaen iti Lucas 19:5.)
 - Ania iti panagkunayo ti panagrikna ni Zaqueo idi nangngaasi ni Jesus kenkuana?
- Kanta
- Kantaen wenno sawen dagiti balikas iti “Jesus Said Love Everyone” (*Children’s Songbook*, p. 61), nga usaren dagiti garaw a naipakita iti baba:
- Kunan Jesus patgen amin (*unnaten dagiti takiag*);
Tratuen ‘ti asi (*agtung-ed-tung-ed*).
No pusom mangipateg (*iparabaw dagiti ima iti batog ti puso*),
Patgendaka met (*arakupen ti bagi*).
- Estoria
- Ipakita ti ladawan 1-64, Ni Jesus a Makipagkarkararag kadagiti Nephite, ket isalaysay ti estoria maipapan no kasano nga inkararagan ni Jesus dagiti ubbing a Nephite, a masarakan iti 3 Nephi 17:11–24. Ilawlawag a nangipakita ni Jesus babaen ti pagwadanna a nasken nga ikararagantayo dagiti dadduma.
- Asino ti inkararagan ni Jesus? (Kitaen iti 3 Nephi 17:21.)
 - Kasano iti panagkunayo ti panagrikna dagiti ubbing idi inkararagan ida ni Jesus?
 - Asino ti mabalintayo nga ikararagan?
- Ilawlawag dagiti tao a mabalintayo nga ikararagan, kas kadagiti miembro ti pamilya, dagiti tattao a masaksakit, dagiti misionario, ken dagiti dadaulotayo iti Simbaan.
- Aktibidad
- Iparang ti ladawan 1-63, Ni Zaqueo iti Maysa a Kayo, ken ladawan 1-64, Ni Jesus a Makipagkarkararag kadagiti Nephite, iti agsumbangir a suli ti siled, ket ikabil dagiti tugot a papel iti suelo nga agturong iti tunggal ladawan. Ipakanta wenno

paisao manen dagiti balikas iti umuna a paset ti “I’m Trying to Be Like Jesus” bayat ti panangsurotka kadagiti tugot nga agturong iti tunggal ladawan.

Agsardeng iti tunggal ladawan ket paisalaysay manen ti estoria kadagiti ubbing agingga iti kabaelanda. Tulongan dagiti ubbing a mangpanunot kadagiti wagas a pakapagbalinanda a nasayaat a pagwadan kas ken ni Jesus iti tunggal kasasaad. Kas pagarigan, mabalinda nga ipabulod dagiti ay-ayamda wenno makiay-ayam iti maysa nga ubing nga agkasapulan iti maysa a gayyem (Zaqueo), ken maikararaganda ti maysa a tao a masaksakit wenno agkasapulan iti naisangsangayan a tulong (panangikararag kadagiti ubbing a Nephite).

Tulongan dagiti ubbing a mangamiris a no ipakitada ti ayatda iti dadduma babaen ti panagbalinda a naasi ken babaen ti panangikararag kadakuada, tultuladenda ti pagwadan ni Jesus. Ipakpakitada pay ti nasayaat a pagwadan kadagiti dadduma a tao.

Kanta

Kantaen wenno sawen dagiti balikas iti koro ti “I’m Trying To Be Like Jesus” (*Children’s Songbook*, p. 78), nga usaren dagiti garaw a nailadawan iti baba:

Aginnayatkay a kas ken Jesus (*arakupen ti bagi*).

Kinaimbagyo ipakitayo (*alamanuen ti sabali tao*).

Naayat ti aramid ken isipyo (*agpammarang nga ulo ti ayup ti maysa nga ima ket aprosan daytoy nga usaren ti sabali nga ima*),

Ta daytoy insuron Jesus (*pagdekketen dagiti ima, a nakasango iti ngato dagiti dakulap, kas maysa a libro ti nasantuan a kasuratan*).

(© 1980 ni Janice Kapp Perry. Naaramat nga addaan pammalubos.)

Makapagbalintayo a Nasayaat a Pagwadan kadagiti Dadduma

Ilawlawag a kas iti panagtungpal dagiti ubbing iti pagwadan ni Jesus, sipsiputan dagiti dadduma a tattao ida ken sursurotenda dagiti pagwadanda.

Aktibidad

Paumayen ti maysa nga ubing iti sango ti klase ket pagbalinen a dadaulo.

Pangidauluen ti ubing kadagiti dadduma pay nga ubbing kadagiti garaw kas iti panagsipat, panagpulgos, wenno panaglagtolagto. Uliten ti aktibidad tapno maikkan iti gundaway dagiti dadduma nga ubbing nga agbalin a mangidaulo.

Ilawlawag nga adda dagiti napatpateg pay a wagas tapno agbalin a pagwadan ngem iti no kasano ti panangigarawtayo iti bagitayo. Ibaga kadagiti ubbing a makapagbalinda a nasayaat a pagwadan babaen ti panagaramid kadagiti nasayaat a banag, kas iti panangibaga iti kinapudno, panagtungpal kadagiti inna ken ammada, panangipabulod kadagiti ay-ayamda, panagbalin a managraem iti simbaan, ken panangtulong kadagiti pamiliada.

- Ania ti mabalinyo nga aramiden tapno agbalin a nasayaat a pagwadan kadagiti dadduma?

Pagpanunoten ti tunggal ubing iti maysa a wagas a pakabagbalinanna a nasayaat a pagwadan ket paibaga iti klase no ania ti aramidennanto.

Pammaneknek

Isaritam ti maysa a panawen idi sinurotmo ti nasayaat a pagwadan ti maysa a tao. Ipeksam dagiti riknam maipapan iti kinapateg ti panangsurot iti pagwadan ni Jesus. Allukoyen dagiti ubbing a mangipakita kadagiti nasayaat a pagwadan kadagiti dadduma babaen ti panagaramid kadagiti banag nga aramiden koma ni Jesus.

Dagiti Aktibidad a Mangpadur-as iti Pannakaammo

Pumili iti sumagmamano kadagitoy nga aktibidad tapno usaren bayat ti adalen.

1. Agaramid iti simple a korona wenno kallugong manipud iti papel para iti tunggal ubing. Iti tunggal korona wenno kallugong, isurat ti *Makapagbalinak a nasayaat a pagwadan*. Ilawlawag dagiti wagas a makapagbalin dagiti ubbing a nasayaat a pagwadan bayat ti lawas.
2. Kantaen ti “Jesus Once Was a Little Child” (*Children’s Songbook*, p. 55), “Jesus Wants Me for a Sunbeam” (*Children’s Songbook*, p. 60), wenno “I Am Like a Star” (*Children’s Songbook*, p. 163).
3. Mangipakita iti *flashlight* wenno sabali a bassit a silaw. Pagsilawen daytoy ket ilawlawag no kasano a makatulong kadagiti tao ti silaw manipud iti *flashlight* bayat ti panaglawag daytoy. Basaen iti napigsa ti umuna a binatog ti 3 Nephi 12:16. Ilawlawag kadagiti ubbing a kaslada kadagiti babassit a silaw no mangipakitada kadagiti nasayaat a pagwadan, gapu ta sipsiputan ken sursuroten ida dagiti sabali a tao. Bay-an nga iggaman ti maysa nga ubing ti *flashlight* ket mangidaulo kadagiti dadduma a manglawlaw iti siled. Uliten agingga a maaddaan iti gundaway ti tunggal ubing nga agtarigagay tapno agbalin a dadaulo.
4. Patakderen dagiti ubbing ket paaramid dagiti garaw iti sumaganad a berso ti aktibidad:

Ay-ayaten ni Jesus dagiti Babassit nga Ubbing

Agtataray dagiti sumagmamano nga ubbing iti natapok a kalsada (*agtaray iti pagtaktakderan*),

Pinagdardaras dagiti babassit a sakada (*itudo iti saka*),

Tapno iti kaaduan makisekseka (*agpammarang a makidinnuron iti kaaduan*)

Immasideg ken Jesus, tapno makitada ti rupana (*agtil-ay ket kumita iti aglawlaw*).

Sumagmamano a nataengan ti nagkuna, “Papanawen ida” (*ingato ti ima a kasla agkunkuna iti “sumardengkayo”*).

“Adu ti ar-aramidenna tapno sanguenna dagiti ubbing ita” (*agrupanget ket agwingiwing*).

Ngem ni Jesus kinunana, “Bay-anyo nga umasidegda kaniak” (*pumayapay*).

“Napategda ken ay-ayatek ida” (*arakupen ti bagi*).

(Naadaw manipud iti Margaretta Harmon iti *Bible Story Finger Plays and Action Rhymes* [Cincinnati: Standard Publishing, 1964], p. 27.)

Dagiti Mainayon nga Aktibidad para kadagiti Babbassit nga Ubbing

1. Dawaten kadagiti ubbing nga ulitenda ti balikas a *pagwadan*. Ibaga kadakuada a ti nasayaat a pagwadan ket maysa a tao a kayatmo a pagbalinan no dumakkelka. Makapagbalin dagiti nagannak kadatayo a nasayaat a pagwadan kadatayo. Dawaten kadagiti ubbing a mangibagada kadagiti banag nga ar-aramiden dagiti nagannak kadakuada a mangaywan kadakuada wenno mangparagsak kadakuada.

2. Paggiinniggemen dagiti ubbing ket paggarawen ida iti patimbukel bayat ti panagkanta wenno panangisaoyo kadagiti balikas iti “When We’re Helping” (*Children’s Songbook*, p. 198). Uliten ti kanta iti mamin-adu a daras agingga a kayatmo, a sukatan ti *ina* iti *ama*, *manong*, *manang*, *lola*, wenno *lolo*.
3. Ay-ayamen ti “Suroten ti Pangulo” a kadua dagiti ubbing. Patakderen dagiti ubbing a nakalinia. Ti umuna nga ubing iti linia ket agtaray, agkingking, aglagto, wenno agaramid iti sumagmamano a sabali pay a garaw iti maysa a bangir ti siled. Tuladen dagiti dadduma pay nga ubbing ti umuna nga ubing, nga aramidenda no ania ti inaramidna. Kalpasanna mapan ti umuna nga ubing iti ungtu ti linia, ket agbalin ti sumaruno nga ubing a baro a dadaulo. Itultuloy agingga a maikkan ti tunggal ubing iti gundaway nga agbalin a dadaulo.

Panggep

Tapno papigsaen ti tarigagay ti tunggal ubing nga agbalin a napudno.

Panagsagana

1. Sikakararag nga adalen ti Exodo 20:15–16; Alma 53:16–22; 56:44–47; ken Pagannurotan ti Pammati 1:13. Kitaen met iti *Pagbatayan ti Ebanghelio* (31110 864), maika-31 a paset.
2. Agaramid iti simple a bedbed ti ulo a naaramid manipud iti papel wenno lupot para iti tunggal ubing. Isurat iti tunggal bedbed ti ulo ti *Makapagbalinak a napudno*.
3. Dagiti kasapulan:
 - a. Biblia ken Libro ni Mormon.
 - b. Maysa a butones wenno sabali a bassit a banag.
 - c. Ladawan 1-13, Joseph Smith (Pakete ti Ladawan ti Arte ti Ebanghelio 400; 62449 864); ladawan 1-65, Dua Ribu nga Agtutubo a Mannakigubat (Pakete ti Ladawan ti Arte ti Ebanghelio 313; 62050 864).
4. Aramidem dagiti nasken a panagsagana para kadagiti ania man nga aktibidad a mangpadur-as iti pannakaammo a kayatmo nga usaren.

Dagiti Aktibidad iti Pannakasursuro

Mangawis iti maysa nga ubing a mangted iti pangrugi a kararag.

Aktibidad a Pangawis iti Panagdengngeg

Paumayem ti maysa nga ubing iti sango ti klase. Pagdinneketen nga italmeg dagiti dakulapmo nga adda ti butones wenno sabali a bassit a banag iti uneg daytoy. Bay-an a pagdinneketen nga italmeg dagiti dadduma pay nga ubbing dagiti dakulapda. Saggaysa nga asitgam dagiti ubbing, nga ikabilmo dagiti imam iti tengnga dagiti dakulapda. Itinnagmo ti butones kadagiti ima ti maysa nga ubing. Bay-am a pagtalinaeden dagiti ubbing a nagdekket dagiti dakulapda, nga agpampamarang nga adda kadakuada ti butones. Sawen ti, “Butones, butones, asino ti akin-iggem iti butones?” Papadas iti ubing nga adda iti sango a pugtuanna no asino nga ubing ti akin-iggem iti butones babaen ti panagsaludsod, “(Nagan), adda kadi kenka ti butones?” Ibaga kadagiti ubbing a nasken a sumungbatda iti pudno, “Awan, awan kaniak ti butones” wenno “Wen, adda kaniak ti butones.”

Ay-ayamenyo ti ay-ayam iti sumagmamano a gundaway, a piliem dagiti dadduma pay nga ubbing a mangpugto wenno mangipasa iti butones. Dayawem dagiti ubbing iti panagbalinda a napudno.

Kayat ti Nailangitan nga Ama ken Jesus nga Agbalintayo a Napudno

Ipakita ti ladawan 1-13, Joseph Smith. Ibaga kadagiti ubbing nga insurat ni Propeta Joseph Smith, “Mamatikami iti panagbalin a napudno” ti maikasangapulo- ket-tallo a pagannurotan ti pammati. Tulongam dagiti ubbing a mangyulo kadagiti- toy a balikas.

- Ania ti kayat a sawen ti agbalin a napudno?

Ilawlawag a ti panagbalin a napudno iramanna ti panangibaga iti kinapudno, saan a panangala kadagiti banag a kukua ti maysa a tao, ken panangtrato kadagiti daduma a tao nga awan ti idaddaduma.

Ipakita ti Biblia ket ibaga kadagiti ubbing nga inyeg ni Moises ti Sangapulo a Bilin kadagiti taona (kitaen iti Exodo 20). Ilawlawag nga inted ti Nailangitan nga Ama ken ni Jesus ti dua a bilin ken ni Moises maipapan iti kinapudno: “Dika agtakaw” ken “Dika agsaksi iti ulbod.” Basaen ti Exodo 20:15–16 iti napigsa.

- Ania ti kayat a sawen ti agtakaw?

Ilawlawag a ti agsaksi iti ulbod kayatna a sawen ti agsao iti maysa a banag a saan a pudno.

Kanta

Kantaen wenno sawen dagiti balikas iti umuna a paset ti “I Believe in Being Honest” (*Children’s Songbook*, p. 149).

Mamatiak iti panagbalin a napudno;
Mamatiak iti panagbalin a pudno,
Nasken a mangrugi kaniak ti kinapudno
Iti amin nga isaok ken aramidko.

Aktibidad

Iladawan ti sumagmamano a garaw kadagiti ubbing. Patakderen dagiti ubbing no kinapudno ti garaw ket pagtugawen no kinaulbod ti garaw. Usaren dagiti pagarigan iti baba wenno agaramidka iti bukodmo:

- Panangawatyo iti awis idinto nga imbaga ni nanangyo a diyo aramiden daytoy.
- Panangibagayo iti kinapudno maipapan iti ar-aramidenyo.
- Panangalayo iti maysa a banag a saanyo a kukua.
- Panangakoyo iti panangaramid iti maysa a banag a saan nga umno.
- Panangibagayo nga inaramid ti maysa a tao ti maysa a banag a saan nga umno idinto ta dakayo a talaga ti nangaramid.
- Pannakakitayo iti sumagmamano a kuarta wenno maysa a banag a kukua ti maysa a tao ken panangisubli daytoy iti akinkukua.

Kiddawen kadagiti ubbing a mangisalaysayda iti padasda maipapan iti panagbalinda a napudno.

- Kasano ti panagriknayo no napudnokayo?
- Kasano ti panagriknayo no saankayo a napudno?
- Apay a no dadduma mabalin nga agbutengkayo nga agbalin a napudno? (Mabalin a madusakayo wenno mapalidayyo ti maysa a tao.)

Tulongan dagiti ubbing a makaawat a nasaysasayaat ti riknatayo no napudnotayo, uray no narigat nga aramiden no dadduma.)

Maparaburantayo No Napudnotayo

Estoria

Ipakita ti ladawan 1-65, Dua Ribu nga Agtutubo a Mannakigubat. Isalaysay ti estoria maipapan iti dua ribu nga agtutubo a mannakigubat, a masarakan iti Alma 53:16–22 ken 56:44–57, nangnangruna iti Alma 53:20–21. Ilawlawag a maysa a gapu ti kinalaing unay dagitoy agtutubo a lallaki ket ti kinapudnoda. Ibaso iti napigsa ti maudi a

paset ti Alma 53:20 (manipud iti *lallakida a napudno*). Ilawlawag a ti panagbalin a napudno kayatna a sawen ti panagbalin a mapagtalkan. Gapu ta napudno dagitoy nga agtutubo a mannakigubat, nasaluadanda iti pagbabakalan. Naparaburanda gapu iti kinapudnoda, pammati, ken kinaturedda. Maparaburantayonto met no napudnotayo.

- Kasano a naparaburan dagiti dua ribu nga agtutubo a mannakigubat gapu iti panagbalinda a napudno? (Kitaen iti Alma 56:54–56.)

Aktibidad

Ikabil dagiti bedbed ti ulo kadagiti ubbing. Pagpammarangen ida nga isuda dagiti dua ribu nga agtutubo a mannakigubat ket pagmartsaen ida iti lawlaw ti siled bayat ti panagsipatmo. Pagsardengen ida iti panagmartsa no isardengmo ti agsipat, ket dawaten iti maysa nga ubing nga ibagana no kasano a makapagbalin isuna a napudno. Rugian manen ti agsipat, ket uliten ti aktibidad agingga a maaddaan iti tunggal ubing iti gundaway a mangted iti sungbat.

Pammaneknek

Iburaymo ti pammaneknekmo a kayat ti Nailangitan nga Ama ken ni Jesus nga agbalintayo a napudno ken makariknatayo iti ragsak no napudnotayo.

Dagiti Aktibidad a Mangpadur-as iti Pannakaammo

Pumili iti sumagmamano kadagitoy nga aktibidad tapno usaren bayat ti adalen.

1. Isalaysaymo ti sumaganad nga estoria maipapan ken ni Jacob Hamblin ken ti anakna a lalaki iti bukodmo a balikas:

Maysa ni Jacob Hamblin kadagiti nagkauna a kameng a napan iti abagatan a Utah. Inayatna dagiti Indian a nagnaed idiy ken nakasursuro nga agsao iti pagsasaoda. Kanayon a napudno isuna kadagiti Indian, ket nasursuroda ti agtalek kenkuana. Maysa nga aldaw imbaon ni Jacob ti anakna a lalaki tapno isukat ti maysa nga urbon a kabalio iti maysa nga Indian para iti sumagmamano nga ules. Kinita a nasayaat ti Indian ti urbon a kabalio ket nangiruar iti sangasalansan nga ules. Kinuna ti anak a lalaki ni Jacob, “Saan nga umanay dayta.” Intultuloy ti Indian ti nangnayon kadagiti ules iti salansan. Idi napanunot ti anak ni Jacob nga addan umdas nga ules, naglugan a nagawid, nagpanakkel nga immawat iti nakaad-adu nga ules a kasukat ti urbon a kabalio. Idi makita ni Jacob no kasano ti kaadu dagiti ules nga inyawid ti anakna, saan a naragsakan. Saan nga agpateg ti urbon a kabalio iti kasta ti kaaduna nga ules. Impaisubli ni Jacob iti anakna ti kagudua dagiti ules iti Indian. Idi nakasubli ti ubing a lalaki, nagkatawa ti Indian ket kinunana, “Ammok a paisublinto ni Jacob dagitoy” (kitaen iti Jacob Hamblin, Jr., kas naisalaysay ken ni Louise Lee Udall, iti *A Story to Tell* [Salt Lake City: Deseret Book Co., 1945], 359–60).

Ilawlawag nga ammo ti Indian a napudno a lalaki ni Jacob Hamblin ket ipaisublina dagiti sobra nga ules. Mapagtalkan ti Indian ni Jacob gapu ta kanayon a napudno. Bay-an a yakem wenna isalaysay manen dagiti ubbing ti estoria.

2. Kantaen wenna sawen dagiti balikas iti “Jesus Was Once a Little Child” (*Children’s Songbook*, p. 55).
3. Agusar kadagiti simple a papet (puppets), kas iti medias wenna supot a papel, tapno yakem dagiti kasasaad a pakapagpilian ti maysa a tao iti nagbaetan ti panagbalin a napudno ken panagbalin a naulbod. Usarem dagiti pagarigan iti baba wenna agaramidka iti sumagmamano a bukodmo:

- Nakabuongka iti maysa a pinggan ket dinamag ni nanangmo no asino ti akin-aramid iti daytoy.
- Tumultulongka nga agpidut ti sumagmamano a kuarta a natinnag, ket masulsulisogka a mangala iti sumagmamano.
- Nanganka iti dua a cookies kalpasan nga imbaga kenka ni tatangmo a dimo aramiden. Dinamag ni tatangmo no nanganka iti cookies.

Pagsinnublaten dagiti ubbing iti panangusar iti papet (puppets) ken panangibaga no ania ti nasken nga aramidenda iti tunggal kasasaad.

**Dagiti Mainayon
nga Aktibidad
para kadagiti
Babbabassit
nga Ubbing**

1. Damagen kadagiti ubbing no adda kabalio iti siled. Ibaga kadakuada nga uray no kinitada a naimbag, saanda a makasapul iti kabalio iti siled gapu ta awan daytoy. Saan a kinapudno ti panangibaga nga adda kabalio iti siled. Damagen no makitada ti _____ (manginagan iti maysa a banag a nalaka a makita dagiti ubbing). Ilawlawag a kinapudno ti panangibaga nga adda iti siled daytoy a banag. Ibaga kadagiti ubbing a no ibagada ti maysa a banag a pudno wenno agpayso, napudnoda.
2. Dawatem kadagiti ubbing nga ingatoda ti agpada nga imada no sawem ti maysa a banag a pudno ken ibabada ti agpada nga imada no sawem ti maysa a banag a saan a pudno. Agaramid kadagiti simple ngem madlaw a binatang, kas iti “Adda sabongko iti buokko,” “Nakaaruatak iti bado,” “Nalabaga ti pantalon ni Juan,” wenno “Nakatugawka iti maysa a tugaw.”
3. Kantaen wenno sawen dagiti balikas iti “Do What Is Right” (*Children’s Songbook*, p.158).

Panggep Tapno allukoyen ti tunggal ubing a mangipakita iti ayat iti Nailangitan nga Ama ken ni Jesus babaen ti panagbalin a managraem.

Panagsagana

1. Sikakararag nga adalen ti Exodo 3:1–10.
2. Dagiti kasapulan:
 - a. Ladawan 1-19, Ni Cristo ken dagiti Ubbing (Pakete ti Ladawan ti Arte ti Ebanghelio 216; 62467 864); ladawan 1-66, Ni Moises ken ti Maur-uram a Kayo, (Pakete ti Ladawan ti Arte ti Ebanghelio 107; 62239 864;) ladawan 1-67, Maysa a Naraem a Klase.
3. Aramidem dagiti nasken a panagsagana para kadagiti ania man nga aktibidad a mangpadur-as iti pannakaammo a kayatmo nga usaren.

Dagiti Aktibidad iti Pannakasursuro

Mangawis iti maysa nga ubing a mangted iti pangrugy a kararag.

Aktibidad a Pangawis iti Panagdengngeg Dawaten kadagiti ubbing nga agdalikepkepda ket agtugawda a siuulimek bayat ti panagkanta wenno panangisaoyo kadagiti balikas iti “Reverently, Quietly” (*Children’s Songbook*, p. 26) iti nakapsut a timek. No ammo dagiti ubbing ti kanta, mabalinda ti makigiddan iti panagkanta.

Naulimek, naraem, sika ti panunoten;
Naulimek, naraem, ti inkami kantaen.
Naulimek, naraem, ikararagmi,
Pagyanem Espiritum ditoy pusomi.

No nalpaskayo, agyaman kadagiti ubbing iti panagtugawda a siuulimek.

Makapagbalintayo a Naraem iti Simbaan

Ipakita ti ladawan 1-67, Maysa a Naraem a Klase.

- Sadino ti yan dagitoy nga ubbing?
- Ania ti ar-aramidenda?
- Ania iti panagkunayo ti pampanunotenda?
- Kasano ti panagtignayyo no umaykayo iti Primary?

Ilawlawag a no umaytayo iti simbaan nasken nga agtignaytayo iti umisu a wagas. Maaw-awagan daytoy iti panagbalin a managraem.

Paulit kadagiti ubbing ti balikas a *managraem* iti sumagmamano a gundaway.

- Ania ti panagkunayo ti kayat a sawen ti panagbalin a managraem?

Ilawlawag a ti panagbalin a managraem kayatna a sawen ti panagaramid kadagiti banag a mangipakita iti ayat ken respetotayo iti Nailangitan nga Ama ken ni Jesus. Maipakitatayo ti ayattayo para kadakuada kadagiti sumaganad a wagas (bay-an

nga ipakita dagiti ubbing ti sumagmamano kadagitoy bayat ti panangisaritam iti maipapan kadagitoy):

- Pannagna a siuulimek ken panagsarita a silalanay.
- Panagtugaw a siuulimek ken panagdengngeg kadagiti kararag ken adalen.
- Panangingato kadagiti imatayo no kayattayo a sawen ti maysa a banag.
- Panangidalikepkep kadagiti imatayo.
- Panangpatalinaed a nadalus ti balay a pagmimiting.

llawlawag a no aramidentayo dagitoy a banag, ammo ti Nailangitan nga Ama ken ni Jesus nga ay-ayatentayo ida ken naragsaktayo nga adda iti simbaan.

Kanta

Kagiddan dagiti ubbing, kantaen wenno sawen dagiti balikas iti “I Want to Be Reverent” (*Children’s Songbook*, p. 28). Ulitin no tarigagayan.

Kayatko’t agbalin a naraem,
Tapno maipakitak ayatko kenka.
Dumngegak a siuulimek,
Gapu ta mangrugi kaniak panagraem.

- Apay a nasken nga agbalintayo a managraem iti Primary?

Ipalagip kadagiti ubbing a no managraemtayo, mabalintayo ti dumngeg kadagiti mannursurotayo ket masursurotayo ti maipapan iti Nailangitan nga Ama ken ni Jesus. No managraemtayo, tultulongantayo met dagiti dadduma nga agbalin a managraem.

- Ania a pasdek ti yantayo ita?
- Akinkukua iti daytoy a balay?

llawlawag a kukua ti Nailangitan nga Ama ken ni Jesus ti balay a pagmimiting. Daytoy ti lugar a yaayantayo tapno agsursuro iti maipapan kadakuada no ania ti kayatda nga aramidentayo.

Aktibidad

Aramiden ti sumaganad nga ay-ayam iti ima a kagiddan dagiti ubbing. Agparnuay kadagiti garaw ti ima a mangipakita kadagiti paset ti balay a pagmimiting.

Ti Balay a Pagmimiting

Dagitoy dagiti diding ti napintas a balay;
Daytoy ti natayag a torre.
Dagitoy dagiti tawa a mangpaspastrek iti lawag
Ken dagiti ridaw a nakalukat para iti tunggal maysa.
Daytoy a balay inaramid dagiti managayat nga ima
Kas maysa a lugar a pagkantaan ken pagkararagan.
Agdalikepkep ken agdumogtayo koma (*agdalikepkep ken agdumog*),
Ket agyamantayo para itoy a balay ita.

- Ania dagiti sumagmamano a banag a nasken nga aramidenyo iti balay a pagmimiting?
- Ania dagiti sumagmamano a banag a nasken a diyo aramiden iti balay a pagmimiting?

Tulongan dagiti ubbing a makaawat nga adda dagiti lugar ken panawen iti balay a pagmimitinganan para iti panagtaray ken panagay-ayam, ngem iti kaaduan ti pasdek ken kadagiti Domingo nasken nga agbalintayo a managraem. Ilawlawag a malak-sid iti panagtugaw a siuulimek iti Primary ken iti kapilia, magna ken agsaratatayo a silalanay kadagiti pasilio.

Estoria

Mangisalaysay iti estoria maipapan kadagiti ubbing iti klaseyo nga um-umay iti Primary. Iraman no kasano ti karagsakda bayat ti panagtaraytaray ken panaglagto-lag toda iti dalanda nga agturong iti pasdek, no kasano ti pannagnada a siuulimek bayat ti iseserrekda iti uneg, ken no ania ti ar-aramidenda kabayatan ti miting ti sakramento ken Primary ket kalpasanna iti pasilio. Yunay-unay no kasano ti karaem dagiti ubbing no umayda iti simbaan.

Aktibidad

Sawen dagiti balikas iti “Two Happy Feet” (*Children’s Songbook*, p. 270) bayat ti pannagna a siuulimek ken siaannad dagiti ubbing iti lawlaw ti siled tapno saan nga agparnuay iti ringgor dagiti sapatosda.

Addaanak iti dua a babassit a saka a naragsak
 A mangipan iti sadino man a papanak.
 Usarek ida no kumingking ken lumagtoak,
 Ket ammok a makaringgorda.
 Ngem iti balay ti Nailangitan nga Amak
 Umaddang dagitoy a naulimek ken nainnayad
 Tapno awan ti makangngeg, uray no ipagpagnak
 Dagiti dua a babassit a sakak.

- Ania ti ar-aramidenyo babaen kadagiti sakayo iti pasilio ti Simbaan? iti kapilia? iti klase?
- Ania ti ar-aramidenyo babaen kadagiti imayo?
- Ania ti ar-aramidenyo babaen ti timekyo?

Maaddaantayo kadagiti Managraem a Rikna

Ipakitam ti ladawan 1-19, Ni Cristo ken dagiti Ubbing, ket ipeksam no kasano ti panagriknam no pampanunotem ni Jesucristo ken no kasano nga ipatpategnatayo. Ilawlawag a managraem a rikna dagitoy. Awisen dagiti ubbing a mangipeksa kadagiti riknada maipapan ken Jesus.

Estoria

Iparang ti ladawan 1-66, Ni Moises ken ti Maur-uram a Kayo, ket isalaysay ti estoria a masarakan iti Exodo 3:1–10. Yunay-unay dagiti naraem a rikna a narikna ni Moises idi nakisao ti Apo kenkuana manipud iti maur-uram a kayo ket inawaganna a mangidaulo kadagiti annak ti Israel a pumanaw iti Egipto. Basaen iti napigsa manipud iti Biblia ket ilawlawag ti paset ti bersikulo 5: “Ikkatem dagiti sapatosmo kadagita saksakam, ita ti disso a yanmo daga a nasantuan.”

- Apay nga inikkat ni Moises dagiti sapatosna?

Ilawlawag a daytoy ti wagas ti panagbalin a managraem. Siguraduen a maawatan dagiti ubbing a ditay masapul nga ikkaten dagiti sapatostayo tapno agbalin a managraem. Addaantayo iti adu a sabali pay a wagas iti panagbalin a managraem.

- Kasano a makapagbalinkayo a managraem?

Makapagbalintayo a Managraem iti Pagtaengan

Ibaga kadagiti ubbing a saan laeng a ti balay a pagmimiting ti lugar a nasken a pagraemantayo.

- Ania ti aramidenyo iti pagtaengan no agkarkarag ti maysa a tao?
- Ania ti aramidenyo bayat ti family home evening?

Ilawlawag a no dumngegtayo a siuulimek bayat dagiti panagkararag ken panagadal iti pagtaengan, managraemtayo pay. Daytoy ti mangipakita nga ay-ayatentayo ti Nailangitan nga Ama ken ni Jesus.

Pammaneknek

Ipeksam ti ayatmo iti Nailangitan nga Ama ken ni Jesucristo ken ti panagyamanmo gapu ta maipakitam daytoy nga ayat babaen ti panagraem. Allukoyem dagiti ubbing a mangipakita iti ayatda para iti Nailangitan nga Ama ken ni Jesus babaen ti panagbalin a managraem iti , iti miting ti sakramento, ken kabayatan dagiti panagkararag ken family home evening.

Dagiti Aktibidad a Mangpadur-as iti Pannakaammo

Pumili iti sumagmamano kadagitoy nga aktibidad tapno usaren bayat ti adalen.

1. Kuyogem dagiti ubbing iti naraeman a pannagna kadagiti pasilio ti balay a pagmimiting. No mabalin, mapankayo iti kapilia. No agsublikayo iti siled a pagadalan, dayawem dagiti ubbing iti naraem a tignayda ket ilawlawag no kasano a nakatulong ti panagraemda iti dadduma a tattao iti pasdek tapno agbalin a naraem iti klaseda.
2. Kantaen wenno sawen dagiti balikas iti "I Will Try to be Reverent" (*Children's Songbook*, p. 28), "Father, I Will Reverent Be" (*Children's Songbook*, p. 29).
3. Patugotan dagiti saka ti tunggal ubing iti maysa a papel nga addaan iti berso a "Dua a Naragsak a Saka" a nakasurat ditoy. Pakoloran iti tunggal ubing ti napatugotan a sakana ket yawidna daytoy.
4. Pagsisinnublaten dagiti ubbing a mangipakita iti maysa a wagas a pakapagbalinanda a naraem iti klase, kas iti panagtugaw a siuulimek, panagdalikepkep, wenno panangingato iti ima tapno agsarita iti maysa a banag. Pagsasaritaan maipapan no apay a masapul nga agbalintayo a managraem iti balay ti Nailangitan nga Ama.
5. Tulongan dagiti ubbing a mangisao kadagiti balikas iti maysa wenno agpada kadagiti sumaganad a berso. Mangparnuay kadagiti garaw kas isingasing dagiti balikas.

Ukraden, Keppetén [Dagiti Ima]

Ukraden, keppetén ida;
Ukraden, keppetén ida;
Pagsinnipaten ida,
Ukraden, keppetén ida;
Ukraden, keppetén ida;
Ipan iti saklot ida.

Iwagwagko dagiti Imak
 Iwagwagko dagiti imak.
 Irikusko dagiti imak.
 Pagsinnipatek dagiti imak.
 Inगतok dagiti imak,
 Kalpasanna ibabak
 Ket ipanko ida iti saklot.

Naulimek dagiti sakak.
 Natalna dagiti sakak.
 Nakatugawak a nasayaat.
 Nakadumogak.
 Nakakidemak.
 Nakasaganaak iti kararag.

**Dagiti Mainayon
 nga Aktibidad
 para kadagiti
 Babbabassit
 nga Ubbing**

2. Pagkidemen dagiti ubbing. Paingato kadakuada dagiti imada no mangngegdaka a mangitinnag iti maysa a sensilio wenno butones. Itinnagmo ti sensilio wenno butones iti suelo wenno iti lamisaan. Kalpasanna bungonem ti butones wenno sensilio iti panio wenno bassit a lupot. Kiddawem kadagiti ubbing nga agtalinaed a nakakidem, dumngeg a nasayaat, ket ingatoda dagiti imada no mangngegda ti sensilio wenno butones iti daytoy a gundaway. Itinnagmo ti nabungon a butones wenno sensilio iti suelo wenno lamisaan. Tulongam dagiti ubbing a makaawat nga adu dagiti mangngegan no dumngegtayo a nasayaat.

Panggep

Tapno tulongan ti tunggal ubing a makaawat a matulongannatayo ti nasayaat a musika nga agragsak ken palagipannatayo maipapan iti Nailangitan nga Ama ken ni Jesus.

Panagsagana

1. Sikakararag nga adalen ti 1 Samuel 16:19–23; Ether 6:2–12; ken Doktrina ken Katulagan 25:12.
2. Dagiti kasapulan:
 - a. Biblia, Libro ni Mormon, ken kopia ti Doktrina ken Katulagan.
 - b. Ladawan 1-61, Ipapanaw Manipud iti Nauvoo (Pakete ti Ladawan ti Arte ti Ebanghelio; 62493 864); ladawan 1-68, Agtokar ni David para ken ni Ari Saul; ladawan 1-69, Dagiti Bilog dagiti Jaredite.
3. Aramidem dagiti nasken a panagsagana para kadagiti ania man nga aktibidad a mangpadur-as iti pannakaammo a kayatmo nga usaren.

Palagip iti mannursuro: Mabalín a kayatmo nga awisen ti pangulo ti musika iti Primary tapno tulongannaka iti daytoy nga adalen.

Dagiti Aktibidad iti Pannakasursuro

Mangawis iti maysa nga ubing a mangted iti pangrugi a kararag.

Aktibidad a Pangawis
iti Panagdengngeg

Pagurnosen iti patimbukel dagiti ubbing ket kantaen ti “When You’re Happy” (*Children’s Songbook*, p. 266) iti sumagmamano a gundaway, nga usaren dagiti balikas kas iti “agsipatka,” “pumaddakka,” ken “agkiremka.” Agparnuay kadagiti garaw kas isingsingasing dagiti balikas.

No sika ket naragsak, agsipatka.

No sika ket naragsak, agsipatka.

No sika ket naragsak,

Biagmo met ti naragsak.

No sika ket naragsak, agsipatka.

- Ania ti panagriknayo idi kankantaenyo daytoy a kanta?

Matulongannatayo ti Nasayaat a Musika a Mangrikna iti Ragsak

Ilawlawag a ti naragsak, napintas, wenna natalna a musika ket makatulong kadatayo a magpasayaat iti panagriknatayo iti kaunggan. No naliday, napungtot, wenna mabutengtayo, makatulong ti nasayaat a musika a mangparagsak manen kadatayo.

Estoria

Iparang ti ladawan 1-68, Agtokar ni David para ken ni Ari Saul. Isalaysay ti estoria maipapan ken David nga agtoktokar iti arpana para ken ni Ari Saul idi saan a nasayaat ti rikna ti ari, a masarakan iti 1 Samuel 16:19–23.

- Apay iti panagkunayo a napasayaat ti musika ni David ti rikna ni Ari Saul?
- Ania dagiti instrumento ti musika a magustuanyo a denggen?

Yakem iti apagbiit dagiti instrumento bayat ti pannakadakatda.

Aktibidad	Pagpammarangen ti tunggal ubing nga agtoktokar iti instrumento ti musika, kas iti piano, biolin, gitara, pluta, wenno arpa, idinto ta ilallaymo ti maysa a familiar a kanta wenno himno iti Primary.
Kanta	<p>llawlawag a makatulong pay ti panagkanta a mangparagsak kadatayo. Kantaen ti “Happy Song” (<i>Children’s Songbook</i>, p. 264), nga aramaten dagiti garaw a nailadawan iti baba:</p> <p>Nagkuak dagiti pato a kasla maragsakan (<i>ukraden ken keppetien ti tangan ken dagiti ramay iti sukog a kasla sippit ti pato</i>).</p> <p>Nagkutak dagiti inakay nga agmalmalem (<i>ikabil dagiti ima iti baba dagiti takiag iti porma a kasla payak</i>).</p> <p>Dagiti tumatayab iti umokda (<i>pagsukogen a kasla umok dagiti ima</i>)</p> <p>Ken angin iti tuktok ti kayo (<i>iwagayway dagiti ima iti ngatuen ti ulo kas kaykayo nga ipuyyuyupoy ti angin</i>)</p> <p>Agkaykaysa nga agkanta iti naragsak a kanta.</p> <p>(© 1963 ti D.C. Heath and Company. Naimaldit babaen ti pammalubos.)</p> <ul style="list-style-type: none">• Ania dagiti kanta ti Primary a tumultulong kadakayo nga agragsak?
Kanta	Bay-an a pumili dagiti ubbing iti paggugustoda a kanta, ket kantaen daytoy a kagiddanmo ida.
Estoria	<p>Ipakita ti ladawan 1-61, Ipapanaw Manipud iti Nauvoo, ket isalaysay ti estoria iti bukodmo a balikas:</p> <p>Idi panawan dagiti nagkauna a kameng dagiti pagtaenganda iti Nauvoo ket nagpalaudda, pinunnoda dagiti adda linongna a bagon wenno karisonda. Masapul nga ibatida ti adu kadagiti sanikuada gapu ta awan ti pagyanan dagitoy. Narigat ti panagdaliasat, ket gagangay a napalalo ti bannog dagiti nagkauna a kameng kalpasan ti agmalem.</p> <p>Iti rabii ummongen dagiti nagkauna a kameng dagiti ayup ken bagonda iti patimbukel ket agaronda tapno makaparnuay iti dakkal nga apuy iti tengnga ti nagtimbukel. Ammo ni Brigham Young, ti propeta, a naragragsakto dagiti tao iti panagbaniagada no adda musikada. Inallukoyna ida nga agkanta ken agsala dagiti nagkauna a kameng a nagitugot kadagiti biolin, trumpeta, ken tambor ket inaramatda dagitoy a nangparnuay iti musika. Nagkanta ken nagsala ti tunggal maysa iti lawlaw ti apuy. Maysa kadagiti paggugustoda a kanta ti “Come, Come, Ye Saints.” Ti musika ti nangted pigsa ken tured kadagiti nagkauna a kameng. No agiddadan iti rabii kalpasan ti panagkanta ken panagsala, riknada ti naragsak.</p>
Kanta	Pagtugawen dagiti ubbing iti patimbukel ket pagpammarangen nga isuda dagiti nagkauna a kameng a nanglawlaw iti apuy. Kantaen ti “Pioneer Children Sang As They Walked” (<i>Children’s Songbook</i> , p. 214) wenno sabali pay a paggugusto a kanta iti Primary a kagiddan dagiti ubbing.

Tultulongannatayo ti Musika a Manglagip iti Nailangitan nga Ama ken ni Jesus

llawlawag a ti musika iti simbaan ket mangipalpalagip kadatayo maipapan iti Nailangitan nga Ama ken ni Jesus. Dawaten kadagiti ubbing nga agkidemda ket

agpammarang a dengdengenda ti musika a matoktokar iti kapilia sakbay ti miting ti sakramento.

- Kasano a makatulong ti musika kadakayo nga agbalin a managraem iti simbaan?

Ilawlawag a paggugusto a denggen ti Nailangitan nga Ama ken ni Jesus a kumantatayo. Basaen iti napigsa ti dua a binatang ti Doktrina ken Katulagan 25:12 (agingga iti *kararag kaniak*). Ilawlawag a ti panagkanta kadagiti kanta iti Simbaan ket kasla panagkararag iti Nailangitan nga Ama. Agyamyamantayo iti Nailangitan nga Ama kadagiti parabur nga it-itedna kadatayo. Ti panagkanta kadagiti kanta maipapan iti Nailangitan nga Ama ken ni Jesus ket mangipalpalagip kadatayo nga ay-ayatendatayo ken kayatdatayo a tulongan. Ilawlawag a maaw-awagan kadagiti himno dagiti kanta a kankantaentayo iti miting ti sakramento.

- Apay a kankantaentayo dagiti kanta ken himno iti simbaan?

Estoria

Ipakita ti ladawan 1-69, Dagiti Bilog dagiti Jaredite, ket isalaysay ti estoria maipapan iti yaay dagiti Jaredite iti naikari a daga, a masarakan iti Ether 6:2–12. Ilawlawag a nagkanta dagiti Jaredite kadagiti kanta a pagdaydayaw iti Nailangitan nga Ama ken ni Jesus bayat ti kaaddada kadagiti bilogda, wenna barko.

- Apay iti panagkunayo a nagkanta dagiti Jaredite iti panaglayagda?
- Ania iti panagkunayo ti panagrikna dagiti Jaredite idi mayangin ken mayallon dagiti bilogda?
- Kasano a nakatulong kadakuada ti panagkanta idi nagbutengda?
- Nakapagkantakayo kadin iti maysa a kanta idi nagbutengkayo? Kasano a nakatulong daytoy kadakayo?

Pammaneknek

Isalaysay ti maysa a panawen idi pinaragsaknakayo ti musika. Ipalagip kadagiti ubbing a paggugusto ti Nailangitan nga Ama ken ni Jesus a denggen ida nga agkanta kadagiti nasayaat a kanta. No agkantada, maragsakanda ket malagipda nga ay-ayaten ida ti Nailangitan nga Ama ken ni Jesus.

Dagiti Aktibidad a Mangpadur-as iti Pannakaammo

Pumili iti sumagmamano kadagitoy nga aktibidad tapno usaren bayat ti adalen.

1. Kantaen ti “Fun to Do” (*Children’s Songbook*, p. 253), “I Think the World Is Glorious” (*Children’s Songbook*, p. 230).
2. No bassit ti klase, papilien ti tunggal ubing iti paboritona a kanta iti Primary, ket kalpasanna kantaen dagita a kanta a sangkamaysa kas maysa a klase.
3. Agaramid kadagiti pagkutog a papel a tasa nga usaren dagiti ubbing kas instrumento a pagtokar. Mangikabil iti bassit a bagas wenna darat iti uneg ti papel a tasa. Ipigket ti maysa pay a tasa iti umuna a tasa tapno saan a maibelleng ti bagas wenna darat. Agkanta iti kanta ti Primary kabayatan ti panangusar dagiti ubbing iti pagkutogda. Mabalimo pay ti mangitugot iti dadduma pay a banag tapno usaren a kas instrumento a pagtokar, kas kadagiti kampana, nangudel a bislak a pagpinnang-oren, wenna dagiti pedaso ti kayo a pagtinnuktokan.
4. Agpatokar iti musika manipud iti audio cassettes ti *Children’s Songbook* (52538) ket pagkantaen dagiti ubbing a maigiddan ditoy wenna itignayda daytoy.

5. Iti bukodmo a balikas, isalaysaymo ti estoria maipapan idi adda ni Propeta Joseph Smith ken dagiti dadduma pay a dadaulo ti Simbaan iti Pagbaludan ti Carthage. Impan dagiti dakes a lallaki ida iti pagbaludan uray no awan ti inaramidda a maikaniwas. Ammo ti Propeta nga agpeggad ti biagna, ket nagladingit unay. Indawatna iti gayyemna a ni John Taylor a kantaanna. Nagladingit met unay ni John, ket imbagana ken ni Joseph a kasla dina kayat ti agkanta, ngem inallukoy ni Joseph isuna. Bayat ti panagkanta ni John maipapan ken Jesus, simmayaan ti rikna ti tunggal maysa iti pagbaludan. Impalagip ti kanta kadakuada nga ay-ayaten ida ti Nailangitan nga Ama ken ni Jesus. Daytoy ti nangted kadakuada iti pigsang ken tured.

**Dagiti Mainayon
nga Aktibidad
para kadagiti
Babbassit
nga Ubbing**

1. Kantaem ti sumagmamano a paggugusto a kanta dagiti ubbing a kagiddanmo ida. Pagsipatem a siulimek dagiti ubbing bayat ti panagkantada. Kasaritam dagiti ubbing maipapan no kasano a paragsaken ida ti musika.
2. Mangisagana iti nairekord a nadumaduma nga estilo ti musika a denggen dagiti ubbing. Siguraduen a mayannatup ti musika para iti Sabbath.
3. Ibaga kadagiti ubbing nga inikkannatayo ti Nailangitan nga Ama iti adu a nadumaduma a kita ti musika. Sumagmamano a musika ti inaramid dagiti tao, ken dagiti dadduma a musika ket inaramid dagiti banag iti lubong iti aglawlawtayo. Mangibaga iti nagnagan ti sumagmamano a banag iti nakaparsuaan nga agparnuay kadagiti uni a kasla iti musika, kas iti angin, tudo, tuma-tayab, ambubuyog, ken gurruod. Patulad kadagiti ubbing ti tunggal uni.

Tultulongannak ti Sakramento a Mangpanunot ken ni Jesus

Panggep

Tapno allukoyen ti tunggal ubing a mangpanunot ken ni Jesucristo bayat ti sakramento.

Panagsagana

1. Sikakararag nga adalen ti Lucas 22:19–20 ken 3 Nephi18:1–11. Kitaen met iti *Pagbatayan iti Ebanghelio* (31110 864), maika-23 a paset.
2. Babaen ti pammalubos ti presidenteyo ti Primary, kiddawem iti bishop a makipagurnos iti maysa a miembro ti korum dagiti priest tapno umay iti klasem iti sumagmamano a minuto iti rugi ti oras ti adalen. Nasken nga agsagana ti miembro ti korum dagiti priest tapno ibagana kadagiti ubbing maipapan kadagiti pagrebbenganna iti panangannong iti sakramento ken ti panagriknana maipapan iti daytoy sagrado nga ordinansa.
3. Dagiti kasapulan:
 - a. Biblia ken Libro ni Mormon.
 - b. Ladladawan dagiti pasamak manipud iti biag ni Jesus, kas iti ladawan 1-16, Ti Pannakayanak (Pakete ti Ladawan ti Arte ti Ebanghelio 201:62495 864); ladawan 1-17, Ni Ubing a Jesus iti Templo (Pakete ti Ladawan ti Arte ti Ebanghelio 205; 62500 864); ladawan 1-19, Ni Cristo ken dagiti Ubbing (Pakete ti Ladawan ti Arte ti Ebanghelio 216; 62467 864); ladawan 1-43, Ni Jesus a Mangag-agas iti Bulsek (Pakete ti Ladawan ti Arte ti Ebanghelio 213; 62145 864); ken dadduma pay a kayatmo nga usaren.
 - c. Ladawan 1-3, Ni Jesus a Cristo (Pakete ti Ladawan ti Arte ti Ebanghelio 240; 62572 864); ladawan 1-8, Panangiwaras iti Sakramento (62021 864); ladawan 1-44, Ni Jesus a Mangisursuro iti Deppaarna iti Laud (Pakete ti Ladawan ti Arte ti Ebanghelio 316; 62380 864); ladawan 1-70, Ti Maudi a Pangrabii (Pakete ti Ladawan ti Arte ti Ebanghelio 225; 62174 864).
4. Aramidem dagiti nasken a panagsagana para kadagiti ania man nga aktibidad a mangpadur-as iti pannakaammo a kayatmo nga usaren.

Dagiti Aktibidad iti Pannakasursuro

Mangawis iti maysa nga ubing a mangted iti pangrugi a kararag.

Aktibidad a Pangawis iti Panagdengngeg

Ipakita ti ladawan 1-8, Panangiwaras iti Sakramento. Ibaga kadagiti ubbing a maaw-awagan iti miting ti sakramento ti miting iti Domingo a masansan a pagtataripnonganda a sangkamaysa a kas familia.

- Apay nga aw-awagantayo daytoy a miting iti miting ti sakramento?

Yam-ammom ti miembro ti korum dagiti priest kadagiti ubbing. Paibagam kenkuana maipapan iti pagrebbengan ti Aaronic Priesthood para iti sakramento. Paipeksam ti riknana maipapan iti akemna iti daytoy sagrado nga ordinansa. Agyamanka kenkuana iti yaayna ket bay-an nga agsubli iti mitingna iti korum wenno klasena iti Sunday School.

Inted ni Jesus ti Sakramento Kadatayo Tapno Tulongannatayo a Manglaglagip Kenkuana

Ipakita ti ladawan 1-3, Ni Jesus a Cristo. Ipalagip kadagiti ubbing nga anak ti Nailangitan nga Ama ni Jesus. Gapu ta ay-ayatennatayo unay ni Jesus, immay ditoy daga tapno agbalin a Mangisalakantayo. Inagasanna dagiti masakit, insurona ti ebanghelio, ken impakitana ti umno a dalan a pagbiagan. Kalpasanna, natay para kadatayo.

Estoria

Ipakita ti ladawan 1-70, Ti Maudi a Pangrabii. Isalaysay ti estoria maipapan iti Maudi a Pangrabii, a masarakan iti Lucas 22:19–20. Basaen iti napigsa manipud iti Biblia ti maudi a binatang ti bersikulo 19: “Aramidenyo daytoy a panglaglagip kaniak.” Ilawlawag nga imbaga ni Jesus kadagiti Apostolna nga agtataripnongda a sangkamaysa iti tunggal aldaw ti Sabbath ket laglagipenda isuna babaen ti panangawat iti sakramento.

Ipakita ti ladawan 1-44, Ni Jesus a Mangisursuro iti Deppaarna iti Laud. Ilawlawag nga idi sinarungkaran ni Jesus dagiti Nephite, imbagana kadakuada nga agtataripnongda a sangkamaysa iti tunggal aldaw ti Sabbath ken laglagipenda isuna babaen ti panangawatda iti sakramento (kitaen iti 3 Nephi 18:1–11).

- Asino ti nasken a panunoten dagiti Apostol idi umawatda iti sakramento?
- Asino ti nasken a panunoten dagiti Nephite idi umawatda iti sakramento?
- Asino ti nasken a panunotentayo no umawattayo iti sakramento?
- Kaano ti panangawattayo iti sakramento?

Aktibidad

Aramiden ti sumaganad a berso ti aktibidad a kagiddan dagiti ubbing:

Maragsakanak nga Immay iti Simbaan Ita

Maragsakanak nga immay iti simbaan ita (*agaramid iti torre ti simbaan babaen iti panamagdekket kadagiti murdong dagiti ramay ti agpada nga ima*).

Magusgustuak ti dumngeg (*pagsukogen ti ima iti lawlaw lapayag*)

Ken agkararag (*agdalikepkep ken agdumog*).

Agsursuroak maipapan ken ni Jesus nga adda idiy langit (*itudo iti ngato*);

Pampanunotek ni Jesus ken ti ayatna (*arakupen ti bagi*).

Dagiti estoria

Ipakita a saggaysa dagiti ladawan ti panagbiag ni Jesus. No mailasin dagiti ubbing ti ladawan, paisalaysaymo kadakuada ti estoria. No dida ammo ti estoria, apagbiit nga isalaysaymo kadakuada daytoy. Bay-an a makiraman ti adu nga ubbing iti panangisalaysay iti estoria agingga a mabalin.

- Ania dagiti estoria maipapan ken Jesus a mapanunoty bayat ti sakramento?

Bay-an nga isalaysay dagiti ubbing ti dadduma pay nga estoria maipapan ken Jesus a mapanunotda kabayatan ti sakramento. No dida makapanunot iti ania man, isalaysaymo kadakuada ti maysa wenno dua nga estoria maipapan ken Jesus a kayatmo a panunoten bayat ti sakramento.

Makapagraemtayo Bayat ti Sakramento

Aktibidad

Tulongan dagiti ubbing a mangisao iti sumaganad a berso, nga usaren dagiti garaw a mailadladawan:

Agdalikepkepak (*agdalikepkep*),
Agdumogak (*agdumog*),
Ken agulimekak (*yarasaas daytoy a binatang*).
Bayat ti pannakabendision ti sakramento,
Ket laglagipenkanto.

Ilawlawag a gapu ta inted ni Jesus ti sakramento kadatayo a mangtulong kadatayo a manglaglagip kenkuana, napateg a panunoten ti maipapan ken Jesus ken tulongan dagiti dadduma a manglaglagip met kenkuana. Maaramidtayo daytoy babaen ti panagbalin a managraem bayat ti sakramento.

Aktibidad

Yarasaas ti maysa kadagiti sumaganad a binatang iti maysa nga ubing ket paulitmo daytoy iti napigsa kenkuana iti klase. Ituloymo iti dadduma pay a binatang ken dadduma pay nga ubbing.

1. Agsaganatayo para iti sakramento babaen ti panagkanta iti naraem a himno a mangipalpalagip kadatayo maipapan ken Jesus.
2. Dumngegtayo a nasayaat bayat ti pannakaisao ti kararag a pammendision iti tinapay.
3. No maibunong ti tinapay kadatayo, mangalatayo laeng iti maysa a pirsay.
4. Dumngegtayo a nasayaat bayat ti pannakaisao ti kararag a pammendision iti danum.
5. Siraraem nga inumentayo ti danum ket isublitayo ti bassit a baso iti bandeha.
6. Ditay iti kaano man nga ay-ayamen ti tinapay wenno dagiti babassit a baso nga agpaay iti sakramento.

Ilawlawag a ti panangaramid kadagitoy a banag ket mangipakita a managraem-tayo bayat ti panangawattayo iti sakramento.

- Kasano a makapagbalintayo a managraem bayat ti sakramento?

Aktibidad

Pagdenggem a nasayaat dagiti ubbing kadagiti garaw nga iladawam. Ibagam a tumakderda no isaom ti maysa a banag a nasken nga aramiden wenno panunotenda bayat ti sakramento. Ibagam nga agtugawda no isaom ti maysa a banag a nasken a dida aramiden wenno panunoten bayat ti sakramento. Usarem dagiti sumaganad a pagarigan wenno sumagmamano a bukodmo:

- Dumngeg a nasayaat bayat ti pannakaisao dagiti kararag ti sakramento.
- Laglagipen nga ay-ayatendatayo ti Nailangitan nga Ama ken ni Jesus.
- Panunoten maipanggep iti ipapan iti piknik.
- Laglagipen a pinaimbag ni Jesus dagiti masakit a tattao.
- Makisaritaka iti kabsatmo a lalaki wenno babai.
- Garaw a garaw.
- Panunoten ti maipapan ken ni Jesus a mangbembendision kadagiti ubbing.

Pammaneknek

Iburaymo ti pammaneknekmo maipapan iti no kasano ti panagyamanmo iti kaadda ti sakramento a tumultulong kadatayo a manglagip ken ni Jesucristo ken no ania ti inaramidna para kadatayo. Ilawlawag nga agyamanka unay no managraem ti tunggal maysa bayat ti sakramento tapno maipamaysayo iti panangpampanunot ken ni Jesus.

Dagiti Aktibidad a Mangpadur-as iti Pannakaammo

Pumili ti sumagmamano kadagitoy nga aktibidad tapno usaren bayat ti adalen.

1. Pagdrowingem ti tunggal ubbing iti ladawan ti bagina nga umaw-uwat iti sakramento. Suratan ti tunggal ladawan iti *Mapanunotko ni Jesus bayat ti yaawatko iti sakramento*.
2. Mangitugotka iti klase iti awan nagyanna a bandeha ti sakramento para iti tinapay ken danum. Bay-an a kitaen ken igganan dagiti ubbing dagiti bandeha. Pailadawan kadagiti ubbing no ania ti mapasasamak kabayatan ti panangan-nong iti sakramento iti miting ti sakramento.
3. Paidramam kadagiti ubbing ti sumagmamano kadagiti paggugustoda nga estoria manipud iti biag ni Jesus.

Dagiti Mainayon nga Aktibidad para kadagiti Babbabassit nga Ubbing

1. Ilawlawag ti sakramento iti simple a wagas. Mangipakita iti ladawan ni Jesus ket ibaga kadagiti ubbing nga adda maysa nga oras iti Domingo a lagipentayo ni Jesus iti naisangsangayan a wagas. Daytoy ti kanito a pannangantayo iti maysa a pirsay ti tinapay ken uminum iti bassit a sangabaso a danum kabayatan ti miting ti sakramento. Ilawlawag a kabayatan ti sakramento lagipentayo no kasano ti kadakkel ti panagayat ni Jesus kadatayo ken panunotentayo dagiti adu a banag nga inaramidna a mangtultulong kadatayo nga agragsak.
2. Kantaen wenno sawen dagiti balikas iti "Tell Me the Stories of Jesus" (*Children's Songbook*, p. 57) wenno "Jesus Wants Me For a Sunbeam" (*Children's Songbook*, p. 60).
3. Tulongam dagiti ubbing a mangaramid kadagiti garaw iti sumaganad a berso ti aktibidad bayat ti panangisaom kadagiti balikas:

Ti Panagparsua

Kinuna ni Jesus a masapul nga agraniag ti init (*agaramid iti dakkel a nagtimbukel iti ngatuen ti ulo babaen kadagiti takiag*),

Masapul nga agtudo (*ibaba dagiti ima iti sanguanan bayat ti panangiwagwag kadagiti ramay*),

Masapul a dumakkel dagiti sabong (*isukog dagiti ima, nakasango iti ngato dagiti dakulap*).

Kinuna ni Jesus a masapul nga agkanta dagiti tumatayab (*ukraden ken keppeteng dagiti ramay ken tammudo kas iti sippit ti maysa a tumatayab*),

Ket amin a kinuna ni Jesus a masapul a mapasamak, napasamak (*agdalikepkep*).

(Johnie B. Wood, iti *Sing, Look, Do, Action Songs for Children*, inatur tapno imaldit ni Dorothy M. Peterson [Cincinnati: Standard Publishing Co., 1965].)

Ipalagip kadagiti ubbing nga inikkannatayo ni Jesus iti adu a banag tapno paragsakennatayo. Bayat ti sakramento, maipakitatayo ti panagyamantayo babaen ti panangpanunot ken ni Jesus.

Inikkannatayo ti Nailangitan nga Ama ken ni Jesus kadagiti Nasantuan a Kasuratan

Panggep

Tapno tulongan ti tunggal ubing a makaawat a naglaon dagiti nasantuan a kasuratan kadagiti balikas ti Nailangitan nga Ama ken ni Jesucristo ken masursurotayo ti maipapan iti Nailangitan nga Ama ken ni Jesucristo babaen ti panagadal kadagiti nasantuan a kasuratan.

Panagsagana

1. Sikakararag nga adalen ti Lucas 22:19–20; 3 Nephi 18:21; Doktrina ken Katulagan 59:6; ken Moises 7:11. Kitaen met iti *Pagbatayan ti Ebanghelio* (31110 864), maika-10 a paset.
2. Agsagakana a mangisalaysay iti maysa kadagiti paggugustom nga estoria manipud iti nasantuan a kasuratan, nga agusarka iti ladawan no mabalin.
3. Dagiti kasapulan:
 - a. Maysa a set dagiti nasantuan a kasuratan (Biblia, Libro ni Mormon, Doktrina ken Katulagan, ken Perlas a Kapatgan).
 - b. Maysa a pedaso ti lupot a pangabbong kadagiti nasantuan a kasuratan wenno papel a pangbungon kadagitoy.
 - c. Ladawan 1-3, Ni Jesus a Cristo (Pakete ti Ladawan ti Arte ti Ebanghelio 240; 62572 864); ladawan 1-18, Ni Juan Bautista a Mangbumbuniag ken ni Jesus (Pakete ti Ladawan ti Arte ti Ebanghelio 208; 62133 864); ladawan 1-44, Ni Jesus a Mangisursuro iti Deppaarna iti Laud (Pakete ti Ladawan ti Arte ti Ebanghelio 316; 62380 864); ladawan 1-70, Ti Maudi a Pangrabii (Pakete ti Ladawan ti Arte ti Ebanghelio 225; 62174 864).
4. Aramidem dagiti nasken a panagsagana para kadagiti ania man nga aktibidad a mangpadur-as iti pannakaammo a kayatmo nga usaren.

Dagiti Aktibidad iti Pannakasursuro

Mangawis iti maysa nga ubing a mangted iti pangrugi a kararag.

Aktibidad a Pangawis iti Panagdengngeg

Sakbay ti klase, abbongan dagiti nasantuan a kasuratan iti pedaso ti lupot wenno bungonen dagitoy iti papel. Ikabil dagiti naabbongan a nasantuan a kasuratan iti lamisaan wenno tugaw a makita dagiti ubbing dagitoy. Ilawlawag nga inabbongam ti maysa a banag a napateg kenka ken iti tunggal maysa. Papugtuam kadagiti ubbing no ania ti inabbongam.

Kalpasan ti sumagmamano a panagpugto, bay-an nga apirasen dagiti ubbing ti lupot wenno papel. No mapugtuam ti ubing a maysa daytoy a libro wenno dagiti libro dagitoy, ibaga kadagiti ubbing a husto ket ikkaten ti abbong dagiti libro. Ibaga kadagiti ubbing a maawagan dagitoy a libro iti nasantuan a kasuratan. Paisao kadagiti ubbing ti balikas a *nasantuan a kasuratan* iti sumagmamano a gundaway.

Sagrado a Libro dagiti Nasantuan a Kasuratan

Ilawlawag a napapateg a libro dagiti nasantuan a kasuratan a maiduma iti dad-duma a libro. Sagrado a libro dagitoy. Ipalagip kadagiti ubbing a ti maysa a banag a sagrado ket makatulong kadatayo a mangpanunot iti Nailangitan nga Ama ken ni Jesus. Ilawlawag nga ibaga dagiti nasantuan a kasuratan kadatayo ti maipapan iti Nailangitan nga Ama ken ni Jesus ken no kasano nga ay-ayatendatayo. Ibagada no ania ti kayat ti Nailangitan nga Ama ken ni Jesus nga aramidentayo tapno makapagragstakayo.

Saggaysa nga ipakita ken inaganan dagiti pagrukodan a libro dagiti nasantuan a kasuratan. No napagtitiyon ti sumagmamano kadagitoy iti maysa a libro, itudo ti sikigan a paset iti akkub a nakailistaan dagiti paulo wenna lukiben kadagiti paulo a panid ti tunggal maysa kadagiti pagrukodan a libro dagiti nasantuan a kasuratan.

Aktibidad

Ibaga kadagiti ubbing a nasken a saluadantayo a nasayaat dagiti nasantuan a kasuratan ket lukibentayo a siaannad dagiti panid. Paumayen iti sango ti klase dagiti ubbing a saggaysa ket pailadawan no kasano ti naannad a panangiggemda kadagiti nasantuan a kasuratan ken pananglukibda kadagiti panid.

Ilawlawag a naglaon dagiti nasantuan a kasuratan kadagiti pudno nga estoria. Tultulongandato dagitoy nga estoria a mangammo no ania ti kayat ti Nailangitan nga Ama ken ni Jesus nga aramidentayo. Dagiti estoria iti nasantuan a kasuratan ket makatulong kadatayo iti biagtayo.

Estoria

Isalaysaymo kadagiti ubbing ti maysa kadagiti paggugustom nga estoria manipud iti nasantuan a kasuratan, nga agusar iti ladawan no mabalin. Yunay-unaymo no kasano a makatulong kenka dagiti banag a naisuro iti daytoy nga estoria iti nasantuan a kasuratan. Yebkasmu no kasano ti ayatmo nga agbasa kadagiti estoria iti nasantuan a kasuratan.

Kanta

Tulongan dagiti ubbing a mangkanta wenna mangisao kadagiti balikas iti "Tell Me the Stories of Jesus" (*Children's Songbook*, p. 57). Ipalagip kadagiti ubbing a pudno nga estoria dagiti estoria iti nasantuan a kasuratan nga ad-adalenda iti Primary.

Dagiti estoria ken Jesus a magustuak,
Isalaysaymo man daytoy amin kaniak.
Estoria bayat pannagnana,
Estoria ti panaglayagna.

Naglaon dagiti Nasantuan a Kasuratan kadagiti Pannursuro ni Jesus

Ilawlawag a sumagmamano kadagiti nasantuan a kasuratan ti insurat dagiti lallaki a makaam-ammo ken ni Jesus ken nagbiag idi panawenna. Nakitada ni Jesus ken nangngeganda a nangisuro. Insurat dagitoy a lallaki dagiti nasantuan a kasuratan tapno masursuro ti tunggal maysa ti maipapan ken Jesus ken dagiti pannursurona ken maammuanda nga isu ti anak ti Nailangitan nga Ama.

Iparang ti ladawan 1-70, Ti Maudi a Pangrabii. Bay-an nga ibaga dagiti ubbing no ania ti ammoda maipapan iti ladawan. Ipakita ti Biblia ket paulit kadagiti ubbing ti nagan daytoy. Lukiben ti Biblia iti Lucas 22. Ilawlawag nga insuro ni Jesus iti Biblia a nasken nga umawattayo iti sakramento tapno lagipentayo isuna. Innala ni Jesus ti tinapay ket binendisionanna ket intedna daytoy kadagiti disipulona (katulongan). Nangala iti kopa ket pinainumna ida. Basaen ti paset ti bersikulo 19 a nagkunaan

ni Jesus iti, "Aramidenyo daytoy a panglaglagip kaniak." Ilawlawag a dagitoy dagiti balikas ni Jesus.

Iparang ti ladawan 1-44, Ni Jesus a Mangisursuro iti Deppaarna iti Laud, ket ipalagip kadagiti ubbing no ania ti mapaspasamak iti ladawan. Ipakita ti Libro ni Mormon ket paulit kadagiti ubbing ti nagan daytoy. Lukiben ti Libro ni Mormon iti 3 Nephi 18. Ilawlawag a sinuruan ni Jesus dagiti tao iti adu a banag. Basaen ti paset ti bersikulo 21 a nagkunaan ni Jesus iti, "Agkararagkayo a sangaamaan."

- Ania ti ibagbaga ni Jesus nga aramidentayo a kaduatayo ti pamiliatayo?

Iparang ti ladawan 1-3, Ni Jesus a Cristo. Ipakita ti Doktrina ken Katulagan ket paulit kadagiti ubbing ti nagan daytoy. Lukiben ti Doktrina ken Katulagan iti beneg 59. Ilawlawag a maysa kadagiti banag nga insuro ni Jesus ket ti ayatentayo koma ti tunggal maysa. Basaen ti paset ti bersikulo 6 a nagkunaan ni Jesus iti, "Ayatenyo ti padayo a tao."

- Ania ti kinuna ni Jesus nga aramidenyo?
- Asino ti kaarrubayo?
- Kasano ti panagriknayo no naasikayo iti dadduma ken ipakitayo ti ayat kadakuada?

Kanta

Tulongan dagiti ubbing a mangkanta wenno mangisao kadagiti balikas ti "Jesus Said Love Everyone" (*Children's Songbook*, p. 61), nga usaren dagiti garaw a nailadawan iti baba:

Ayaten tunggal maysa (*unnaten a nasayaat dagiti takiag*);

Kuna ni Jesus (*agtung-ed-tung-ed*).

No pusom napno't ayat (*iparabaw dagiti ima iti batog ti puso*),

Ayatendaka (*arakupen ti bag*).

Iparang ti ladawan 1-18, Ni Juan Bautista a Mangbumbuniag ken ni Jesus. Bay-an nga ibaga dagiti ubbing ti maipapan iti ladawan. Yunay-unay a nabuniagan ni Jesus ken kayatna a mabuniagan ti tunggal maysa. Ipakita ti Perlas a Kapatgan ket paulit kadagiti ubbing ti nagan daytoy. Lukiben ti Perlas a Kapatgan iti Moises 7 ket ibaga no kasano a sinuruan ni Jesus ti lalaki nga agnagan iti Enoc tapno mapan kadagiti tao ket buniaganna ida. Basaen ti paset ti bersikulo 11 a nagkunaan ni Jesus iti, "Mamuniag iti nagan ti Ama, ken ti Anak, . . . ken ti Espiritu Santo."

Ingato dagiti uppat a pagrukodan a libro dagiti nasantuan a kasuratan. Yunay-unay nga adda amin kadagiti dagiti pannursuro ni Jesus.

- Ania dagitoy a libro?
- Asino ti akinpannursuro ti masarakan kadagiti nasantuan a kasuratan?
- Apay a naisurat dagiti nasantuan a kasuratan?
- Ania ti mariknayo iti pannakaammo nga ay-ayatennatayo ti Nailangitan nga Ama ken ni Jesus ken inikkandatayo kadagiti nasantuan a kasuratan?

Pammaneknek

Ipeksam ti panagyaman ken ayatmo kadagiti nasantuan a kasuratan. Iburaymo ti pammaneknek a balikas ti Nailangitan nga Ama ken ni Jesus dagiti nasantuan a kasuratan ket babaen ti panagadal kadagiti nasantuan a kasuratan masursurotayo no ania ti kayat ti Nailangitan nga Ama ken ni Jesus nga aramidentayo.

Dagiti Aktibidad a Mangpadur-as iti Pannakaammo

Pumili iti sumagmamano kadagitoy nga aktibidad tapno usaren bayat ti adalen.

1. Kupinen iti aggudua dagiti panid ti papel tapno agaramid iti babassit a kopia dagiti akkub ti uppat a pagrukodan a libro dagiti nasantuan a kasuratan a saggaysa a set dagiti ubbing. Imaldit ti nagan dagiti pagrukodan a libro dagiti nasantuan a kasuratan kadagiti akkub. Abutan iti sulit ti tunggal akkub ket agusar iti maysa a tali wenno panait tapno agkakadua a talian ti uppat nga akkub dagiti nasantuan a kasuratan para iti tunggal ubbing.

Iti uneg ti tunggal akkub, imaldit ti nasantuan a kasuratan a naisuro bayat ti adalen:

Biblia: *Sinuruannatayo ni Jesus maipapan iti sakramento (Lucas 22:19).*

Libro ni Mormon: *Sinuruannatayo ni Jesus nga agkararag a sangapamilia (3 Nephi 18:21).*

Doktrina ken Katulagan: *Sinuruannatayo ni Jesus nga ayatentayo dagiti padatayo a tattao (Dkk 59:6).*

Perlas a Kapatgan: *Sinuruannatayo ni Jesus nga agpabuniag (Moises 7:11).*

Ikkang iti maysa a set dagiti akkub ti tunggal ubbing tapno yawidna. Bayat ti panangaramidmo, sublien nga adalen dagiti pannursuro ni Jesus a napaglilin-nawagan iti adalen.

2. Tulongan dagiti ubbing a mangyulo iti paset ti maikawalo a pagannurotan ti pammati: “Mamatikami iti Biblia a sao ti Dios” ken “Mamatikami pay a sao ti Dios ti Libro ni Mormon.”
3. Mangala kadagiti ladawan ti sumagmamano nga estoria iti Libro ni Mormon manipud kadagiti ladawan a nairagpin iti daytoy a pagbasaan wenno manipud iti biblioteka ti balay a pagmimiting. Ipakita ti tunggal ladawan ken ilawlawag iti ababa ti estoria a mangiladawan iti daytoy. Ipalagip kadagiti ubbing a naglaon dagiti nasantuan a kasuratan kadagiti pudno nga estoria. Pakanta kadagiti ubbing ti “Book of Mormon Stories” (*Children’s Songbook*, p. 118).
4. Isalaysay kadagiti ubbing ti maipapan iti maysa a panawen nga adda naisang-sangayan a kaipapanan iti biagmo dagiti nasantuan a kasuratan. Ilawlawagmo no kasano a nakatulong kenka dagiti nasantuan a kasuratan ken no ania ti nariknam ditoy.
5. Mangsapul kadagiti ababa a nasantuan a kasuratan a naglaon kadagiti balikas ni Jesus, kas kadagiti adda iti adalen. Isao ti tunggal nasantuan a kasuratan, a mangrugi kadagiti balikas a *Ni Jesus kinunana*. Kas pagarigan, “Ni Jesus kinunana, ‘Umaykay sumurot kaniak.’ ” Mangipasippaw wenno mangyawat iti maysa a *beanbag* wenno nalukneng a banag iti maysa nga ubbing ket paulit kenkuana ti nasantuan a kasuratan nga isaom ket kalpasanna isublina kenka ti *beanbag*. Itultuloy ti mangipasippaw iti *beanbag* agingga a maaddaan iti gundaway ti tunggal ubbing.

**Dagiti Mainayon
nga Aktibidad
para kadagiti
Babbabassit
nga Ubbing**

1. Kantaen wenno sawen dagiti balikas iti “Book of Mormon Stories” (*Children’s Songbook*, p. 118) bayat ti pannakaingato ti kopia ti Libro ni Mormon wenno “Tell Me the Stories of Jesus” (*Children’s Songbook*, p. 57) bayat ti pannakainngato ti Biblia.
2. Isalaysay iti ababa ti estoria maipapan kadagiti sangapulo nga agkukutel (kitaen iti Lucas 17:11–19), ket kalpasanna aramiden ti sumaganad nga aktibidad iti ramay a kagiddan dagiti ubbing:

Sangapulo a lallaki ti masaksakit (*ingato ti sangapulo a ramay*);
Inagasan ni Cristo ida iti maysa nga aldaw.
Nagsao laeng, ket nalaingan ti sakitda (*agpayapay*)!
Saan kadi a nakaskasdaaw daytoy? Ken saan kadi a maiduma (*ikabil ti maysa a ramay iti sentido ket agpammarang a kasla maburiboran*)
Dayta maysa laeng a lalaki (*ingato ti maysa a ramay*)
Ket nagdaydayaw iti Dios (*ingato ti agpada a takiag*)?
(Naadaw manipud iti Jean Shannon iti *Bible Story Finger Plays and Action Rhymes* [Cincinnati: Standard Publishing Co., 1964], p. 27.)

Ipakita kadagiti ubbing no sadino ti pakasarakan iti daytoy nga estoria iti Biblia.
3. Saludsoden kadagiti ubbing no ania dagiti paggugustoda nga estoria iti nasantuan a kasuratan. No kabaelam, ipakitam no sadino ti pakasarakan dagitoy nga estoria kadagiti nasantuan a kasuratan.

Kamengak ti Ti Simbaan ni Jesucristo dagiti Santo iti Ud-udina nga Aldaw

Panggep

Tapno tulongan ti tunggal ubing a makaawat a kamengda iti Ti Simbaan ni Jesucristo dagiti Santo iti Ud-udina nga Aldaw.

Panagsagana

1. Sikakararag nga adalen ti Marcos 1:9–11; Doktrina ken Katulagan 115:4; ken Joseph Smith—Pakasaritaan 1:5, 10–19. Kitaen met iti *Pagbatayan ti Ebanghelio* (31110 864), maika-17 a paset.
2. Gumetteng iti maysa a dakkal a panid papel wenno naingpis a karton ket aramiden a kasla pedaso ti dadakkal a sinniriban (puzzle) a kas iti kaadu dagiti tao iti klase (ubbing ken mannursuro). Isurat ti nagan ti tunggal miembro ti klase iti maysa a pedaso ti sinniriban (puzzle).
3. Dagiti kasapulan:
 - a. Maysa a set dagiti nasantuan a kasuratan.
 - b. Ladawan 1-4, Ti Umuna a Parmata (Pakete ti Ladawan ti Arte ti Ebanghelio 403; 62470 864); ladawan 1-8, Panangiwaras iti Sakramento (62021 864); ladawan 1-12, Ubing a Babai a Makomkompirmaan (62020 864); ladawan 1-18, Ni Juan Bautista a Mangbumbuniag ken ni Jesus (Pakete ti Ladawan ti Arte ti Ebanghelio 208; 62133 864); ladawan 1-39, Panangbendision iti Maysa a Maladaga; ladawan 1-40, Panangannong iti Masakit (62342 864); maysa a ladawan ti sibibiag a propeta.
4. Aramidem dagiti nasken a panagsagana para kadagiti ania man nga aktibidad a mangpadur-as iti pannakaammo a kayatmo nga usaren.

Dagiti Aktibidad iti Pannakasursuro

Mangawis iti maysa nga ubing a mangted iti pangrugy a kararag.

Aktibidad a Pangawis
iti Panagdengngeg

Ingatom ti sangapedaso a sinniriban (puzzle) nga adda naganmo a naisurat iti daytoy. Ibagam kadagiti ubbing a maibilang daytoy iti sinniriban. Ibumong dagiti dadduma pay a pedaso ket tulongan dagiti ubbing a mangbukel iti sinniriban. Itudom ti tunggal nagan iti sinniriban ket ibasa daytoy kadagiti ubbing. Ilawlawag a kas iti pannakaibilang ti tunggal pedaso iti daytoy a sinniriban, kameng ti tunggal maysa kadakuada iti daytoy a klase. Ilawlawag a ti kameng iti maysa a banag kayatna a sawen nga agbalin a kapaset daytoy.

- Ania pay ti nakaikamenganyo?

Ilawlawag a kamengtayo iti dadduma pay a ragup, kas kadagiti pamilia wenno dagiti sangakaarrubaan. Kamengtayo pay iti simbaan ni Jesus.

Ipakita ti ladawan 1-39, Panangbendision iti Maysa a Maladaga.

- Ania ti mapaspasamak iti daytoy a ladawan?

llawlawag kadagiti ubbing a kaaduan kadakuada ti immawaten iti nagan ken bendision idi maladagada pay laeng. Gapu iti daytoy a panangnagan ken panangbendision, naikabil dagiti naganda kadagiti kasuratan ti Simbaan ken maibagada ti, “Kamengak ti Ti Simbaan ni Jesucristo dagiti Santo iti Ud-udina nga Aldaw.”

Tulongan dagiti ubbing a mangisao iti “Kamengak ti Ti Simbaan ni Jesucristo dagiti Santo iti Ud-udina nga Aldaw” iti sumagmamano a gundaway.

Aktibidad

Aramiden ti berso ti aktibidad a “Maragsakanak nga Immay iti Simbaan Ita” a kagiddan dagiti ubbing:

Maragsakanak nga immay iti simbaan ita (*agaramid iti torre ti simbaan babaen ti panamagdekket kadagiti murdong dagiti ramay ti agpada nga ima*).

Magusgustuak ti dumngeg (*pagsukogen ti ima iti lawlaw ti lapayag*)

Ken agkararag (*agdalikepkep ken agdumog*).

Agsursuroak maipapan ken ni Jesus nga adda idia langit (*itudo iti ngato*);

Pampanunotek ni Jesus ken ti ayatna (*arakupen ti bagi*).

llawlawag kadagiti ubbing nga umaytayo kadagiti mitingtayo iti Simbaan tapno agsursuro iti ad-adu pay maipapan ken ni Jesus ken no ania ti kayatna nga aramidentayo. Ibaga kadagiti ubbing nga iti daytoy nga adalen masursuroda ti maipapan iti sumagmamano kadagiti napapateg a banag a paset ti simbaan ni Jesus.

Addaan iti Priesthood ti Simbaan ni Jesus

Ipakita ti ladawan 1-8, Panangiwaras iti Sakramento; ladawan 1-12, Ubing a Babai a Makomkompirmaan; ken ladawan 1-40, Panangannong iti Masakit. Bay-an nga ibaga dagiti ubbing no ania ti ammoda maipapan iti mapasasamak iti tunggal ladawan. llawlawag a kasapulan ti priesthood tapno aramiden ti tunggal maysa kadagitoy a banag. Ti priesthood isu ti bileg nga adda iti Nailangitan nga Ama ken ni Jesus. Ited ti Nailangitan nga Ama ken ni Jesus daytoy a bileg kadagiti nalinteg a lallaki tapno makatulong dagiti lallaki iti aramid ti Nailangitan nga Ama ken ni Jesus iti daga. Itudo dagiti addaan priesthood iti tunggal ladawan. Paisao kadagiti ubbing ti balikas a *priesthood* iti sumagmamano a gundaway.

- Asino ti am-ammoyo nga addaan iti priesthood?

Tulongan dagiti ubbing a makaawat a dagiti lallaki nga addaan iti priesthood ket mabalinda ti mangbendision ken mangiwaras iti sakramento, mangbuniag, mangted bendision kadagiti tao, ken agaramid iti dadduma pay a napapateg a banag. Ipakita manen ti ladawan 1-39, Panangbendision iti Maysa a Maladaga, ket ibaga kadagiti ubbing a dagiti maladaga ket bendisionan dagiti lallaki nga addaan iti priesthood.

Estoria

Iparang ti ladawan 1-18, Ni Juan Bautista a Mangbumbuniag ken ni Jesus. Bay-an nga ibaga dagiti ubbing no ania ti malagipda maipapan iti ladawan. Sublien nga adalen biit ti estoria, a masarakan iti Marcos 1:9–11.

- Asino ti mangbumbuniag ken ni Jesus? (Kitaen iti Marcos 1:9.)
- Ania a bileg ti masapul nga adda ken ni Juan tapno mabuniaganna ni Jesus? (Ti priesthood.)

llawlawag a ti panagbuniag babaen ti maysa a tao nga addaan iti priesthood ket napateg a paset ti panagkameng iti simbaan ni Jesus. Ibaga kadagiti ubbing a no agtawenda iti walo, mabalindan a mabuniagan a kameng ti simbaan ni Jesus.

Addaan Maysa a Propeta ti Simbaan ni Jesus

Estoria

Ipakita ti ladawan 1-4, Ti Umuna a Parmata, ket isalaysay ti estoria maipapan ken ni Joseph Smith ken ti Umuna a Parmata, a masarakan iti Joseph Smith—Pakasaritaan 1:5, 10–19.

- Asino ti immay nakisao ken ni Joseph Smith iti kakaywan? (Kitaen iti Joseph Smith—Pakasaritaan 1:17.)

Ilawlawag a gapu ta kinasao ti Nalangitan nga Ama ken ni Jesus ni Joseph Smith, aw-awagantayo ni Joseph Smith iti propeta. Ibagbaga ti propeta kadatayo no ania ti kayat ti Nailangitan nga Ama ken ni Jesus a maammuantayo.

- Ania ti propeta? (Maysa a lalaki nga addaan naisangsangayan nga akem tapno makisao iti Nailangitan nga Ama ken ni Jesus ken ibagana kadatayo no ania ti kayatda a maammuantayo.)

Ipakita ti ladawan ti sibibiag a propeta. Ibaga kadagiti ubbing ti maipapan kenkuana. Ilawlawag nga adda a kanayon sibibiag a propeta iti simbaan ni Jesus tapno mangisuro kadatayo no ania ti kayat ti Nailangitan nga Ama ken ni Jesus a maammuan ken aramidantayo.

Kanta

Tulongan dagiti ubbing a mangkanta wenno mangisao kadagiti balikas iti koro ti “Follow the Prophet” (*Children’s Songbook*, p. 110). Ilawlawag a ti mayaw-awan kayatna a sawen ti agaramid kadagiti maikaniwas a banag. Paingato iti maysa nga ubing ti ladawan ti sibibiag a propeta bayat ti panagkantayo.

Denggen propeta, denggen propeta, denggen propeta; di mayaw-awan.
Denggen propeta, denggen propeta, denggen propeta; mangidalan.

Addaan Nasantuan a Kasuratan ti Simbaan ni Jesus

Ingato dagiti nasantuan a kasuratan.

- Ania ti ig-iggamak?

Bay-an nga ibaga dagiti ubbing no ania ti ammoda maipapan kadagiti nasantuan a kasuratan. Ipalagip kadagiti ubbing a naglaon dagiti nasantuan a kasuratan kadagiti pannursuro ti Nailangitan nga Ama ken ni Jesus. Naglaon dagiti nasantuan a kasuratan iti adu a pudno nga estoria maipapan ken ni Jesus, dagiti propeta, ken dagiti dadduma pay a tattao. Dagiti nasantuan a kasuratan ket napateg a paset ti simbaan ni Jesus.

Kamengtayo iti Ti Simbaan ni Jesucristo dagiti Santo iti Ud-udina nga Aldaw

- Akinsimbaan ti nakaikamengantayo?
- Ania ti nagan ti simbaan a nakaikamengantayo?

Ibasa ti Doktrina ken Katulagan 115:4 kadagiti ubbing. Ilawlawag a daytoy a nagan kayatna a sawen a daytoy ti simbaan ni Jesus iti panawen a pagbibigantayo iti agdama. Tulongan dagiti ubbing a makaawat nga adu a tattao iti intero a lubong ti mailbilang iti Ti Simbaan ni Jesucristo dagiti Santo iti Ud-udina nga Aldaw.

Mabalin a kayatmo nga ilawlawag nga adda dagiti dadduma pay a simbaan iti daga ita a mangisursuro ti maipapan ken Jesus ken mangisursuro kadagiti tao

nga agbiag iti nasayaat, ngem awananda iti priesthood, iti maysa a sibibiag a propeta, wenna amin a nasantuan a kasuratan.

Aktibidad

Dawaten iti tunggal maysa a kameng iti simbaan ni Jesus tapno tumakderda. Ipalagip kadagiti ubbing a nasken a nakatakder ti amin kadakuada. Paulit kadagiti ubbing ti, “Kamengak iti Ti Simbaan ni Jesucristo dagiti Santo iti Ud-udina nga Aldaw.”

Usaren dagiti ladawan ken nasantuan a kasuratan, sublien nga adalen biit a ti priesthood, ti sibibiag a propeta, ken dagiti nasantuan a kasuratan ket napapateg a paset ti simbaan ni Jesus.

Pammaneknek

Iburaymo ti pammaneknekmo maipapan iti kinapudno ti ebanghelio. Tulongam dagiti ubbing a mangiparikna no kasano ti kinapateg ken kinapintas ti agkameng iti pudno a simbaan ni Jesus.

Dagiti Aktibidad a Mangpadur-as iti Pannakaammo

Pumili iti sumagmamano kadagitoy nga aktibidad tapno usaren bayat ti adalen.

1. Agaramid iti etiketa a naisurat ti *Kamengak iti Ti Simbaan ni Jesucristo dagiti Santo iti Ud-udina nga Aldaw* tapno isuot a yawid ti tunggal ubbing. Bay-an a koloran dagiti ubbing ti etiketada.
2. Aramiden ti sumaganad nga ay-ayam iti ramay a kagiddan dagiti ubbing:
Daytoy ti Simbaan
Daytoy ti simbaan (*pagsinnillapiden dagiti ima a nakapauneg dagiti ramay*), Ket daytoy ti torre (*iruar dagiti tangan ket pagdekketen dagiti ungtoda*). Ilukat dagiti ridaw (*ukraden dagiti dakulap, a nagdedekket dagiti ramay*) Ket kitaen amin dagiti tao (*iwagwag dagiti ramay*). Irikep dagiti ridaw ket denggen panagkararagda (*ikeppet dagiti ima a nakapauneg dagiti ramay; ikabil dagiti ima iti maysa a lapayag*). Ilukat ti ridaw ket rimmuarda nga immadayo amin (*ukraden dagiti ima, aramiden a “magna” nga umadayo dagiti ramay*).
3. Mangisalaysay iti estoria maipapan iti maysa nga ubbing a kameng ti Ti Simbaan ni Jesucristo dagiti Santo iti Ud-udina nga Aldaw a mapmapan iti Simbaan. Iramanmo dagiti aktibidad a mabalin a pakiramanan dagiti ubbing iti klasem, kas iti panagtugaw a kaduada dagiti pamiliada iti miting ti sakramento, panangawat iti sakramento, panagtugaw a siraraem iti Primary, panagkararag, ken panagkanta.
Mabalinmo met a pagpanunoten dagiti ubbing maipapan kadagitoy a kapanunotan babaen ti panagsaludsod iti “Ania ti nasken nga aramiden dagiti ubbing a kameng ti Simbaan iti Domingo?” “Ania ti nasken nga aramidenda iti miting ti sakramento? iti Primary?” “Ania ti nasken nga aramidenda iti pagtaengan iti Domingo?” “Ania ti nasken nga aramidenda bayat ti family home evening?” “Kasano ti nasken a panangtratoda kadagiti pamiliada? kadagiti gagayyemda?” Tulongan dagiti ubbing tapno maawatanda no ania ti nasken nga aramiden dagiti ubbing a babbai ken lallaki a maibilang iti simbaan ni Jesus.
4. Pagpanunoten dagiti ubbing maipapan kadagiti nadumaduma a ragup a nakaikamenganda kas iti maysa a pamilia wenna klase iti Primary. Paibaga kadagiti ubbing no ania ti magustuanda iti panagkameng iti tunggal ragup.

Gibusan daytoy a pagsasaritaan kadagiti banag a magustuanda (ken magustuam) maipapan iti panagkameng iti Ti Simbaan ni Jesucristo dagiti Santo iti Ud-udina nga Aldaw.

5. Kantaen wenno sawen dagiti balikas iti “The Church of Jesus Christ” (*Children’s Songbook*, p. 77).

**Dagiti Mainayon
nga Aktibidad
para kadagiti
Babbabassit
nga Ubbing**

1. Sakbay ti klase, mangidrowing iti uppat a simple a ladawan—maysa a mata, maysa nga ima, maysa a lapayag, ken maysa a ngiwat—iti nagsisina a panid ti papel.

Ibaga kadagiti ubbing nga adu a banag ti maaramidtayo iti simbaan. (Ipaskil ti ladawan ti maysa a mata.) Mabasatayo dagiti estoria iti nasantuan a kasuratan. (Ipaskil ti ladawan ti maysa nga ima.) Makapagay-ayamtayo a nasayaat kadagiti gagayyemtayo. (Ipaskil ti ladawan ti maysa a lapayag.) Mangngegtayo a naimbag dagiti mannursurotayo. (Ipaskil ti ladawan ti maysa a ngiwat.) Makapagsaritatayo a silalanay no addatayo iti Simbaan. Paasitgen ti tunggal ubbing ket paitudo iti maysa kadagiti ladawan. Bayat ti pannakaitudo ti maysa a ladawan, ibaga manen kadagiti ubbing no ania ti itakderan daytoy.

2. Tulongan dagiti ubbing a mangkanta iti “Book of Mormon Stories” (*Children’s Songbook*, p. 118), nga agparnuay kadagiti garaw kas isingsingasing dagiti balikas wenno pagmartsaen dagiti ubbing nga aglawlaw iti siled bayat panagkantada.

Addaantayo iti Maysa a Sibibiag a Propeta

Panggep

Tapno tulongan ti tunggal ubing a makaawat a maparaburantayo no surotentayo ti propeta.

Panagsagana

1. Sikakararag nga adalen ti 1 Samuel 3:1–10, 19–20. Kitaen met iti *Pagbatayan ti Ebanghelio* (31110 864), maika-9 a paset.
2. Ilista iti saggaysa a panid ti papel ti sumagmamano a pannursuro ti sibibiag a propeta a naggapu kadagiti bitla iti komperensia wenno sinurat kadagiti magasin ti Simbaan. Mangisagana kadagiti papel a kas kaadu dagiti ubbing iti klase. Ikulpi dagiti panid ti papel ket ikabil iti maysa a malukong, wenno basket. Mabalina nga iraman kadagiti pannursuro ti—
 - Agadal manipud kadagiti nasantuan a kasuratan iti inaldaw.
 - Ngilinen a nasantuan ti aldaw ti Sabbath.
 - Agkararag iti inaldaw.
 - Mapan iti miting ti sakramento ken Primary.
 - Agbalin a napudno.
3. Dagiti kasapulan:
 - a. Biblia.
 - b. Ladawan 1-4, Ti Umuna a Parmata (Pakete ti Ladawan ti Arte ti Ebanghelio 403; 62470 864); ladawan 1-29, Panangbangon iti Daong (Pakete ti Ladawan ti Arte ti Ebanghelio 102; 62053 864); ladawan 1-42, Inawagan ti Apo ni Ubing a Samuel (Pakete ti Ladawan ti Arte ti Ebanghelio 111; 62498 864); ladawan 1-66, Ni Moises ken ti Maur-uram a Kayo (Pakete ti Ladawan ti Arte ti Ebanghelio 107; 62239 864); maysa a ladawan ti sibibiag a propeta.
4. Aramidem dagiti nasken a panagsagana para kadagiti ania man nga aktibidad a mangpadur-as iti pannakaammo a kayatmo nga usaren.

Dagiti Aktibidad iti Pannakasursuro

Mangawis iti maysa nga ubing a mangted iti pangrugi a kararag.

Aktibidad a Pangawis iti Panagdengngeg

Saggaysa nga ipakita dagiti ladawan da Noe (ladawan 1-29), Moises (ladawan 1-66), ken Joseph Smith (ladawan 1-4). Awisen dagiti ubbing a mangibaga no ania ti ammoda maipapan iti mapaspasamak iti tunggal ladawan.

Kalpasan a mapaglilinnawagan no ania ti ammo dagiti ubbing maipapan kadagiti ladawan, ilawlawag biit nga imbaga ni Jesus ken ni Noe nga agaramid iti bilog tapno maisalakan ti pamiliana manipud iti layus. Imbaga ni Jesus ken ni Moises a wayawayanna dagiti Israelita manipud iti pannakaadipen. Imbaga ni Jesus ken ni Joseph Smith a saanna a masapul ti makikappeng iti ania man kadagiti simbaan nga adda idi iti daga.

Makisasao dagiti Propeta iti Nailangitan nga Ama ken ni Jesucristo

Ilawlawag a propeta da Noe, Moises, ken Joseph Smith. Ti maysa a propeta ket maysa a lalaki a makisarsarita iti Nailangitan nga Ama ken ni Jesus. Gapu ta awan ti Nailangitan nga Ama ken ni Jesus iti daga tapno mangisuro kadatayo, addaanda kadagiti propeta a tumultulong kadakuada. Isursuro ti Nailangitan nga Ama ken ni Jesus ti propeta, ket isursuronatayo ti propeta no ania ti nasken nga aramidentayo tapno maparaburan ken makapagragstayo.

Estoria

Ipakita ti ladawan 1-42, Inawagan ti Apo ni Ubing a Samuel, ket isalaysay ti estoria maipapan iti pannakaawag ni Samuel tapno agbalin a maysa a propeta, a masarakan iti 1 Samuel 3:1–10, 19–20. Ibasar ti 1 Samuel 3:10 kadagiti ubbing.

- Asino ti immawag iti nagan ni Samuel bayat ti kaaddana iti iddana? (Ni Jesus. Kitaen iti 1 Samuel 3:4.)
- Asino iti impagarup ni Samuel ti umaw-awag kenkuana? (Kitaen iti 1 Samuel 3:5.)
- Ania ti imbaga ni Eli nga aramiden ni Samuel? (Kitaen iti 1 Samuel 3:9.)
- Ania ti kinuna ni Samuel ken ni Jesus? (Kitaen iti 1 Samuel 3:10.)

Ilawlawag nga ubing pay ni Samuel idi kinasao ni Jesus iti umuna a gundaway. Idi dimmakel a nataenganen, insurona kadagiti taona no ania ti kayat ti Nailangitan nga Ama ken ni Jesus nga aramidenda.

Aktibidad

Kiddawen iti tallo nga ubbing nga agpammarangda a Samuel, Eli, ken Jesus ket yakemda ti estoria. Bay-an nga agakem pay dagiti dadduma nga ubbing, no tari-gagayan.

Addantayo iti Maysa a Propeta iti Daga Ita

Iparang ti ladawan ti sibibiag a propeta. Ibagam kadagiti ubbing ti maysa a banag nga ammom maipapan iti propeta.

Patakderen dagiti ubbing ket paisao ti “Ni (nagan ti sibibiag a propeta) ti propeta ti Dios.”

- Apay a kasapulantayo ti sibibiag a propeta? (Tapno maammuantayo no ania ti kayat ti Nailangitan nga Ama ken ni Jesus nga aramidentayo.)

Ilawlawag nga isursuronatayo ti propeta babaen ti panagsaritana kadagiti komperensia. Dadakel a miting dagiti komperensia a dardar-ayan dagiti adu a tattao. Mabalintayo ti dumngeg iti propeta iti television, radio, wenna dagiti nairekord. Naisurat pay dagiti balikasna kadagiti magasin ti Simbaan a maibasa kadatayo dagiti nagannak kadatayo wenna dagiti dadduma.

Aktibidad

Pagpiliem ti tunggal ubing iti maysa a panid ti papel manipud iti malukong wenna basket nga insaganam. Basaen ti mensahe iti tunggal papel ket paglilinnawagan daytoy biit kadagiti ubbing. Ibaga kadagiti ubbing a dagitoy a mensahe ket amin a banag nga indawat ti sibibiag a propeta nga aramidentayo.

Aktibidad

Pagpanunoten dagiti ubbing kadagiti wagas a mabalinda a surotan ti propeta. Mangipasippaw wenna mangyawat iti *beanbag* wenna nalukneng a banag iti tunggal ubing ket isao ti, “Surotek ti propetatayo babaen ti _____.” Pailleppas iti tunggal ubing ti binatog babaen ti wagas a mabalinna a surotan ti propeta.

Maparaburantayo No Surotentayo ti Propeta

Agibasar manen kadagiti ladawan da Noe, Moises, Joseph Smith, ken ti sibibiag a propeta. Ilawlawag a gapu ta simmurot kenkuana ti pamilia ni Noe, naisalakanda manipud iti layus. Gapu ta simmurot dagiti Israelita ken ni Moises, naipanawda iti Egipto a nagturing iti nasaysayaat a daga. Gapu ta simmurot dagiti tao ken ni Joseph Smith, nagbalinda a kameng ti Ti Simbaan ni Jesucristo dagiti Santo iti Ud-udina nga Aldaw.

Ilawlawag a naparaburan dagitoy a tao gapu ta sinurotda ti propeta. Maparaburantayo met no surotentayo ti propeta.

Kanta	<p>Tulongan dagiti ubbing a mangkanta wenno mangisao kadagiti balikas iti koro ti “Follow the Prophet” (<i>Children’s Songbook</i>, p. 110). Ilawlawag a ti mayaw-awan kayatna a sawen ti agaramid kadagiti maikaniwas a banag. Paingato iti maysa nga ubing ti ladawan ti sibibiag a propeta bayat ti panagkantayo.</p> <p>Denggen propeta, denggen propeta, denggen propeta; di mayaw-awan. Denggen propeta, denggen propeta, denggen propeta; mangidalan.</p>
Pammaneknek	<p>Iburaymo ti pammaneknekmo maipapan iti sibibiag a propeta. Ibagam kadagiti ubbing nga ammom a no surotentayo ti propeta, maparaburantayo ken agragsak-tayto.</p>

Dagiti Aktibidad a Mangpadur-as iti Pannakaammo

Pumili iti sumagmamano kadagitoy nga aktibidad tapno usaren bayat ti adalen.

1. Mangala iti maysa a nairekord iti teyp wenno video maipapan iti sibibiag a propeta tapno ipangngeg wenno ipabuya kadagiti ubbing, wenno ipakita dagiti ladawanna manipud kadagiti magasin ti Simbaan.
2. Kantaen wenno sawen dagiti balikas iti “Agyamankam, O, Dios, iti Propeta” (*Dagiti Himno ken Kanta dagiti Ubbing*, 33438 864) para kadagiti ubbing.
3. Isalaysay manen ti estoria maipapan iti parmata ni Presidente Lorenzo Snow maipanggep iti Mangisalakam (kitaen iti adalen 26). Ilawlawag a nagpakita ni Jesus ken ni Presidente Snow tapno ibagana kenkuana no kasano nga idauluan ti Simbaan. Imbaga ni Jesus ken ni Presidente Snow no ania ti isuro kadagiti kameng ti Simbaan.
4. Mangpanunot iti sumagmamano a kasasaad a pakasurotan dagiti ubbing kadagiti pannursuro ti propeta. Iladawan ti tunggal kasasaad iti klase, ket paisalaysay wenno payakem kadagiti ubbing no ania koma ti aramidenda iti tunggal kasasaad tapno sumurot iti propeta. Kas pagarigan: “Makitam ti sumagmamano a kuarta iti kosina. Kayatmo a matagikua daytoy, ngem ammom a kuarta ni nanangmo daytoy. Ania ti aramidem tapno masurotmo ti pannursuro ti propeta nga agbalin a napudno?”

**Dagiti Mainayon
nga Aktibidad
para kadagiti
Babbabassit
nga Ubbing**

1. Mangiparang iti ladawan ti sibibiag a propeta kabayatan ti sibubukel nga oras ti klase. Mangilatang iti oras a mangibaga kadagiti ubbing maipapan iti kinataona. Ilawlawag nga ay-ayatenna ida ket kayatna a tulongan ida a makasubli iti Nailangitan nga Ama ken ni Jesus. Uliten daytoy iti mamindua wenno mamitlo a gundaway kabayatan ti klase.
2. Agay-ayam iti “Suroten ti Pangulo” a kadua dagiti ubbing. Pagtakderen iti maysa a linia dagiti ubbing. Ti umuna nga ubing iti linia ti agtaray, agkingking, aglagto, wenno agaramid iti sumagmamano a dadduma pay a garaw nga agturong iti sabali a bangir ti kuarto. Sumurot dagiti dadduma pay nga ubbing iti umuna nga ubing, nga aramidenda met ti inaramidna. Kalpasanna mapan ti umuna nga ubing iti ungo ti linia, ket ti sumaruno nga ubing ti agbalin a baro a pangulo. Itultuloy agingga a maaddaan iti gundaway nga agbalin a pangulo ti tunggal ubing.

Kalpasan ti ay-ayam, ilawlawag a ti propeta ti pangulo ti Simbaan. No surotentayo dagiti banag nga ibagana nga aramidentayo, iturongnatayo nga agsubli iti Nailangitan nga Ama ken ni Jesus.

Panggep

Tapno tulongan ti tunggal ubing a makaawat a makatulong ti tunggal miembro ti ward wenno branch iti simbaan.

Panagsagana

1. Sikakararag nga adalen ti 1 Nephi 17:7–15; 18:1–4.
2. Mangisagana iti simple a kard ti panagyaman a koloran ti tunggal ubing ken ited iti presidente ti Primary wenno iti maysa a tao a tumultulong kadagiti ubbing iti simbaan. Mabalín a kayatmo ti mangidrowing iti sabong iti sango ti nakulpi a panid ti papel ken suratan iti *Agyamanak* iti unegna.
2. Dagiti kasapulan:
 - a. Libro ni Mormon.
 - b. Banniit ken ti ikan manipud iti adalen 11. Iti tunggal ikan mangipan iti pangibagnos (clues) maipapan iti bishop wenno branch president, kas iti “Agtugtugaw iti sango ti pulpito iti simbaan,” “Tultulonganna dagiti tao iti wardtayo [wenno branch],” wenno “Mabalintayo nga ited ti apagkapullotayo kenkuana.”
 - c. Maysa a pagyanan dagiti krayola wenno lapis.
 - d. Ladawan 1-8, Panangiwaras iti Sacramento (62021 864); ladawan 1-67, Maysa a Naraem a Klase; ladawan 1-71, Panangbangon iti Bapor.
4. Aramidem dagiti nasken a panagsagana para kadagiti ania man nga aktibidad a mangpadur-as iti pannakaammo a kayatmo nga usaren.

Dagiti Aktibidad iti Pannakasursuro

Mangawis iti maysa nga ubing a mangted iti pangrugi a kararag.

Aktibidad a Pangawis
iti Panagdengngeg

Mangipan iti maysa a tugaw iti tengnga ti siled ti klase ket padasen nga ingato daytoy babaen ti maysa kadagiti saka daytoy. Ilawlawag nga adu dagiti banag ti ditayo kabaelan nga aramiden malaksid no agtitinnulongtayo a mangaramid. Mangawis iti tallo nga ubbing a saggaysada a mangiggem iti saka ti tugaw ket tulongandaka a mangingato iti tugaw iti sumagmamano a pulgada manipud iti suelo. Ilawlawag a no agtitinnulong nga agaramid ti tunggal maysa, adu ti maaramid-tayo a banag a ditay kabaelan nga aramiden no agmaymaysatayo.

Kayat ti Nailangitan nga Ama ken ni Jesus nga Agtitinnulongtayo

Estoria

Ipakita ti ladawan 1-71, Panangbangon iti Bapor, ket isalaysay iti ababa ti estoria maipapan ken ni Nephi ken ti pamiliiana a mangbangbangon iti bapor, a masarakan iti 1 Nephi 17:7–15 ken 18:1–4. Yunay-unay a kasapulan ni Nephi ti tulong ti Apo (Jesus) ken ti pamiliiana tapno mangbangon iti bapor.

- Apay a di kabaelan ni Nephi ti mangbangon iti bapor nga awan tulong?
- Kasano a tinulongan ti Apo ni Nephi? (Kitaen iti 1 Nephi 17:8–10; 18:1.)
- Kasano a timmulong ti pamilia ni Nephi? (Kitaen iti 1 Nephi 18:1.)

- Ania ti napasamak idi nagtitinnulong ti tunggal maysa? (Kitaen iti 1 Nephi 18:4.)

Palubosan dagiti ubbing a mangisarita iti maipapan kadagiti ania man a padpadasda iti pannakitinnulong iti dadduma a tattao.

Aktibidad

Ilawlawag nga agtitinnulongtayo met nga agtrabaho iti simbaan. Tunggal tao iti ward (wenno branch) tulonganna dagiti dadduma. Agpammarangka babaen ti balikas ken tignay, a maysa a tao a tumultulong kadagiti miembro ti klasem iti simbaan iti tunggal lawas, kas iti parakumpas, pianista, mannursuro, wenno presidente ti Primary. Papugtuam kadagiti ubbing no asino ti ipampammarangmo. Kalpasan a mapugtuam dagiti ubbing no asinoka, ilawlawag dagiti pagrebbengan ti takem dayta a tao. Ulitem iti mamin-adu a gundaway no kayatmo.

Ipakita ti ladawan 1-8, Panangiwaras iti Sakramento.

- Ania ti ar-aramiden daytoy a deacon?
- Adda kadi am-ammoyo nga agiwarwaras iti sakramento?

Ilawlawag a dagiti agtutubo a lallaki nga addaan iti Aaronic Priesthood ket mabalin nga agisagana, agbendision, ken agiwaras iti sakramento. Dagitoy dagiti wagas a makatulong dagiti agtutubo a lallaki iti simbaan.

Aktibidad

Ilawlawag nga adda maysa a tao iti ward wenno branchyo a tumultulong iti tunggal maysa iti simbaan. Inikkan ti Nailangitan nga Ama daytoy a tao iti napateg nga aramiden. Pagsisinnublaten dagiti ubbing iti panagbanniit kadagiti pangibagnos iti papel nga ikan. Basaen iti napigsa ti tunggal pangibagnos. Itultuloy agingga a maibasa amin dagiti pangibagnos, ket kalpasanna papugtuam kadagiti ubbing no asino ti tao.

- Ania ti nagan ti bishop (wenno branch presidenttayo)?
- Ania dagiti napapateg a banag nga ar-aramidenna a makatulong kadaytoy?

Ilawlawag a ti trabaho nga ar-aramiden dagiti dadduma a tao iti ward wenno branchyo, kas kadagiti home teacher ken visiting teacher. Mabalin a kayatmo nga isarita maipapan kadagiti takem nga adda kadagiti miembro ti pamilia dagiti ubbing.

Makatulongtayo iti Simbaan

Aktibidad

Mangiwara iti sangasupot a krayola wenno lapis iti suelo. Dawaten iti maysa kadagiti ubbing a pidutenna dagitoy, ket orasan isuna tapno makita no kasano ti kabayag ti panangpidutna kadagitoy. Iwara manen dagiti krayola wenno lapis. Pagtitinnulongan ti sibubukel a klase ti mangpidut kadagitoy, ket kitaen no mano nga oras ti nabubos iti daytoy. Ilawlawag a no agtitinnulong nga agaramid ti tunggal maysa, maaramidtayo a nasaysayaat ti trabaho.

- Ania ti mabalinyo nga aramiden tapno makatulong iti simbaan?

Tulongan dagiti ubbing nga agpanunot kadagiti wagas a makatulongda iti simbaan, a pakairamanan ti panangpatalinaed a nadalus ti balay a pagmimiting, panagbalin a nasingpet kadagiti dadduma, panangtulong kadagiti ubbing a malidlidayan wenno mabutbuteng, ken panagbalin a managraem kabayatan dagiti miting.

- Kasano a makatulongtayo a mangpatalinaed a nadalus ti siled a pagadalan ken balay a pagmimitingantayo?

- Kasano a matulongantayo dagiti sabali a tao iti simbaan?

Ipakita ti ladawan 1-67, Maysa a Naraem a Klase.

- Kasano a makatulong dagitoy nga ubbing iti simbaan?
- Kasano a matulongan dagiti kaklasetayo no managraemtayo?
- Kasano a matulongan ti mannursuro no managraem ti tunggal maysa?
- Kasano ti panagriknatayo no managraem ti tunggal maysa?

Aktibidad

Ilawlawag a sabali pay a wagas a pakatulongantayo iti simbaan ti panangisao iti “agyamanak” kadagiti tao nga agar-aramid kadagiti banag para kadatayo. Pakoloran kadagiti ubbing dagiti kard ti panagyaman nga insaganam, ket ited dagitoy bayat ti oras ti panagklase no mabalín.

Pammaneknek

Ipeksam ti panagyamanmo kadagiti amin a tao a tumultulong kenka iti ward wenno branchmo. Ibagam no kasano ti riknam maipapan iti panangaramidmo iti trabaho ti Nailangitan nga Ama babaen ti panagbalinmo a mannursuro iti Primary.

Dagiti Aktibidad a Mangpadur-as iti Pannakaammo

Pumili iti sumagmamano kadagitoy nga aktibidad tapno usaren bayat ti adalen.

1. No mabalín, pasiaren ti uneg ti kapilia ket ipakita kadagiti ubbing no sadino ti pagtugawan ti bishopric (wenno branch presidency) bayat ti miting ti sakramento. Bay-an nga agsisinnublat dagiti ubbing iti panagtugaw kadagiti tugaw. Kalpasanna ipakita kadagiti ubbing no sadino ti opisina ti bishop (wenno branch president).
2. Mangipasippaw wenno mangyawat iti maysa a nalukneng a banag kas iti bola wenno *beanbag* iti maysa nga ubing, ket dawaten kenkuana a mangibaga iti nagan ti maysa a tao iti ward (wenno branch) a tumultulong iti simbaan ket ilawlawag no kasano a tumultulong dayta a tao. Kalpasanna paipasippaw iti ubing ti banag nga agsubli kenka. Itultuloy agingga nga addaan iti uray maysa laeng a gundaway ti tunggal ubing.
3. Babaen ti pammalubos ti presidenteyo iti Primary, mangawis iti maysa a miembro ti bishopric wenno sabali a dadaulo ti ward tapno sumarungkar iti klase ket ibagana kadagiti ubbing no ania ti ar-aramidenna tapno makatulong iti simbaan.
4. Mangidrowing iti simple a rupa iti plato a papel wenno nagtimbukel a papel para iti tunggal ubing. Ikkan dagiti ubbing iti krayola wenno lapis, ket painayon iti tunggal ubing ti buok a kapada ti maris ti bukodna a buok. Ibagam kadagiti ubbing a no sawem ti maysa a pudno a banag maipapan iti no kasano a makatulongda iti simbaan, masapul nga ingatoda dagiti rupa a papelda. No palso ti maisao, nasken nga ipan dagitoy iti saklotda. Agusar kadagiti binatang kas iti—
 - Nasken nga agibellengak iti papel iti sirok ti tugawko.
 - Nasken nga agyamanak kadagiti tao a tumultulong kaniak iti simbaan.
 - Nasken nga agtarayak iti dalanko a mapan iti klase.
 - Nasken nga agbalinak a managraem iti simbaan.

**Dagiti Mainayon
nga Aktibidad
para kadagiti
Babbabassit
nga Ubbing**

1. Agay-ayam iti “Suroten ti Pangulo” a kadua dagiti ubbing. Pagtakderen iti maysa a linia dagiti ubbing. Ti umuna nga ubing iti linia ti agtaray, agkingking, aglagto, wenno agaramid iti sumagmamano a dadduma pay a garaw nga agturong iti sabali a bangir ti kuarto. Sumurot dagiti dadduma pay nga ubbing iti umuna nga ubing, nga aramidenda met ti inaramidna. Kalpasanna mapan ti umuna nga ubing iti ungti ti linia, ket ti sumaruno nga ubing ti agbalin a baro a pangulo. Itultuloy agingga a maaddaan iti gundaway nga agbalin a pangulo ti tunggal ubing.

Kalpasan ti ay-ayam ipalagip kadagiti ubbing a ti bishop ti pangulo ti ward. Kayatna nga aramidentayo dagiti banag a mangiturong kadatayo nga agsubli iti Nailangitan nga Ama.

Ti Panagungar ni Jesucristo (Paskua ti Panagungar)

Panggep

Tapno tulongan ti tunggal ubing a makaawat a nagungar ni Jesucristo.

Panagsagana

1. Sikakararag nga adalen ti Lucas 23:32–24:12, 36–40, 51. Kitaen met iti *Pagbatayan ti Ebanghelio* (31110 864), maika-12 a paset.
 2. Dagiti kasapulan:
 - a. Biblia.
 - b. Ladawan 1-3, Ni Jesus a Cristo (Pakete ti Ladawan ti Arte ti Ebanghelio 240; 62572 864); ladawan 1-16, Ti Pannakayanak (Pakete ti Ladawan ti Arte ti Ebanghelio 201; 62495 864); ladawan 1-55, Sermon iti Bantay (Pakete ti Ladawan ti Arte ti Ebanghelio 212; 62166 864); ladawan 1-59, Ti Pannakailansa iti Krus (Pakete ti Ladawan ti Arte ti Ebanghelio 230; 62505 864); ladawan 1-72, Ni Jesus nga Agkarkarag iti Getsemani (Pakete ti Ladawan ti Arte ti Ebanghelio 227; 62175 864); ladawan 1-73, Pannakaitanem ni Jesus (Pakete ti Ladawan ti Arte ti Ebanghelio 231; 62180 864); ladawan 1-74, Ipakpakita ni Jesus dagiti Sugatna (Pakete ti Ladawan ti Arte ti Ebanghelio 234; 62503 864).
 3. Aramidem dagiti nasken a panagsagana para kadagiti ania man nga aktibidad a mangpadur-as iti pannakaammo a kayatmo nga usaren.
-

Dagiti Aktibidad iti Pannakasursuro

Mangawis iti maysa nga ubing a mangted iti pangrugi a kararag.

Aktibidad a Pangawis iti Panagdengngeg

Iggamam ti ladawan 1-3, Ni Jesus a Cristo, a nakapakleb iti saklotmo. Ibagam kadagiti ubbing a pagsasaritanyo maipapan iti maysa a tao a napateg unay. Idawatmo kadagiti ubbing a pugtuanda no asino daytoy a tao, kalpasan ti panangtedmo kadakuada kadagiti sumaganad a pangibagnos:

1. Ay-ayaten unay unay daytoy a tao ti tunggal maysa.
2. Nagnaed iti daga nabayagen a panawen ti napalabas ken nangbukel iti Simbaanna.
3. Insuronatayo no kasano ti agbiag ken agbalin a naragsak.
4. Binendisionanna dagiti tao ket imbagana kadakuada nga agbalinda a manangngaasi ken managayat.

No napugtuanen dagiti ubbing (wenna naibagamon kadakuada) a ni Jesus dayta a tao, iparangmo ti ladawan.

Ay-ayatennatayo ni Jesus

Ipalagip kadagiti ubbing nga anak ti Nailangitan nga Ama ni Jesus. Imbaon ti Nailangitan nga Ama ni Jesus iti daga para iti maysa a napateg a panggep.

- Estoria Ipakita ti ladawan 1-16, Ti Pannakayanak. Isalaysay iti ababa maipapan iti pannakayanak ni Jesus. Mabalín a kayatmo a tulongandaka dagiti ubbing a mangisalay-say iti estoria. Ipalagip kadakuada a naisangsangayan a maladaga ni Jesus.
- Ipakita ti ladawan 1-55, Sermon iti Bantay. Ilawlawag nga idi dimmakkelen ni Jesus, binukelna ti simbaanna ket sinuruanna dagiti tao no kasano ti agbiag ken agpipinnateg iti tunggal maysa.
- Kanta Pagtakderen dagiti ubbing ket pakanta wenno paisao dagiti balikas iti “Jesus Said Love Everyone” (*Children’s Songbook*, p. 61), nga usaren dagiti sumaganad a garaw:
- Ayaten tunggal maysa (*unnaten a nasayaat dagiti takiag*);
 Kuna ni Jesus (*agtung-ed-tung-ed*).
 No pusom napno’t ayat (*iparabaw dagiti ima iti batog ti puso*);
 Ayatendaka (*arakupen ti bagi*).
- Ipakita ti ladawan 1-72, Ni Jesus nga Agkarkararag iti Getsemani.
- Ania ti ar-aramiden ni Jesus iti daytoy a ladawan?
- Ilawlawag a sakbay a natay ni Jesus, napan nagkararag iti maysa a lugar a maawagan iti Minuyongan ti Getsemani. Nagsagaba idia ni Jesus para kadagiti basbasoltayo tapno makapagbabawi ken mapakawantayo kadagiti maikaniwas a banag nga ar-aramidentayo. Ni Jesus laeng ti tao nga addaan iti bileg a mangaramid iti daytoy para kadatayo. Inaramidna daytoy gapu ta ay-ayatennatayo unay unay.
- Nagungar ni Jesus**
- Ilawlawag nga adu a tattao a nagbiag iti panawen ni Jesus sakbay ditoy daga ti nangipateg kenkuana. Nupay kasta, sumagmamano a tattao ti saan a nangayat kenkuana. Saanda a namati nga isu ti anak ti Nailangitan nga Ama.
- Estoria Ipakita ti ladawan 1-59, Ti Pannakailansa iti Krus. Ilawlawag iti simple a balikas ti Pannakailansa iti Krus kas nailadawan iti Lucas 23:33–46. Ilawlawag a naranggas unay ken ni Jesus dagiti tao a di nangayat kenkuana. Inlasa dagiti soldado dagiti ima ken saka ni Jesus ket imbitinda isuna iti krus. Pinanawanda ni Jesus iti krus agingga a natay. (Agannad iti panangisalay-say iti daytoy nga estoria ken panangaramid iti berso ti aktibidad iti baba. Mabalín a managrikna unay dagiti dadduma nga ubbing iti kapanunotan a dangdangran dagiti tao ni Jesus.)
- Ilawlawag nga idi natay ni Jesus, pinanawan ti espirituna ti bagina, ket napan idia langit. Ipalagip kadagiti ubbing nga adda espiritu ti tunggal maysa kadatayo. Saan a makita dagiti espiritutayo, ngem dagitoy ti gapu ti panagbiagtayo.
- Ipakita ti ladawan 1-73, Pannakaitanem ni Jesus. Ilawlawag nga innala dagiti tao a nangipateg ken ni Jesus ti bagina ket binungonda a nasayaat daytoy iti lupot. Binagkatda ti bagi ni Jesus nga impan iti maysa a pagitaneman (lugar a kasla rukib a nakaitaneman dagiti tao) ket siiinnayad nga impaiddada ti bagina sadiay (kitaen iti Lucas 23:50–56).
- Ipakita ti ladawan 1-74, Ipakpakita ni Jesus dagiti Sugatna. Ilawlawag a tallo nga aldaw kalpasan ti ipapatayna, nagungar ni Jesus. Sibibiag manen. Idi natay ni Jesus, pimmanaw ti espirituna iti bagina. Idi nagungar, nagsubli ti espirituna iti bagina. Ni Jesus ti immuna a tao a nagungar.
- Ilawlawag nga adu a tattao ti nakakita ken ni Jesus kalpasan ti panagungarna (kitaen iti Lucas 24). Insuro ni Jesus dagiti gagayyemna ket impakitana kadakuada

ti nagungar a bagina (kitaen iti Lucas 24:36). Nagpasagid kadagiti gagayyemna tapno maammuanda nga adda lasag ken tulang ti nagungar a bagina (kitaen iti Lucas 24:39–40). Kalpasan ti panangisurona kadagiti tao, napan ni Jesus nakipag-naed manen iti Nailangitan nga Ama (kitaen iti Lucas 24:51).

- Apay a kinayat ni Jesus a sagiden isuna dagiti tao? (Kitaen iti Lucas 24:36–40.)
- Sadino ti napanan ni Jesus kalpasan a pinanawanna dagiti tao? (Kitaen iti Lucas 24:51.)

Ilawlawag a ti aldaw a panagungar ni Jesus ti umuna a Paskua ti Panagungar. Ramrambantayo ti Paskua ti Panagungar iti tunggal tawen tapno makatulong kadatayo a manglagip a nagungar ni Jesus.

Aktibidad

Pagtakderen dagiti ubbing ket paaramidmo dagiti garaw iti sumaganad a berso a kagiddandaka:

Nagbiag manen ni Jesus

Tallo nga aldaw kalpasan ti ipapatayna (*ingato ti tallo a ramay*).

Adda lamma ti lansang ita ken sakana (*itudo ti dakulap ken saka*)

Ken dunor ti espada iti bakrangna (*itudo ti bakrang*).

Immay ni Jesus ket sinuruannatayo amin (*ukraden dagiti takiag*)

Tapno agbiag a mayannurot iti pudno nga ebanghelio (*agdalikepkep*).

Gapu ta nagungar ni Jesus,

Agungartayonto met (*agtung-ed-tung-ed*).

Agungartayonto

Tulongan dagiti ubbing a makaawat a nagbiag manen ni Jesus kalpasan ti ipapatayna. Sibibiag ita ni Jesus idia langit, ket saanton a pulos matay pay. Ilawlawag nga inaramid ni Jesus a mabalin nga agungartayonto a kas kenkuana. Kayatna a sawen nga agbiagto manen ti tunggal maysa kadatayo kalpasan ti ipapataytayo.

- Adda kadi am-ammoyo a natayen?

Ilawlawag a no matay dagiti tao, sibibiag pay laeng dagiti espirituda. Maysa nga aldaw agungardanto, a kayatna a sawen agtiponto manen dagiti bagi ken espirituda a kas iti napasamak ken Jesus. Mabalin a kayatmo nga ilawlawag kadagiti ubbing a mabalin a ditayo agungar kalpasan ti tallo nga aldaw, kas ken ni Jesus, ngem agungartayonto amin iti maysa nga aldaw.

Paulit kadagiti ubbing ti balikas a *nagungar* iti sumagmamano a daras ket ibaga no ania ti kayatna a sawen.

Isuro no kasano ti kakasdaaw a maammuan nga amin dagiti tao nga am-ammo ken ay-ayatentayo—dagiti nagannak, kakabsat, lelong ken lelang, ken gagayyem-tayo—ket agungarto. Agbiagtayonto manen amin kalpasan ti ipapataytayo. Inaramid ni Jesus a posible daytoy.

Pammaneknek

Iburaymo ti pammaneknekmo nga ay-ayaten ni Jesus ti tunggal maysa kadatayo. Gapu iti dakkal nga ayatna kadatayo, nagsagaba ken natay ken nagungar tapno makapagungar met ti tunggal maysa kadatayo iti maysa nga aldaw.

Dagiti Aktibidad a Mangpadur-as iti Pannakaammo

Pumili iti sumagmamano kadagitoy nga aktibidad tapno usaren bayat ti adalen.

1. Paglilinnawagan biit ti sumagmamano a padas ken kaugalian iti Paskua ti Panagungar a familiar kadagiti ubbing. Bigbigen a dagiti kaugalian iti Paskua ti Panagungar nga awan pakainaiganna iti relihion ket naragsak, ngem tulongan dagiti ubbing a mangyadayo kadagita a kapanunotan manipud iti pudno a kaipapanan ti Paskua ti Panagungar.
2. Ipakita kadagiti ubbing ti maysa a guantes. Idasig dagiti naindagaan a bagitayo iti maysa nga ima nga adda guantesna. Ipakita no kasano a paggarawen ti ima (ti espiritu) ti guantes (ti bagi). Ikkaten ti guantes ket ilawlawag a kas iti ipapatay iti bagi daytoy. Nagsina ti espiritu ken ti bagi, ket saan a makagaraw ti bagi. Isubli ti guantes iti imam ket ilawlawag a kas iti panagungar daytoy. Ita nagtipon ti espiritu ken bagi. Ipalagip kadagiti ubbing a gapu ta nagungar ni Jesucristo, agungarto ti amin a tao iti maysa nga aldaw.
3. Agaramid kadagiti kopia ti maibunong a papel a napauluan iti “Ni Jesus ti Managayat a Gayyemtayo,” a masarakan iti ungti ti adalen 6, ket bay-an a koloran dagiti ubbing dagitoy.
4. Mangipasippaw wenno mangyawat iti *beanbag* wenno sabali a nalukneng a banag iti maysa nga ubing ket pasungbatan kenkuana ti maysa kadagiti saludsod iti baba (wenno maipada a saludsod) sakbay ti panangipasippaw wenno panangyawatna nga isubli kenka ti *beanbag*. Itultuloy agingga a naaddaan iti gundaway ti tunggal ubing a mangsungbat iti saludsod.
 - Apay a ramrambakantayo ti Paskua ti Panagungar?
 - Asino ti immuna a tao a nagungar?
 - Ania ti kayat a sawen ti agungar?
 - Sadino ti nakaipanan ti bagi ni Jesus kalpasan ti ipapatayna?
 - Kalpasan ti panagungar ni Jesus, adu kadi a tattao ti nakakita ken Jesus?
 - Apay a pinasagid ni Jesus kadagiti tao ti nagungar a bagina?
 - Asinonto pay ti agungar gapu ta nagungar ni Jesus?
5. Tulongan dagiti ubbing a mangkanta wenno mangisao kadagiti balikas iti “Did Jesus Really Live Again?” (*Children’s Songbook*, p. 64) wenno “Jesus Has Risen” (*Children’s Songbook*, p. 70).

Dagiti Mainayon nga Aktibidad para kadagiti Babbabassit nga Ubbing

1. Tulongan dagiti ubbing a mangaramid kadagiti garaw iti sumaganad a berso ti aktibidad bayat ti panangisaom kadagiti balikas:

Nagungaren ni Jesus!

Daytoy ti lugar a nakaitaneman ni Jesus (*itudo*);

Kitaenyo, naituliden ti bato a nayadayo!

Agkummogkayo; ket iti uneg kitaenyo (*agkummog ket ipan ti ima iti mata*).

Awan ditoy (*tumakder*)!

Nagungaren ni Jesus! Agragsakkayo (*agsipat*)!

(Dana Eynon, iti *Bible Story Finger Plays and Action Rhymes* [Cincinnati: Standard Publishing Co., 1964], p. 29.)

2. Ilawlawag a natay ni Jesus ken nagungar iti panawen ti panagsusulbod. Ti panawen ti panagsusulbod ti panawen ti baro a biag. Mangrugi a dumakkel manen dagiti kayakoy ken sabsabong. Mayanak dagiti adu nga ayup iti panagsusulbod. Bay-an nga agdrowing ti tunggal ubing iti ladawan dagiti sabsabong wenno maladaga nga ayup. Ipakita ti ladawan 1-3, Ni Jesus a Cristo, ket ilawlawag a gapu ta nagungar ni Jesus, agbiagtayonto manen kalpasan ti ipapataytayo.
3. Kantaen wenno sawen dagiti balikas iti "Jesus Is Our Loving Friend" (*Children's Songbook*, p. 58). Ipalagip kadagiti ubbing a ramrambantayo ti Paskua ti Panagungar tapno lagipentayo ni Jesus ken ti panagungarna.

Ti Pannakayanak ni Jesucristo (Paskua)

Adalen
46

Panggep

Tapno tulongan ti tunggal ubing a makarikna iti panagyaman iti pannakayanak ni Jesucristo.

Panagsagana

1. Sikakararag nga adalen ti Mateo 2:1–2 ken Lucas 1:26–35; 2:1–20.
2. Ammuem ti sumagmamano a simple a detalye maipapan iti pannakayanak dagiti ubbing ti klasem, kas iti no sadino ti nakayanakanda, no ania ti maris ti buokda, ken no sadino ti nagnaedanda iti umuna a lawas ti panagbiagda. Agbalin a managrikna kadagiti asino man nga inampon nga ubbing.
3. Gumetteng kadagiti panid ti papel (agarup 20 sentimetro ti kaatiddogna ken 4 a sentimetro ti kaakabana) tapno aramiden a kadena ti Paskua [Christmas Chain]. Gumetteng iti umdas a panid ti papel para iti tunggal ubing tapno agaramid iti kadena iti sumagmamano a silpo ti kaatiddogna.
4. Agsurat iti maysa a pakaammo a mangilawlawag iti kadena ti Paskua (kitaen iti adalen) kadagiti nagannak ti tunggal ubing, tapno maallukoyda ti annakna nga agaramid kadagiti nasayaat nga aramid.
5. Dagiti kasapulan:
 - a. Biblia.
 - b. Maysa a bassit a Belen. Mabalina a kayatmo nga usaren ti maysa a munieka a maladaga a nabungon iti ules, a naipaidda iti maysa a bassit a kahon. Gumetteng iti maysa a bituen manipud iti papel ket ikabil iti ngatuen ti belen. No awan ti belen, aramaten ti ladawan 1-75, Ti Pannakayanak ni Jesus (Pakete ti Ladawan ti Arte ti Ebanghelio 200; 62116 864).
 - c. Krayola ken pagpigket.
 - d. Ladawan 1-75, Ti Pannakayanak ni Jesus (Pakete ti Ladawan ti Arte ti Ebanghelio 200; 62116); ladawan 1-76, Awan Siled iti Pagdagusan (62115 864); ladawan 1-77, Ti Pannakaiwaragawag ti Pannakayanak ni Cristo kadagiti Pastor 202; 62117 864); ladawan 1-78, Dagiti Masirib a Lallaki (Pakete ti Ladawan ti Arte ti Ebanghelio 203; 62120 864).
6. Aramidem dagiti nasken a panagsagana para kadagiti ania man nga aktibidad a mangpadur-as iti pannakaammo a kayatmo nga usaren.

Dagiti Aktibidad iti Pannakasursuro

Mangawis iti maysa nga ubing a mangted iti pangrugy a kararag.

Aktibidad a Pangawis iti Panagdengngeg

Patakderem ti maysa nga ubing iti abaymo bayat ti panangibagam kadagiti detalye nga ammom maipapan iti pannakayanakna. Ulitin para iti tunggal ubing iti klase.

Ramrambantayo ti Pannakayanak ni Jesucristo iti Panawen ti Paskua

Ilawlawag a gapu ta daytoy ti panawen ti Paskua, ramrambantayo ti pannakayanak ti maysa a tao nga ay-ayatentayo amin.

- Asino ti ramrambantayo ti pannakayanakna?

Estoria	<p>Isalaysay ti estoria ti isasarungkar ti anghel ken ni Maria a masarakan iti Lucas 1:26–35. Ilawlawag nga imbaga ti anghel ken ni Maria nga isunto ti agbalin nga ina ti Anak ti Dios a ni Jesus.</p> <ul style="list-style-type: none"> • Ania ti nagan ti ina ni Jesus? (Kitaen iti Lucas 1:27.) • Asino ti ama ni Jesus? (Nailangitan nga Ama. Kitaen iti Lucas 1:35.) <p>Ilawlawag a saan nga ama ni Jesus ni Jose. Isu ket nasayaat a lalaki a napili tapno mangaywan ken ni Jesus. Nagparang ti anghel ken Jose iti tagtagainep ken imbaga kenkuana maipapan iti napateg a maladaga nga agbalinto nga anak ni Maria. Imbaga ti anghel ken Jose a ni Maria ti agbalinto nga asawana.</p>
Estoria	<p>Ipakita ti ladawan 1-76, Awan Siled iti Pagdagusan, ket isalaysay ti maipapan iti panagbaniaga da Jose ken Maria manipud iti Nazaret nga agturong iti Betlehem, a masarakan iti Lucas 2:1–7. Basaen iti napigsa ti Lucas 2:7, nga ilawlawag dagiti ania man a balikas a mabalina a di familiar kadagiti ubbing</p>
Aktibidad	<p>Pagtugawen wenno pagparintumengen dagiti ubbing iti suelo iti sango ti Belen. Mabalina a kayatmo ti mangted iti ules a pagtugawanda. Ipasam ti ladawan 1-75, Ti Pannakayanak ni Jesus, ket paibagam iti tunggal ubing maipapan iti maysa a banag a makitana iti ladawan.</p> <ul style="list-style-type: none"> • Apay a saan a naturog da Maria ken Jose iti pagdagusan? (Kitaen iti Lucas 2:7.) • Sadino ti nakayanakan ni Jesus? (Iti maysa a kulluong.) • Ania a kita ti pagiddaan ti insagana ni Maria para iti maladaga a ni Jesus? (Kitaen iti Lucas 2:7.)
Kanta	<p>Tulongan dagiti ubbing a mangkanta wenno mangisao kadagiti balikas iti “Away in a Manger” (<i>Children’s Songbook</i>, p. 42). Mangparnuay kadagiti garaw ti ima ken takiag a maibagay kadagiti balikas.</p> <p>Iti kulluong, awan ti konana, Ni bassit nga Apo Jesus nagidda; Bitbituen langit nangsilaw kenkuana, Ni Apo Jesus garami’t iddana.</p>
Estoria	<p>Ipakita ti ladawan 1-77, Ti Pannakaiwaragawag ti Pannakayanak ni Cristo kadagiti Pastor, ket isalaysay ti maipapan iti isasarungkar dagiti pastor, kas nailadawan iti Lucas 2:8–20.</p> <ul style="list-style-type: none"> • Apay a nagbuteng dagiti pastor? (Kitaen iti Lucas 2:9.) • Ania ti imbaga ti anghel kadagiti pastor? (Kitaen iti Lucas 2:10–12.) • Ania ti inaramid dagiti pastor kalpasan a sinarungkaranda ti ubing a ni Jesus? (Kitaen iti Lucas 2:17, 20.)
Estoria	<p>Ipakita ti ladawan 1-78, Dagiti Masirib a Lalaki, ket isalaysay maipapan iti isasarungkar dagiti masirib a lalaki, kas nailadawan iti Mateo 2:1–12.</p>
Aktibidad	<p>Pagtakderen dagiti ubbing ket pagpammarangen a nakasakayda kadagiti kamelio a manglawlaw iti siled, a mangsursurot iti bituen a mangiturong kadakuada iti maladaga a ni Jesus.</p> <p>Kalpasan ti sumagmamano a rikus iti aglawlaw ti siled, pababaen dagiti ubbing kadagiti kamelioda ket agsublida iti belen. Ilawlawag nga iti kanito a nasarakan</p>

dagiti masirib a lallaki ni maladaga a Jesus, nakasapulen ni Jose iti maysa a nasaysayaat a lugar a pagindegan ti pamilia ken saanen nga agyan pay iti kullu-ong. Palagipan dagiti ubbing a nangitugot dagiti masirib a lallaki kadagiti regalo a balitok, insenso, ken mira. Paibaga iti tunggal ubing no ti ipampammarangna a regalona ket balitok, insenso, wenno mira ket kalpasanna isagutna daytoy ken ni maladaga a Jesus.

Ti Saguttayo ken ni Jesus ket ti Panagbalin a kas Kenkuana

llawlawag a tunggal Paskua bayat ti panangrambaktayo iti kasangay ni Jesus, mabalintayo ti mangted kadagiti sagut kenkuana. Ditayo kabaelan ti mangted kadagiti sagut a balitok, insenso, ken mira kas iti inaramid dagiti masirib a lallaki, ngem mabalintayo ti mangted iti sabali a kita ti sagut. Mangtedtayo iti sagut ken ni Jesus no padasentayo ti agbalin a kas kenkuana. Agbalintayo a kas ken ni Jesus no nasingpettayo iti pamilia ken gagayemtayo.

Aktibidad

Tulongan ti tunggal ubing nga agaramid iti maysa a kadena ti Paskua nga addaan iti sumagmamano a silpo. Pakoloran kadagiti ubbing dagiti silpoda ket kalpasanna ipigket a pagsisilpuen dagitoy (kitaen iti pannakailadawan iti ungtong ti adalen). Ibaga kadagiti ubbing nga ikabilda dagiti kadenada iti maysa a lugar iti pagtaenganda a mangipalagipto kadakuada nga agaramid kadagiti nasayaat para kadagiti dadduma kas sagut ken ni Jesus. Kariten dagiti ubbing a mangaramid iti uray maysa laeng a nasayaat nga aramid iti tunggal aldaw agingga a madanonan ti Paskua.

Tulongan dagiti ubbing nga agpanunot kadagiti nasayaat nga aramid a kabae-landa nga aramiden. Ipalagip kadakuada a no agaramidda kadagiti nasayaat, mangmangtedda iti napintas a sagut ken ni Jesus. Ikkan ti tunggal ubing iti surat a mangilawlawag iti kadena kadagiti nagannak kadakuada.

Pammaneknek

llawlawag a ti pannakayanak ni Jesucristo ti maysa kadagiti kapatgan a banag a napasamak iti daga. Ipeksam ti ayatmo ken ni Jesus ken ti tarigagaymo nga agbalin a kas kenkuana, saan laeng nga iti panawen ti Paskua no di ket iti unos ti makatawen.

Dagiti Aktibidad a Mangpadur-as iti Pannakaammo

Pumili iti sumagmamano kadagitoy nga aktibidad tapno usaren bayat ti adalen.

1. Isalaysay manen ti estoria ti pannakayanak ni Jesus idinto ta idrama dagiti ubbing dagiti parte da Jose, Maria, ken ti agay-aywan iti pagdagusan, dagiti pastor, ken dagiti masirib a lallaki. Agusar kadagiti *props* kas iti munieka a maladaga, bassit nga ules, balabal, no adda dagitoy. Ikkan ti tunggal ubing iti gundaway a makiraman. Mabalina a kayatmo nga uliten ti aktibidad, a palubosan dagiti ubbing a mangyakem iti nadumaduma a parte.
2. Tulongan dagiti ubbing a gumetteng wenno agdrowing kadagiti simple a pagarkos a bituen. Bay-an a koloran dagiti ubbing dagiti pagarkosda, ket mangipan iti singdan iti tunggal bituen tapno maibitin ti ubing iti maysa a lugar iti pagtaenganna.
3. llawlawag ti sumagmamano kadagiti panagsagana nga inaramid dagiti pagtagilakuan ken negosio para iti Paskua a nadlaw dagiti ubbing. Tulongan ida a makaawat a makaparagsak dagiti regalo ken pasken, ngem ti Paskua


ket pudno a maipanggep iti pannakayanak ni Jesucristo ken ti kinapateg ti panangipamaysa kenkuana ken iti biagna.

4. Ilawlawag dagiti kaugalian ti Paskua a maipamaysa ken ni Cristo iti lugaryo a kaay-ayom wenno ammom. Awisen dagiti ubbing a mangisarita maipapan kadagiti ania man a kaugalian a maipamaysa ken Cristo a kaay-ayo dagiti pamilyada iti panawen ti Paskua.

Dagiti Mainayon nga Aktibidad para kadagiti Babbabassit nga Ubbing

1. Pagpamarangen dagiti ubbing nga isuda dagiti pastor nga agin-inana iti katalalunan. Tulongan ida a mangyakem iti buteng a narikna dagiti pastor idi makitada ti anghel, kalpasanna ti ragsak a nariknada idi maawatanda ti damag. Tulongan ida a mangarapaap a dengdengenda dagiti anghel nga agkankanta ken kumitkitada iti napintas a tangatang iti rabii ken kumitkitada ti bituen. Aggigiddan a magna a manglawlaw iti siled a mangsarak iti maladaga. Agparintumeng iti sango ti maladaga a ni Jesus iti kulluong, ket agkanta iti kanta a pagdaydayaw.
2. Tulongam dagiti ubbing a mangaramid kadagiti garaw iti sumaganad a berso bayat ti panangisaom kadagiti balikas:

Ti maladaga iti kulluong (*igaraw ti takiag a kasla in-indayonen ti maladaga*).
Kadenna ti managayat nga ina (*igaw-at dagiti takiag*),
Nagraniag ti bituen kadagiti langit (*itudo ti tangatang a masmasdaaw*),
Adtoyen ti Anak ti Dios (*agsipsipat gapu iti rag-o*)!
2. Kantaen wenno sawen dagiti balikas iti “Jesus Said Love Everyone” (*Children’s Songbook*, p. 61). Ipalagip kadagiti ubbing a ramrambakantayo ti pannakayanak ni Jesus.
4. Agaramid kadagiti simple a nagetteng a papel ti maladaga a ni Jesus a nabungon iti lampin. Mangummong iti nagango a ruot, garami, wenno *straw* ket itugot tapno ipigket dagiti ubbing iti maysa a “kulluong” (kuadrado a papel). Paipigket kadagiti ubbing ti nagetteng a maladaga a ni Jesus iti idda a ruot wenno *straw*.



Indeks kadagiti Aktibidad a Berso ken Kanta nga Adda Aksionna iti Primary 1

A Baby in a Manger	153	I'm Glad I Came to Church Today	46, 133, 138
A Happy Family	76, 80	I'm Trying to Be Like Jesus	120
A Prayer Song	10	If You're Happy	69, 129
A Smile Is Very Catchy	114	If You're Very, Very Tall	3, 17
A Song of Thanks	12	Jesus Came Alive Again	149
Adam and Eve	43	Jesus Is Risen!	150
All Things Bright and Beautiful	40	Jesus Loves All Children	16
Away in a Manger	13, 152	Jesus Loves Little Children	121
Because Today Is Sunday	47	Jesus Said Love Everyone	111, 120, 136, 148
Beehive	41	Joseph Knelt among Trees	6
Birds in the Tree	41, 76	Little Baby Moses	3, 80
Book of Mormon Stories	141	Little Seeds Lie Fast Asleep	29
Busy Little Finger	94, 103	Make Happy Days	69, 110
Children, Put Your Pants On	106	My Family (1)	76
Clap Your Hands	55	My Family (2)	77
Counting Fingers	54	My Feelings	67
Dear Little Friend	109	My Hands	53
Do As I'm Doing	119	My Heavenly Father Loves Me	15
Eency Weency Spider	41	My Legs Like to Run	93
Five Little Fishes	33	My Little Kitten	116
Fun to Do	24, 25, 54, 72, 80, 103, 108	Noah	36, 116
God's Creation	9, 24, 44	Once I Was a Baby	14, 51, 73
Grandmother	81	One Little Butterfly	40
A Happy Song	129	Open, Shut Them.	xv, 127
Head, Shoulders, Knees, and Toes	48	Our Arms We Fold	12
Heavenly Father Knows Me	2, 17	Popcorn Popping	28
Helping Makes Me Happy	68	Saturday	47
Here Is The Church	140	Seeds Are Buried Deep	104
Here We Are Together	76	Smiles	66
Hinges	50	Sometimes I'm Tall, and Sometimes I'm Small	xvi
Home	102	Ten Men Were Sick	137
How Long Is Forever?	86	The Creation	47, 134
I Am a Helper	86	The Goldfish	32
I Am Thankful for My Eyes	8, 12, 61	The Little Turtle	33
I Dig	30	The Meetinghouse	126
I Have a Nose	63	The Pioneer Children	102
I Have a Wonderful Body	5, 49, 59	The Raindrops	26
I Have Two Little Hands	53	The Still Small Voice	21
I Like My Hands	54, 94	The World Is So Big	24, 37, 40, 44, 117
I Love to See the Temple	84	This Is My Mother	90
I Pray in Faith	11	This Is What the Baby Does	80
I Reach Up High	54	This Little Fellow	23
I Shake My Hands.	xvi, 128	Touch Your Eyes	59, 62, 65
I'll Fold My Arms	133		

Two Happy Feet	126	When I Do Something Wrong	96
Two Little Friends	100	When We're Helping	83, 103
Two Little Tweety Birds	40	Young Jesus Went to the Temple	14
We All Lived Together with Heavenly Father	9, 87		
We Fold Our Arms	12		

Dagiti Kanta para iti nursery manipud iti *Children’s Songbook*

Dagiti sumaganad a kanta manipud iti *Children’s Songbook* ket mayannatup nga aramaten iti nursery. Nairaman ti sumagmamano a singasing para kadagiti wagas a maibagaymo dagiti balikas. Mabaln nga addaanka kadagiti dadduma a kapanunotan a mangibagay kadagitoy ken iti dadduma pay a kanta iti *Children’s Songbook* tapno maikanatad dagitoy para iti nursery.

Panid

A Happy Family (© 1975 Pioneer Music Press, Inc.)	198
Mangpartuat iti berso maipapan iti naragsak a nursery wenno Primaryyo. Usaren kas maysa a kablaaw: “I see Susie, she sees me . . .”	
Do As I’m Doing	276
Usaren a panangted kadagiti direksion: “Clean up the nursery; follow, follow me . . .” wenno “Gather for singing. . . .”	
‘For Health and Strength	21
Usaren ti nagan ti ania man a banag a kayat a pagyamanan dagiti ubbing: “Dagiti kayo ken sabong ken tudo nga agtinnag dayawenmi ti naganmo, O Apo.”	
Fun to Do	253
Head, Shoulders, Knees, and Toes	275
Agkanta maipapan kadagiti pangrugian a garaw: “Umayka ket aggiddanta a magna (agtaray, agkingking, aglagto) . . . nga aglawlaw iti kuarto.” Usaren iti panangted pangiturong: “Orasen tapno ipakni dagiti ay-ayam . . . ket idulin dagitoy iti kahon (iti salansan, iti pagidulinan).”	
Hello Song	260
Here We Are Together	261
I Wiggle	271
If You’re Happy	266
My Hands	273
Once There Was a Snowman (© 1981 Pioneer Music Press, Inc.)	249
Mangpartuat kadagiti berso maipapan iti dadduma pay a banag iti nakaparsuaan: “Naminsan adda maysa a berde a kayo . . . natayag. Iti linongna naginanaak . . . nagbassit. “Wenno” “Naminsan adda maysa a bantay . . . nangato. Iti tuktod inulik . . . ; nagulep.”	
Rain Is Fallin Around	241
Sing a Song	253
Smiles	267
Thanks to Our Father	20
We Bow our Heads	25

Kas pangnayon kadagiti kanta iti *Children’s Songbook*, mabalnmo nga usaren dagiti kanta dagiti ubbing manipud iti bukodyo a kultura. Penken a masurot dagiti kanta ti sumaganad nga annuroten (criteria):

Ababa ken simple dagitoy.

Usaren dagitoy ti bassit laeng a teklado (5 agingga iti 8 a tono).

Maulit-ulit dagiti balikas (mausar dagiti agpapada a balikas iti sumagmamano a gundaway) ken nalaka a masursuro.

Mangiladawan dagiti balikas kadagiti banag a makita, mangngeg, masagid, maangot, wenno marikna dagiti ubbing.

Saan a maisuppiat dagiti balikas kadagiti pannursuro ti ebanghelio.

